

LE JARDIN MEDICINAL EN- RICHI DE PLV-

fieurs & diuers remedes
& secrets.

COMPOSE PAR ANTHOI-
ne Mizald, de Moluſſon en Bourbon-
nois, Docteur en medecine.

Mis nouuellement en François.



PAR IEAN LERTOVT.

M. D. LXXVIII.



REVUE
MÉDICALE
DE
PARIS
TOME
XV
AN
VI

PARIS
DE LA LIBRAIRIE
DE LA FACULTÉ DE MÉDECINE
N° 101

PARIS
DE LA LIBRAIRIE
DE LA FACULTÉ DE MÉDECINE
N° 101



PARIS
DE LA LIBRAIRIE
DE LA FACULTÉ DE MÉDECINE
N° 101

ANTOINE MIZALD

SVR SON IARDIN

MEDICINAL.

PREFACE



A Y souuent admiré le souci & diligence de nos ancestres en ce qu'ils ont basti & dressé vn magasin, duquel on peut tirer beaucoup de secours & aides, pour l'ëtretenemët de la vie humaine, & pour remedier aux maladies: lequel les anciens ont appelé *Alexichepos*, & nous l'appelons ouurier pour aider, & iardin salutaire. Car ils n'ont vsé de l'armonie du luth, ou de la lire, comme on recite qu'anciennement ont fait Orphee & Amphion: mais par vn laborieux & assiduel travail, & de corps, & d'esprit, & par diligence d'estude, ils ont comme contrainct les forests esloignées, les montaignes difficiles, & les lieux inaccessibles, d'habiter, & se renger dans les villes & maisons champestres. Ce qu'ils ont principalement executé, lors qu'ils ont trouvé le moyen d'approprier, & rendre domestiques les plantes & arbres, qui auparauant estoÿët sauuages, & ont tiré profit des plantes, qui auparauant ne faisoÿent qu'empescher & nuire: c'est à dire, ils ont conduit & attiré les pla

tes des bois & montaignes, qui ne seruoient là que pour retraite & nourriture aux bestes sauvages, & aux oyseaux pour y nicher, ils les ont, di-ie, seu approprier à l'vsage & nourriture des hommes, & peu à peu les ont attirez comme si s'eussent esté chartiers enuoyez du ciel és iardins des villes & villages, pres leurs maisons & habitations, afin qu'il ne les faut pas aller chercher si loin, tellement que par leur diligence, & adresse à les cultiuer, ils les ont rendues familières à ieunes & à vieux. O que nous pouuons dire les hommes trois & quatre fois heureux, de ce que ceux qui ne cedoyent rien en force à Hercules, ni en sapience à Nestor, n'ont rien laissé qu'ils n'ayent esprouué & experimenté, & si n'ont rien caché, de ce qui leur a semblé pouuoir profiter à la posterité. Et voila d'ou est sorti le profit inestimable des iardins, & mille commoditez, mille secours qu'on en tire, soit qu'on considère la nourriture qu'on en prend, ou les remedes de sorte que iusques auourd'huy nous auons receu comme de pere à fils, & d'aage en aage, & poursuura ce bien à ceux qui viendront apres nous, par vne singuliere faueur de Dieu, sinon que la nonchailance & bestise des hommes les en rende indignes. Faudra'il donc que nous enseuelissions de si grandes richesses, & vn si grand bien, qui nous a esté laissé par vn si bon nombre de si grands

.A.

& excel-

& excellens personnages qu'ils auoyent acquis par vn si grand labeur: & que nous possédôs côme par hoirie legitime: & qui nous apporte vn heur nô pareil, a sauoir de iouir de tant de remedes que nous pouuôs tirer des iardins: & qui plus est permettrons nous que nostre posterité soit priuee & defraudee des biens, que nous ne pouuons pas nous vanter auoir acquis: mais qui ont esté acquis par d'autres, qui les ont laissez par droit de substitution, à ceux qui viendront apres nous. Nous pouuons donc dire à bon droit, que ceux là sont enuieux & marriés du bien public, & seroyent contens que les inuentions de nos deuanciers fussent enseuelies, qui sans se soucier de ceux qui viendront apres eux, ne semblent estre pais que pour eux mesmes, ni estre sages que pour eux mesmes, & qui passent leur vie, comme la limace dans sa coquille: à la verité c'est mal recognoistre ceux par le moyen desquels ils iouissent d'vne si grande lumiere, tiree du milieu des brouillats: & qui des aspres montaignes, haliers, & bois toffus, voire des ordures de la terre, ont bien scëu tirer les pierres precieuses & l'or, voire sans que cela nous couste riens: mais ce n'a pas esté sans hahaner & suer, & sans qu'ils ayent trainé bien souuent parmi la poudre: & si ne peut on pas dire qu'ils ayēt eu autre desir, autre esperance, ni autre in-

Chacun se doit estimer à faire la posterité participante des labeurs.

tention, sinon de faire leurs successeurs participans de si grands biens; & que leurs successeurs eussent le mesme souci. Parquoy afin que la posterité ne me puisse mettre au nombre de ces mal'heureux qui sont entachez du vice d'ingratitude; vice vrayement odieux à Dieu & aux hommes, toute ma vie ie me suis esuertué; que mes estudes, quoy qu'ils soyent petis & de peu d'estime, pour le moins ce qui peut estre de sçauoir & grace en moy, soit rapporté à l'usage & profit public: & que s'il y a quelque chose de bien en moy, que i'aye receu de la largesse de Dieu, de ceux qui m'ont précédé; & de ceux qui ont mieux estudié que moy, soit rapporté au commun profit. C'est donc à cela, que ie me suis addonné toute ma vie; & m'y addonne encores de franche volonté & courage, delibéré de poursuivre le reste de mes iours, s'il plaist à Dieu m'en faire la grace, quoy que ce soit avec perte de mes biens, & au preiudice de ma santé; laquelle me fait iournellement de grands empeschemens. Voici donc ce Jardin Medicinal que, pour le present ie presente & mets en auant, afin que chacun en puisse tirer profit. Ie ne doute pas qu'il ne se trouue des hommes qui le regarderont de mauuais œil, & qui le liront encores plus à cōtre cœur & qui se despitant, gronderont entre leurs dents, disant, voy de quoy s'est aduisé ce personnage,

sonnage, de vouloir restaurer & remettre en vſage les remedes prins és iardins, deſquels partant de centaines d'annees on n'auoit tenu conte, & que les beſtes & les hommes ſouloyent aux pieds, meſmement en ce temps, auquel on n'a pas fauter d'autres remedes? N'eſt ce pas, diront ils, ſe mocquer, & perdre ſon temps? Ie n'ignore pas que ce ne ſoit vne choſe dangereuſe, de mettre en auant quelque choſe de nouueau, ou renouueller quelque choſe deſia enuieillie, & que ce n'eſt pas ſans difficulté, principalement en ce temps, auquel on ne s'eſtudie qu'au gain, ſi ſuis ie pourtant reſolu d'eſſayer: car quel dommage pourra porter l'eſſay, puis qu'un tel profit en ſortira, que de ſecourir, & aider à la vie d'un ſi grand nombre de pauures gens, & du populaire, ſoit qu'ils deſirent de chaffer les maladies qui les pourſuyuent, ou ſe preferuer d'y tomber? car telles gens n'ont pas moyen d'appeler les medecins, à cauſe de leur pauureté, & encores moins, ils ont moyen de prendre chez les Apotichaires, qui ne ſlaient que le gain, les drogues qui leur ſont neceſſaires. Il m'a donc ſemblé que ie ferois choſe vtile & profitable, ſi pour gratifier aux pauures, & au populaire, ie monſtrois qu'ils pourront trouuer en leurs iardins, aſſez de ſecours & remedes pour ſe ſuruenir en leurs maladies, & pour s'aider à viure. Dauantage

*C'eſt vne
œuure bon
ne & ſain
ête que de
aider aux
pauures.*

ie veux faire cognoistre à chacun, que plusieurs medicamens, qui estoient hors d'usage, sont comme renouvellez: & que plusieurs desquels on se sert à present ne seront plus en usage, selon que la coustume & la raison le commanderont, car c'est à eux de bailler la reigle de medeciner. Au reste ce mien labour ne sera point trouué nouueau par ceux qui auront leu, ou pour le moins entendu que Pythagoras premieremēt & Democrite en ont escrit des volumes to^r entiers, & que Democrite ayāt esté enseigné touchāt ceste matiere, par les Ægyptiēs, en a fait part à Hipocrates qui estoit son grād ami, & de mesme temps: mais afin que ces petits commencemens prinsent accroissement, Herodote, Strabo, Plutarque & autres, disent qu'anciēnemēt on reputoit à grand forfait, de passer auprès des malades (lesquels on auoit de coustume de mettre en lieu public, à la façon des Ægyptiēs) sans enseigner au malade, avec quelles herbes & remedes, il auoit luy mesme ou quelcun autre esté gueri de sēblable maladie. Dauātage Pausanias recite qu'ē la ville d'Epidaurus y auoit vn petit boschage dedié à Æsculapius successeur d'Apollo, quant à la medecine, dans lequel y auoit vn temple rōd enrichi de marbre blanc, & soustenu de plusieurs colōnes, ausquelles on trouuoit par escrit les noms de ceux, tant hommes que femmes,

mes, qui auoyent esté gucris par Æsculapius, & les nōs des maladies, desquelles ils auoyēt esté affligez, par quels signes on les auoit recogneues & remarquees, & par quels remedes & herbes, & avec quelle methode ils auoient esté gucris: & dit-on que ce temple ayant esté consumé par feu, Hipócrates redigea ceste methode en Aphorismes, sentences, & en art: & deslors on edifia entre plusieurs nations, des temples à Æsculapius parmi les bois, & sur les chemins, & hors des villes: ce que à la verité, ne signifioit autre chose, sinon que les plus auciens & premiers remedes des maladies, ne se trouuoient pas dans les villes & boutiques, mais aux champs parmi les bois, où on venoit demander aide & secours à ce diuin guerisseur des maladies, & qui garentissoit les hommes de mort, & là on monstroit fidellement aux malades qui y alloient: ou à ceux qui venoient en leur nō, comme il se failloit gouverner & ce qu'il faisoit faire. Certainement, dit Pline, les bois & forests & les lieux les plus hideux & rudes, ne sont point desnuiez de medicines, tant nature, mere de toutes choses, a esté soigneuse de ne destituer iamais l'homme de remedes: lesquels remedes, comme nous auons ia dit ci deuant, les anciens chercheurs des secrets de nature, ont avec grand soin & diligence

ce, tiré des bois, ou il sçble que nature ait mōstré sa face hideuse, pour les nourrir dans leurs iardins, tāt des villes que des villages & n'y ont espargné ni leur peine, ni le soin de les bien cultiuer. Dieu tresbon les pouffant en cela. Qui est celuy qui pourra nier que les Romains n'ayent demeuré six cens ans, ou plus, sans aucuns medecins ni apotichaires? & cōbienny a-il eu de gens depuis le commencement du monde, qui ont longuement vescu, & en bonne santé, sans medecins ni apotichaires? certes le nombre en est infini: non pas toutesfois qu'ils ayent esté sans médecine, mais comme elle estoit simple & aisee, aussy estoit-elle facile à inuenter & preparer, pource qu'elle estoit nourrie en nos iardins, & comme en nostre maison & pays. Qui est celuy qui ne sache bien que Marcus Cato, ce personage tant renommé pour auoir triomphé, auoir esté Censeur, & pour estre vn personage fort excellēt aux lettres, a vsé des herbes que luy mēme auoit plātées en son iardin, & principalemēt il s'est serui des Chous du iardin, & par ce moyen luy, son fils, sa femme, ses seruiteurs & familiers, ont vescu long aage, en bonné santé? Qui est-ce qui n'a leu Antonius Castor (auquel Plinē confesse deuoir tout ce qu'il a de la cognoissance des herbes, ou peu s'en faut, cōme estant le plus exquis en ceste faculté) auoir planté & nourri

plu

plusieurs herbes en son iardin, par l'aide desquels il paruint iusques à cent ans, ou plus, sans que sa santé fust en rien interessée, voire sans que sa memoire ni ses forces fussent en rien afoiblies. Sabinus Tiro ne composa-il pas vn liure des remedes des Iardins, lequel il dedia à son Meccenas pour la cōseruation de sa santé? Valgius Romain, & Pompeius Lenæus, afranchi de Pōpee le grād, ne luy firent-ils pas present d'vn liure contenant la medecine des herbes, lequel ils auoient prins en la librairie de Mithridates; apres qu'il fut vaincu par Pompee? Si ces exemples ne te cōtentēt, & que tu en vueilles auoir de plus anciens, il ne faut sinon lire ce que Marc Varron recite de Nestor, homme fort sage & eloquent, lequel estoit viuant du temps de la guerre de Troye, trois cēns ans, ou plus, deuant la construction de Rome, enuiron le temps du regne de Dauid, qui auoit vn iardin medecinal, lequel il descriuit fort elegamment en vers. Il apert donc que la medecine, qui prenoit les remedes es iardins, est fort ancienne; vray est comme tesmoigne Seneca, qu'au commencement, on n'auoit pas cōgnoissance de beaucoup d'herbes, mais depuis qu'on a tāt desguisé les viandes, & qu'il y a eu tant de fortes & diuersites de mets, on a aussi veu tant de maladies, si diuerses & incertaines, qu'on peut dire que sont esté au-

*D'ou est
procedé
que la Me
dicine, qui
anciennement
auoit
pre de re
medes, est
apres creue,
en telle di
uersité.*

tant de punitions, & iustes vengeance de la superfluité & excès : aufquelles n'estoyent point subiets ceux qui n'auoyent point lâché la bride à leurs appetis, qui se fauoient commander, qui aprestoient eux-mesmes leurs viandes, & viuoyent simplement & sobrement : mais depuis qu'on a commencé à vser des viandes, non pas pour oster la faim : ains pour reuciller l'appetit, & pour ce faire on a inuenté mille sortes de sauces : la vie des hommes a esté beaucoup plus miserable, leur santé moins ferme, & leur face plus transie, qu'elle n'estoit pas du tēps de la sobrieté : & encores ne peut-on attendre sinon que le mal empire, & que nos successeurs soyent encores plus miserables que nous, si on ne trouue moyen de brider ces gourmās & deuorateurs, aufquels la terre ni la mer ne suffiroient pas. Quiconque considerera la multitude des cuisiniers, & la diuersité de leurs sauces, ne s'esmerueillera point du grand nombre, & de la diuersité des maladies, par laquelle tant de medecins & apoticairez avec leurs familles, sont nourris grassement. Mais ie m'esgare par trop de mon propos : or pour y retourner, ie di que les anciēns Romains ont eu en grāde estime & reputation la medecine, laquelle prenoit ses remedes és iardins. Mesmes elle a esté receuē entr'eux, par l'espace de six cēs ans ou pl^s, avec grand recueil, cōme nous auons

desia

desia dit ci deuant, & Marcus Cato l'a diligēment pratiquee, iusqu'a l'octâte cinquiesme an de son aage, afin que nul ne pense qu'il ait eu faute de tēps, pour en pouuoir faire l'experience. Finalement les richesses venans à croistre, avec l'Empire & domination, & la licence estant entree tant de la dissolution és viandes, que la paillardise, la simplicité de ceste medicine fut chassée au loin, & fut bānie de la compagnie des hommes: & dès lors on fit venir, & par mer & par terre, force medecins, d'Asie, de Grece, d'Egypte, de Sicile, d'Arabie, de Marceille, & autres nations estrange-res, sans s'arrester au dire de Marc Catō, que long tēps auparauāt il auoit predict à son fils, & voicy ses paroles: Tien ceci cōme vne prophetie. Lors que ceste gēt (parlāt des Grecs) o Marc mō fils, enuoyera par deçà ses medecins, elle corrompra toutes choses, car ils ont deliberé & iuré entr'eux, de faire mourir par la medicine tous les Barbares (car c'estoit ainsi que les Grecs appelloient toutes les autres nations, sinon la leur) mais, disoit-il, on les payera en ce faisant, afin qu'ils gassent tout plus gayemēt: Et de fait cela aduint, à la grande ruine de plusieurs: car d'autant qu'on s'estoit persuadé que ces gens auoyent la vie & la mort en leur puissance, estans entrez à Rome, ils y eurent fort grande autorité, laquelle ils exerçoient seueremēt: & de là Plin

priet matiere & occasion d'efcrire, que la médecine est vn art lequel cōmande aux Empe-
raurs & Roys, & tue les hōmes, sans crainte
de punitiō; no' voyōs (dit-il) les anciē cōseil-
lers estans malades, lesquels aux plus grands
froidures de l'hiuer, on faisoit descendre dās
des eaux & lacs, iusques à estre roides & tran-
sis, & estoit-on venu iusques à vne telle bestie-
se (comme nous voïōs encores auourd'huy)
que si quelcun portoit seulement le nom, ou
la robbe, ou estoit seulement en opinion d'e-
stre medicin, on ne faisoit point de difficulté
de se fier en luy, encores qu'il n'y ait point de
mensonge plus à craindre que cestuy-la. Et
pourtant ceux-ci pour acquerir bruiet & re-
nōmee, aportās quelque chose de nouveau,
comme cela aduient souuent en la médecine,
commencerent à condamner & reiecter pu-
bliquement les remedes & medicines que
on prenoit aux iardins: s'en mocquer à gor-
ge ouuerte: & afin d'en abolir entierement
la memoire, ils dresserēt des magasins & bou-
tiques de drogues, desquelles ils tiroient vn
merueilleux profit, & là, comme dit Pline,
on promettoit à chascun la vie, moyenant ar-
gent, par le moyen de certaines drogues es-
trāgeres, & desquelles on n'auoit iamais oui
parler, ausquelles ils donnoient des noms
magnifiques: & le nombre de telles gens est
tellemēt accru, & sont si bien enracinez, que
on

on peut bien dire, ou est le village qui n'en soit rempli? Vous verriez là vne grande quantité de boites argentees, de coffrets peints, rez magnifiquement, de pots fort beaux, mais bien souuent la pluspart ne vid iamais le soleil, & ne fut iamais ouuert, ou bien peu souuent. Je ne parle point de indicibles artifices, mixtions, & compositions, lesquelles ne sont sorties d'ailleurs que de l'industrie & adresse des hommes comme tesmoigne Plin: Les Cerots, Emplastres, Coliris, & Antidotés, dit-il, ne sont pas ouurages de ce diuin & grand ouurier, a sauoir nature, mais ce sont inuentions de dame Auarice, forgees es boutiques: Car les ouurages de nature sont simples, accomplis & parfaits. Ceux-là sont bié mal aduisez, qui ne tenans conte des biens que nature leur offre liberalement & sans qu'il leur couste rien, sans grâd artifice ni des pense, sans fard, labeur, ni grand aprest, qui sont accomplis & doux, aiment mieux recourir à des remedes estranges, qu'il faut aller querir bien loin, douteux, mal-plaisans, qui font souleuer le cœur, incogneus, & bien souuēt suspects & nuisibles: pour lesquels auoir, il faut bien souuent hazarder & mettre en danger la vie & les biens.

*En diligence & soin, l'apotichaire ores,
Vers les Indois s'en va, Grecs, Babilô & Mores.*

Or pour scauoir combié ceux-la sont fol-

lement, il ne fera pas mauuais d'entendre ce que Plin en dit. Quant à nous, dit-il; nous n'auons point touché aux medicines qu'on apporte des Indes, d'Arabie, ou des autres nations estrangeres: car il ne me semble point que ces choses apportees de si loin, soiēt propres pour nous seruir de remede, car elles ne sōt pas produites pour nous, nō pas ni pour ceux la ou elles viennent, autrement ils ne les vendroyent pas. Voila quel est le tesmoigna ge que ce grād personnage a rendu, desia de long temps, touchāt les remedes estrangers: lesquels sont en telle estime aujourd'huy en tre plusieurs, & les prise on tāt, qu'on estime la vie estre mal assuree, & la santé peu ferme, sinon qu'on soit souuēt trompé par tels medicamēs estrangers, & apportez de loin, & bien souuent brouilleez & sophistiquez, achetez neantmoins bien cherement. O quelle folie & vanité voit on en toutes choses. S'il est seulement question de la guerison d'une petite playe, ou d'une bien legiere maladie, faudra aller querir les remedes en la mer rouge, ou es Isles nouvellement decouuertes, au lieu qu'on pourroit bien trouuer les remedes vrais & non suspects (comme tesmoigne le mesme Plin) es herbes que les plus pauvres mangent iournellement, ou qu'ils foulent aux pieds en leur iardin, ou en leur chap. Si donc ces choses sont vrayes, comme à la
verité

verité elles sont. N'est ce pas vne grande folie, ou plustost rage, d'aller chercher bien loin ce qu'on foule iournellement aux pieds, & vouloir auoir à grans frais, & avec grand danger, ce qui est bié souuent sophistiqué, & est plustost poison que remede. Il est donc beaucoup meilleur (comme Diocles Caristius, medecin en estime & en aage apres Hippocrates, & tant recommandé par Galien, escriuit au roy Antigonus) d'vser des remedes esquels on ne se peut pas aisement tromper: auquel rang nous pouuons mettre cōme il dit, la Reparee cuitte en Eaumiel, la Malue, la Parelle, la Mercuriale, & toutes choses cōfités au miel car toutes ces choses laschēt le vētre, & euacuēt les excremens. Les Arcades, cōme dit Pline, n'vset point de medicamēs mais pour toute médecine ils boyuent du lait au printēps, pource que lors les herbes sont pleines de suc, tellement que le lait est rendu cōme medicinal: ils ne boyuēt pas aussi que du lait de vache, pource que les vaches mangēt presques de toutes sortes d'herbes, de façon que lors leur lait porte medicine: & de là, ie croy qu'est venu l'vsage que plusieurs natiōs ont, de garder du beurre de May, pour s'en seruir à diuers vsages, & non pas sans quelque raison. Di moy ie te prie, n'est ce pas vn grand auenglissement, d'approuuer tellement les choses estrangeres, & incertaines, que ce

Arcades estoient certains peuples de Crete qui est maintenant appelee Candie.

pendant on reiette les certaines & esprou-
 uées? N'est ce pas vne folie, de laquelle il faut
 auoir plustost compafsion, que non pas de
 s'en rire, quand les hommes ne veulent pas
 fauoir ni entendre ce qui leur est profitable
 pour leur santé, mais aiment mieux marcher
 des pieds d'autrui, veoir par les yeux d'au-
 trui, ouyr des oreilles d'autrui, & receuoir
 par les mains d'autrui, tellement qu'ils de-
 pendent entierement du iugement d'autrui,
 & se gouernent selon qu'il plaist aux autres
 leur ordonner, comme s'ils ne pouuoient vi-
 ure qu'à l'aide, au plaisir & apetit des autres:
 qu'est ce viure, où mourir miserablemēt si ce
 la ne l'est? faudra-il qu'on ne face point d'es-
 tat des aides & remèdes pour viure, & pour
 nous secourir en nos maladies que nous pou-
 uons recouurer en nos maisons, & dans nos
 iardins, comme si nature les auoit faits seule-
 ment pour farcir le ventre, & pour repaistre
 les yeux par leur beauté, & le sentiment par
 leur odeur, ou pour nourrir la vermine, les
 chenilles, limaces, & araignees, comme si
 Dieu, qui est tout bō, & auteur de toutes ces
 choses, maistre & superintendant de nature,
 laquelle Hipocrates appelle tousiours tres
 iuste, n'auoit eu plustost esgard au profit &
 necessité des hommes? Quel conseil, ie vous
 prie, & quelle sagesse est cela, de tormenter
 les malades par medicamens, si souuent rei-
 terez,

terez, si mal plaisans à la veüe, au gouſt, à l'ou-
 deur, voire meſme à l'ouye, & ſi facheux, que
 de les ouyr nommer ſeulement, ils font ſou-
 ſleuer le cœur, au lieu qu'avec vne ſimple her-
 be prinſe au iardin, on le pourroit deliurer
 ſans facherie, ſeulement & promptement.
 N'eſt ce pas vne vraye brutalité, ou pluſtoſt
 ſtupidité, de receuoir & approuuer tellemēt
 les choſes douteuſes & ſuſpectes, qu'on en
 meſpriſe les remedes certains, qu'on peut re-
 couurer ſans peine, promptement, & en tout
 temps en ſa maiſon? Nous remedions donc
 aux maladies, au rapport & ſous la foy d'au-
 truy, & les drogues eſtrangeres ſont en brouip,
 par l'autorité de ie ne ſçay qui: & puis, eſt-il
 queſtion d'un remede, il faudra faire vn me-
 ſlinge, & vn brouillis de pluſieurs ſimples,
 qu'un aſne lembaſté pourroit à grand peine
 porter, & faire vn amas de pluſieurs ingre-
 diens, comme on parle, pluſtoſt par oſten-
 tation, & pour piper les hommes, que pour
 beſoin qu'il en ſoit: comme ſi la vertu & fa-
 culté des choſes entaſſées en monceaux, e-
 ſcrites le plus ſouuent à l'aduenture, par ces
 oſtentateurs pluſtoſt que docteurs, depen-
 doit de leur iugement & volōté, comme ſont
 les points de la Geomantie: car comme dit
 Plinē, de meſſer la vertu & faculté des choſes
 par ſcrupules, ce n'eſt pas vne adreſſe des hō-
 mes, mais pluſtoſt vne impudēce. Que dirōs

*Geomantie
 tie eſt vne
 ſorte de di-
 uination
 qui ſe fait
 par cer-
 tains points
 qui ſe ſont
 à l'auentu-
 re, & deſ-
 quels les
 Geoman-
 tiens tiret
 apres telle
 conſequen-
 ce qu'ils
 veulent.*

nous de ce que Hipocrates mesme escrit en vne certaine epistre adreſſee à Crateuas herboriſte & qui lay furniſſoit de drogues, aſſa-
 uoir que la coniecture & iſſue eſtoit incertaine, meſme à ceux qui procedoyent bien prudem-
 mēt es purgatiōs, n'eſt-ce pas à dire que il n'y a aucun medicament laxatif, qui ne nu-
 ſe à la vertu, & à la ſubſtance de quelque par-
 tie de noſtre corps? Et pōurtāt, il me ſemble
 qu'Anicena a fort bien dit, que boire les me-
 dicines, encores qu'elles ne ſoyent point ve-
 neneuſes, ſi ſōt elles tōuſiours ennuyeuſes &
 faſcheuſes à nature. Auquel ſ'accorde Platō,
 quād'il eſcrit ainſi. Je ne conſeilleray iamais
 à vn homme ſage & bien aduiſé, de prendre
 ces purgatiōs que les medecins ont accou-
 ſtūmé de faire boire, compoſees de medica-
 mens laxatis, & ſur tout quand ils ſont vio-
 lens: car il n'eſt pas bon d'irriter legieremēt
 les maladies par medicamens, ſinon qu'elles
 ſoyent fort dangereuſes. Or ie ſçay bien amy
 lecteur, qu'entendant tous ces diſcours, tū dé-
 māderas, que faut il donc que ie face, puis-
 que l'vſage & l'iſſue des medicamens ſont tant in-
 certains, commēt pouruoyray ie à ma ſanté
 ſeulement vſe en cela de la couſtume. louable
 & ſalutaire des anciens, choiſi en ton iardin
 ou en ton champ, des remedes qui te ſoyent
 familiers & cogneus, qui ſoyent nais & nour-
 ris chez toy deſquels tes anceſtres ont vſé,
 qui ſōt approuuez par ceux de tō pays, creus

en meſme climat, meſme aër, & meſme contrée que toy, & ayās meſme naturel: deſquels tu pourras eſtre prouueu & fourni toutes les fois que tu en auras affaire, toſt frais & en leur vigueur, ſans qu'il te faille trotter bien loin, ni languir en les attendant. Le medecin eſt troppeur dit Arnaud de villeneufue, ou ignorant, qui pouuant ſecourir au patient par remedes cōmuns & vſitez, cherche ceux qui ſont malaiſez à reconuerer & inuſitez: il dit dauantage que le ſage & bō medecin taſche de guerir les maladies, pluſtoſt par viandes ayans quelque vertu medicinale, que par pures medecines. Or les viandes medicinales, ſont celles qui croiſſent en nos jardins. Tu te peux donc à bon droit, mocquer de ces grands vateurs des remedes barbares, & eſtrangers: & meſpriſer ces grāds arangueurs, des louāges des drogues eſtrāgeres, & ces grāds aualeurs de medecines, qui n'eſtiment rien ſinō ce qui eſt venu des Indes d'Italie ou d'Eſpagne, d'Aphrique, voire qui ne ſoit apporté des Antipodes. Mais voulez vous entēdre, ce qu'André Mathiol, diligent & fidele interprete de Dioſcoride, dit de ſes drogues barbares. Il ſe faut bien prendre garde, dit il, qu'auourd'huy on trouuera à grand peine de ces drogues qu'on apporte de pays eſtrange, qui ne ſoyēt brouillees & ſophiſtiquées, principalement de celles qu'on apporte d'Alexandrie, &

de Syrie: car d'autant qu'elles passent par les mains des Mores, des Turcs & des Iuifs, qui ne se delectent à autre chose qu'à nous tromper, nous di-ïe qui sommes Chrestiens, ils estiment faire grand seruice à Dieu, s'ils nous peuuent abuser & tromper en quelque chose. Il ne faut donc faire que se rire de ceux qui exaltent iusques au ciel, & louent excessiue-
ment les drogues estrangeres, tant simples, que composees, avec leurs noms barbares & incogneus: lesquelles ont bien souuent plus de besoin d'estre purgees elles mesmes, que non pas de vertu, pour purger & mondifier les corps. Certainement si nos predecesseurs eussent prudemment, & en bone conscience soustenu, & empesché que les drogues nou-
uellement trouuees, & apportees d'un nou-
veau monde, n'eussent point eu d'estree, mais qu'on se fust tenu, à celles qu'on auoit de long temps experimentees, & qui se trou-
uoient es iardins, & comme logees en nos maisons, nous en sentirions vn fruit & profit qui ne seroit pas petit ou suspect. Que cha-
cun donc apprene à preferer les biens de son pays, & les remedes accoustumiez, prins & tirrez de ses iardins, qui ne sont point enuieillis pourris, arides, mangez des souris, araignes, vermisses, tignes, cloportes, mousches, & qui ne sont point ni chanfys, ni moisiss, & qui n'ont point combatu cinq ou six annees
contre

contre telle vermine, sans estre remuez, comme il aduient bien souuent és boutiques des Apotichaires, aux estrangers & autres semblables, qui de vieillesse, & pour auoir esté trop gardez, n'ont plus de suc, sont ridez, flestris, & sans substance & vertu: & qu'on s'efforce de remettre sus ceste ancienne médecine qui prenoit ses remedes és iardins, en la composition desquels il ne falloit pas beaucoup employer de temps, & qui estoient recens & sans tromperie, qu'on s'employe à la desgager, à la rappeler de son bannissement, & que on luy tende la main, pour la releuer & redresser, afin qu'elle reprenne son ancienne possession. Qu'on incite aussi tous les amis, parens, aliez & voisins de faire le semblable, & qu'on s'y employe à bon escient, estans asseurez, que le dire de Quintilien est veritable assauoir, que nous vsons plus seurement des choses acoustumees, & que l'vsage des choses nouuelles n'est pas sans danger, fayt on cōte que ces remedes là sont les meilleurs, qui sōt les plus cogneus & experimentez par plus de gens, comme sont les remedes des iardins, qui ne seruiron pas moins d'aliment, & de médicament auourd'huy, qu'ils faisoient au temps passé: car comme dit ce Poëte qui a escrit des herbes, le iardin suppeditoit aux anciens & de quoy se nourrir, & de quoy se mediciner. Quand ie conseille d'vsor des re-

medes prins és iardins, ce n'est pas à dire que ie fois d'auijs de reietter les medicamens apportez de pays eſtrâge, pourueu qu'ils ſoyêt bien cogneuz, bien choiſis, & experimentez de longüe main: ou qu'on meſpriſe entiere-ment les Apoticaireſ, & leurs inuentions & artifices, comme du tout inutiles: car au contraire nous les approuons & louons grandement, pourueu qu'elles ſoyent maniees & conduites par gens ſauâns, experimentez, fidelles, & de bon cœur, qui ſoyent fournis de bonnes matieres, & bien façonnez. aux deux parties de la Pharmacie: & ſur tout que ce ſoyent gens charitables, & eſloignez de toute auarice, Dieu par ſa bonté vueille qu'ainſi ſoit, car c'eſt luy qui eſt vrayement l'Æſculape celeſte, ſans lequel les medicines ſont au tant de venins, & duquel on peut bien dire à meilleures enſeignes, ce qu'Ouide dit d'Apollo.

Auſſeur ie ſuis de l'art de medicine.

Sur la vertu des plantes ie domine.

Et à cela s'accorde le dire de Ieſus Syrach, homme fort ſage entre les Hebreux, & doué de l'eſprit de Dieu. La medicine (dit-il) eſt du Souuerain, car le Seigneur a produit les medicines de la terre, ce que Moÿſe Hebreu, le plus ancien de tous les eſcriuans, au moins de ceux deſquels nous auons les eſcrits, auoit laiſſé par eſcrit long temps au parauant, di-

ſant:

sant le Dieu souverain a creé les herbes & plantes de la terre , afin que la posterité d'Adam eut dequoy se soulager en ceste vie terrestre, & dequoy se garentir des maladies: auquel souscrit Theodoret Euesque, en ses questions qu'il a faites sur le Genese , là ou il dit Le Seigneur preuoyant que les hommes seroyent subiets à tomber en maladies: (asçauoir à cause du peché, contre lequel la sentence estoit pronôcée) il commanda à la terre de produire les herbes, lesquelles seruiroient, non seulement pour manger & pour nourriture, mais aussi pour remédier & subuenir aux maladies : mais il nous faut laisser traiter ces matieres Theologiques aux Theologiens, & mettre fin desormais à ceste preface, afin que chacun se mesle de son estat.

Nous auons bien voulu, quant toutes choses donner ces petis aduertissemens: il est maintenant temps de discourir des aides & remedes qu'on peut tirer de ce Iardin medicinal, mais auant qu'en venir là, ie veux descrire l'ordre auquel nous l'auons departi, comme en ses sillons & quarrceaux, par lesquels on pourra plus aisément cognoistre & retenir ce qui y est traité, & avec quel ordre le tout a esté discoursu.

Ce liure qui est nommé le iardin medicinal,
est departi en huiët sillons, & chasque sil-
lon est departi en quarreaux à la maniere
suivante.

Le premier fillon traité de quelques herbes pota-
gieres, & est diuisé en dix quarreaux. 30.

1 La Laitue.

2 Le Chou.

3 Le Persil.

4 Le Pourpier.

5 La Bette ou Reparee.

6 La Blette ou Saune.

7 L'Ozéille.

8 Les Espinarts.

9 La Borrache.

10 Les Asperges.

Le second fillon contient quelques racines bonnes
à manger, & est departi en quatre quarreaux. 76.

1 Le Pourreau.

2 L'Oignon.

3 L'Ail.

4 Le Reffort.

Le troisieme fillon traite de quelques herbes o-
doriferantes, & est diuisé en onze quarreaux. 109.

1 La Sauge.

2 L'Hysope.

3 La Sarriette ou Sauoree.

4 La Mariolaine.

5 Le Fenail.

6 La Mente.

1 Le Thym.

2 Le Basilic.

3 L'Orualle.

10 Le Rosmarin.

11 La Lauande.

Le quatriesme fillon contient quelques fruits des herbes & arbrisseaux, diuisé en six quarréaux. 142.

1 La Courge.

2 Le Cocombre.

3 Le Poupon & Melon.

4 L'Artichaud.

5 Les Fraises & Framboises.

6 Les Groiselles.

Le cinquieme fillon traite de quelques fleurs tant odorantes que sans odeur, & est reparti en neuf quarréaux. 160.

1 La Rose.

2 Le Lis.

3 Les Violiers.

4 La Violette de Mars.

5 L'Oillet.

6 Les Penfées & Pasquettes.

7 Le Glay ou Glayeul.

8 Le Passeueleurs.

9 La Soulcie.

Le sixiesme fillon décrit quelques herbes qui ne sont point bones à manger, diuisé en onze quarréaux.

1 Le Fort ou Aluine.

2 L'Auronne.

3 La Rue.

4 L'Ortic.

5	Le Plantain.	222
9	L'Armoise & la Tanee.	227
7	L'Esclaire.	
8	La Mercuriale ou Vignoble.	
9	La Parietaire.	
10	La Malue.	
11	L'Espurge ou Catapuce.	

Le septiesme fillon contient les arbres fructifiers,
diuisez en treize quarreaux.

1	Le Pomier & son fruit.	
2	Le Poirier.	
3	Le Coignier.	
4	Le Prunier.	
5	Le Cerisier.	
6	Le Meurier.	
7	Le Peschier.	
8	Le Neflier & Sorbier.	
9	Le Citronnier.	
10	L'orangier & Limonier.	
11	Le Grenadier.	
12	Le Figuier.	
13	L'Oliuier.	

Le huitiesme fillon contient quelques arbres por-
tans nois, & Bayes, diuise en huit quarreaux.

1	Le Noyer.	
2	L'Amandrier.	
3	Le Pin.	
4	Le Noisillier ou Auellanier.	
5	Le Chastaignier.	
6	Le Laurier & ses Bayes.	
7	Le Geneure.	
8	Le Sureau & l'Yeble.	

En somme il y a des herbes & arbrisseaux
cinquante six.

Et d'arbres avec leurs fruits vingt quatre.

LE JARDIN MEDICINAL D'ANTHOINE

MIZALD DE MO

LYSSON



E suis deliberé que la Lactue
face l'entree & le commence-
ment de nostre oeuvre: nō pas
que ie vueille inferer de là que
elle merite le premier rang en-
tre toutes les herbes des Iardins, car ie con-
tredirois à ce que M. Cato & Plin en ont
escrit: lesquels adiugent le premier lieu au
Chou, comme nous môstrerons en son lieu:
mais d'autant que ie suis assuré que la Lai-
ctue est vne herbe fort salutaire, & de bonne
nourriture, entre toutes les herbes des iar-
dins: qui a donné occasion à Anicena, de la
nommer herbe benite: à cause dequoy elle a
esté tellement estimee des Anciens, & ont es-
té si soigneux de la cultiuer, qu'yne famille
notable de Rome, asçauoir la Valerienne,
n'a pas desdaigné d'en prendre le surnon de
Lactucini, comme recite Plin au chapitre
cinquesme du dixneufiesme liure. C'est par
le moyē d'icelle que D. Cesar Octavian Au-
guste, fut gueri d'vne longue & dangereuse
maladie, par le conseil d'Anthoine Musa me-
dicin fort excellent, En recompense dequoy

30
il luy fit dresser vne statue près de celle d'Æsculapius, à ses despens. Mais sans s'arrêter plus longuement aux louanges de la Laictuë, il nous faut selon nostre petitësse, descrire ses vertus medicinales, & commencer à despartir nostre Iardin en quarreaux.

LE PREMIER SILLON DV

Iardin Medicinal contient quelques herbes potagieres, diuisé en dix quarreaux.

*De la Laictuë des Iardins, & de ses iherbes
remedes, quarrean I.*

PAR le mot d'herbes potagieres, que les Latins appellent Olera, nous entendons non pas seulement les plantes & herbes des Iardins, qu'on met es bouillons & potages, pour leur donner goust, mais aussi celles qui pour estre aisees à aprester, seruent de viande iournallement aux pauvres, soit en salade ou autrement. Et c'est ainsi qu'Horaë en a vsé escriuant à Sæua, cômë sensuit.

*Si les Rois prenoient plaisir d'vser d'herbes
potageres: Aristipus n'en voudroit vser du tout point, ou
gueres.*

Mais

Mais c'est à faire aux Gramairiens de s'amuser à ces choses, mais nous comme medecins, nous arrestërõs à descrire les remedes qu'on peut tirer de la Laituë : laquelle a esté en telle estime entre les anciens Romains, comme fauent bien ceux qui sont versez aux histoires, & mesmement apres que par le moyë d'icelle D. Auguste eut recouuré sa santé, qu'ils trouuerent le moyë de la pouuoir garder en hyuer, la sauoir dans l'Oximel. La Laituë donc est yne plante fort salutaire, comme tefmoigne Columelle en ses vers, laquelle il magnifie si fort, à cause de la guerison d'Auguste, & voicy ses vers, comme ie les ay tournezz.

Sus vienne auant la Laituë sauoureuse.

Pour soulager l'ennuy de maladie facheuse.

Le suc de la Laituë appliqué sur le front de celuy qui a la fieure, le prouoque à dormir, comme dit Florentinus fidele interpreter Grec, des matieres qui concernent l'Agriculture & la medecine. Lequel enseigne aussi, que si quelqn'un mangeroit de la Laituë à iuin, il ne s'enyureroit point. D'auantage, sa semence broyée & beue arreste la perte de la semence genitale & pourtant elle seroit fort vtile à ceux qui sont souuent tormentez de songes & imaginations veneriennes: comme le tefmoigne ce distique, commun si ie l'ay bien tourné.

*La semence de Laiëtue humee avecques du
vin,*

*Oste les songes de Venus: & flux de ventre
malin.*

Lequel Distique nous attribuons à Macer, poëte & medicin expert, que plusieurs pensent auoir esté de mesme temps qu'Ouide, & auoir vescu sous D. Auguste, & prennent leur coniecture de ces deux vers d'Ouide, mais mal à propos ce me semble.

Sape suas volucres legit mihi grandior aëo,

Quæque nocet serpēs, quæ iuuat herba, Macer.

Mais sans m'arrester à ces choses, ie reuiens à traicter de la Laiëtue: laquelle, comme dit le mesme Florentinus, mise sous les draps du liët, sans que le malade en sache rien, elle le fait dormir, principalement si elle a esté arrachée racine & tout, avec la main gauche, auant que le Soleil fut leué. Elle fait aussi dormir, comme dict le mesme authcur, si on en met cinq feuilles, ou troys, ou vne, dessous le cheuet, sans le feu du malade, mais il faut obseruer que les feuilles qui auront esté cuillies au bas de la tige, soyent tournées vers les pieds, & celles qui auront esté prinſes au plus haut de la plante, soyent tournées vers la teste. Pareillement les Grecs qui ont traicté de l'agriculture, ont donné c'est aduertissement à ceux qui desirent d'auoir lignee de fuir sur tout le trop grand & continu

& continuel vſage des Laiſſuës: car non ſeulement (comme ils eſcriuent) elle diminue la faculté d'engendrer (à cauſe dequoy les Pythagoriciens luy ont donné vn non qui ſignifie chaſtree) mais auſſi elle fait que les enfans qu'on a apres, ne ſont pas de bon ſens, mais ſont lourds & ſtupides d'eſprit, & dégènerēt beaucoup de la ſubtilité de leurs peres & meres. Juſques ici j'ay propoſé ce que les Grecs ont iugé de la Laiſſuë, il me faut maintenant monſtrer ce qu'en ont dict nos medecins: ils tiennēt auſſi que la Laiſſuë prouoque à dormir, qu'elle engendre vn ſang qui n'eſt pas trop mauuais, auſſi n'eſt-il pas parfait en tout & par tout, ſi eſt-il pourtant beaucoup meilleur que celuy des autres herbes potagieres: Ce que Eobanus Heſſus poëte. fort el legāt, a gentiment exprimé en ſon liure qu'il a faiſt de la conſeruation de la ſanté, & voici ſes paroles, ſi j'ay bien tourné.

*La Laiſſuë des Iardins la beauté & l'ornemēt,
Eſtant froide & humide engendre doux repos:
Surpaſſant tout herbage en grand nourriſſement
Elle produit auſſi vn ſang viſ & diſpos.*

Voila pourquoy Galien., à mō aduis, dit, que entre toutes les herbes qu'on mange, la Laiſſuë eſt de meilleur ſuc, & de meilleur nourriture, ſi elle eſt mangée par vn homme bien temperé. Que ſi elle ſe rencontre en vn ſtomach chaud, elle y ſert grandement, mais ſi

on en vse trop fouuēt, elle nuit fort à la veuē & esblouit les yeux, comme nous dirons ci apres. Ie di dauantage qu'elle est fort nuisible à ceux qui respirēt avec difficulté, à ceux qui crachent le sang, & à ceux qui abondent en phlegme: & qui plus est en manger trop fouuent, soit qu'elles soyent cuites ou cruës, n'est pas moins nuisible que la Cigue. Et pour tant nous en vsons en Esté plustost pour médicament que pour aliment, ascauoir pour rafreschir & humecter, car elle est froide & humide. A cause dequoy on pourroit demander, & à bon droit, comme il se peut faire qu'elle engēdre de bon & pur sang au corps humain: à quoy ie respons, que c'est à cause de sa substance fort familiere à la nostre, car elle a vn suc laicteux & doux: dauantage estant modérément cuitte, elle se conuertit aisément & promptement en sang, à cause dequoy elle fait venir abondance de laict. Elle est semblablement vtile à ceux qui sont detenus de ce mal soudain & dangereux, qu'on appelle entre les Grecs Cholere, qui procede d'vne grande abondance d'humeurs bilieux, avec vn vomissement qui ne se peut arrestier. Dequoy nous auons pour tescmoin vn fort ancien poëte medicin, asauoir Quintus Serenus, en ce sens.

*Celuy qui de Colere tormenté se verra
Vn grand soulagement & aide il receura*

S'il

S'il prend la Laiëtne cuitte, ou le Chou bien trempé.

On attribue aufsi ceste faculté à la Laiëtne de lacher le ventre, à cause qu'estant froide & humide, elle tempere la trop grande chaleur du foye, laquelle chaleur attirant soudainement & fort la viade & breuuage, est cause bien fouuent qu'on n'a pas le ventre à commandement. Or que la Laiëtne aye ceste vertu de lascher le ventre, nous en auons vn bon tefmoin que nous pouuons produire, asçauoir Martial, qui en escrit en ceste sorte,

On t'attribue le loz, o Laiëtne d'estre utile. A bien lascher le ventre, & de le rendre habile

Et ailleurs:

Phebe, tu as la face d'un qui est dur de vëtre: Vse donc de viade, ou Laiëtne, ou Malue entre.
On tient aufsi qu'elle obscurcit la veuë, comme nous auons n'aguères dict, & qu'elle est dōmageable aux yeux & les esblouit, ce que on tient aduenir à cause qu'elle engrossit les esprits seruans à la veuë, d'autant aufsi qu'elle trouble l'humeur christalin, qui est le miroër & principal instrument de la veuë, au lieu qu'il doit tousiours estre cler & net: & outre cela elle offence par sa froideur, les esprits animaux, sinon qu'on corrigé sa froidure meslant d'autres herbes chaudes parmi, ou quelques choses aromatiques, ou beuuant de quelque puissant vin, apres auoir mangé

la Laiçtuë. Car comme dit Hypocrates, le froid est du tout ennemi du cerueau, de l'espine, des nerfs, des os, & des dents: pour ce tient-on que la Laiçtuë est stupefactiue, comme nous auons desia remarqué ci-deuant, & Galien l'a experimenté, comme tu entendras. Plusieurs (dit-il) vsent de la Laiçtuë auant qu'elle soit montee en tige, la faisant vn peu bouillir en eau: ce que i'ay fait, seulement depuis que les dents m'ont commencé à faire mal: car quelque vn de mes compagnons, sachant que des ma ieunesse, i'estois accoustumé à en manger, mais qu'à present elle me nuisoit grâdement, me conseilla de la faire cuire. Lors donc que i'estois en ma ieunesse, & que i'auois l'estomach bien souvent tormenté d'abondance de cholere, ie mangeois la Laiçtuë toute cruë, afin de le rafraeschir. Mais quand mon aage a commencé à deschoir, le mesme herbage m'a esté vn bon remede contre les veilles, & l'impuissance de dormir: car lors ie me prouoquois tout expres à dormir, au contraire de ce que ie faisois en ma ieunesse, pource que cela me estoit facheux de ne pouuoir dormir: ce que m'estoit en partie aduenü, pource qu'en ma ieunesse ie m'estois accoustumé à veiller, de mon propre gré, afin de vaquer à l'estude: en partie aussi pource que les gens vieux sont ordinairement subiects à ce mal, de ne pou-

*Galien v
soit de la
Laiçtuë
& pour
quoy et cō
ment.*

noir dormir. Et pourtāt la Laiētue au souper, m'estoit vn remede souuerain pour me faire reposer, ou bien ie la prenois lors que ie me voulois aller dormir: mais auant que la manger, ie la faisois cuire. Voila ce qu'en dit Galiē, le recit duquel i'ay voulu ici inserer, pource qu'il est plaissant, & bien propre à la matiere que ie traicte. Au reste les anciēs n'auoyent pas accoustumé de seruir la Laiētue à l'entree de table cōme nous, mais à la fin cōme Martial l'a testifié clairemēt par ces deux vers, si i'ay bien tourné,

*Pourquoy anciennemēt la Laiētue estoit dōnee.
A la fin du repas, maintenant à l'entree.*

Mais pour te faire cognoistre que ceci ne se est point fait sans bonne cause & raison, il te faut entēdre que la Laiētue estant de nature froide & humide, si on la mäge à la fin du repas, & apres toutes les autres viandes, elle incite beaucoup plus à dormir, & si reprime & rabat les fumees & vapeurs du vin, mōtās au cerueau, parquoy elle empesche l'yurognerie, en humectāt le cerueau. Mais les medecins de nostre siecle, ont iugé qu'il estoit plus profitable de la mäger à l'entree de table, & deuant toutes autres viādes, apprestee avec huylle, vin-aigre, & sel, afin de téperer & resiouir aucunement l'estomach par trop chaud, & en rabatant la trop grande chaleur ouurir l'appetit, & avec celà elle modere aucunemēt le

sang bouillant, & la trop grande chaleur du foye & du cœur. Et pourtant ce n'est pas de merucilles, si elle garde de s'enyrurer, pour le moins elle y resiste fort, & si elle guerit, par sa froideur naturelle, ceste pesanteur de teste que les Grecs appellent d'un mot bien propre *Carinaria*, à cause qu'elle reprime & dissout les vapeurs qui s'esleuēt quād on a trop beu. Cē que Q. Serenus poēte & medicin excellent, n'a pas oublié parlant de la curation de l'yurognerie en ces termes, si i'ay rēcōtré.

Plusieurs tiennent qu'à ceci la Laituē est conuenable.

Le remede est biē aisé, & si n'est moins profitable. Je croy biē aussi que c'est de là que Rufus Ephésien medicin, a prins le nom de *Acraipaly*, qu'il luy attribue, pource qu'elle empesche l'yurognerie, & chasse tout mal de teste, procédant de trop boire. Biē est-il vray qu'il en faut vser avec iugement & discretion, car cōme nous auons dit ci deuant, elle esteint les amoureuses chaleurs: parquoy ceux qui sont liez par mariage, n'en doiuent vser que bien peu souuēt, sinō qu'ils corrigent sa trop grande froidure, par quelques autres herbes chaudes, comme sont la Roquette, le Cresson de iardin, la Mente, la Mariolaine & semblables, ou qu'ils boiuent apres de quelque vin puissant. Mais ceux qui ont vouē chasteté, cōme sont Prestres, Moines, Nōnains, & au-

tre telle vermine qui est enserree dás les cloistres, il est bon qu'ils mágent la Laiçtuë, sans y mesler rien de chaud, afin que cela leur serue pour mieux garder leur chasteté; & leur oste l'enuie de se frotter, amortissant aucunement le feu de conuoitise. Il est donc bien necessaire d'auoir esgard & considérer la température des personnes, quád il est question d'vser de la Laiçtuë: en laquelle Callimachus parlát par alegorie & similitude, dit que Venus auoit caché sô amoureux Adonis: voulát par là enseigner, cômél'interprete Athenæus, que ceux-là ne sont pas propres au ieu d'amour, qui vsent souuent de Laiçtuës: que les femmes donc se gardét d'en aprester gueres souuent à leurs maris. Je ne veux point cacher vn secret qui est cognu par peu de gens, & que j'ay souuent experimété heureusémét, contre les blanches fleurs des femmes: il est composé de la creime tiree de la semence de Laiçtuë, laquelle on fait premierement tremper en eau, dans laquelle on ait amorti vn quarreau d'acier, y adioustant de la poudre d'yuoir bien deliée. Je veux bien aussi qu'on sache que la semence de Laiçtuë pilée & broyée dans du bouillon, & beuë, fait dormir ceux qui ne peuuent reposer: & ses sucilles cuittes en eau de la decoctiõ d'Orge, augment merueilleusement le laiçt, si on en boit, & puis qu'on frotte tout doucement les mäs-

melles avec la main. Je di dauantage que si la teste est par trop eschauffee, pour auoir esté trop longuement au soleil, mesme qu'elle face mal, il sera bon de mesler le suc de Laiçtuë avec du vin-aigre, & l'en bassiner, comme Galien nous en a aduerti. Mesme contre les brusleures, il faut prendre les fueilles, & les bien piler, puis les apliquer sur la partie malade, mais il les faudra changer souuent, sans attēdre qu'elles soyēt eschauffees & seichees. C'est assez parlé des remedes qu'on peut tirer de la Laiçtuë, ie veux encor adiouter seulement ce mot, que la Laiçtuë mangée ou appliquée, adoucit & appaise l'ardeur & trop vehemēte chaleur des parties internes & externes : Ce que cognoissant bien ce grand personnage Ant. Musa, medicin d'Auguste ayāt tenté tous autres remedes, & ne sachāt plus que faire, pour le guérir d'une distilatiō qu'il auoit, causée par le vice du foye, & de laquelle il estoit grandemēt tormenté, il fut en fin cōtraint de chāger de methode pour sa guérison, & recourut à la Laiçtuë, comme nous auons ci deuant touché, par le moyen de laquelle Auguste recouura sa premiere santé, d'ou il vint que la Laiçtuë fut depuis fort esteimee.

*Du Chou & des remedes qu'on en peut
tirer: quarreau II.*

IE n'ignore pas que ce bon personnage, & qui n'a son pareil en l'agriculture, a sçauoir *Le Chou fort loué & estimé par les anciens.* M. Cato, hōme renommé & remarqué pour auoir triomphé, auoir esté Censeur, & bien versé aux lettres, a preferé le Chou à toutes les autres herbes qu'on mange: ie sçay bien aussi que Pline la mis au premier degré de toutes les herbes des iardins: & que Pythagoras a célébré ses louanges sur tous autres: Chrisippus medicin, en a fait aussi vn volume à part, diuisé par toutes les parties du corps humain. Mesme Cato a fort exalté ses vertus, & les remedes qu'on en peut receuoir, & les a tellement faictes cognoistre au peuple Romain, qu'ils ons lōg tēps esté sans autres medicines ni autres mediciens: Toutefois ie n'ay peu estre esmeu pour toutes ces choses, encores qu'elles soyent bien considerables, à mettre en ce iardin medicinal le Chou deuant la Laictuë, pour les raisons que i'ay ci deuant deduites. On scait bien que le Chou, à cause de la grosseur de sa tige, & de ses fueilles branchuës a prins le nom de Chou, duquel nous auons maintenant à discourir, & traiter de quoy il sert en medicine: & pourtant nous commencerons à ce que les Anciēns en ont escrit, & que M. Cato en a expérimenté. Traictant doncques de ceux qui yrinent avec difficulté, & gout-

à goutte, voici ce qu'il en dit. Prenez le Chou & le iettez en eau bouillante, & le faites vn peu cuire, tellement qu'il soit à demi cuit seulement: puis ostez vne partie de l'eau, & y adioustez de l'huyle, du sel, & vn peu de Cumin, & les faites encores vn peu bouillir, & humez de ce bouillon froid, & mâgez le Chou, & reiterez cela tous les matins. Le mesme autheur vsoit du Chou, qui a les branches menues, & les fueilles delices, qu'on appelle Crambe, contre toutes tumeurs, & cõtre toutes vlceres, encores qu'elles fussent en uieillies, le pilant & appliquant dessus: & se seruoit du mesme remede pour nettoÿer les chancres, & les guerir: ce que ne se peut faire par autre medicament, comme luy mesme escrit. Bien est vray, qu'auant que l'appliquer il le faisoit lauer en grande quantité d'eau chaude, ou en vin tiede, comme lit Macer, & apres l'ayant pilé l'apliquoit deux fois le iour. Il vsoit du mesme remede contre les desflouëures & meurtrisseures, & contre les vlceres & chancres des mammelles. Si d'auanture l'vlcere ne pouuoit souffrir l'acrimonie il y mesloit de la farine d'Orge; & puis l'apliquoit. Il testifie aussi qu'il n'y a remede qui plus adoucisse la goutte & douleur des iointures, que le Chou tout cru, si on le hache menu avec de la Rue & du Coriandre, puis que on le mange: ou bien qu'on y mette vn bien peu

peu de sel & de farine d'Orge, & qu'on l'applique bien à propos. Ce que le Poëte qui a traité des herbes, parlant de la médecine des Chous exercée par M. Cato, a compris en quelques vers, desquels voici la substance, si ie n'ay failli à tourner.

*Si tu mesles tresbien de l'Orge la farine
Aucc Rue, Chou, Coriandre & un bien peu de sel,
Faisant un cataplasme: tu auras medicine
Fort propre à appaiser ce grand douleur cruel
De la goutte & podagre qui les iointures mine.*

Si tu entends dur des oreilles, dit le mesme Caton, broye le Chou avec du vin, & en tire le ius, puis le fais vn peu tiedir, & le mets goutte à goutte dans tes oreilles, & soudain tu recouvreras l'ouye. S'il y a abondance d'humour melancholique, si la Rate est enflée, si le cœur te denlt, si le foye, les poulmons, les flancs, ou quelque autre partie interieure te fait douleur, tu en seras gueri par le moyen du Chou. Si quelcun desire d'en sçauoir d'auantage, qu'il lise le liure qu'il a luy mesme composé de la chose rustique, & là il trouuera de quoy se contenter. Mais dira quelcun, ces vertus ne se peuent approprier à nostre Chou de iardin, de l'usage & vertu duquel nos medecins sont en doute & ne sauēt qu'en dire: Quant à la cause, tu la pourras apprendre ailleurs. Ces choses estans ainsi pesees, ie vien à produire ce que les Agriculteurs en

ont escrit : ils disent donc que la decoction du Chou faite en vin doux & beuë prouoque les mois aux femmes: semblablement que son ius meslé avec miel pur, est vn souuerain remede pour les yeux, si on l'applique sur le coin d'iceux. Que si quelcun auoit mágé des Champignons ou Poutirons veneneux, il sera grandement foulagé, s'il boit du ius de Chou. Ils disent aussi que le Chou apporte grande nourriture au corps humain, tellement qu'on tiét qu'un enfât nourri de Chous deuiendra beaucoup plustost grand. Le ius de Chou beu avec vin blanc par l'espace de quarante iours, guerit les Rateleux & ceux qui ont la iaunisse, comme il a esté par escrit Paxamus Grec, en ses Paradoxes rustiques: dans lesquelles il n'a pas aussi oublié de dire, que le Chou meslé avec Alum rond, destrem pé en vinaigre, nettoye de la lepre & mal saint Main; estant cuit & mangé, il aide à la voix, & aux maladies de la canne du poulmon. Et de là vient que ceux qui desirent d'auoir bonne voix, en vsent volontiers. Les fueilles ou la semence de Chous meslez avec Benioin & vinaigre, & appliquez, guerissent entierement la morsure du chien enragé, ou autre. Si l'Vuule, ou Luette est prolôgee par quelque distilation suruenue, tellement que elle pende sur le gosier, il faut appliquer du ius de Chou tout cru, sur le sommet de la

teste

teste, & elle se retirera & retournera en son lieu naturel, ce qui doit estre attribué à vn secret de nature. Voila ce qu'en disent ceux qui ont escrit de l'agriculture entre les grecs. Quant aux medecins, ils afferment tous d'un commun accord, que le Chou trop souuent mangé, engendre grande quantité d'humeur melancholique, que sa substance est aussi domageable à l'orifice de l'estomach, & si obscurcit (comme nous dirons tantost) la veüe: & pourtant il est bon de s'en abstenir, sinon que par faute d'autres meilleurs herbages, on soit cōtraint d'en mâger. Le suc de Chou tout cru humé avec vin, sert de remede cōtre la morsure des viperes: & enduit avec farine de Fœnugrec, c'est vn souverain remede contre la goutte des pieds, & autres maladies des iointures: il est aussi profitable aux vlceres vieux & sales, mis sans estre meslé, & si on le tire par le nez, il purge le cerueau: & appliqué avec farine d'yuroye sur les parties naturelles des femmes, il prouoque les mois. Les feuilles enduites toutes seules, ou pillees avec griotte seiche & appliquees, sōt fort profitables aux inflammations & tumeurs: & avec sel elles rompent les charbons, & arrestent la cheute de poil. Les mesmes feuilles cruës, avec vin-aigre, sont vtils aux Rateleux: & cuites & iointes avec miel, sont fort excellentes contre les vlceres corrosifs & les gangrenes.

Les tiges verdes, enſemble les racines brulées,
& incorporees avec vieil oingt, adouciffent
la douleur de coſté enuieillie. Ce que le Poë
te qui a eſcrit des herbes, n'a pas oublié ni
obmis, diſant.

*Si voulez appaiſer, mal de coſt' & ſciatique,
Meslez avec vieil oingt, cédres de Chou brulé:
De peu d'eſtime elle eſt, mais bõne la pratique.*

Qui voudra deſſeicher le ventre par trop
humide, lors que le Chou aura vn peu bouil-
li, il faut oſter la premiere eau, & y en verſer
de l'autre toute chaude, & la faire encore re-
bouillir, iuſques à ce qu'il ſoit mol & aſſez
cuit: ce qu'il ne faut pas faire quand on veut
laſcher le ventre: & de là eſt venu le vers de
Salernitanus.

Ius caulis ſoluit, cuius ſubſtantia ſtringit.

C'eſt à dire.

*Le bouillon du Chou relaſche, mais la ſubſtance
reſtraint.*

Toutes ces choſes & dauantage, ſont com-
prinſes vñ peu plus proprement en quelques
vers d'Eobanus Heſſus, deſquels voici le
ſens, ſi ie n'ay failli à tourner.

*Le Chou cuit par deux fois, arreſte bien le
ventre.*

*Mais cuit légèrement le laſche doucement,
Vray eſt que pour ce faire, l'huyle d'Oline y en-
tre.*

Le lait & la ſemence accroiſt aucunement.

Je n'ay pas voulu laisser ici à dire que toute sorte de Chou, comme i'ay desia dit, est fort nuisible à la veüe: ce que doit estre principalement remarqué par ceux qui sont adonnéz à l'estude. Il est de peu de nourriture, & engendre des songes fascheux & terribles, à cause des humeurs melancholiques qu'il engendre, comme nous en auons donné aduertissement ci deuant. Au reste il n'est pas à mespriser, de sçauoir qu'anciennement en Athenes on apprestoit aux accouchees des Chous au repas, lesquels on leur pendoit au col, pour preseruatif, comme recite Atheneus. Il est aussi recité par Suidas, que les anciens seruyent des Chous en leurs bāquets, mais estais recuits, tellement qu'ils faisoient souleuer le cœur: & de là est venu le prouerbe entre es Grecs. Le Chou reiteré c'est la mort. Le Chou a vne vertu singuliere contre l'yurognerie, de laquelle il preserue & empesche, prins non seulement deuant le repas, mais aussi apres, mesme il chasse & dissout toute malalie & pesanteur qui procede de trop boire: & pour la preuue de ceci nous produirons deux tesmoins entre les autres: premierement M. Cato, homme comme dit Pline, excellent sur tous autres en l'usage de toutes choses. Si tu veux, dit il, boire d'autāt, & souper iusques à regorger, mange auant que entrer à table, tout ton saoul

de Chous tout crus, trempez en vinaigre:& quand tu auras soupé, manges en encore cinq fueilles, & tu te trouueras comme si tu n'auois mangé ni beu, & si pourras boire iusque à creuer, si tu veux. Le second tesmoin que nous voulons produire est C. Galien, lequel a escrit que les fueilles de Chou trempées en eau chaude, & appliquees autour de la teste, résistent naturellement à l'yurognerie: ce que procede d'une contrariété naturelle qui est entre ceste herbe & le vin, comme dit Agrius, duquel M. Varron fait mention: A cause dequoy, il me semble qu'Athenus n'a pas escrit legeremēt, que les vignes où on sème des Chous, ne rapportent pas si grande abondance de vin, tant il y a de la contrariété entre le Chou & la vigne, & le vin. Theophraste aussi a remarqué, que le sep de vigne encore vif, se retire de l'odeur du Chou. Et Pline, que le vin se gaste dans le tonneau, par la seule odeur & goust du Chou, mais y faisant tremper des fueilles de Reparee, il retourne en son premier naturel. Ceste raison induisoit Androcides, qui estoit homme illustre, comme recite le mesme Pline, à affirmer, que le Chou auoit vne grande vertu contre l'yurognerie, comme nous auons dit ci deuant. De là aussi venoit que anciennement les Égyptiens qui aimoyent fort le vin, comme recite Suidas & Atheneus

auant

auant que manger autre chose, mangeoyent en leurs repas des Chous cuits : & en leurs banquets & festins le premier mets estoit de Chous, afin d'empescher que le vin ne leur nuisit, & se preseruer des inconueniens qui viennent de l'yurognerie. Or plusieurs estiment que cela doit estre entendu du Chou le plus rouge. Ceste fa^ço de faire des Ægyptiens, est auiourd'huy suyue de toutes les nations, mais principalement des Alemans & Flamans : car à l'entree de tous leurs repas ils seruēt de Chous, & bien souuēt en mettēt aussi à la fin, pour se garder d'estre surprins du vin, duquel ils ne sont iamais las de boire & ont le gosier tousiours prest à aualer : ce sont nations qui portent patiemment la peine & le trauail, mais ils ne peuuent endurer, la soif. Et a ce propos nous auons quelque fois passé le temps avec vn mien ami Alemand, homme docte & bien versé, nommé Geruais Mastalerus qui estoit de Brisgovv, avec lequel ie me suis quelque fois ioué en ces vers.

*Les Alemans sont duits à porter les trauaux
Impatiens à porter de la soif les assauts.*

Ce qui reste est bien digne d'estre attentiuement remarqué. La Cendre des tiges de Chou, & leur decoction nettoÿe la teste des surfures, si on s'en laue. Et si on se baigne les tetins avec bouillon de Chous tiede, cela

fait venir le lait. Pareillement les cendres
meſſees avec blanc d'œufs, ſeruent de reme-
de aux bruſſures: & l'eau qui ſort de la tige
du Chou, lors qu'on la bruſſe, guerit le feu
volage qui n'eſt pas encore enuieilli, auſſi
bien que l'eſcorce de la racine de Parelle ma-
chee & appliquee ſur le mal. Je di encorcs,
que le Chou pilé avec Griotte ſeiche bien
delice, puis incorpore avec eau roſe, & appli-
qué ſur les yeux, guerit les fluxions chaudes
qui deſcendent ſur iceux. Et ſi tu fais cuire
les fueilles de Chou, puis les ayant pilees tu
les meſles avec lie de vinaigre, & deux iaunes
d'œuf tous crus, avec vn peu d'huyle roſat,
meſſât le tout bien enſemble, & le faiſant vn
peu tiedir & puis tu l'appliqueſ ſur le lieu qui
eſt affligé de goutte, tu trouueras que c'eſt
vn remede ſingulier pour appaiſer la dou-
leur, mais il le faudra chāger ſouuēt le meſme
Chou tout ſeul, ou bien meſlé avec graiſſe,
eſt tenu pour vn remede bien propre aux in-
flammations endurcies, & aux Hereſipeles: la
maniere de l'appliquer eſt, de oindre les par-
ties malades avec huyle roſat, & puis appli-
quer la compoſition ſuſdite ſur la partie, &
la lier avec bendes. Je ne penſe auoir rien ou-
blié au recit des remedes qu'on peut tirer du
Chou, hors mis vn grād miracle, & qui n'eſt
point vulgaire, auquel nature ſe monſtre ad-
mirable, lequel auſſi ie ne veux pas taire: aſça-
uoir

uoir que ceste herbe que nous auons dite
 estre ennemie de la vigne, estant plantee vis à
 vis du Ciclamen ou Pain porcin, & de l'O-
 rigan, elle seiche entierement: tant grande
 est la contrarieté & haine secrette qui est en-
 tre ces plantes & le Chou, non moindre que
 celle qui est entre le Chou & la vigne & le
 vin, & au contraire. Il ne se faut donc pas e-
 stonner, si quand le Chou cuit & bouillit, &
 on iette seulement quelques gouttes de quel
 que vin fort & puissant dans le pot, le Chou
 ne cuira plus, mais ayant perdu toute sa for-
 ce, il changera de couleur & se corrompra,
 come a bié remarqué Paxamus, vn d'entre les
 Grecs qui a traité de l'agriculture. Par tous
 ces discours on peut aisément recueillir, que
 ceux qui ont enuie de faire Caroux, & auoir
 le renom & la victoire de bien boire, doyent
 manger à l'entree de leur repas, des Chous
 tout crus, afin de se garder d'enyurer, com-
 me nous auons ia dit ci deuant: Ce que Guil-
 laume Gratarolus medecin fort renommé,
 dit en son liure de la conseruation de la san-
 té, auoir esté experimenté en sa presence par
 vn personnage docte, & qui faisoit professiō
 de Philosophie, car ce personuage estant as-
 sis à table, beut Sorboniquement, sans ia-
 mais refuser pas vn de ceux qui le conuioyēt
 à boire, seulement pour auoir mangé vne pe-
 tite fueille de Chou rouge toute crue, de-

uant qu'entrer à table. Ce sera assez parlé du Chou, i'adiousteray seulement, que s'il est planté en lieu sec & aride, il est fort terrestre & astringent, mais s'il est creu en lieu chaud & humide, il sera de nature toute contraire. D'auantage le Reffort, qui est aussi nommé des Grecs *Crambi*, a les mesmes facultez que le Chou pour empescher l'yurognerie: comme il sera dit en son lieu.

De l'Ache des iardins, autrement appelé Persil & des remedes qu'on en peut tirer,

Quarreau. I I I.

L'Ache qu'on cultiue és iardins est appelé des grecs *Selinon* (côme qui diroit lunatique, à cause de ceste hideuse maladie, d'Epilepsie qu'il irrite & prouoque, comme il sera tâtost dit) vulgairement on l'appelle Persil, les facultez & remedes duquel nous voulons maintenant traiter. Florentinus en ses Georgiques grecques, afin que ie commence par là, enseigne que l'Ache appliqué avec pain, en forme de cataplasme, sert de remede au feu saint Antoine: & que sa decoction chasse la grauelle, come fait aussi sa fomentatiō. D'auantage qu'il est profitable à ceux qui vrinent avec difficulté & aux maladies des reins, tât sa feuille que sa racine: ce que ie trouue auoir esté remarqué par ce Poëte qui a escrit des herbes, quand il traite de l'Ache en ces termes.

L'Ache

*L'Ache crue mangée prouoqu' à vriner.
Encor plus sa racine, prinse en decoction:
Beaucoup plus sa semence, formée en potion.*

Le mesme Florentinus adioust, que si on bafine les lieux meurtris avec la decoction de la semence de Persil, ils retournent en leur naturelle couleur: & que si on pille ses fucilles, & les applique sur les māmelles endurcies cela les amollira. Pline escrit, que la semence appliquée avec blanc d'œuf, ou bouillie en eau & beuë, est vn souverain remede pour les reins: & broyée en eau froide, est profitable contre les vlcères de la bouche: & avec vin vieil, elle romp la pierre en la vessie: la racine a mesme faculté. On baille la mesme semence avec du vin blac à ceux qui ont la iaunisse, & aux fēmes qui ont leurs mois retenus. Quant aux racines qu'ō met au potage, ou qu'on māge avec huyle & vinaigre, en façon de salade: il sera bon d'en vser plustost en hyuer, ou au cōmencement du printemps, ou sur la fin de l'Autonne, que non pas en Esté, & ce à l'entree du repas, soit du disner ou du souper: dautant qu'elles conduisent les matieres du haut en bas, & leur seruent comme de guide, prouoquant l'vrine. Mais ie ne veux pas oublier en ce lieu, que l'Ache de iardin ne sert pas seulement aux reins, mais aussi à la douleur de la colique, & autres maladies procedātes de vētositez encloses, & qui ne peuuēt auoir issue.

Outre ce, le suc d'Ache beu avec miel, chasse par vomissement le sang figé en l'estomach: la semence cuite en vinaigre & eau, fait vriner ceux qui ne pouuoient vriner: & la plante broyée, & mise dās la matrice, tire l'enfant dehors & l'arriere-fais aussi. Que si la femme boit son ius, il luy purgera la matrice de toutes superfluitéz. Dioscoride ne specifie pas particulieremēt à quelle sorte de maladie l'Ache sert, mais dit seulement en general, qu'il est vtile à toutes inflations, disant simplement l'Ache dissout toutes inflations. Toutesfois il attribue au Persil grande vertu contre les maladies du boyau Colon, comme nous auons ia dit: pareillement contre les maladies de l'estomach, & voici ces propres paroles. Le Persil, dit-il, sert de remede contre les inflations & douleurs de l'estomach & du Colon. Avec lequel s'accorde Galien, adioustāt qu'il est fort plaisant à la bouche. Plinē dit, que tout cru il rend l'eau beaucoup plus plaisante à boire. Et Florentinus Grec dit, que si on le mange, il fait que les fluxions qui tombent ordinairement sur les playes, abondent beaucoup dauātage. Son ius incorporé avec miette de pain blanc, corrige, voire oste du tout les enfleures des yeux, & des mammelles: ce que ce poëte herboriste n'a pas oublié parlant derechef de l'Ache en ces sens.

Si dans le suc de l'Ache on met mie de pain blanc,

Et en

*L'Ache
seruiant
aux infla-
tions & à
la colique.*

Et en forme d'emplastre on le met sur les yeux;
 On tiét que cela appaise la grãd tumeur d'iceux.
 Comme aussi des mammelles enflees.

J'auois presque oublié de dire, que Crisippus médecin & Dionisius, disent qu'ils ne font d'aüs qu'on vse ni de l'un ni de l'autre Ache, entendans le masle & la femelle, encóres que du temps de Pliné, comme aussi au iourd'huy on ne voit gueres bouillon ni potage qu'il n'y en ait, pour leur donner goust & faueur, qui est la cause pourquoy Theophraste l'a nommé herbe domestique: la raison que ceux là alleguoyét estoit, que l'Ache estoit dedicé aux banquets des funeraillés & mortuaires, & pourtant qu'il estoit malencontreux & portoit malheur: ou bien comme escrit Plutarque, pource que on faisoit des festons & coronnes d'Ache autour des sepulchres: & de là estoit venu le prouerbe commun il a besoin d'Ache, quand on vouloit dire, il n'y a plus d'esperance de sate. Aucuns toutesfois estiment, que le dire de Crisippus & Dionisius doit estre entendu de l'Ache des marts, pource que il irrite beaucoup plus fort les aeces du haut mal, que l'autre. Mais ceci ne conuient aucunement aux vertus de nostre Ache. On tiét qu'en la tige de l'Ache femelle s'engendre des petits vers, desquels si quelcun mange, soit homme ou femme, il deuient dra sterile. On dit aussi qu'une femme estant

Pourquoy
 l'Ache estoit ancié-
 nement de-
 fendue en
 viandes.

acouchee, celuy qui la tettera apres qu'elle aura mangé de l'Ache, il deuiendra epileptique: toutesfois ils tiennent que le masle est moins nuisible que la femelle, comme escrit Pline, induit par l'aduis & tesmoignage des Anciens. Tellement que ie ne suis pas esbahi si nos medecins, suyuant le conseil d'Auicena, defendent l'Ache à ceux qui sont suiets au haut mal, affermans qu'il fait venir les acces, & les red plus forts: qui est aussi la cause pourquoy les Grecs defendoyēt aux nourrices, aux femmes enceintes, & à celles qui estoient nouuellement acouchees, de mager point d'Ache en leurs viandes: bien est vray, qu'on peut encores alleguer vne autre raisõ c'est qu'il arreste les mois des femmes & empesche l'abõdãce du lait, & incite au ieu d'amour ceux qui en mangent: mais il ne faut pas mettre en oubli, que Celsus met l'Ache entre les choses qui reserrēt & refroidissent, de sorte qu'estant oint avec huyle, aux grandes ardeurs de la fiure, plusieurs ont experimenté avec heureux succes, leur auoir donné vn grand alegement. Ce qui a esté confirmé par Q. Serenus, comme il l'a laissé par escrit.

*Si par grandes chaleurs ton corps est affligé,
Mefle le ius de l'Ache avec huyle d'Oliue,
Puis en frotte tes membres, Et seras soulagé.*

Ie laisseray a parler des autres vertus & facultez de l'Ache, sinõ que les poissõs malades

en leurs estâgs, & viuiers: sont grâdemēt ref-
iouys par luy. Pareillemēt qu'il n'y a riē qui
face meilleure haleine & le soufflé plus doux,
que fait l'Ache maché tout frais & verd, ce
que sçauent fort bien les femmes à louage,
lesquelles portent ordinairement de l'Ache,
& le machent, afin de couvrir la puâteur de
laquelle elles sont pleines, & rendre leur souf-
fle plus souëf. I'estoys prest à mettre fin à ce-
ste histoire des remedes qu'on peut tirer de
l'Ache, lors que troys choses notables me
sont venues en memoire & bien à propos.

La premiere est qu'il se faut bien garder de
mâcher de l'Ache là ou on craint la piqueu-
re des scorpions, comme a remarqué Albu-
cher. *Trois dra-
ses nota-
bles de l'a-*

bater escriuant a Almanfor roy des Sarra-
fins. La seconde est que les cuisiniers ostent
ordinairement le vin-aigre de leurs fausses
par le moyen de l'Ache mis en vn sachet, &
les tauerriers la mauuaise odeur de leurs
vins, cōme l'affirme Plin. La troisieme est
que le Petroselinum, l'Hipposelinum, l'Eleo-
selinum, l'Oreoselinum, & l'Ache rustique,
sont plantes si approuchantes de naturel, & si
semblables en leurs facultez, que les herbo-
ristes attribuent bien souuent à l'vne, le nom
de l'autre. Quant à l'Hipposelinum, i'ay quel-
que fois estimé (afin que ie die cela en pas-
sant) que Gaza auoit fort bien rencontré l'in-
terpretant Equapium, c'est à dire, Ache de

cheual, non pas à cause de sa grandeur, comme aucuns estiment, mais pource que c'est vne viande fort bonne & plaisante aux cheuaux lassez & recreus: Ce qu'estant fort bien cogneu par ce troys-fois grand personnage Homere, il escrit qu'Achiles donna pour pasture aux cheuaux des ambassadeurs d'Vlices & de Phœnix, qui estoient lassez, de l'Ache des marcz, qu'on appelle Eleoselinum, & aucuns Paludapium. Dequoy Plutarque en ses Banquets, rendant raison, dit que les cheuaux qui cessent du trauail accoustumé, sont subiects à auoir mal aux pieds: à quoy l'Ache est vn remede souverain. Et en ce lieu Plutarque ne met aucune difference entre l'Apium Eleoselinum & Hipposelinum, à cause de la grande affinité & conuenance de leurs facultez & remedes. C'est donc assez parlé de l'Ache des iardins & du Persil, lequel nous auons confondu avec l'Ache commun, pour la ressemblance des remedes, sans qu'on nous puisse imputer cela à grande faute.

Du Pourpier & de ses remedes, lequel se col-

lecte & se colup **Quarreau III:** *se collecte & se colup*

LE Pourpier ou Pourcelaine, ou Pourchail le, est vne herbe entre celles de iardin, laquelle on met es potages en son tēps, & fait souuent l'entrée du repas & à riches & à po-

ures

ures, accoustree avec sel, huyle & vinaigre. Elle est de nature froide & humide, aussi est elle propre à corriger aucunement les fluxions bilieuses & fort chaudes, & si aide grandement à ceux qui sont tormentez de fièvre ardente. Ce que n'a pas esté caché au poëte herboriste, qui en escrit comme s'ensuit.

*Par sa froideur humide elle aide grandement
Aux fieures Causoniques l'appliquant seulemēt
Sur l'estomach: le mesme le suc accomplira
Estant beu, ou bien l'herbe quād on la maschera.*

*Causoniq.
C'est a dire
ardantes.*

Elle guérit les dens agacées, pour auoir mangé quelque chose aigre, austère, ou froide, si seulement on la mache: Elle est aussi propre cōtre les Heresipeles & feu saint Anthoine, & rabat les assauts de Venus & ses songes: el le appaise les douleurs de teste, procedantes de la chaleur du Soleil, si on la mesle avec huyle rosat: C'est aussi vn souverain remede aux playes qui sont dangereuses de tomber en gangrene & mortification, si on l'applique dessus avec Griotte. Dauantage elle sert de remede aux enfans desquels le nombril pend, si on l'applique: & r'asfermit les dēs qui branlent, si seulement on la masche: & si appaise les vlcères de la bouche & palais & de la racine de la langue, & les tumeurs des genciues, par le moyē de son suc. Chasse les vers ronds qui s'engendrent dans le ventre, soit qu'on prenne de sa decoction, ou de son eau

distillee, & beuë avec vin, elle arreste les distenteries, d'ou vient que le mesme Poëte en parle en ceste sorte, comme ie l'ay traduit.

*Maschee ou beuë elle peut empescher
Le flux de sang, & le ventre arrester.*

Leontinus Grec, qui est vn de ceux qui ont escrit de l'agriculture, a laissé par escrit, que vne fueille de Pourpier mise sous la langue de ceux qui sont alterez, leur appaise la soif, & leur oste l'appetit de boire: & que si on s'en frotte par plusieurs iours les verruës elles se perdront: ce que Pline n'a pas aussi oublié: adioustant dauantage que son suc incorporé avec miel, ou avec terre Cimolienne, guerit les inflammations des mammelles & de la podagre. Ceux qui ont l'estomach froid doiuent corriger la trop grande froidure du Pourpier avec Menthe, Fenail, ou quelque autre herbe semblable, qui soit chaude. Mais i'auois presque oublie, tant ie suis oublieux, de dire que le Pourpier a vne vertu admirable d'adoucir les grandes chaleurs des fieures, si estant broyee avec farine d'Orge, on l'applique sur les flancs & sur la region du foye. Dauantage, trempee dans du miel, machee, & retenue quelque tēps en la bouche, sert grandement aux petites inflâmtions & vlcères de la bouche. Pareillement, sa racine seichee, puis pillée avec miel, & reduite en forme d'onguent, aide grandement

aux

aux creuassés des leures, & des autres parties, & n'aide pas moins aux douleurs des playes, si on l'applique avec huylle & Griotté. Que si on la faict vn peu cuire, elle est de grande vertu contre les hemorragies & flux de sang. Nous adiousterons pour le dernier, que les Anciens ont cogneu par expérience, que le suc du Pourpier arreste merueilleusement le crachemēt de sang: voire mesme l'herbe prise en quelque sorte qu'on voudra. Que si on la mange avec vinaigre, elle profitera grandement aux ardeurs de l'estomach.

De la Bette, Poree, ou Reparee, & des remedes qu'on en peut tirer. Quarrean. V.

Claude Galien tient que ceste herbe a vne certaine faculté nitreuse, par la vertu de laquelle, elle mondifie & nettoye les ordures: mais ceste faculté est plus apparēte en la Poree blanche, tellement qu'elle irrite le ventre, & si mort & pique l'estomach, qui a vn sentiment fort exacte, & si offence aucunement le foye: Ces deux dernieres facultez sont proprement exprimees par Eobanus Hessus en ces deux petis vers, comme ie les ay tournéz.

*La Bette crue nuit, mais cuitte elle profite
Mangée trop souuent le foye & ventre irrite.*

Diphilus medicin qui a traicté de lagricul-

ture, enseigne que la Poree blanche lasche le ventre, & la rouge prouoque l'vrine. Aucuns blasme la noire, pource disent-ils, que elle engendre vn sang melancholique. Son ius tiré par le nez purge le cerueau: distillé dās les oreilles, appaise la douleur d'icelles: si on s'en frotte appaise la douleur des dens: Si on se frotte la teste avec le suc de Poree, on sera garéti de la Rasche ou Tigne, & si on tire par le nez le suc de sa racine, on appaisera la douleur des dents. Si quelqu'un a les mules aux talons, & il les bafine avec decoction de Poree, il sera grandement soulagé: & si on faict cuire les fueilles, ce sera vn fort bon remede pour les brusleures. Je di dauantage, que le frequent vsage de la Poree aide grandement à ceux qui voyēt mieux de nuict que de iour, que les Grecs appellēt *Nictalopes*. Et si on fait iniection de la decoction de Poree & de Blette en la matrice, ce sera pour corriger les vices qui y sont. On fait bien aussi cuire la Poree rouge avec des lentilles, pour restreindre le ventre trop lasche: au lieu que la blanche, cōme nous auons dit, lasche le ventre, laquelle estāt cuitte & prinse avec des Auls crus, chasse la vermine du vêtre. Et si est beaucoup plus propre aux obstructiōs du foye, que nō pas la Malue, mesmement si on la mäge avec Moustarde, ou vin-aigre: estāt aussi mangée elle sert merueilleusement aux Rateleux: De sorte

forte qu'estant ainsi accoustree, on la pour-
roit bien plustost appeller medicament, que
non pas aliment. Menander, qui est vn medi-
cin & Agriculteur d'entre les Grecs, dit que
la racine de Poree rostie, esteint la mauuaise
senteur des Auls, si on la mange apres. Celle
qui a les racines rouges, ou rougeastres, com-
me elle est de plus grād nourriture, aussi en-
gendre-elle vn sang plus grossier, que nō pas
les fueilles: & si ont cela dauantage, qu'elles
engendrent aisement des ventositez, encores
qu'au reste elles passent legeremēt par le ven-
tre. Vray est que cest herbage, comme aussi
tous autres, est de peu de nourriture: que si
on en mange en quantité, comme nous auōs
ia dit ci deuāt, il fasche & offense l'estomach.
Il a neātmoins ceste vtilité, qu'estant cuit en
eau-miel, il purge & nettoye les excremēs du
ventre, cōme l'a escrit Diocles Carystius, hō
me par le tesmoignage de Pline, second à Hi-
pocrates & en aage & en renom, en vne epi-
stre excellente qu'il escriuit à Antigonus, du
presage des maladies, des signes d'icelles, &
de la curatiō par remedes prins es iardins: La
quelle epistre nous auōs depuis n'agueres mis
en lumiere pour le profit public, avec vn pe-
tit traitté du Sené, qui est vne plāte fort pro-
fitable, & de laquelle on peut receuoir beau-
coup de benefices. Au reste ie ne veux pas
oublier que (comme nous auons dit ci de-

uant) le vin qui perd sa faueur par le moien du Chou, la recouure si on faict tréper seulement quelques fueilles de Poree dans le tonneau. Si tu veux auoir biẽ tost du vinaigre, il ne faut sinon piller la racine de Bette, puis la ietter dans du vin, & troys heures apres tu auras du vinaigre: que si tu le veux faire retourner en son premier estat, il ne faut qu'y ietter vne racine de Chou. Mais nous deuiõs auoir reserué ces choses, au traicté que nous auons faict des secrets & remedes pour les vins: duquel nous ne ferons iamais participãs les tauerniers, que premierement ils n'ayent desisté de brouiller leurs vins & les meller, au grãd preiudice & dommage de plusieurs.

De la Blette ou Saune, & de ses remedes.

Quarreau VI.

ON tient la Saune pour vn herbage inutile à l'estomach, & qui renuerse tellement le ventre, qu'aucuns en prennent ceste maladie qu'on appelle Cholere, & flux de ventre, vomissemens, avec grands tormẽs de boyaux, à cause qu'elle esmeut l'humeur bilieux: ce que se doit entendre quand on en mange trop grande quantité & trop souuët. Et de la est venu que Pline la nomme herbage fade, sans goust, & sans acrimonie aucune: & le poëte Heflus, herbage sans vertu, & qui ne sert à rien qu'à lacher le vêtre: & voy-
cy ses

cy ses vers selon que ie les ay traduits.

*Sans faueur ni vertu est la viande ou Saune
entre*

Ayant ce seul usage de bien lascher le ventre.

De c'est herbage qui est ainsi sans vertu ni faueur, les Latins ont prins la denomination des hommes sans gouft, qu'ils appellēt Blitei: Bien est vray que les Anciens Grecs ont aussi appellē *Blitous*, ceux que les Latins nommēt *Stolidi*, *Fatui*, & *Blitei*: de là est aussi prins le mot cōmun & vulgaire qu'on appelle *Blitres* ou *Belitres* ceux qui ne valēt rien, & qui ne ont point d'esprit, ni de gouft. C'estoit aussi l'iniure que les maris disoyēt à leurs femmes, comme le recite Menander. Aucuns tienēt que la Saune beuē avec vin, est vtile cōtre les scorpions: & enduite, elle est vtile aux clous qui viennent es pieds: semblablement elle profite à la rate, & à la douleur d'icelle, meslee avec huyle. Hippocrates, selon que le recite Plinē, tient que par le moyen de ceste herbe mangée, on peut arrester les mois des femmes. Mais il se faut bien prendre garde, que les Anciens ont confondu le *Blitum* qui est nostre Blette ou Saune, avec *Beta* qui est nostre Poree ou Reparee, d'oū est venu que Martial a appellē la Bette ou Poree, fade & sans faueur, & voicy ses vers.

En non d'er. Biquou. E. i. d. d. f. f.

O que le cuisinier souuent & vin & poivre
Demandera afin qu'au desjeuner du febreux
La Blette fade ait goust-

Biē qu'à la vérité elle aye vn goust nitreux,
& non pas fade & sans goust, comme la Saun-
ne: à cause de quoy son ius tiré par le nez, fait
sortir la morub & phlegme, principalement
la Réparée blanche. Je laissois vn remede, ou
deux qu'on peut prendre de la Saune: Le pre-
mier est que l'eau de sa decoction, & princi-
palement de la bouge; racines & tout, reme-
die aucunement aux furfures & peaux mor-
tes qui tombent de la teste. L'autre est, que
ses fueilles cuittes sous la cendre, ou bouillies
en eau, seruent de remede contre les brusleu-
res. Souuenez-vous bien qu'il y a moins de
goust aux Saunes qu'aux Bettes, & si est plus
fado & humide: aussi engendrent-elles la cho-
lere, cōme font aussi les Courges, & Poupōs
car ne pouuās pas esueille la faculté expultri-
ce, & se iournant longuement, ils corrompent
la viande, & de là procedēt les vomissemens, &
les agitatiōs, & troubles du vêtre, avec force
venositez: cōme a doctement remarqué Pier-
re Sena. *mutillol ubi notio no saia A d*

De l'Oseille ou Saliette; & de ses remèdes.
sup un v. de Quatreau. *II. no 1000*

Cette herbe a prins le nom d'Oxalis entre
les Latins, à cause de son suc aigre, d'ou
est aussi venu que plusieurs la nomment Ace-
teuse

teuse, & le vulgaire François la nomme Ozeille. Il s'en trouue de deux sortes, l'une grande, l'autre petite. On se sert de toutes les deux pour mettre es potages, & pour dōner goust aux salades: mesme on en fait de la sauce verte, pour y tremper la chair, qui est de fort bon goust & resueille merueilleusement l'appetit: & ne se fait gueres festin, qu'il n'en y ait. J'ay experimenté, cecy de l'Ozeille, qu'il n'y a chair si dure, ni si seiche, qu'elle n'atendrisse & rende propre à manger, si on les faiēt cuire ensemble; & l'ayant vn peu faicte tremper, on la faiēt bouillir: car elle est de nature humide, par le moyen de laquelle elle amollit les choses dures. Mais d'autant que ceste faculté est beaucoup plus forte & plus vigoureuse en l'Oxilapathum, & au Lappathū, que en l'Ozeille, ie suis beaucoup mieux venu à bout de mon intention, asçauoir, d'atendrir la chair, par le moyen d'iceux, que par l'Ozeille des iardins, laquelle se recouure aisément & sans grande peine, & s'en sert-on ordinairement pour reueiller l'appetit perdu, ou pour adoucir l'ardeur de l'estomach ou du foye, si besoin faiēt: ce que le poëte herboriste n'a pas ignoré, ni teū, escriuant de l'Ozeille en ce sens.

*Plusieurs à la prime vere en mangent non
si pas petit: l'ou si si l'estomach n'est
Sachans par experience qu'il resueille l'appetit.*

○ La semence des deux Ozeilles brôyée en eau ou vin, & beüe, sert grandement aux disenteries, coliques, soulcuemens de cœur & appetis de vomir. Les racines cuites en vinaigre, ou crues & enduites, guerissent la gratelle & le mal saint Main: mais il faut premierement auoir frotté le lieu avec vin-aigre & nitre au Soleil. Aucuns se seruent de toute la plante, côme aussi du *Semperuiuum minus*, cõtre les Heresipeles, & dartres ou fens volages, mesmes aux enfleures des yeux, appliquee en forme de cataplasme. Pareillement contre les gouttes chaudes des pieds, incorporee avec Griotte, & contre les douleurs de teste enuieillies, enduite avec huyle rosat. Appliquee sur la matrice, elle arreste les purgations ou fleurs blanches des femmes, comme dit Dioscoride: mais non pas les purgations ordinaires, qui viennent tous les mois côme estime le poëte herboriste, en ces vers.

Prinse avec vin ou maschée souuent

Tout flux de ventre arreste incontinent

La decoction de ses racines appaise la demangeison, si on s'en laue ou frotte le corps dans les estuues; elle appaise aussi la douleur des dens avec vin. Aucuns pour amolir les escrouelles, cõseillent de porter de ces racines pendues au col: lesquelles aussi estans beües avec vin, remedient à la iaunisse, toutesfois l'*Oxilapathum* ou Parelle, est plus efficace.

en toutes les opérations, que n'est pas l'Ozeille. Apulee faisoit vne composition pour le Bubon ou tumeur qui viét en l'Eine, en ceste sorte: Il prenoit de l'Ozeille, & la piloït sans point de sel, puis y adioustoit de vieil Oinct, au double de l'herbe, & les ayans bien pestris ensemble, en faisoit vn petit gasteau, lequel il enuelopoït dás vne fueille de Chou, & le mettoit sous la cendre chaude, & puis le mettoit tout chaudement sur le Bubon: & le bendoit & couuroit avec vn linge. Cuitte en vin bruse & rude, & beuë, elle corrige le degoustement & appetit desordonné des femmes enceintes, ce que faict aussi la decoction de Citron. Je ne veux pas laisser passer que ie ne die que la racine d'Ozeille cuïtte, ou seulement trempée en eau, faict que l'eau a vne couleur fort approchée d'un vin cleret, qui est vne bonne tromperie pour les malades febricitans: ses fueilles enuelopees dás du papier, & vn peu eschauffees so^r les cédres chaudes: puis meslees avec vn peu de miel rosat, sont propres à faire suppurer toute sorte de tumeurs. I'ay cogneu vn certain personnage qui n'appliquoit autre remède pour la guari son des dissenteries des petits enfans, si n^o cestui-cy: Il faisoit tréper l'Ozeille en fort vinaigre, puis il trempoit des estoupes dans le mesme vinaigre, & les faisoit vn peu cuire sous la cédre, & pressoit les estoupes pour en

faire sortir le ius, lequel il faisoit boire tout chaud. I'auois presqu'oublié de dire, que l'Ozeille est d'une vertu admirable contre la contagion de la peste; si l'ayant faite tremper en vin aigre, on en prend de matin: ce qui a esté expérimenté avec heureux succès; comme nous l'auons clairement monstré en nostre traité de la Peste. Il ne sera toutesfoi hors de propos ni sans profit, de produire ce que Ant. Gainier medecin de Pauie en a escrit: traitant de la Peste: l'Ozeille, dit-il, a une vertu admirable contre la Peste; comme ie l'ay aprins de quelque personnage digne de foy; lequel estant en vn lieu où la Peste estoit bien forte; ne changea iamais de lieu; estant secouru par le moyen de ceste herbe: de laquelle il faisoit prendre tous les iours, deuant disner & deuant soupper, à chacun de ses domestiques, vn morceau: & si on n'en pouuoit recouuer de la fresche; il en auoit fait seicher; & mis en poudre; de laquelle il leur faisoit boire avec vin blanc: il vsoit aussi par fois des pilules de Rufin, contre la Peste: & aduint par ce moy que pas vn de ses domestiques ne fut surprins de la Peste. Le mesme Gainier dit dauantage, que l'Ozeille mangée; non seulement guérit la piqueure du Scorpion, mais si on en a mangé auant qu'estre piqué; il ne permettra que le venin face aucun dommage au corps: ce qu'Auicenna auoit

uoit desia remarqué & laissé par escriptz auant que luy. Je diray pour la fin, que nos femmes illetes ont acoustumé de mettre de l'Ozeille sur le poignet de ceux qui sont tormentez de la fieure, qui ne se faict phs sans profit, ad non

Des Espinars & des remedes qu'on en peut tirer
Quarreau VIII.

C'Est merueilles que les Espinars ayent esté incogneus aux Anciens, veu qu'on en void les tables des riches & des pauues en estre couuertes quand ce vient en Carcme, desquels aussi ils fareissent leur ventre. Les Espinars laschent le ventre & humectent le corps, & si engendrent force ventositez, sinon qu'on en oste l'humidité superflue, ou qu'on la corrige avec quelque chose chaude. Au reste pource qu'en apprestant ces herbagés plusieurs y cōmettent de biē lourdes fautes, ce ne sera pas peut estre, mal-faict, si i'en fay icy vn sommaire recit. Il faut premiere-ment oster tous les petis filets qui sont en la racine, puis les faire cuire sans eau, car ils iettent assez d'humidité d'eux mesmes, en les faisant cuire, sans qu'il soit besoin d'y en mettre d'autre: que si tu les fay cuire autrement, tu osteras leur suc naturel, & gasteras tout: apres qu'ils ont bouilli, il faut ietter là le suc, & les biē hacher avec vn couteau de boys, ou

attremment, & les tourner souuent, cela fait
il les faut prendre entre les mains, & les ser-
rer bien fort, pour en faire sortir toute l'hu-
midité, puis les fricasser dans la poille avec
bon huyle, ou avec beurre frais, y adioustant
vn peu de Verius, & vn bien peu de poiure
pilé, afin qu'ils ayent meilleur goust, & que
l'humidité venteuse en soit ostee : Mais ie ne
suis pas icy pour traicter de la cuisine, mais
seulement de la médecine, parquoy ie me veux
arrêter à traicter ce qu'appartient aux médi-
cins, & laisser aux cuisiniers leur cuisine.

De la Bourrache, & de ses remedes.
Quarreau IX.

LA Bourrache, que plusieurs tiennent pour
la vraye Buglose, est vn herbage les fueil-
les duquel on met souuēt es potages, pource
qu'il est sain, & y dōne fort bō goust: mesmes
plusieurs vsent en hyuer de sa racine, au lieu
de la fueille, lors qu'ils n'en peuuent pas recou-
urer: sa fleur est fort plaisante en Esté pour
les salades. Ceste herbe a vne singuliere ver-
tu de resiouir, à cause de sa bōne senteur, car
elle sent naifucement le Poupon, & cōme dit
Galien, elle recree l'esprit, si on la met trem-
per dans le vin. D'ou est venu que les Grecs
luy ont donné vn nom qui signifie resiouis-
sante ou recreatiue, & vn autre qui signifie
chassant

chassant tristesse, à quoy a fait allusiō le vers,
duquel on vse communément.

Dicit Borrage, gaudia semper ago.
La Borrache se vante, d'estre tousiours resjouys-
sante

Aucuns disent que ceste plante est vtile
contre les frisons des fieures, & que la racine
qui aura ietté trois tiges, pilee avec la semen
ce, & cuitte dans du vin, est profitable con
tre la fieure tierce, & celle qui en aura ietté
quatre, profitera contre la fieure quarte, ce
qui est confirmé par Dioscoride. D'autres
attestent qu'elle est fort vtile contre les ab
sces. Galien escrit qu'elle profite grandemēt
à ceux qui sont tourmentez de la toux, à cau
se de l'aspreté du gosier, si on la fait cuire en
vin-miel. Plinc adioust, que si quelcun préd
la Borrache, lors qu'elle commence à flestrir
& qu'il oste la mouëlle de la tige, puis qu'il
l'enuelope de sept feuilles auant que l'accès
le prenne, il sera entièrement gueri de la fie
ure. Le poëte herboriste, suyuant le dire des
Arabes, rend à la Borrache le tesmoignage
qui s'ensuit.

Si par adustion la colere est bruslee,
La Borrache la purge prisee avecques du vin:
Si par humeurs malins la poitrine est pressée
Son suc prins en eau tiede est un secours diuin.

Il adionste dauantage, asçauoir qu'elle est
fort vtile aux afflictions du cœur, & à ceux

qui font tourmentez de la ſciatique : & qui plus eſt ſi on la fait ſouuent trempier dans le vin qu'on boit ; elle rend la memoire ferme & viue. Je ne me taiferay point de ce que i'ay entendu auoir eſté experimenté. Si vne femme apres eſtre accouchée, ne peut biẽ vuider, qu'on luy face boire du ſuc de Borrache, de Porreaux, & de Perſil, avec du vin & huyle d'Amandes douces, & on verra merueilles. Si outre cela tu luy fais vn parfum avec de corne & d'ongles de chieure, tu esbranleras grandement la matrice, pour chaſſer & ietter hors toutes lées ſuperfluites qui reſteront apres l'enfantement.

Des Aſperges & de leurs remedes.

Quarreau X.

IE veux bien aduertir le lecteur, que les Grecs appellent communément & d'un mot general Aſperges, tous les bourgeons ieunes & tendres, tant des herbes que des arbriffeaux. Mais ici nous ne parlons que de ceux qu'on plante & noutrit és iardins, auxquels on a donné ſpecialement le nom d'Aſperges. On tient que c'eſt vne viande fort plaiſante à l'eſtomach: que ſi on y adioute vn peu de Cumin ou d'Anis, il diſſipera les ventofitez contenues au ventre & au boyau Colō, prouoquera l'vrine & chaſſera la grauelle. Aucuns baillent à boire la racine avec vin
doux

doux, contre les douleurs de l'Amaris: & tiennent que si quelcun s'estoit oint avec huyle, dans lequel on eut pilé des Asperges, il ne pourroit apres estre picqué des mousches à miel, Pline a escrit que les Asperges sont fort profitables aux douleurs de la poitrine, & de l'espine; qu'ils rendent hardi au ieu d'amour, & laschent doucement le ventre: mais il les faut prendre avant toute autre viande: ceux là donc faillent bien lourdement, qui les seruent tout à la fin du repas. Dioscoride dit, que soit qu'on les mange rostis ou bouillis, il appaisent la maladie en laquelle on n'vrine que goutte à goutte, la difficulté d'vrine, & la dysenterie. Galien dit que les Asperges deliurent de tout empeschement les reins & le foye, principalement leur racine & semence. Ce que Quintus Serenus n'a pas oublié en cest amas de remedes, qu'il a mis en vers poetiques, là ou il dit en ceste sorte, traitant des remedes pour la longie, & pour les reins: *Asperg. l. 1. v. 11*

*Prends avec vin, d'Asperge le fin bout
Ou bien l'applique, pour en venir à bout.*

La decoction de la racine est vtile à ceux qui yrihent avec difficulté, & si sert de remede à ceux qui sont tormentez de la douleur des dens, si seulement on la tient sur lo lieu ou est la douleur. Mesme il y'en a qui tiennent que si vn chien auoit beu de la decoction d'Asperges, il en mourroit, si cela est vray

ou non, il ne faut sinon l'experimenter: ie ne veux pas oublier de dire que les Asperges ne veulent gueres cuire, car si on les fait cuire l'onguement, ils se flestrissent tous. Et de là estoit venu que Drusus l'Empereur, voulant enseigner le soudain succes de quelque chose, auoit accoustumé de dire: plustost qu'un Asperge ne seroit cuit. Si on les fait bouillir dans du bouillon gras, il n'y faut point d'autre sauce, mais si on les fait cuire en eau simple, il y faut mettre apres du bon huyle, ou du beurre frais, avec vn peu de sel & de vinaigre, & vn bien peu de poiure, & ainsi accoustrez, ils sont fort plaisans à manger. Mais ie me suis encor oublié à ce coup, que ce n'est pas de la cuisine que i'ay à traiter, mais de la medicine.

LE SECOND SILLON
du Iardin Medicinal, où il est traité de quelques racines bones à manger, desparties en quatre quarreaux.

Du Porreau de iardin, & de ses remedes,

Quarreau I.



AYANT à discourir de quelques racines bones à manger qu'on prend és iardins, il m'a semblé bon de cōmencer par le Porreau: lequel, comme dit Sotio és preceptes de son agriculture Grecque,

que, estant pilé & appliqué sur la morsure des animaux qui se trainent, les guerit plus soudain qu'autre remède qu'on y sçauroit appliquer: & la semence beüe avec vin cuit, sert de remède aux difficultez d'vrine. Dauantage elle aide aux crachemens de sang enuieillis, si on en prend vne moyenne quantité, avec pareille mesure de Bayes de Myrthe, ou de Galles, & de farine d'encës dans du vin, pour ueu qu'il n'y ait point de fieure. Hipocrates ordonnoit d'en prendre sans y meller autre chose: il defendoit toutesfois d'en vser trop souuent, & en trop grande quantité, pour ce qu'ils nuisent à la veüe, & endommagent l'estomach. A quoy Eobanus Héssus a fait allusion en ces vers disant: *(image)*

*Les Porreaux à la veüe apportent grãd dom-
Et chargent l'estomach, si par trop on en mange.*

On les pourra rendre moins nuisibles, si on les fait cuire, iusques à ce qu'ils soyent presque tous en pâte, car ainsi accoustrez, on ne les estime pas moins nourrissans que la chair, bien est vray qu'ils sont mal-aisez à cuire en l'estomach, à cause de quelques filamens qu'ils ont. Le suc des Porreaux tout cru, prins en grande quãtité, est nommé par Pline entre les venins: car le commun bruit est que Mela de l'ordre de cheualerie, estant coupable d'auoir mesusé de la charge qu'il auoit des affaires de Tiberius, & estant appe

lé par luy, ne sachant plus que faire, il beut de suc de Porreau, au pois de trois deniers d'argét, & soudain il mourut, sans aucun torment. Le Porreau pilé avec du miel, mondifie les vlcères: & son suc beu en petite quantité, avec lait de femme, arreste la trop grande perte des femmes, qui ont fait leurs enfans auant le terme, appaise la vieille toux, cōme à remarqué le poëte herboriste en ces vers.

*Si le suc de Perreau on boit en lait de femme
Il appaise la toux tant vieille qu'elle soit.
Remediant aux maux que le poulmon entame.*

Ceux qui seront mordus de ces petites bestioles venimeuses, & en boiront avec vin, en sentiront vn grand soulagement. Pareillemēt si on mesle vne certaine quantité de son suc, avec vne tierce partie de miel, & qu'on le distille goutte à goutte dās le nez ou dās les oreilles pourueu qu'il soit tiede, on guerira les douleurs de teste, procedātes de froidure: si on mesle de son suc avec vinaigre, ou qu'on l'incorpore avec noix de Galle, puis qu'on l'enduisse sur le front, il arrestera le sang coulant par le nez: & aduiendra le mesme si on le met dans les narines, incorporé avec poudre d'encēs. Mesme prins avec miel, c'est vn bon remede contre les maladies de la poitrine. Il est bon de n'oublier pas ce que Galien a remarqué, aſſauoir que l'acrimonie du Porreau diminue fort, & n'enfle pas tant, si on le fait cuire en deux eaux, ostant la preiniere, &

y mettant d'autre eau froide, & ainsi accou-
stré, on estime qu'il arreste le flux de ventre,
& adoucit la voix enrouée, applanissât le go-
sier par sa lèteur. Voila pourquoy les perdrix
(si on veut croire Aristote) mágēt coustumie-
remēt du Porreau, afin d'auoir la voix plus re-
sonāte. Il ne faut dōc pas s'esmeruiller beau-
coup si Nerō auoit accoustumé de mager de
Porreaux avec huyle, certains iours du mois,
pour embelir sa voix, lors qu'il estoit en dis-
pute avec Phonnascus, à qui l'auroit plus reso-
nāte, durāt lequel tēps il ne mägeoit rien au-
tre chose, non pas mesme du pain, comme re-
cite Pline: lequel estime que cela se doit entē-
dre du Porreau qu'il nōme Sectius, auquel
le mesme Nerōn dōna la vogue. Aucuns ont
expérimenté que le suc de Porreaux prins a-
vec vin, appaise la douleur du Rable: & appli-
qué reunit les rompures. Que diray ie plus.

Par son suc tu gueriras la matrice retiree

Et la fille tu feras fertile en belle lignee.

Il ne faut pas dissimuler ce que Dioscori-
de, Pline, & Celsus en disent, asçauoir que le
Porreau à vertu de restreindre; & d'arrester
le sang, comme nous auons ia dit, & pourtāt
qu'il est bon de l'appliquer sur les playes: ce
que Q. Serenus à elegāmēt mōstré en ces vers

Si d'une playe fresche le sang coul' à ruisseaux
Restrein le avec cendre de Fenail ou Porreaux.

La semēce du Porreau pillee & beuē avec
vin cuit, ou avec vin blāc fort & puisstāt cōme

nous auons dit, oste les difficultez d'vriner, & ouure les conduits de l'vrine, & si avec le ius de Porreau on mesle de la graisse de canard, & puis avec celà on engraisse le col de la matrice apres les purgations des mois, on adoucira la matrice retraite. Le mesme suc beu avec eau tiede, a vne singuliere vertu pour faire sortir l'enfant de celles qui sont au trauail. I'ay entendu de quelques vns qui disoyent l'auoir experimēté, que la semence de Porreau pilee dās l'eau ou dās le suc de Plātain, avec de Myrrhe, sert de remede souverain contre le crachement de sang, venant du poulmon ou de la poitrine. Et la mesme semence prinse au poids de deux dragmes, avec quelques grains de Meurthe, dās de l'eau de Pourpier, a la mesme vertu & operation. Au surplus la vapeur de la decoction des fueilles de Porreau, de Sauge, & de Laurier, faite en quelque vin puissant, receuë par le fondement, & les herbes appliquees chaudement sur le ventre, ont vne singuliere vertu pour appaiser la douleur qui suruient, voire mesmes la colique: ce qui a esté souuent experimēté, cōme aussi ce que s'ensuit, a sçauoir que le suc du Porreau qu'on coupe, prins avec miel, purge la matrice, & beu avec vin puissant, prouoque les mois. Si on en mange souuent (comme on dit) il rend fertile & fecond la personne. Et si on pile le Porreau avec en-

uéc encës, ou avec Nois de galle, puis qu'on le mette dans le nez, on arreftera le fang qui en coule. Au reſte ſi quelcun veut experimenter, aſſauoir ſi vn mēbre qui eſt preſt à couper, eſt entierement mortifié ſans eſperance de guerifon, il faut prendre le verd du Porreau, & le bien broyer, & le mettre ſur le mēbre toute vne nuit, ſi le lēdemain le mēbre a perdu quelque peu de ſa noirceur ou liuidité, c'eſt ſigne qu'il y a encore vie, mais ſ'il n'en a rien diminué, on le peut hardimēt couper cōme eſtant mort, de peur que la partie ſaine n'en reçoynie dōmage. Vn certain Eſpagnol, grand recherché des ſecrets de nature, m'a aſſuré l'auoir ſouuent experimenté, i'en ay auſſi voulu faire part à la poſterité. C'eſt aſſez diſcoursu des remedes quē l'on peut tirer des Porreaux. Mais auant que laiſſer ce Quarreau Porrique, ce ſera vn plaſant aduertiffemēt, ſi on entend que quiconque aura mangé du Cumin, il ne ſentira aucunement la mauuiſe odeur des Porreaux, encores qu'il en mange tout ſon ſaoul, car par le moyē du Cumin la forte odeur du Porreau eſt eſteinte, comme a enſeigné Sotion, au traité qu'il a fait des preceptes de l'agriculture. Il ne reſte plus ſinon de ſeauoir ce que Petrus Creſcentius a laiſſé par eſcrit, aſſauoir que la ſemence de Porreau iettée dās le vin, le garde d'enaigrir, voire meſme change le vinaigre en vin, luy

ostant toute l'aigreur: ce qu'on pourra aisément experimenter & sans qu'il couste beaucoup, & si on en pourra receuoir mille commoditez. Mais nos tauerriers, vrayes pestes du vin, qui coustumieremēt le brouillēt & falsifiēt, ne sōt pas dignes qu'on leur enseigne ces choses, ni beaucoup d'autres plaisantes & vtils, que nous auōs recueilli en nostre traité des secrets & remedes du vin.

Des Oignons, & des remedes qu'on en peut tirer, Quarreau. I I.

LES anciens qui ont traité de l'agriculture, ont appelé les Oignōs, Vniones, à cause qu'ils n'ont qu'une seule teste, vnue, & non pas composée de plusieurs bulbes & noyaux, cōme ont les Auls: de sorte que nostre nom François est venu de là. Hippocrates a plus recommandé le regard de l'Oignon, que non pas le mager, disant qu'il est bon de le regarder, mais mauuais à le manger, pource qu'il est mordant, fort chaud & bruslant. Sotion qui est vn auteur ancien qui a escrit de l'agriculture & de la médecine, dit que l'Oignon encores ieune & tendre, mangé à ieun avec miel, conserue l'homme en bonne santé. Ce que le poëte herboriste a remarqué escriuāt des Oignons en ceste sorte.

*Qui des Oignons fera son desuiner
Iournellement il viura sans danger.*

Le mesme Sotiō enseigne, que les Oignōs guerissēt entieremēt les vlceres, & qu'ils effa-
cēt entieremēt les taches blāches qui viēnēt
au corps humain, que les latins nōment Vi-
tiligines, si on les en frotte au soleil : & leur
suc est fort vtile à ceux qui ont les oreilles
bouēuses: on tiēt que si on en enduit les squi-
nances, ils y seruent grandement, cōme aussi
à la toux, mais il les faut faire cuire sous la cē-
dre, puis les māger avec huyle. Aucuns asseu-
rent que si on broye les Oignons verds avec
vinaigre, puis qu'on les applique, que ce sera
pour guerir les morsures des chiens apres le
troisieme iour, semblablement estās cuits au
fouyer, & incorporez avec farine d'orge, puis
appliquez, aident grandement aux defluxiōs
des yeux, que les latins appellent Epiphoræ,
& aux vlceres des parties genitalles. Dauanta-
ge leur suc tiede meslé avec laiēt de femme &
distile dans les oreilles, guerit ceux qui oyēt
dur, & qui ont le tintement d'oreilles: lequel
aussi plusieurs ont fait boire avec eau, à ceux
qui auoyent soudain perdu la parole: tou-
tes ces vertus sont exprimees par le mesme
poëte en quelques vers ou il parle des Oignōs
en ceste forte: si i'ay bien tourné.

*Qui dessus la morsure d'un chien l'appliquera
Avec miel & vinaigre soudain la guerira:
D'autres avec vin-miel les broyēt bien ensemble
L'estant trois iours apres, ainsi meilleur leur sem-
ble.*

*Si son suc tu distiles avec lait dans l'oreille
 Pressée de douleur, tu verras lors merueille:
 Le suc aussi humé avec eau remedie
 Au mal qui tout soudain la langue humaine lie.*

Il y en a qui font vser des Oignons à ceux qui ont dissenterie, & disent qu'ils sont grandement profitables aux douleurs du rable: ils affirment aussi que leur suc beu avec suc de Fenail profite aux hydropiques, quand l'hydropisie ne fait que commencer. Lequel seul donné avec Rue & miel, peut reueiller les Lethargiques: & incorporé avec raisins secs, ou avec Figues, meurt les petites apostumes & tumeurs, & les fait rompre incontinct. Le mesme suc tiré par le nez, descharge le cerueu de toutes superfluitez, & de toutes mauuaises humeurs: & mis dans le fondement avec coton, fait sortir les hemorroides. D'auantage, si on frotte vne partie desnuee de poil avec l'Oignon, il y fera renaistre le poil: mesme le seul odeur de l'Oignon, aide grandement aux paralysies & conuulsions. L'Oignon blanc cuit sous la cendre, & incorporé avec bonne quantité de beurre frais, apaise les violentes douleurs des hemorroides, si on l'applique dessus: broyé avec sel & miel: & mis sur la morsure d'un homme, ou d'un chien enragé, si on l'y laisse seulement vn iour le patient en sentira vn soulagement qui ne sera pas petit: Et si on pile l'Oignon avec graisse de

se de poule, se fera pour effacer toutes les taches rouges ou liuides qui aduiennent au corps, principalement en la face. Ce que fait bien aussi le sang d'une poule noire. Le mesme Oignon pilé avec sel & miel, seruira pour arracher tous durillons & porreaux, mesmement ceux qui viennent par la casseure des souliers. I'adiousteray ce qu'en dit Galié: que si on frotte souuét avec vn Oignon, vne partie qui aye perdu le poil, il aidera grandemēt à faire reuenir le poil. Outre ce, si on fait quelque peu cuire vn Oignon, soit dans de l'eau ou dans du vin, puis qu'on le pile, & que on le fricasse en huyle commun: puis qu'on l'applique en forme d'emplastre sur la matrice, ce sera pour oster entierement toutes les douleurs qui restent aux acouchees, apres l'enfantement. Qui fera aussi cuire le mesme Oignon sous la cendre, puis le pestrira avec huyle de lis, il fera vn remede excellent pour meurir & amollir les abscez; mais ie vous prie de n'oblier que l'Oignon par sa seule odeur fait sortir du cerueau grāde quantité de phlegme: Les anciés aussi se seruoient du suc d'Oignons, pour la guerison de toutes sortes de playes des bestes, & s'en trouuoient bien, le faisant seulemēt distiller dedans: Ils nous ont aussi donné aduertissement, que l'Oignon mangé ou beu avec vin blanc, prouoque les mois arreztez: & incorporé avec graisse de

poule, il guerit l'eschauffeur & escorcheur des pieds. Si quelcun fait cuire l'Oignon au foyer, puis qu'il le mesle avec huyle d'Olive, & qu'il le mange, il sera grandement soulagé des morsures & extorsions qui accompagnent ordinairement la dissenterie: & si adoucira les extremes douleurs & fâcheries des hemorroides. Mais les gens studieux & fort addonnez aux lettres, se doyuent bien garder d'vser trop souuent des Oignons, ni des Auls: car ils nuisent grandement aux yeux, obscurcissent la veüe, alterent, & eschauffent dauantage la colere: ils sont toutesfois aucunement vtils aux phlegmatiques, & mesmement en hyuer: ie di encôres avec Galien, que l'Oignon cuit deux fois perd son acrimonie, & est aussi plus foible en ses facultez, ne luy demeurant rien de la mauuâistie de son suc. Mais c'est merueille de ce qu'en dit Plutarque, ascauoir qu'entre tous les herbages, le seul Oignon ne se resent aucunemēt des dommages de la lune, & si a la force de croistre & décroistre du tout contraire à icelle: car lors que la lune s'en va & s'enuieillit, c'est lors que l'Oignon reuerdit & regerme, & au cōtraire, lors que la lune reuiet & raieunit, l'Oignon seiche & flectrit. Et de là estoit peut estre venu l'vsage entre les Pelusiotes, prestres des Ægyptiës, d'auoir desendu religieusement de manger les Oignons

gnons en leurs bâquets, & festins: car puisque toute sorte de fruits, d'herbes, arbres & animaux, se resistent de l'accroissement & de croissement de la lune, d'ou vient que le seul Oignon a ses changemens du tout cōtraires? l'adiousteray pour la fin, que les pelures ou escorces des Oignons cuittes sous la cendre, & appliquees sur les parties bruslees, ostent entierement tout le sentimēt & la douleur de la brusleure, de quoy que ce soit: son suc tiré par expressiō, & appliqué avec des drapeaux tout chaudement, des le commencement, fait le mesme: car il resout les vapeurs acres, & les flammeches de la brusleure, encloses sous la peau endurcie par le feu, & l'ayant aucunement amolie & relaxee, fait qu'elles sortent dehors: ce qu'a esté plusieurs fois experimēté comme ce qui s'ensuit aussi. On prend vn Oignon blâc, & le caue-on du costé mesme par ou il iette ses racines, & dans la cavité on met de fine Theriaque pestrie avec ius de Citrō: puis on rebouche le trou avec la mesme piece qu'ō en auoit ostee, & l'envelope on avec du papier ou du parchemin, & l'ayāt bié lié, il le faut puis apres enterrer sous la cendre chaude, & le laisser là cuire iusques à ce que l'Oignon soit bien mol, tellement que en le pressant on en puisse recueillir le suc qui en sortira, lequel sera merueilleusement vtile & profitable à ceux qui sont

affligez de peste:mais il les faudra incontînēt apres faire fuer. Le meſme Oignon caué cōme nous auons dit, puis rempli de graine de Cumin en poudre, cuit & preſſé, eſt vn fort bon remede contre la durté d'ouye, ſi on diſtille le ſuc qui en fort dans les oreilles. L'Oignon eſt auſſi fort ſalutaire mangé avec ſuc-cre ou miel,eſtant premierement bouilli, ou cuit ſous la cendre, à ceux qui reſpirent avec difficulté,aux Aſthmatiques ou pouſſifs,& à ceux qui on la toux, ſi ſeulement on y adiouſte vn peu de beurre frais: la groſſe eſcorce ou pelure des Oignons, cuite ſous les cendres chaudes,ſert de remede contre les douleurs enuieillies de la teſte, ſi on en met vne petite piece encores toute chaude, dans l'oreille du coſté malade, y adiouſtant vn peu d'huyle Roſat, & d'huyle Laurin, puis enue-lopant biē toute l'oreille avec laine enſuyee. Ces choſes ſont eſcrites, non pas pour les riches,mais pour les ruſtiques, & pour le ſimple peuple.

Des Auls de iardin, & des remedes qu'on en peut tirer. Quarreau III.

IL n'y a perſonne, tant ſoit il peu verſé en la cognoiſſance des choſes ruſtiques qui ne ſache fort bien, que les Auls ſont fort en vſage entre ceux qui demeurent aux champs & qu'ils

& qu'ils s'en seruent bien souuent pour remede en leurs maisons champestres. Aussi y a il vn d'entre les Grecs qui a escrit de l'Agri culture & de la medicine, qui dit que les Auls mangez, ou seulement pendus droit sur la region de l'estomach, chassent la vermine du ventre & appliquez en forme de cataplasme, qu'ils aident grandemēt à ceux qui sont mordus des viperes, ou d'un chien enragé, voire mesmes que si quelcun a premieremēt mägé des Auls, il sera asseuré cōtre le venin des ser pēs, & de tous autres animaux qui se trainēt. Dequoy nous produirons pour tesmoin (apres le tesmoignage que les mediciens Grecs, Arabes, & Latins en ont rendu) Eobaldus Hefsus, poëte fort excellent, lequel escrit des Auls en ceste forte.

*Mal aisé est de pouuoir amasser,
Droque qui mieux aux venins remedie:
Leur seule odeur peut bien au loin chasser
Le serpenteau qui guette nostre vie.*

Ce qui a esté confirmé long temps aupara uant par le poëte herboriste, disant,

Si quelqu'un est piqué de Scorpion ou ser pent,

*Il doit māger des Auls, ou appliquer seulement
Et si avecques miel l'apposer il endure.*

Ne l'endommagera d'aucun chien la dent dure.

Et par là ie pense que ce que Volaterra nus a escrit est vray, asçauoir que de son tēps

il se trouua vn certain homme de vilage, qui dormant aux champs la gucule ouuerte, vn serpent luy entra dans le corps, sans qu'il s'en apperceut, mais il se gucrit luy mesmes soudainemēt en mangeant des Auls, comme par vn prompt preseruatif: & toutesfois il enuennima sa femme & la fit mourir, ayant compagnie avec elle, qui est vn cas admirable: Et par là tu peux cognoistre que ce n'est point mal à propos qu'on appelle les Auls, la Theriaque des vilageois & paisans, d'autant que ils n'ont point de meilleur ni plus prompt remede, contre les venins, & contre toutes choses venimeuses: A quoy, comme ie croy, a fait allusion Vergile, philosophe & medecin exquis, & qui auoit grande cognoissance des secrets de nature, en ce Distique.

Thestyle accoustre aux moissonneurs, d'ardeur

Laissez les Auls, Serpot, herbes d'odeur.

La cause de ceci peut estre assignee, d'autāt que toutes choses odorantes sont fort contraires aux vers & aux serpens: ou bien pour ce que les Auls resiouissent les esprits lassez, & reestablissent & rafermissent les forces deffaillantes. Mais il sera bon d'entēdre les vers d'Æmilius Macer, touchant cecy.

*On mesle aux moissonneurs, en leur ropas, les
Auls,*

*De peur que par fortune, laissez de leurs trauaux
Et de sommeil surprins dormās à quelque umbrage*

○ Quel-

Quelque serpent nuisant ne leur porte dommage.

Ie réuieh aux facultez & remedés qu'on peut prédre des Auls: Leurs testés & racines, qui sont faictes à gouffes, broyees avec miel, effacent les meurtrisseures, & ostent la liuidité, ramenant la naïfue couleur, cōme il a esté experimété: l'Ail prouoque aussi l'yrine, & sert de secours aux maladies des reins: il apaise aussi la douleur des dēs, si on le tiēt seullemēt en la bouche, & principalemēt si la matiere qui cause la douleur est froide. A cecy ie veux adiouster cē qu'en dit Celsus, asçauoir que si ceux qui sōt trauaillez des fleurs quartes, mangēt des Auls deuāt l'accez, ils ne sentiront aucune frisson, mais entrerōt soudain en la chaleur. Mais entre toutes les autres choses cecy est memorable que dit Serapio, qu'encores que les Auls endōmagent la vœue estant bien disposee, que neantmoins si elle est blessée & offusquee par trop grande abondance d'humidité, ils la resiouissent. enduits avec Nitre, sel, & vin-aigre, ils remediēt à la maladie que les Latins appellent Pthiriasis, qui est quand les poux sortent de toutes les parties du corps, & mangent vne personne: ce qu'ils feront biē aussi tous seuls, soit que on les boyue ou qu'on s'en frotte, comme asferment Plinē & Auicene. Dioscoride ordonne de les prendre avec Origan, contre les poux & les lendes, soyent crus ou cuits. Prins

tous seuls, sans y mesler autre chose, & mangez, profitent contre les vers, comme enseigne Celsus: avec lequel s'accorde Rufus Ephesien, y adioustant que les nouveaux sont meilleurs que les vieux. Aucuns assurent que avec huyle & sel, ils profitent aux bourions & pustules qui viennent en la face: & qu'ils effacent les lentilles & les darts ou feux volages. Ils sont fort vtils contre la toux enuicillie, ou crus ou cuits, mais on estime que cuits, profitent plus que crus & bouillis plus que rostis, & ainsi qu'ils profitent plus à la voix. Il y en a qui m'ont assuré auoir experimenté, que troys Auls, broyez avec graisse de porc, tellement que le tout soit reduit en forme d'Onguent, estre vn remede souuerain contre la toux venue de froidure, si on oinct avec cest Onguent les plantes des pieds, aupres du feu, & l'espine du dos, lors que le malade est au lict: mais il faudra aussi qu'il vse à son disner & à son souper, d'une decoction pectorale. C'est Onguent profite aussi contre les froidures & frissons des fieures, mais avec les parties susdictes, il en faudra aussi appliquer sur le poignet des mains. Si vn homme a mangé des Auls, encores qu'il prenne apres de poison, elle ne luy nuira point: & ceux qui ne peuuent cuire la viande, recoiuent vn singulier profit des Auls, pourueu qu'ils n'en

mangent par trop, car il porteroit nuifance aux yeux: ce qu'Hellus n'a pas oblié, parlant des Auls, comme fenfuit.

Soit qu'on le mange cru ou bien cuit en potage,

Il chauffe l'estomach & le foulage fort

De toute humidité: mais il porte dommage,

Aux yeux prins trop fouuent: & si altere fort.

Praxagoras melloit les Auls avec du Coriandre, dans du vin, pour furuenir à la iauniffe. Hipocrates tient que le parfum des Auls, attire l'arrierefais des acouchees, ce que tesmoigne aussi Pline, dans lequel on a, ce me semble, mis mal à propos, les secōds enfans. Diocles, comme le recite le mefme Pline, affirmoit, que les Auls bouillis seruēt de remede aux Nephritiques, là ou aussi on a commis vne autre faute, mettant phrenetiques au lieu de Nephritiques. Nous auons pour confirmation de nostre aduis Didymus, qui est vn authēur Grec qui a escrit de l'agriculture, lequel enseigne que les Auls prouoquent l'vrine, & guerissent la Nephritique ou mal de reins. Aucuns m'ont racōté pour vne chose bien experimentee, que les Auls bouillis, ou bien cuits sous la cendre, & broyez avec de la poix, tirent hors tout ce qui peut estre dans vne playe. D'auātage, que les dosles des Auls nettiez de leur escorse, & mis dans les parties naturelles des femmes, bien auant,

prouoquent les mois, mais il est bon de les lier avec vn filet, & les atacher à la cuisse, pour les pouuoir retirer quand on vouldra. Ils disoyent aussi qu'on pouuoit faire le mesme plus aisément & avec moins de fascherie, si on piloit les Auls avec huyle d'Aspic, ou avec huyle de Violier iaune, puis qu'on les mit dans vn petit sachet de toile bien clere, longuet & rond, & qu'on le mit dedàs la matrice de la femme bien auant, lequel on pourroit apres retirer quand on vouldroit: car ils afferment qu'ainsi preparez, ils ont vne merueilleuse vertu à prouoquer les mois, & si resiouissent grandement la matrice, & la nettoient: de sorte que par ce moyē il y a eu des femmes, qui ont esté rendues fertiles, au lieu qu'auparauant elles estoient steriles, & comme sans espoir de porter enfãs. Je neveux pas oublier, qu'vne petite douffe d'Ail, priuee de sa pelure, rostie, & appliquee sur la dent qui fait mal, la guerit entierement, pourueu que l'humeur qui cause la douleur soit froide. Ce que nous auons aussi experimenté en la racine d'Esclere, pilee & appliquee. Et qui plus est les Auls pilez, & broyez avec du vin, puis coulez, sont fort vtiles contre la piqueure des serpens, si on les boit soudain apres, & qu'on frotte le lieu mordu avec vn Oignon acre & fort: ou bien qu'on face vn emplastre d'Auls, de fueilles de Figuier, & de Cumin, pilez

lez ensemble, & qu'on l'applique dessus. Ce que pourra bien aussi seruir, és morsures des autres animaux venimeux. Les Auls avec de la Centauree, ou au double de Figues, seruēt pour faire vider les eaux, & vuidees descher le vêtre aux hydropiques, cōme tesmoigne Diocles: mais on tient que l'Ail verd pilé avec de Coriandre, & broyé en vin, puis beu, est plus efficace en ceci. Sur quoy on peut produire les vers du poëte herboriste, par lesquels il conferme ceci.

*Hipocrates tient que par la fumee
Des Auls bruslez, on pourra retirer
L'arrierefais: Praxagoras les faisoit bien piler
Avec Coriandre & vin pour la Iannisse.
Diocles veut contre le mal & vice
D'hydropisie qu'avecques Centauree,
On les aualle: & bouillis il recree
Les Nephritiques.*

Aucuns pour appaiser la douleur des dents prennent trois petites dernes d'Ail, & les pilēt dans du vinaigre, puis les mettent dans la cavité de la dent: D'autres ne font que se lauer la bouche de leur decoctiō. A ceci nous pouuons adiouster que les Auls broyez en vinaigre avec nitre, guerissent la tigne: Estans mangez, & tenuz en la bouche, ils seruēt contre la froidure de l'air, & cōtre les eaux troubles, & procedentes des neiges, & contre les incommoditez qui en procedent.

Mais entre les autres vertus des Auls, c'est bien vne honte qu'on ignore ceste-cy, asçauoir qu'ils rendent habile au ieu d'amours: de sorte que si on frotte la nature des iumés avec des Auls, cela leur prouoquera l'vri ne retenue, & si seront plus propres à se ioin dre à leurs masses. Si on fait cuire les Auls avec des febues, iusques à ce qu'ils soyent tous en paste, puis qu'on s'en frotte les temples, ce sera pour guairir de la Migraine, & des douleurs de teste procedantes de froidure, comme il a esté experimenté: & si on distile l'Ail, meslé avec graisse de Canard, dedans l'oreille, c'est vn bon remede contre la surdité, ou durté d'ouye. Il corrige aussi la toux, la difficulté d'aleine, & la voix enrouée. Que si on le fait cuire avec de la bouillie, il seruira grandement, contre les enuies qu'on a de aller à selle sans y pouuoir rien faire, qu'on appelle vulgairement Espraintes: & cõtre les maladies froides des Polmons & procedâtes de Phlegmes. Au reste, Galien dit que les Auls cuits deux ou trois fois, ou bien bouillis, perdent leur acrimonie, mais aussi sont-ils de bien peu de nourriture, au lieu que deuant qu'estre bouillis ils n'en donnoyent du tout point. Il est toutesfois d'auis qu'on vse biẽ peu souuẽt, non seulemẽt des Auls, mais aussi de toutes autres choses acres, principalement ceux qui sont de nature bilieuse: car
elle

elles ne sont propres sinon à ceux qui abondent en humeurs gros, visqueux, & crus, & encores en doivent-ils vser avec prudence & discrétion. Ce que s'ensuit ne m'a pas semblé deuoir estre oublié. Didimus, qui est vn auteur Grec, qui a escrit de la chose rustique, ou plustost Sotion, comme ie l'ay en mou exemplaire Grec, a laissé par escrit, que pour offer la mauuaise haleine que les Auls causét, quand on les a mangéz, il ne faut que mager apres vne febue toute cruë. D'autres dient qu'il faut mager vne racine de Reparee cuitte sur les charbons, & qu'il n'y faut autre chose: par lequel remede Menander, vn entre les Grecs, promet que la mauuaise senteur sera couuerte, comme nous l'auons remarqué cy deuant, quand nous auons traicté des remedes qu'on peut tirer de la Reparee. En nostre temps, on efface communément la senteur des Auls, en mangeant apres vn peu d'Ache verd. Si tu veux auoir des Auls qui n'infecteront aucunemēt le soufflé de ceux qui les mangeront, mēsmes qui corrigeront le mauuais soufflé, & si seront doux, il te faut lire le second liure de nos secrets du Iardin, & là tu trouueras chose qui te contentera. Pour la fin, ie diray deux choses admirables: la premiere est que si on frotte avec des Auls, les dens des Mousteles & Escurieus, à grande peine oseront-ils rien mordre apres, de sorte

que par ce moyen on les pourra appriuoiser. La seconde est, que si on pend des Auls, aux brâches des arbres d'où les oiseaux viennent manger les fruits, ils n'en oseront approcher, si ce que Democrite a noté sur les Georgiques Grecques est veritable: & icy nous faisons fin à la tractation des Auls pour venir aux autres.

Du Reffort ou Rauanet, & de ses remedes.
Quarreau IIII.

LE Reffort, que les François appellent vulgairement Rauet, Rauanet, ou Raphe, sert bien souuent aux villageois, pour recouurer l'appetit quand ils l'ont perdu, & qu'ils sont degoustez, le mangeât quelque fois tout seul, & quelquefois avec eau & sel. Florentinus Grec en ses commentaires qu'il a faicts de l'Agriculture, dit que le Reffort est propre pour ceux qui sont phlegmatiques, & qu'il sert de remede au mal de Reins, & à la pierre; principalement si on prend l'escorce extérieure, & qu'on la face cuire en eau & vin, ou qu'on la pille, & l'ayant passée par un linge, qu'on la face boire au malade de matin à ieun, & qu'il continue cela quelques iours. On a de coustume de le faire prendre avec eau tiede, auant qu'auoir rien mangé, pour preparer les voyes au vomissement, bien

bien est-il vray, qu'à ces fins les medecins ordonnent plustost la semence que non pas la chair de la racine. Si pour le manger on le prepare avec huyle, cela garde qu'il ne produit pas tant de rots & ventositez, comme il a accoustumé autrement, la raison est, pour ce que l'huyle qui nage par dessus en l'estomach, garde les ventositez de sortir. Le suc de Reffort beu avec vin-cuit guerit la iaunisse: & avec miel, il guerit la toux: ce qu'on pourra aussi ordonner à ceux qui ont courte haleine, & qui respirent à peine. Vn certain Medien medecin, duquel Pline fait mention, ordonnoit à ceux qui crachoyent le sang, le Reffort cuit: l'aduis duquel suit Q. Serenus, en ces vers.

Si de sang bouillant, la poictrine est remplie,

Le suc de Mente y sert, ou la Reffort bouillie.

Pline dit dauantage, que le Reffort cuit en eau & vin-aigre, remédie aux morsures des Serpens, si on les applique dessus: Q. Serenus dit le mesme, hormis qu'il ne fait point de mentio de l'eau & vin-aigre, voicy donc ses vers, comme le les ay tournez.

*Bon est de boire dans du vin le germe du
Sesly broyé:*

Ou la decoction du Reffort: ou bien pilé & lié.

D'autres affirmēt, que toute la Racine est tellement contraire à tous venins, que si quelcun en mange à ieun, les venins ne luy nuiront aucunement : mesme que si on se frotte les mains avec son ius, on pourra apres manier les serpens, sans crainte d'en estre offencé; ce que ie conseillerois de croire plustost que de l'esprouuer. Mais entre les autres choses, ceci me semble fort notable, que si quelcun a mangé du Reffort, & puis qu'il soit piqué d'un Scorpion, il sera du tout hors de danger de sa vie : & si on iette du Reffort sur un Scorpion, il mourra soudain. Les Agriculteurs Grecs adioustent, que si quelcun a esté fouetté, & que les playes & marques y soyēt demeurees, que pilant du Reffort & l'appliquant dessus, elles seront entierement effacees, & la liuidité estant ostee, la partie reprendra sa naifue couleur, car mesme le Reffort efface les lentilles & taches du visage. Ceux qui ont la fieure quarte pourront recevoir santé & guerison, s'ils vsent souuent du Reffort pour se prouoquer à vomir. Il est aussi bon aux acouchees, & aux nourrices, pour leur faire venir abondance de lait : & prins à l'entree du repas, faict fort roter, & si prouoque à vriner. Ce que iusques icy nous auons traicté, est prins pour la pluspart de Florentinns, un des premiers Agricultul

Agriculteurs & mediciens Grecs. Hipocrates(pour mesler parmi la medicine, quelque chose de Rustique) dit que le poil tombant aux femmes,il le faut frotter avec du Reffort pilé: dauantage que contre les douleurs de l'Amaris,il le faut appliquer sur le nombril. Praxagoras estoit d'avis d'en bailler à ceux qui ont mal de flancs: & Plistonius, à ceux qui ont la Colique. Prins avec miel,ils ne prouoquent pas seulement les mois,mais aussi chassent la vermine du ventre, & aident grandement aux inflammations du gosier si on les gargarise avec vin-aigre melé. Mais qui refusera d'entendre ce qu'en dit Galien? La racine du Reffort,dit-il, est entre les choses que nous mangeons ordinairement, & nous sert plustost de sauce que de nourriture. Plusieurs tiennent que le Reffort mangé ou beu,est grandement vtile à ceux qui ont mangé des Potirons ou Champignons, en danger d'estre estranglez.Vray est que le Reffort engendre vn sang acré & mordant, à cause de quoy il est fort contraire aux colériques & bilieux.Aucuns estiment qu'il est fort contraire à l'estomach,& qu'il engendre des rots, mesmes des cruditez, sinon que la faculté qui cuit la viande en l'estomach soit bien forte. Ce que doit estre entendu quand on en mange par trop, ou qu'on ne mange autre chose,ou bien peu:car mangé comme on

le mange auiourd'huy, il ne peut pas beaucoup nuire : mesme on void souuent les païsans en manger tout leur saoul avec du pain seulement, sans que cela leur porte aucun dommage. Galien s'esmerueille de ceux qui mangent du Refforta pres souper, pour aider à la digestion: car dit-il, encores qu'ils affirmēt l'auoir experimēté, si est-ce que personne ne les a sceus imiter, sans en receuoir dommage. Il semble donc bien que le poëte Hefsus a bien escript, disant,

*Plusieurs estiment bien meilleur de le manger
deuant le past-*

Mais sur ceci il faut entendre ce qu'en dit Leuinus Lemnius : Le Reffort, dit-il, lequel par excellence & par epithete, on appelle Radicula, est coustumierement mis à l'entree de la table : & ainsi il ouure l'appetit, & nuit moins à l'estomach : parquoy ceux-là sont à reprendre qui le mangent sur la fin du disner ou du souper: estimās par ce moyē, qu'il aide mieux à la digestion, au lieu qu'il est fort nuisible à l'estomach s'il n'est mangé à l'entree, acoustré avec sel & eau, car autrement il cause des puantes ventositez, & des rots sentās le brulé. La decoction des ses fucilles est vtile contre les opilations du foye, & contre la iaunisse. I'approue donc bien ce qu'aucuns mettent dans le potage la fucille de
Ref-

Reffort, au lieu de Chou, car le gouft n'en eft pas moindre, ni moins falutaire. Le fuc de Reffort, ou l'huyle tiré de fa femence, diftilé dans les oreilles, chaffent les ventofitez, & le tintement d'icelles : & la femence broyée en vin blanc, puis paffée par vn linge & beuë n'a pas moins d'efficace contre les venins que la Theriaque mefme: ce que nous auons fouuent veu experimenter en temps de peſte. La mefme femence broyée avec du vin-aigre, & appliquée fur les Gangrenes, y fert grandement: Et ſi quelqu'un a eſté frappé ou fouëtté, de ſorte que les marques & meurtriſſeures y ſoyent demeurees, il faut prendre de la femence de Reffort, la broyer avec miel, & l'appliquer, & elles feront effacees. Si on pile la racine avec du vin-aigre, ce ſera pour remedier aux inflâuations qui ne font que cômencer: & ſi on la pile avec racine de Blanc d'eau, ce ſera pour appaiſer les douleurs de la veſcie: & ſi prouoquera l'vriné ſi on l'applique en façon d'emplafre ſur le penil. Si on meſle le fuc de Reffort avec du fromage ſalé, ce ſera pour effacer les meurtriſſeures & terniſſeures. Je di dauantage que manger ſouuent du Reffort, augmente le lait. Je n'oublieray pas auſſi ce que Pline dit, que le Reffort eſt acré, ſelon qu'il a ſon eſcorce eſpeſſe, & qu'il nuit aux dens, à cauſe qu'il les mine & conſume.

C'est vne chose admirable de la contrariété qui est entre les Refforts, & la vigne, car la haine est si mortelle, que s'ils sont plantez l'un pres de l'autre, il semble, à les veoir, qu'ils se fuyent l'un l'autre, par vne certaine inimitié naturelle. Que si on les met dans la fosse l'un de l'autre, ils ne prendront jamais, & de là ont conclu les Grecs, que le Reffort est vn bon remede contre l'yurongnerie, tellement qu'ils n'ont point faict de distinction entre le Reffort, & le Chou, comme nous auons remarqué en nostre traicté des secrets des Iardins: toutesfois ils leur ont attribué diuerses facultez à l'endroict des vins: car on tient que si on met vn Reffort dans vn tonneau de vin gasté, il le corrigera, & attirera toute la corruption à soy: ce qui est tout au contraire du Chou, lequel mis dans le vin, tant s'en faut qu'il le corrige, qu'au contraire il le corrompt & gaste. Pierre Crescētius (afin que ie ne cache riē de ce que i'ay leu, ouy, ou obserué) enseigne de faire du vin-aigre medicinal avec du Reffort, en ceste sorte: pren dit-il, vn Reffort, & le fay seicher, puis le mets en poudre, & mets ceste poudre dans le tonneau ou est le vin que tu veux faire enaigrir, & les mesle tresbien ensemble, puis les laisse reposer quelques iours: car par ce moyen tu auras du vinaigre compose avec

Reffort,

Reffort, duquel tu te pourras ſeruir avec grand profit pour diminuer & brifer la pierre aux reins, & la faire fortir, & pour pluſieurs autres choſes. Il y a encore quelque peu a dire du Reffort: les anciens l'ont eu en telle eſtime, que Moſchion Grec a eſcrit vn liure tout entier de ſes louanges: dans lequel il dit qu'on l'a tellemēt preferé à toutes les autres viandes entre les Grecs, que au tēple d'Apollo, qui eſtoit en Delphes, on preſentoit le Reffort au pois de l'or, la Bette au pois de l'argēt, & la Raue au pois du plomb: Ce que Eobanus Heſſus a doctement exprimé par ces quatre vers, parlant du Reffort en ceſte maniere, comme ie les ay traduits.

*Apollo Delphien comme contient la fable,
Cherifſoit le Reffort plus qu'autre mets de table:
Auſſi luy offroit on au pois de l'or luyſant:
La Bette au pois d'argent, la Raue en plomb peſant.*

Deuant que mettre fin à ceſte hiſtoire, ie veux manifefter vn ſecret du Reffort, que i'ay eſprouué & confirmé par pluſieurs fois, contre la violence de la douleur de la grauelle, & contre la colique procedante de grauiers, ou ventofitez: pareillemēt contre les difficultez d'vrine: & le veux franchemēt deſcouvrir à ceux qui franchemēt le voudront receuoir: & ce remede ſeruira grandement, tant pour

preuenir le mal, & l'empescher auant qu'il vienne, que pour le guerir quand il est desia venu, comme ie l'ay souuent experimenté: & puis bien dire que i'ay refusé de l'enseigner à plusieurs qui estoient contens de m'en donner bonne somme d'argent. Voici donc quelle en est la composition. Il faut prēdre de l'escorce de la racine de quelque Reffort bien acré & fort, vne once: de noyaux de Nefles. deux drachmes: les ayāt rompues grossierement, il les faut faire trēper en quatre onces de bon vin blāc, l'ēspace de huit heures: puis les couler, & l'ayant vn peu fait tiedir sur le feu, le faire boire lors que le malade se leuera du liēt, & le soir quand il se couchera: & si besoin fait il faudra reiterer le mesme breuage: augmentant & diminuant la quantité, selon l'aage & force du patient. Je m'assēure que plusieurs me remercierōt de leur auoir enseignē vn si souuerain remede, ou plustost m'enuoyeront quelque bonne somme d'argent, ou pour le moins me feront quelque petit present. C'est aussi vne chose plaisante de scauoir que le Reffort enseueli dans vn monceau de sel, quelque grand qu'il soit, le fera fondre tout, & conuertir en eau saleē soudainement: & si on le met dans du vin punais, il tirera toute la puanteur à soy, comme i'ay desia

desia dict. Vray est qu'il semble que ces choses soyent hors de nostre propos, parquoy ie poursuiuray au reste.

LE TROISIEME SILLON

du Iardin medicinal, contenant quelques herbes odoriferantes, diuisé en onze Quarreaux.

De la Sauge des iardins, & des remedes que on en peut tirer. Quarreau I.



Le ne se trouue point, ou bien peu de iardins, soit aux châps soit à la ville, ou il n'y ait de la Sauge: elle est appelee des Latins *Salvia*, pource qu'elle sauue & conserue en santé plusieurs: parquoy le poëte qui a fait la pluspart de ces vers en rithme, s'esmerueillant des vertus & facultez singulieres de ceste herbe, dit en demandant.

Cur morietur homo, cui Salvia crescit in horto

C'est à dire.

Pourquoy meurt l'homme puisque la Sauge on a?

A laquelle demande on fait vne responce bien a propos, asçauoir

Contra vim mortis, non est medicamen in hortis.

C'est à dire.

Contre les assauts de la mort,

On n'a remede ni support.

La Sauge donc est vne plâte fort salutaire,

comme le mesme poëte semble l'auoir voulu monstrier par ces six vers qui se commencēt.

Salvia saluatrix, natura conciliatrix &c.

C'est à dire.

La Sauge sauueresse, & de nature apointeresse.

Sur tout on tient que la Sauge est fort vtile a rendre fertile: à cause dequoy Agripa ne l'a pas sans cause appelé sacree: enseignant que les sages femmes en font tousiours prouisiō, & la donnent à manger pour faciliter l'enfantement. Aëtius n'a pas oublié de dire, que les femmes qui ont la matrice glissante, & qui sont suiettes à ne retenir, reçoient grād profit, si elles mangent souuent de la Sauge: car elle retient l'enfant, & le rend vigoureux. Si vne femme prend vne hemine du ius de ce ste herbe, avec vn peu de sel, & qu'elle le boiue quatre iours apres auoir esté separee d'avec son mari, & vn quart d'heure apres l'auoir beu elle se conioint avec son mari, indubitablement elle conceura, ou les liures des anciens sont menteurs. Et pourtant ils disent qu'en Copto pays d'Ægypte, apres vne grande mortalité, ceux qui estoient demeurez de reste, contraignoient les femmes de boire de ce ius, & que par ce moyen elles faisoient beaucoup d'enfans. Les medecins tiennent, qu'avec le parfum de Sauge, on arrestera la trop grande abondance des mois, & tout autre flux des femmes, & que les nerfs en sont
forti-

*Hemine
est vne cer
taine mesu
re conte-
nant demy
septier.*

fortifiez: ce qu'auient aussi si on boit du mesme suc: car il desseiche fort les humiditez, par lesquelles ils sont rendus laches: & pourtant on tient que ce suc sert de remede contre le tremblement des mains. Nous adioustons que les fueilles de Sauge, mises dans ce qu'on boit, corrige toute la mauuaistié & malice qui y peut estre, ce qu'on declare par ce vers commun.

Salvia cum Ruta faciunt tibi pocula tuta.

C'est à dire.

La Sauge & la Rue rendront ton boire assésuré.

La Sauge aussi pillée, & appliquée sur les morsures des bestes venimeuses, y aide grandement, & si arreste le sang coulant des playes: Si on boit son ius tiede avec vin, il appaise la toux enuieillie, & la douleur de costé. La Sauge beüe, ou apliquée par dessus, purge la matrice, & si fait sortir l'arrierefais, qui demeure apres l'enfantement: mesme elle aide fort à la difficulté d'enfanter. Il est aussi fort bon de la boire avec Aluine, à ceux qui ont la dissenterie: on tient aussi qu'elle pousse hors l'enfant qui est mort dans le ventre de sa mere, si on l'applique: & si fait mourir la vermine qui s'engendre dans les oreilles: & broyée avec huyle, elle profite contre les Serpens. Elle noircit les cheueux, & nettoye les vlceres sales: & avec vin, elle fait ruisseler les mois arrestez. Dauantage si on se bas-

fine bien avec la decoction, tant des tiges que de la fueille de Sauge, cela appaisera la demangeison des testicules, & de la matrice. Ce que le poëte herboriste a aucunement exprimé par ces vers suyans.

*En lauuant avec vin ou aura cuit la Sauge
Les parties naturelles de femelle ou de masle
Osteras la frison que ces parties la mange
Noirciras les cheueux, si bien souuent au basle
Tu les oins & les frottes avec le suc de Sauge.*

On fait du vin avec Sauge, qu'on appelle Saluiatum, duquel on se sert en plusieurs choses avec grande vtilité, duquel nous auons amplement traité en nostre discours que nous auons fait des vins medicinaux. Mathiol fait vne certaine composition de pilules, pour les Tabides, en ceste sorte. Pren du Nard & de Gingembre, de chacun deux drachmes, de semence de Sauge rostie, pilee, & criblée, huit drachmes: de Poivre long, douze drachmes: de tout ceci mis enséble avec suc de Sauge, il faut former les pilules: & en bailler au matin à ieuñ vne drachme, & autant le soir, & faire boire apres vn peu d'eau pure. Orpheus commādoit de donner à ceux qui crachoyent le sang, du suc de Sauge meslé avec miel & le leur faisoit prendre à ieuñ, & par ce moyen il arrestoit soudain la violence du sang coulant. Aucuns vsent fort de la Sauge en leurs sauces & potages, afin de faire reuenir l'ap-

nir l'appetit perdu, principalement quand ils ont l'estomach répli de mauuais humeurs & de cruditez. Je ne veux pas publier de dire ce petit mot en passant, aſſçauoir que la Sauge doit auoir en vn iardin, tousiours la Rue pour compagne, autrement elle est en danger d'estre infectee par les serpens, crapaux, & verdiers, dont ceux qui en mangerôt receuront grand dommage, car tel bestial s'aime fort auprès de ceste herbe: ce que Bocace a enseigné par le recit d'vne gentile hystoire, & bien memorable: d'un qui se iouant avec son amoureuse dans vn iardin, & s'estât frotté les genciues avec vne feuille de Sauge, les pensant nettoyer, il tomba soudainement mort, la femme qui se iouoit avec luy, & qui faisoit les preparatifs au ieu d'amour, fut incontinent soupçonnée de luy auoir donné quelque poison: le iuge donc l'ayant menée au mesme iardin, elle voulant monſtrer cōme l'homme estoit mort, & comme il auoit fait, print vn bouquet de Sauge, & fit de mesme qu'il auoit fait, & soudain elle mourut aussi, de quoy les regardās, furent merueilleusement estonnez: & pourtant le iuge qui estoit homme prudent, & qui n'estoit pas ignorant des secrets de nature, print mauuaise opinion de ceste Sauge; parquoy il commanda qu'on l'arrachast incōtinent, aduint qu'en l'arrachant on trouua vn crapaut fort grand

& de couleur blafarde, qui se logeoit là dessous, lequel par sa mauuaise haleine & par sa baue & pernicieuse saliuë, auoit infecté toute la plante. J'ay bien voulu ici faire ce recit, afin que chacun en soit aduertit, bien que ie l'aye desia remarqué au recueil que i'ay fait de mille choses notables & memorables: & que desormais, on se garde de porter legerement & sans considération, au nez où à la bouche, les herbes qu'on trouue és iardins.

De l'Hysope & des remedes qu'on en peut tirer. Quarreau II.

L'HYSOPE est vne herbe assez colgneue aux François, pour le moins en ce qu'ils s'en seruent fort pour donner goust à leurs viandes, & que quand ils mettēt à bouillir, ou qu'ils fricassent des febues fresches, ils en mettent ordinairement parmi, & non sans profit, car il corrige & dissout l'humidité veueuse qu'elles engendrent. L'Hysope cuit avec vin, & gargarizé, sert de remede contre la squinance. Il est aussi bon à ceux qui respirent avec difficulté: & si chasse la vermine du ventre: meslé avec huyle, il est bon pour guerir la galle & rongne des bestes: & cuit avec miel, Figues, & Rue, il sert grandement contre l'inflammation des poulmons, cōtre les maladies du foye, les toux enuieillies, la
difficulté

difficulté de respirer, aux pleuretiques, & à ceux qui sont suiets à distillations: ie ne veux pas oublier de dire qu'il fait mourir la vermine large du ventre, & qu'il fait sortir les vers prins avec Figues, & si est fort efficace cōtre la tigne ou rache. Le ius de sa decoctiō prins avec vinaigre mielé, a grande vertu d'inciser le phlegme gros & visqueux, & de le faire sortir par embas. Il sert cōtre l'hydropisie, & cōtre la tumeur de la ratte, si on l'applique avec Figues, Nitre & Glayeul: avec eau chaude il guerit les ternisseures & meurtrisseures, & la vapeur receüe, guerit le tintement des oreilles. La douleur des dens, de laquelle aucuns sont tormentez s'appaisera, si on se laue la bouche de la decoction d'Hysope encores tiede, avec vn bien peu de vinaigre, principalement si la douleur procede de matiere froide. Le vin de sa decoction appaise les suffocations de matrice, & si la nettoye de tous humeurs superflus. Mais le poëte herboriste a en peu de paroles comprins toutes ces vertus en ces vers, comme ie les ay traduits.

*Si quelque fluxion se fait sur la poitrine,
Qui la toux & la phtise engendre bien souuent
La decoction d'Hysope sera pour medicine,
Cuit avec Figues seiches, & miel ensemblemēt.*

Ceuxlà mesme pourront aussi vser de la poudre d'hysope incorporee avec miel, & reduit en forme de loch, ou bien avec vinaigre

miel. Le meſme medecament chaſſe auſſi & diſſout les vétoſitez, & atténue les phlegmes gros & viſqueux, & les rend plus aptes à expulſion. Mais il ſera bon d'entendre ce que Iean Meſué, vn des plus excellens d'entre les Arabes, a dit de l'Hyſope. Voici donc comme il en parle. L'Hyſope, dit-il, nettoye la poitrine, les poulmons, & toutes les autres parties ſervantes à la reſpiration, de toute phlegme, de tous humeurs pourris & corrompus, & de toute pourriture qu'y pourroit eſtre amallée: & d'autant qu'il a vertu d'incer, atténuer, & modifier, il fait qu'on crache plus aisément: & pourtant il eſt ſalutaire aux Aſthmatiques & pouſſifs, à ceux qui tombent du haut mal, pour trop grande abondance de phlegme, & a toutes autres maladies procedées de trop grande humidité de cerueau, ſi ſeulement on prend de ſa decoction, avec vinaigre-miel ſcilitique. Il aide auſſi la diſteſtion, aide à la reſpiration, & fait auoir la couleur naiſue. On le fait cuire avec vin, quand on ſ'en veut ſeruir pour amoindrir les tumeurs du foye, de la rate, & des autres entrailles. L'Hyſope qui eſt le plus fort à l'odeur & au gouſt, eſt eſtimé le meilleur: & ſera bon de le cueillir lors qu'il flourit: voila ce qu'en dit Meſué. Il m'eſt venu en memoire & bien à propos, vn ſecret d'un fort docte medecin bien aisé à faire & bien familier, duquel

quel il se seruoit pour faire sortir les pierres des reins, il n'y mettoit autre chose sinon du sirop d'Hysope, avec deux ou trois fois autant d'eau de Parietaire, & par ce remede, le quel il faisoit prendre en hyuer, à ieun, l'espace de dix ou douze iours, il m'a asseuré en auoir guéri plusieurs, & auoit chassé le grauiier & sable qui estoit aux reins. Il suffit d'auoir dit des facultez & vertus de l'Hysope, ce que nous en auôs discouru iusqu'ici: i'adiousteray seulement cest aduertissement, asçauoir que l'Hysope endure seulement d'estre moyennement cuit & pilé: mais encore ne fera il pas fascheux de remarquer ce que Pierre-Pena à dit, asçauoir qu'en Angleterre se trouuë es iardins d'Hysope, qui sans aucun artifice ni fard, a la moitié de ses fueilles & branches si blanches, qu'il n'y a neige ni chaux plus blanche, sans qu'il y ait point de bourre par dessus, l'autre moitié demeurant verte.

De la Sauoree, & de ses remedes.

Quarreau III.

LA Sauoree, que les François nôment communément Sarriette, a vertu de prouoquer l'vrine & les mois, ceste herbe ensemble avec sa fleur mise sur la teste en façon de chapeau, resueille ceux qui sôt trop endormis & assoupis, On distile son ius avec huyle rosat

H. ii.

dans les oreilles, contre la douleur d'icelles: & appliqué avec farine de Froment, il est vtile à ceux qui ont la sciatique: & avec vin, il sert de remede contre les maladies du poulmon, de la poitrine & de la vessie. Ceste herbe broyée avec eau, & respandue, fait mourir les puces. Elle sert aussi pour bien faire purger les femmes, apres l'enfantement: & si rend habiles, ceux qui sont par trop lasches au ieu d'amour, de sorte qu'aucuns estiment qu'elle a prins le nom duquel les Latins la nomment, des Satyres fort addonnez à pail-lardise, comme qui l'appeleroit Satyreia, au lieu de Saturcia. Il ne faut pas oublier à dire qu'elle aide a la digestion de l'estomach, & oste le degoustement. Si on pestrit sa poudre avec miel cuit, puis qu'on le lesche, ou qu'on le boiue avec vin, il fera cracher aisément les humeurs gros & visqueux qui sont en la poitrine. Le mesme prins en vin tiede, appaise les trenchées du vêtre. Tu reueilleras ceux qui sont surprins de mortel sommeil, si tu mesles la Sarriette avec vinaigre chaud, & que de cela tu bassines souuent la teste du malade. Sa Poudre prise dans vn œuf molet refueille l'appetit de se iouer avec les dames. la Sarriette hachée menu avec du persil, & mise parmi les febues, ou fresches ou seiches, & fricassée, fait vne viande merueilleusement plaissante au cœur tant à ceux des villes qu'aux

qu'aux payfans. Mais laissons parler de la cuisine aux cuisiniers.

De la Mariolaine, & de ses remedes.

Quarreau. I I I I.

LE S François appellent Mariolaine, ce que les Latins nōment Sampſucus: & semble qu'ils ayent prins leur nō des Latins, l'appelāt Mariolaine, pource qu'elle est cultiuée par les fēmes, avec plus grand ſouci & diligēce que pluſieurs autres herbes, elle a vertu de eſchauffer, & pourtant le bouillon de ſa decoction est donné a boire, avec grand profit à ceux qui commencent à tomber en hydropiſie: pareillement à ceux qui ont difficulté d'vriner, ou qui ſont trauaillez de trenchees: les fueilles ſeiches enduites avec miel, guerifſent les meurtriſſeures: & appliquees par le bas en forme de peſſaire prouoquēt les mois arreſtez; empēſchent les inflammations des yeux: & avec Griotte oſtent les enſleures. Enduites avec vināigre & miel, elles reſiſtent au venin des ſcorpions: & avec cire, elles ſeruent grandement aux delouēures. Le ſuc de Mariolaine tiré apres l'auoir broyee en vin, prins par le nez fait eſternuer, & purge le cerueau de la phlegme. L'huyle compoſé avec Mariolaine, eſlargit la matrice ſerree, ſi ſeule mēt on en oint le col de la matrice, cōme dit Auicena. Certainement c'eſt vne choſe admi

nable & digne d'estre remarquée, que les rats espient à grandes troupes les racines de Mariolaine (comme ie l'ay souuent obserué) comme si elle leur seruoit de quelque remede souuerain, & que pour cela ils la cerchassét: mais de scauoir dire pourquoy, & pour remede à quelle maladie, ie confesse que ie ne le scay pas encores. Pour la fin ie di que de la Mariolaine la plus menue, qui est aussi la plus delicate, & la plus odorante, qu'on appelle vulgairement prime Mariolaine, on fait de l'huy-le par distillation, lequel estant meslé avec caillé de lieure avec vn bié peu de yray musc, a esté vn fort bon remede à plusieurs qui ne pouuoient conceuoir, comme l'asseurent plusieurs doctes auteurs, qui ont recherché de bien pres les secrets de nature.

Du Fenoil & des remèdes qu'on en fait

en peut tirer.

Quarreau

LE Fenoil est assez cogneu par tous les Iardins, & grandement anobli par le moyen des serpens: car on tient qu'ayans mangé du Fenoil, ils laissent leur vieille peau, & renouellent leur veuë: & de là on a prins argument, comme dit Pline, d'estimer que le Fenoil pouuoit seruir contre l'esblouissement

ment de la veüe des hōmes. Quand les nourrices n'ont pas assez de laiēt, il leur faut faire boire sa semence, & elles auront incontinent les mammelles remplies de laiēt : ce qu'il fait comme dit Dioscoride, si on le baille avec ptisane, voire mesme l'herbe. La mesme semēce de Fenoil broyee avec eau, arreste l'appetit de vomir, appaise les ardeurs d'estomach, & renforce l'estomach affoibli: & si est grandement profitable aux poulmons & au foye. Elle arreste le ventre, si on la mange par mesure, prouoque l'vrine, & si on le fait rostir, il appaisera incontinent les trenchees & douleurs du ventre. La decoction de sa fueille cheuelue profite grandement à la douleur des reins, & si prouoque les mois: & la racine prinse avec ptisane fait le mesme: laquelle estant beue avec vin, porte vn merueilleux soulagement aux hydropiques, & à ceux qui sont retraits. Les fueilles enduites avec vinaigre, soulagent grandement toutes tumeurs avec inflammatio. Et la poudre de la semence broyee avec Menthe & graisse, allège les tumeurs des mammelles. Dauantage si quelcun a l'estomach refroidi, & s'il a besoin d'attenuer & inciser de phlegme grossier & visqueux, il sentira vn grand profit s'il prend six onces de l'escorce de racines de Fenoil cuittes en vne liure de vinaigre & de miel: apres qu'elles sont cuites, on les presse,

& iette on là les racines, puis on met le miel dedans, & les fait encores recuire, iusques à ce qu'il soit assez espais, & de cela on en fait prendre trois cuillerees au malade, plus ou moins, selon l'aage du patient. Plusieurs vsent de la racine de Fenoil, incorporee avec cire, contre les meurtrisseures: avec miel, contre les morsures des chiës, & contre l'esblouissement des yeux: & avec vinaigre, contre l'enfleure qui suruiuent apres auoir receu quel que coup: & de ceci nous pouuons produire vn bõ tesmoin, asçauoir le poëte herboriste: lequel traitant du Fenoil, en parle en ceste façon.

*Qui sur les yeux applique son suc avec du miel,
Chasse toutes tenebres, void bien clair insq' au
ciel.*

*Et si avec vinaigre l'enduit sur les tumeurs.
Venues de meurtrisseures, en resont les humeurs.*

La semence du Fenoil est souuerainement bonne pour dissiper & faire sortir les ventosités qui sont au vêtre, comme le vers cõmun composé en rithme le tesmoigne disant.

*Du bon Fenoil la semence ouvre les conduits du
cul.*

Au reste il n'est pas bon de se taire ici de beaucoup de choses: premieremēt de ce que le Fenoil prins en quelque façon que ce soit, augmente la semence genitale, car il est fort ami des parties qui seruent à la generation,
soit

soit qu'on les bafine seulement de la racine cuite en vin: ou qu'on les frotte de la mesme racine broyee en huyle. On tire vn certain ius de la semence encores nouuelle & tēdre, ensemble des fucilles, branches & iettons, le tout broyé & pressé ensemble: lequel seiché au Soleil, est tenu pour vn singulier remede qu'on mesle parmi les autres qui esclarcissent la veuë. On peut faire le mesme, avec semblable effect, des racines qui viennent les premieres de la semence pilee. Aucuns couppēt la tige, lors qu'elle fleurit, & la mettēt au feu, & reçoüyēt la liqueur qui en sort par la chaleur du feu, comme vne gomme, laquelle on estime beaucoup plus profitable aux yeux, que non pas le suc precedent. *Q.* Serenus se sert pour la mesme fin, de la liqueur du Fenouil meslé avec miel, & voicy quels sont ses vers, selon que ie les ay tournez.

Quand la veuë par vieillesse commence à s'obscurcir.

Le suc du Fenouil tendre la pourra esclaircir, Meslé avecques miel-

Paul Ægineta descrit vne certaine eau fort vtile pour les yeux qui ne voyēt gueres clair, & voicy qu'elle en est la composition. Il faut mettre dans vn pot de terre tout neuf, du Fenouil tout verd & fraiz avecq eau de pluye, & les laisser là tremper quelques iours, puis les tirer dehors, & faut garder ceste eau pour

s'en seruent au besoin, de laquelle il se faudra lauer les yeux tous les matin vn moys durant. Ie ne veux pas oublier d'aduertir, qu'il ne faut pas vser du Fenoil comme pour viande, mais bien cōme medicine: car il est de difficile digestion, & si engendre peu de nourriture, & mauuaise: Toutesfois on s'en sert quelquefois, pour corriger aucunement la malice & intemperature de quelques autres viandes: car comme à la Laictuë nous adioustons par fois du Persil, de Menthe, de Marjolaine, ou quelque autre herbe semblable, afin de moderer sa trop grãde froidure, semblablement nous mettons le Fenoil parmi les Courges, & Naueaux, & les faisons cuire ensemble, afin de temperer leur malignité & mauuaise qualité. Ce qu'on pratique aussi quand on fait cuire plusieurs poissons, principalement de ceux de mer, lesquels on enuolope par fois des fueilles de Fenoil, par fois on les en farcit, pour leur donner bon goust, & pour esteindre le goust de la Marce, laquelle les friants & delicats ont accoustumé de craindre. Mais ceci sent mieux sa cuisine, que sa medicine, parquoy ie suis content de n'en dire plus pas vn mot.

De la Menthe des iardins, & de ses remedes.

Quarrean. VI.

LA Menthe a retenu son nom Latin entre les François, laquelle Florentin (qui est vn excel-

excellent autheur entre les Grecs, qui a escrit de la chose rustique) tient pour vne herbe inutile, d'autant, dit-il, que si on la baille à manger à vn personnage blessé, elle gardera que la playe ne se pourra consolider ni resfermer: on la baille toutesfois à boire à ceux qui crachent le sang, comme tesmoigne Q. Serenus, duquel voicy les paroles, que nous auons desia alleguees ailleurs.

*Si de sang bouillonnant la poitrine est remplie.
La Manthe beuë y sert: ou la Reffort bouillie.*

C'est vne chose asseuree que ceste plante suruiët à plusieurs maladies des genitoires, si on les bassine de la decoction d'icelle opportunement: dauantage elle guerit les douleurs d'oreilles, & les aspretez de la langue, si on la mesle avec miel: & avec vin-cuit, elle haste l'enfantement: & avec sel elle guerit les morsures des chiens. Qui la mettra dans le lait, elle gardera que le lait ne se prendra point par la presure, ni n'especira point, quoy que on y mette du caillé, comme a escrit Florentin: lequel conclud par là, qu'elle resiste & empesche la generation, & pourtant qu'elle est peu profitable. Dautres la tiennent fort salutaire, de sorte que si on la met sur des Mammelles, le lait n'aura garde de se figer ni mettre en grumeaux: & pour-tant ils conseillent de la mesler par-mi le lait qu'on veut boire, pour empescher que le

laict ne se prenne & caille dans l'estomach, en danger d'estouffer vne personne. Plusieurs m'ont asseuré auoir experimenté, que les fromages frottez avec suc de Menthe, ou avec sa decoctiō, ne pourrissent ni corrompent point: parquoy il me semble, que le poëte herboriste (apres les Grecs toutesfois) n'a pas escrit legerement ni sans bonne consideration, de la Mēthe ce qui s'ensuit, comme iel'ay tourné.

Pour garder que les fromages ne pourrissent, faut le ius

De la Menthe: ou l'herbe mesme pilee & mise sus.

Sa decoction prise par trois iours, deliure tellement de la douleur de la Colique, comme on dit, que iamais elle ne reuiet apres: mesme Aëce récite & rend tesmoignage, qu'il en fut gueri par le moyen de ce remede. Le suc de Menthe meslé avec ius de Grenade, arreste les sanglots & les vomissemēs, tant de phlegme que de cholere, comme a remarqué Democrite en ses Georgiques: Prins avec Amidon & eau, il arreste les grāds assauts de la colique, & les trop abondantes purgations des femmes. Comme l'odeur de la Menthe resueille l'esprit, aussi sa saueur ouure l'appetit des viandes. Le suc de la Menthe fresche tiré par le nez, corrige les vices des narrines: lequel sert aussi es douleurs de
la

la teste, si on en enduit les temples. Le mesme prins avec vin-aigre retient le sang qui coule interieurement: Voire mesme aucuns disent, que la plâte guerit le feu volage, si seulement on la tiët en la main, ce que d'autres entendent du Mentaistre. Il ne faut pas ici oublier ceste grande vertu que la Menthe a de fortifier l'estomach, & de corriger les corruptions & putrefactions qu'y suruiennent, & si chasse & par dessus & par dessous, la vermine qui monte souuent iusqu'en l'estomach, & qui tormeute grandemët le vêtre: Dequoy nous auons pour tesmoin Salernitanus, lequel parle de la Menthe, en ses vers Rithmez en ceste sorte.

*La Menthe ment S'elle se monstre lache
A chasser la vermine, qui ventre & stomach fas-
che.*

Mais il faut faire prendre sa decoction seulement (comme de l'Aluine) & nō pas la substance. Cornelius Celsus tient, que cela doit estre entendu des vers longs, qui tormentent ordinairement les enfans, Dioscoride promet que le suc de Menthe donné en breu uage avec vin-aigre produira le mesme effect. Mais on prendra plaisir d'entendre ce que Q. Serenus, a dit & philosophé, de ceste matiere.

*Quelle misere peut l'hōme douter & craindre,
Qui ne naisse avec luy en son sein est la mort.*

*Le ver, la tigne, qui tant le pique & mord
 S'engendre en luy: le vient ronger & esprandre:
 Mesme montans souuent viennent atteindre
 Iusqu'à la gorge saisissant soufffle & vie
 Mais Menthe beuë guerit & viuifie
 Dit Democrité-*

Estant beuë elle auance l'enfantemēt, aug-
 mēte l'abondāce du laiēt: & amollit les durtes
 des māmelles, si on la faiēt cuire & la met des-
 sus en façon d'Emplastre. Il ne faut pas lais-
 ser passer, qu'il se peut faire par art & par la
 culture, que la Menthe s'acquerra vn suc, le-
 quel incitera merueilleusement l'appetit du
 ieu des dames: ce qui est commun à toutes
 les choses qui sont participātes d'vn humeur
 à demi cuit, & qui est venteux: & ceci ser-
 uira pour bien entendre ce prouerbe d'Ari-
 stote, qu'on interprete diuersemēt, asçauoir,
 La Manthe ne doit estre plantee ni mangee
 en temps de guerre: car ceux qui mangēt de
 ceste herbe en quātité, sont fort adonnez
 à paillardise, laquelle affoiblit merueilleuse-
 ment le corps, diminue les vertus & facultez,
 & si abestit l'esprit: lesquelles trois choses,
 comme chacun scait, sont directement con-
 traires à la force & magnanimité. Toutesfois
 Aristote rēd vne autre raison de ceci, disant,
 que cela aduiēt pource que la Menthe refroi-
 dit le corps, & allegue pour preuue de cela,
 que la Menthe consumant la semence geni-
 tale,

tales, refroidit par ce moyē le corps: or la froi-
 dure, cōme chacun cōfesse, est du tout cōtrai-
 re à magnanimité & hardiesse. Quoy que
 ce soit, Dioscoride recommande fort la Men-
 the, pour la gaillardise au ieu d'amour, cōme
 nous auons ia dit: il ne se faut donc pas esba-
 hir si les anciens, durāt la guerre, defendoyēt
 aux soldats de māger de la Menthe, & si Ari-
 stote en a escrit en ceste façon.

*Ne mange point la Menthe, ni plante en tēps
 de guerre.*

Car les plus forts & robustes deuiennent
 mols & effeminez, pour estre trop addonnez
 à paillardise. Mais ie crain que ie ne me sois
 par trop arresté a deduire ceste matiere, car
 ceci ne cōcerne point les rémedes qu'vn me-
 dicin peut tirer de la Menthe.

Du Thym, & des remedes qu'on en peut tirer.

Quarreau. VII.

LE commun des Frāçois appelle Thym, ce-
 que les Latins nōment Thymus: plusieurs
 luy donnent le nom de Mariolaine d'Angle-
 terre: Les mouches à miel aiment merueilleu-
 sement ses fleurs, cōme chacun scait, car elles
 rendent vn miel de fort belle couleur, & de
 bonne odeur, comme la bien remarqué Vir-
 gile, disant,

Le miel sentoit naïfement le Thym.

La decoctiō du Thym faite avec miel, aide

à ceux qui ont courte haleine & qui respirēt à peine : & mesmes pour faire cracher , tous les vices & empeschemens de la poictrine. Il esment les mois des femmes qui sont arrestez: faict sortir l'enfant mort dans le ventre, l'arrierefais, & si prouoque les vrines . Si on pile l'herbe, puis qu'on en frotte les porreaux & verruës, elle les effacera: avec vin & Griotte, elle sert de remede cōtre la sciatique & si est bon d'en faire prendre à ceux qui ont le haut mal: mesme i'ay souuēt ouy dire, que la senteur du Thym resueille ceux qui en sōt tombez: & qu'il est besoin que telles gēs dorment sur le Thym mol. Les fueilles pilees, & saupoudrees sur de la laine, sont profitables aux delouëures, si on l'applique dessus avec huyle : & en enduit-on les brusleures, avec graisse de porc, nō sans profit. Mais il ne faut pas vser du Thym qui est noir, ains prendre de celuy qui est enrichi d'une fleur de couleur perse ou blanche . Au surplus, ie croy qu'on prendra plaisir d'ouir le discours que Iean Mesué fait, touchant le Thim: Il eschauffe, dit-il, atténue, rend plus subtil, resout, ouure les obstructions, & dissipe les grosses vétoситеz: Il purge doucement la phlegme par le bas avec sel & vin- aigre (dit Dioscoride) & selon aucuns, elle purge aussi la melancolie, mais fort lentement, si on y mesle du sel Gemmé, ou du sel Indique. Il attire le phlegme

me gros & visqueux, de la poictrine, & des parties seruans à la respiration: voire mesme du cerueau: & pourtant il aide grandement aux maladies qui suruiennent à ces parties, & aux maladies des nerfs procedâtes de phlegme & de froidure: comme sont l'asthme, la toux, & quand on sent douleur aux poulmôs pour auoir eu froid: en quoy on se sert principalement de son sirop, ou de sa decoction, ou de l'huyle faict de ses fleurs cuites: lequel aussi a vertu d'esclaircir la veuë, & conseruer la santé. Le Thym fortifie les nerfs & les parties nerueuses par sa chaleur: son parfum corrige le tintement & bourdonnement d'oreilles. Il est fort salutaire aux gens vieux, contre la froidure de l'hyuer: il ouure l'appetit, aide la digestion: avec miel & nitre. il fait mourir la vermine du ventre, il prouoque les mois, & l'vrine, & si sert de remede aux rigueurs & frissons des fieures. Sa trop grande chaleur est aucunement corrigee par le meslange des autres choses, soit qu'on le face cuire avec Raisins secs, ou qu'on le face tremper en vin aigre, ou en eau-miel, avec vn bien peu de sel gemmé, qui sert mesme pour accroistre sa vertu laxatiue. Il endure d'estre cuit & pilé mediocrement. Outre ces vertus & facultez recitees par Mesué, il ne nous faut pas laisser en arriere celles qu'Aëtius de Capa-

doce luy atribue: L'experience , dit-il , a fait cognoistre que ces choses sont veritables, touchant le Thym. Baillez à ieun, à ceux qui sont tormétez des gouttes, quatre drachmes de Thym sec, mis en poudre tresdeliee, avec vn Cyathe de vinaigre-miel: car ainsi prins il purgera la cholere, & les autres humeurs, & le sang corrompu & plein d'acrimonie: il est aussi propre cõtre les maladies de la vescie. Quand on aura le ventre enflé, asçauoir, lors qu'il commencera à deuenir gros, baillez à ieun vne drachme de ceste poudre avec vne cuilleree d'eau-miel. Contre les douleurs du rable, de la hanche, des costez & de la poictrine, contre les suspensions des flancs, & quand il semble qu'on soit conflé, il en faut bailler au poids d'vne drachme, avec vne cuilleree de vinaigre-miel. On la baille aussi à ieun, ou deuant souper, à ceux qui ont les yeux chassieux, ou qui ont quelque grande douleur aux yeux. Semblablement aux melancholiques, à ceux qui sont troublez de leur sens, qui sont deuenus timides & craintifs, on leur en fait prendre vne drachme, avec vne cuilleree d'Oximel. D'auantage contre la goutte des pieds, voire quand mesme elle auroit presque osté tout le mouuement, on sentira vn merueilleux profit si on préd de ceste poudre dās du vin: finalement on en peut bailler enuiron deux drag-

drachmes à ieün, à ceux qui ont les genitoires enflez, & ils en sentiront grand profit. Iuf qu'icy nous auons assez amplement traicté l'hiftoire & recit du Thym, laquelle nous auons vn peu amplifié, pource que c'est vne herbe de grâde vertu, & qu'elle fe trouue par tous les iardins en abondance.

*Du Basilic des Iardins, & de ses
vertus & remedes.*

Quarreau VIII.

LE Basilic des iardins, que les Latins appellent Occimū est vne herbe fort bien connue, voire tellement qu'a grâde peine void on fenestre de maison, ni iardin qui ne'n soit garni & qui ne soit rempli de l'odeur qui en prouiēt, tāt il est de bōne & souēfue odeur: ie parle de celuy des iardins, & non pas de celuy qui vient aux chāps & par-mi les blez, qui sert bien souuent de pasture au bestail) à cause de laquelle plusieurs ont estimé ceste herbe auoir prins le nom d'Ocimum, car *Oxo* en Grec signifie sentir bon. Les Grecs modernes qui ont escrit des herbes, suiuan *Pfel-lus*, le nomment Basilicum, c'est à dire Roial, d'ou les François on prins le nom de Basilic dont ils l'appellent communemēt: & peut estre qu'il a esté ainsi appelé, à cause qu'on

le fouloit trouuer és iardins des Rois seulement, ou bien pource qu'il est digne des Rois, pour sa bonne & souefue odeur. Mais tout ceci ne sert de rien à ses vertus medicinales, desquelles il faut maintenant parler. Les anciens ne s'accordent gueres en ceci, a-sçauoir si le Basilic est bon à manger ou non. Chrysispe qui est vn medicin fort ancien, tient que le Basilic est nuisible à l'estomach : Gallien & Paul Ægineta, ont defendu d'en vser pour viande, à cause d'un certain humeur superflu, qui nuit aux parties interieures du corps : ce qui se doit entendre quand on en mange par trop : mais ils ne l'ont pas reietté pour s'en seruir exterieurement. Ceux qui maintiennent le contraire, comme sont Dioscoride & Pline, ne font que se mocquer de toutes ces choses comme inuentees à plaisir : car ils afferment qu'il est fort vtile à l'estomach, d'autant qu'il dissout & dissipe les ventositez qui s'y engendrent, si on le prend avec vin-aigre. Certainemet ie croy que tout ainsi que le trop grand vsage est nuisible, aussi si on en vse par mesure & sobrement, il est profitable : car si quelqu'un en vouloit vser en telle quantité que des autres herbes, il se peut asseurer qu'il sentira domage en ses entrailles : mais s'il en vse sobrement, & comme pour medicine, il
en

en sentira du profit interieurement. Le Basilic amollit le ventre, dissipe les ventosités, prouoque l'vrine, & si engendre grande quantité de lait aux femmes. Si on le pile & qu'on le sente, il fait esternuer, durant lesquels il faut fermer les yeux. Par son odeur il resiouit ceux qui sont tristes, & rend hardis les timides & pusillanimes : & si on le mesle parmi de l'ancre des courdouanniers il efface les verrues. Il resueille & incite au ieu d'amours, à cause dequoy on en baille parmi la viande aux cheuaux & aux asnes, au temps qu'ils se doyent ioindre à leurs femelles. On a aussi cogneu par experience, que prins avec vin-aigre, il est fort salutaire à ceux qui ont defaillance de cœur : pareillement à ceux qui ont douleur de teste, procedante de froidure, avec huyle rosat, ou avec le vin-aigre mesme. Dioscoride soustient, que enduit avec farine d'orge bien deliée, huyle rosat, & vin-aigre, il sert de remede souuerain contre les inflammations des poulmons : & que son suc dessèche les defluxions : & sa semence beuë, sert de remede contre la difficulté d'vrine : & qui plus est, qu'il aide grandement à ceux qui engendrent beaucoup d'humeurs melancholiques. Pline recite que Chrysippe medecin a fort crié contre le Basilic, & qu'il a deffendu aux hommes d'en vser, d'autant, dit-il,

que les cheures n'en magent point:lesquelles mangeans de toutes autres herbes assez goulüement,elles s'abstiennent de ceste-ci seule quoy qu'elles soyent affamees: ce qui a esté aussi remarqué par Sotion, qui a escrit de l'agriculture en grec: lequel adiouste encores, que quiconque vsera du Basilic, se mettra en danger de perdre le sens: & dauantage, que si celuy qui a mangé du Basilic, est mordu le mesme iour d'un scorpion, il ne pourra estre garenti. Auquel, & à Chrysipe, semble que Pline cōtredise directemēt, car il a laissé par escrit, que les cheures magent fort volōtiers le Basilic, & que iamais persōne ne fut troublé de son sens pour en auoir mangé: voire prins en vin, & vn peu de vinaigre, il sert de remēde contre les piqueures de scorpions terrestres. Dioscoride enseigne, l'ayant tiré des enseignemens des Africains, que ceux qui ont mangé du Basilic, ne sentent aucune douleur, s'ils sont piquez des scorpions. Je laisse donc à penser, asçauoir si l'opinion de Sotion, qui nie le Basilic estre bon, est point à reietter. Diodore en ses Empiriques croit que le Basilic engendre les poux, si on en mange abondamment à cause d'un humeur superflu qui abonde en luy. C'est bien vne chose merueilleuse, & digne d'estre rémarquée, ce que Iaque Holier medicin excellent, & qui a esté mon maistre, atteste auoir veu luy
mesme

mesme, asçauoir qu'un certain Italien, pour auoir souuent senti du Basilic, s'engendra vn scorpion dâs la cerueau, lequel apres l'auoir longuement & griefuement affligé de douleurs, le fit en fin mourir. Je diray pour la fin ce qu'un mien ami, homme bien versé, m'a fait entendre auoir esprouué: Si vne femme est au trauail de l'enfant, & qu'on luy face tenir vne petite racine de Basilic, avec vn tuyau de canne, elle enfantera soudain & sans douleur. Il y a plusieurs autres secrets excellents de ceste plante, qui sont encores cogneus à bien peu de gens, mais nous les reseruerons à publier, avec plusieurs autres, si seulement nous entendons qu'on aye prins plaisir à ceci.

De l'Orual, & des remedes qu'on en peut tirer.

Quarreau I X.

L'ORVAL est vne herbe fort odorante, laquelle les Parisiens appellent Toute-bonne: d'autres la nomment Sclarea ou Sçarlea, & d'autres Matrisaluia & Gallitricum: mesmes aucuns la disent l'herbe de saint Iean. Quant à ses vertus, tu apprendras pour le present ceci de moy. L'herbe pilce fait sortir les pointes & espines, & si aide à celles qui enfâttent avec difficulté faire sortir l'enfant: mise

dans le vin, elle refiouit l'esprit, & si rend plus habile au ieu des dames : vray est que si on en prend par trop, elle offence le cerueau. L'orual tant des iardins que le sauua-ge, sont medicinals : mais le sauua-ge, incite beaucoup plus à paillardise que l'autre, & pourtant on estime que c'est de là qu'il a prins son nom. Sa semence qui est noire, viët dans des petites gouffes, & cause pesanteur de teste, pour l'odeur forte & violente dont la plante ferit le nez & est toute pleine. La mesme semëce oste la chassieuseté des yeux, & si on la met dans l'œil, & qu'on la demeine longuement par dedans, en fin elle sortira comme pleine d'humeur, & chargée de petites peaux, & accompagnée de plusieurs ordures, faisant sortir hors avec soy & bali-ant tout ce qui estoit tombé dans l'œil, & qui faisoit de la fascherie. Ce qui est autant notoire à plusieurs, & ce par plusieurs experiences, comme la chaste Diane estoit cogueuë de ses chiens. Dauantage, elle nettoye les taches & blanchisseures qui viennent es yeux, si on la mesle avec miel : & si on la tient pour estre fort profitable à ceux qui ont la toux. Les femmelettes s'en seruët, & en vsent, contrel'esblouissement de la veuë, l'appliquât dessus les yeux, & ne l'ostët que premieremët l'esblouissement ne soit osté. Or asçauoir si ceste plante est point celle que Plin ne

Alectorolophos: ie m'en rapporté à ceux qui sont bien sauans & bien versez. Je ne veux pas laisser en arriere (encores qu'il semble n'estre pas bien conuenable à la matiere medicinale dont nous traitons) que la fleur & la semence de l'Orual des iardins mis en vn tonneau de vin, lors que le vin bouillit encores, fait que le vin a vne telle bonté, & saueur si plaisante, qu'on le prendroit pour vin grec de Cádiz, ou pour Maluoisie: dressez hardimēt les oreilles tauerniers & vendeurs de vin, mais au moins ie vous prie ne trompez plus personne par vos brouilleries & meslinges meschantes & nuisibles: au grand dommage & perte & des ames & des corps, & qui de uroyent estre punies de la teste, & principalement en ceste ville de Paris, qui est la premiere ville de France, en laquelle ce mal regne fort, duquel ceux qui y viennent pour estudier reçoient vn merueilleux dommage & incommodité.

Du Rosmarin & de ses remedes.

Quarreau X.

LE S villageois, & apotichaires aussi nōment Rosmarin, ce qu'aucuns appellent Libanotis: c'est vn arbrisseau propre à vigneter, & à faire chapeaux de fleurs, duquel l'odeur approche aucunement de la senteur

de la Resine, ou de l'encēs, & est si souëfue, & plaisante, qu'elle fait reuenir à eux ceux qui ont deffaillâce de cœur. Son parfum arreste les fluxions & la toux: & sa decoction guerit la iaunisse. Et ce qu'il a de singulier entre les autres, c'est que par la sêteur qu'il iette quād on le brusle, il rend vne maison assëuree, en temps de peste, corrigeant & repurgeant le mauuais aër par son parfum & vapeur salutaire. On tire par distillation vn huyle des plus hauts bouts des branches & reiettôs de Rosmarin, & de ses fleurs, qui est de fort bonne odeur, & grandement vtile aux paralitiques, & à ceux qui ont des durtez és iointures. L'eau tirée du Rosmarin est fort propre au cœur, & a l'estomach: les fleurs confortēt grandement la teste & le cerueau: & pourtāt leur vsage est fort efficace contre les maladies de la teste. Aucuns confissent ses fleurs avec sucre, puis les gardent, tant pour eux que pour leurs amis, pour en vser au besoin. Toute la plante est fort vtile à toutes maladies prouenant de froidure, d'autant qu'elle le renforce & eschauffe les membres & les nerfs. Mais il nous faut ici philosopher plus particulieremēt, des aides & remedes du Ros-

Collire est vnne sorte de remede pour le mal des yeux. marin, qui sont experimētees & approuuees. Le suc donc tiré de ces racines & de ses fueil les estant rassis & purifié, & puis estant re-

duit en forme de Collire avec miel escumé, sert

fert de beaucoup. contre les defluxions de la phlegme qui tombe sur les yeux. Que si la fluxion est chaude, on y pourra adiouster vn blanc d'œuf, avec le suc de quelque pomme de bonne sorte, & vn peu d'eau Rose, le tout bien battu & meslé ensemble. La semence du Rosmarin prins avec poiure dans du vin, est vn singulier remede contre la iaunisse, contre les oppilations du foye, & quand il s'enfle & deuient gros. Sa racine seichee, mise en poudre, & beuë avec vin, appaise & adoucit les douleurs du ventre, quand ce seroit mesme la colique: ce que font bië aussi la Rue & la Sarriette. Nous reseruerons le reste au traité ou nous parlerons des vins composez & medicinaux, & des autres choses des iardins.

De la Lauande, qu'aucuns appellent Nard bastard, & de ses remedes.

Quarreau XI.

LA Lauande, qui est appelee d'aucuns Nard bastard, & entre les François a presque retenu le nom latin de Lauādula (pour ce qu'on s'en sert fort aux bains & estuues, pour lauer les corps, & y estant meslée, elle fait sentir fort bon ce qu'on y laue) est vn arbrisseau assez cogneu de chacun: lequel n'estant pas de moindre odeur que le Nard, a prins entre nous le nom de Spica & l'appe

lons Aſpic:encores que pluſieurs donnent ce nom à la grande Lauande . On met à Paris en poignées & en petits faiſſeaux, les eſpics & ſommitéz, qu'on a accouſtumé de tondre & rogner de la Lauande, qu'on va vendant par la ville, en Eſté à belles chartees, & cheuaux chargez, pour s'en ſeruir à diuers vſages, cōme chacun ſçait. Mais ceci ne ſert de rien pour les remedes qu'ō en peut receuoir, deſquels ie vay maintenant diſcourir. Les Arabes eſcriuent, qu'elle aide grandement à toutes maladies froides du cerueau, meſmes aux paralyſies, & aux retractiōs de nerfs ou ſpafmes, à quoy s'accordent les auteurs Grecs & Latins: dauātage elle renforce l'eſtomach affoibli, & deliure le foye de toutes obſtructions & empeschemens . Elle aide auſſi bien fort aux opilations de la ratte: eſchauffe la matrice: & prouoque les mois, & fait ſortir l'arriereſais. La Lauande a vne odeur fort aromatique, à cauſe de laquelle, ſa ſemence & ſes fueilles ſont tant plus priſees és maladies & afflictions de la matrice: meſme ſi on en fait des fomentations ou lauemens, ou eſtans en poudre, ou ſeulement en infusion les faire prendre au dedans, elles ſeruent grādemēt aux ſuffocations de matrice, & aux eſleuations d'icelle procedantes de quelques vapeurs pourries & corrópues: & auſſi pour haſter l'enfantement . On tire vn huyle des
c fleurs

fleurs de la Lauande, par distillation faite en Alambis de verre, que les parfumeurs appellent huyle d'Aspic, lequel a vne senteur si forte & si bonne, qu'il surpasse toutes les autres senteurs, mesme fait qu'on ne les sent point: qui est la cause pourquoy les parfumeurs & apotichaires, le tiennent ailleurs qu'en leurs boutiques, afin qu'il n'efface la senteur du Musc, de l'Ambre, de la Ciuette, & des autres onguents & parfuns aromatiques: cest huyle a les mesmes vertus & facultez que la plante, & sert aux mesmes maladies, voire ses vertus sont plus singulieres que de l'herbe mesme, comme nous declarerons ailleurs.

Voila ce que ie puis pour le present mettre en auant des plantes & arbrisseaux de senteur qui sont es iardins. Je viens maintenant a traiter des herbes qui ressembtent à herbes ou arbrisseaux, & suiuray la mesme methode & ordre que i'ay tenu ci deuant en la tractation des autres: ie veux seulement aduertir le lecteur, que ie n'ay pas voulu mettre la Lauã de entre les fleurs odoriferantes, pource que la fueille ne l'est pas moins que la fleur, ce que ne se peut pas dire des fleurs, dont nous traiterons au cinquieme fillon. Toutesfois pource qu'on peut bien cueillir sa fleur separément de la fueille si quelcun la veut mettre entre les fleurs, ie n'y empescheray pas beaucoup.

LE QUATRIEME SILLON
du Iardin medicinal, contenant la description des fruits Cartilagineux, prouenant sur plantes semblables à herbes ou arbrisseaux: diuisé en six Quarreaux.

De la Courge & de ses remedes.

Quarreau I.



PVISQVE entre les fruits ressemblans à herbes, & reuestus d'une peau ferme comme Cartillage. La Courge tiét le premier rang: ie traiteray aussi d'icelle en premier lieu. Bien est vray que Cryssippus medicin, condamne entiere-ment les Courges, comme nuisibles & dommageables à l'estomach: mais c'est tout au contraire de ce que Diphilus en auoit dit, le quel tenoit, que les Courges estans cuites en eau & vinaigre, renforçoient l'estomach. Ceux d'entre les Africains & Grecs, qui ont escrit de l'Agriculture, tiennent que la Courge lasche le ventre: & que son ius distillé dans les oreilles, profite grandement contre la douleur d'icelles. La chair du dedans nettooyee de ses semences, sert de remede contre les clous, qui viennent es pieds: & le ius de sa decoction, r'affermit les dets qui branflét, & appaise les douleurs d'icelles, procedantes de cha-

de chaleur. Elle amolit aussi le ventre par sa grande humidité, encores qu'elle donne mauuaise nourriture au corps, cōme Heflus poëte l'a fort bien declaré par ces deux vers.

*La Courge froide estant humide de nature,
Bien peu au corps humain donne de nourriture.*

Si on la prent comme pour medicine, elle refroidit & humecte: si pour nourriture, il se ra bon d'y mesler quelque autre chose chaude, comme du Persil, d'Oignon, du Poiure, de Menthe, du Thym, & semblables: autrement elle engendrera vn humeur aqueux & qui se corrompra incontinent, mesmement si elle rencontre vn estomach froid. Les racleures de l'escorce pilees, & appliquees sur la teste des enfans, esteignent les ardeurs procedantes de l'inflammation du cerueau qu'on appelle Siriasis. Si on prend vne Courge crue & l'ayant cauee, on la réplit de vin, puis qu'on le tienne au ferein, & l'ayant vn peu amorti, on le face boire à celuy qui est dur de ventre & qui ne peut aller à selle, celà luy fera bon ventre. La cendre de la Courge seiche, mise sur les brusleures, y sert de singulier remede. Mais ie vous prie que nous n'oublions point de remarquer en ce lieu, que la Courge cuitte a l'estufée, ou frite, est beaucoup plus saine que bouillie: car en fricassant, elle perd beaucoup de ceste humidité superflue dont elle abonde: aussi est elle de plus gran-

de & meilleure nourriture. Que si on la fait bouillir, il y faudra mesler quelque chose acre & picquante: autrement elle sera fade & sans saveur: tellement que pour luy donner goust il faut mettre avec, quelque chose aigre, aspre, salee, & autre semblable: la vertu de laquelle elle communique à nostre corps: & par ce moyen elle perd ce vice qu'elle a de prouoquer à vomir: comme a tresbien & doctement escrit Galien, grâd en tout apres Hipocrates. Mais apres ces choses venons à deduire par le menu, les remedes qu'on a experimentez de la Courge. Quiconque donc fera brusler la Courge dans vn pot de terre, puis la broyera avec graisse de canard, il aura vn excellent & incredible remede contre les playes. Et le suc qu'on tire de ces raboteures pilees toutes seules, ou avec huyle rosat, guerit toutes brusleures de la peau. Mais entre tous les remedes cestuy-ci est merueilleux, asçauoir l'eau qu'on en fait, contre les fieures aiguës & ardêtes, en ceste façon. Couurez yne Courge fresche de paste fraischement pestrie, puis la mettez dans le four tout chaud, & la faite cuire tant que la paste de dessus soit cuite, puis la tirez & l'ouurez & recueillez l'eau que vous trouuerez dedans. Si vous voulez faire le mesme en vne autre sorte, il faut mettre toute la Courge entiere en petites pieces, & la mettre dans vn pot de terre

*Eau singu-
liere de
Courge
contre les
fieures ar-
dentes.*

terre tout neuf, & le bien boucher, puis le mettre dans le four, & le faire cuire, & garder apres l'eau qui en sortira. La façon d'vser de ceste eau, est de la prendre avec du sucre, pour rabatre les chaleurs violentes des fieures, pour desalterer & lascher doucement le ventre. L'infusion de la semence de l'herbe aux puces, que les Latins appellent Psyllium, ou l'eau ou elle aura trempé, avec sucre rosat, ou Iuleb violat fera le mesme, cōme nous l'auons remarqué par plusieurs experiences. Je ne veux pas laisser ce que j'ay tiré d'Au-

cena, asçauoir que celuy qui est suiet à la colique, se doit garder bien estroitement de manger ni Courge ni Concombre, en quelque sorte qu'on les puisse apprester, autrement s'il a du mal, qu'il s'en prenne à luy mesme, & qu'il die hautement ce vers.

*Aduertis
sement à
ceux qui
sont suiets
à la Coli-
que.*

J'endure & souffre playes que mon traitt mesme a fait.

Au reste ce ne sera point sans profit ni hors de propos, si ie donne cest aduertissement: que la Courge estant de soy insipide & du nombre des choses que les Grecs appellent Apia, c'est à dire sans aucune qualité manifeste, elle reçoit facilement telle saueur & odeur, mesme telle couleur qu'on luy vouldra donner: selon les choses qu'on meslera parmi. Or par quel moyen on la pourra rendre laxatiue sur le Courgier mesme, nous l'ensei-

*La Courge
est de soy
insipide &
sans goust.*

gnons au traité que nous auons fait des secrets des iardins, & par quel moyen on peut auoir des fruits, herbes, racines, raisins, & vins, qui purgeront le corps doucement & sans dommage.

Des Concombres, & de leurs remedes.

Quarreau II,

LE Concombre est tellement cogneu & par ceux des villes & par ceux des châps, qu'à grand peine se trouuera il des fruits des iardins, y n autre plus cogneu. Matron en ces vers l'appelle fils de la terre, pource qu'estant cōme produit d'icelle, il demeure tousiours en son sein. Heraclite Tarentin luy a donné le nom d'Hedygeon, comme qui diroit douceur de la terre. Diphilus Caristijs, me dicin fort excellent entre les Grēcs, & bon agriculteur, aentierement defendu de le manger à l'entree de table, comme estant nuisible, à cause qu'il reuiert à la bouche, comme le Reffort: mais prins à l'issue de table, il estime qu'il sera plus aisé à cuire & digerer: autrement il est d'aduis de s'en abstenir du tout. Ceux qui ont escrit de l'agriculture & de la médecine, tiennent que la semence de Concombre a vertu de temperer aucunement l'acrimonie de l'vrine. Toute la chair du Concombre a vertu de refreschir, qui est la cause

la cause pourquoy il se distribue difficilement par le corps, & passe malaisément par les destours du ventre, esmouuant par fois les frissons de la fièvre, & esteignant les amoureuses chaleurs. D'où est venu ce proverbe entre les Grecs : La femme tissant vn mâteau, doit manger du Concombre : pource que celles qui sont estat de tistre, si nous voulôs adionster foy à Aristote, sont pour la pluspart impudiques, & adonnées à paillardise. La senteur du Concombre sert grandement à ceux qui sôt tōbez en sincope, procédât de cause chaude : & sa semence aide grandement à ceux qui ont la vescie vlcerée, ou qui sont tormentez pour auoir pris des Cātharides, si on la leur fait prédre dās du lait, ou en du vin cuit : elle est aussi propre à ceux qui ont la toux, si on pile de ladite semence autant qu'on en pourra prédre avec trois doigts, avec du Cumin, puis qu'on la face boire avec vin. Elle profite aussi aux phrenetiques, prise avec lait de femme, & à ceux qui ont flux de ventre avec sang prise au pois d'un acetabule. Item à ceux qui crachēt pourri, prise au mesme pois, avec du Cumin. Tout le Cōcōbre a vne vertu abstersiue, & incisive, a cause de laquelle il embellit les corps, & les red luisans : & principalemēt si on fait seicher sa semēce, qu'on la pile, & l'ayant criblée, on s'en serue comme d'une poudre pour mondifier &

*Acetabu**le est vne**certaine**mesure pe-**sant deux**onces &**douze scru-**pules, selon**que Paul**Aegine-**ta escrit.*

nettoyer. Mais il sera bon & plaisant d'entendre ce que Claud. Galien discourt de bonne grace (comme il fait de toutes choses) touchant l'vsage des Concombres. Ceux, dit-il, qui peuuent bien cuire & digerer les Concombres, & qui se fias en celà en mágét sans crain-
 te tout leur faoul, amassent pour vn lóg téps vn humeur froid & aucunement grossier, dás les veines, lequel se conuertit à grande peine en bon sang, par la faculté que les veines ont de chäger les cruditez: & pourtát ie suis d'aduís que chacun s'abstienne de mäger ces viâdes qui engendrent mauuais sang, quoy que aucuns ayent l'estomach assez fort pour les cuire: car sans s'en prendre garde, telles viandes causent long temps après vn mauuais suc dans les veines, lequel à la moindre occasiõ se corrõp & pourrit, & engendre des fieures fort mauuaises & difficiles. Ce sont là les propos dorez de Galien, lesquels tous ceux qui desirent de conseruer leur santé doyuent bien noter, & encores mieux pratiquer. Certes ce que i'ay leu autresfois dans les Georgiques des Quintilins, est bien memorable, & si a esté experimenté heureusement par aucuns, comme i'ay entendu. Mais qu'est ce pourra dire quelqu'un? Si vn ieune enfant qui est encores à la mammelle, ou vn peu plus grandet, a la fieure, & qu'on prenne des Concombres de sa grandeur, & que
 on les

on les mette auprès de l'enfant, lors qu'on le couchera, comme si on les vouloit faire dormir avec luy, il sera incontinent gueri, la chaleur de la fièvre estant du tout engloutie & esteinte par iceux. Athenæus escrit que les Concombres croissent és iardins, principalement en pleine lune, & que c'est lors que ils deuiennent gros, mesme ils se remplissent, comme nous voyons aux Herissons de mer, qui est vn tesmoignage manifeste d'un humeur aqueux. Plin s'accorde avec Athenæus, adioustant que les Concombres estans comme effrayez toutes les fois qu'il tonne, ils se tournent & deuiennent secs: ce que i'ay cogneu par experience, en la presence de quelques miens amis, qui s'enquierent de la nature & secrets des choses, les voulans cognoistre par experience. N'oublions pas ie vous prie que les mulets, les chats, & les asnes, sont fort friands des Concombres; aufquels ils prennent vn merueilleux & singulier plaisir, mesmes ils les sentët de bien loin il faut donc bien bien fermer les lieux ou les Concombres viennent, de peur que ces bestes n'y entrent, gastent tout, & foulent tout aux pieds. Mais que fay ie m'esgarant ainsi de mon propos: ie reuiens donc aux remedes qu'on en peut tirer. Si on prend des semences de Concombres, de Courge, & de Citrulé, vne certaine quantité, autant d'un que d'autre

de semences de Laictuë & de Pourpié la moitié de la quantité: de suc de Regalisse, la quatre partie: & qu'auec de la Mucilage, tiree de la semence de l'herbe aux puces, on en face des petits torchisques ou panicles, pour les tenir en la bouche, ou pour les dissoudre en quelque sirop aigrelet avec eau d'orge, ce sera un souverain remede pour estancher la soif, & la chaleur de la fièvre.

Des Poupons, Melons, & Melopepons & de leurs remedes. Quarreau I I I.

PO V R C E que ces trois sortes de fruits venas és iardins, sont presque de mesme nature & qualité, nous les traitos ici en mesme lieu, les cōprenans tous sous le mot de Poupon: lequel on dit estre meur lors que la queue se separe du corps, & qu'il produit une senteur souëfue, quand on approche du nez le nôbril. Diocles Caristhius a escrit en son liure qu'il a fait des choses salubres, que le Poupon est de facile digestion, & qu'il plaist merueilleusement au cœur, mais qu'il n'aide pas beaucoup. Diphilus enseigne que ils s'engrossit soudainement, & qu'il donne fort peu de nourriture: avec ce qu'il passe difficilement par le ventre. Phœnias estoit d'aduis de mâger cru seulement celuy qui est sans semence. Galien tenoit que toutes les sortes de Poupons ont vertu de refroidir, & ré-

*Pour co-
gnoistre
quand un
Poupon est
meur.*

plir de

plir de force humeur: avec vne manifeste faculté de modifier, ce qui se mōstre clairemēt parce qu'il embelit & nettoye le cuir de toute crasse & ordure, & toutes lētilles & taches qu'y suruiennēt: mēsmie il efface les taches qui viennēt au visage pour auoir esté au soleil, & ces macules blanches que les latins appellent Vitilignes, à quoy on se sert principalemēt de la semence: il dit dauantage, qu'ils engendrēt mauuais suc, encores que l'estomach les cuise bien. Outre ce qu'ils esmeuuent à plusieurs cestē maladie soudaine & dangereuse qu'on appelle cholere, chassant par dessus & par dessous grande quantité d'humiditez superflues. Il les faut māger à l'entree du repas, à la condition toutes fois, que ceux qui sont phlegmatiques, boyuēt apres de quelque bō vin vieil: & les bilieux mangent deuant quelque viande aigrette, & par ce mōyen on euitera tout danger: car les Poupons mangés se conuertissent aisēmēt en humeur bilieux, ou en phlegme: parquoy le Melon qui est doux & bien meur n'est pas bon, mais nuit aux bilieux, & celuy qui n'est pas bien meur, nuit aux phlegmatiques. Plusieurs estiment plus les longs que non pas les ronds: mais & les vns & les autres esmeuent le ventre & prouoquent l'vrine, pourueu qu'ils soyent bien meurs: & pourtant on les estime vtiles aux reins: mais sur tout la semence, laquelle

on tient pouuoir chasser la pierre qui y seroit desia formee. Si on lie l'escorce de Poupon sur le front de ceux qui ont quelque fluxion chaude sur les yeux, elle l'arrestera fort bien. Le suc espessi, auëc sa semence mise en poudre, font vne composition deterfiue, fort propre à nettoyer la peau, & rendre la face fort polie & belle. Au reste toutes les especes de Melons prouoquent à vomir, si elles rencontrent vn corps qui y soit disposé: sinon qu'on mange, apres auoir mangé du Melon, quelque autre viande de bonne nourriture: car par ce moyen il descend plustost par le bas. Plusieurs medecins tiennent, que les Poupous amortissent les amoureuses chaleurs, & qu'ils amoindrissent la semence genitale. Aucuns ont escrit pour chose certaine & asseuree, que si on met vne piece de Melon dans le pot avec la chair, il fera que la chair sera beaucoup plustost cuite: ce qu'on peut bien aussi faire avec la semence d'Ortie, ou de Moustarde, ou seulement avec vn surgcon de Figuier, comme nous dirons en son lieu. Pour la fin, les chats sont fort frians des Melons, il se faut donc bien prendre garde qu'ils n'approchent des Melonnières. Je ne veux pas oublier que les semences de Melon nettoyees de leur escorce, & confites en sucre, sont de grande efficace, pour prouoquer l'vrine, & pour appaiser aucunement la douleur.

Secrets notables & bien remarquables.

leur de reins. l'auois laissé, par mesgarde, de dire, que les racleurs de Melon mises sur le deuant de la teste, soulagent grandemēt l'ardeur que les petits enfans ont au cerueau, qu'on appelle communement Syriaſis.

De l' Artichaut, ou Cardon de iardin: & de ses remedes. Quarreau I I I I.

IL ya aujourd'huy bien peu de iardins en France, qui n'ayent grande abondance de Artichauts: de sorte qu'on n'estimera pas vn bâquet magnifique, s'il n'y a d'Artichauts, ou ce seroit en saison qu'on n'en pourroit recouurer. Nous l'appelons Cardon qu'on plante en des iardins, pource qu'à la verité c'est vne espeece de Chardon, mais par artifice & culture, on l'a réduit domestique, de sauuage qu'il estoit: ce qui en a esté cause c'a esté la friandise des hommes, laquelle s'est bien sceuë approprier les choses sauuages & prodigieuses de nature, la viande des Asnes, mesmes celles que les bestes mesprisent, pour seruir à sa volupté & delicateſſe: tāt le plaisir de la bouche & de Venus, a transporte vn tas de Epicuriens, qui ne seruent que de fardeau sur la terre. Les François appellent communément ceste plante Artichauts, prenans le nō comme ie pense, d'vn article des Arabes Al, & de Cocalos, qui signifie (comme dit Ga-

lien interpretant le dire d'Hippocrates) le fruit d'une pomme de Pin, à laquelle l'Artichaut ne ressemble pas mal. On les fait cuire en bouillon gras, comme les Asperges, & on les apreste avec beurre, sel & vin-aigre, pour les servir à la table des riches, comme chacun fait. Aucuns les mangent tous crus avec sel & poivre, ou poudre d'Anis ou Coriandre, & mangent ainsi les escailles si bien agencées. Mais encorés à ce coup ie m'ahurte à la même pierre, oubliant que ce n'est pas de la cuisine que ie traite ici, mais de la médecine. Ie reuiens doncques à traiter des vertus & facultez de l'Artichaut: lequel Galien met entre les viandes de mauuaise nourriture, mesmement quand il est desia vieil & endurci, & desia prest à fleurir: car lors il engendre vn sang bilieux, il sera doncques meilleur de le manger bouilli que tout cru. On tient que ses pommes encorés petites & tendres prouoquent l'vrine: & si on les fait tremper en quelque vin puissant, elles resueillent l'appetit de Venus, comme le tesmoigne Hesiodé: lequel dit aussi, que lors que l'Artichaut est en fleur, les Cigales chantent fort asprement, les femmes sont fort apres le masse, & au contraire les hommes sont fort laches au ieu d'amours. Si on oste la mouelle de dedans sa racine, puis qu'on la face cuire en

re en vin, & qu'on la boyue, elle oſtera la mauuaife ſenteur des aiſſelles, qui ſentent côme le Boucquin, laquelle ſenteur s'euacue & s'en va par les vrines, comme Xenocrates aſſeure l'auoir experimenté. La meſme racine cuitte en eau, fortifie l'eſtomach, & ſi profite aucunement à la matrice, pour faire conceuoir des maſſes, comme l'ont aſſeuré Chérias Athenien, & Glaucias. Mais ſur ceci ie te laiſſe à diſcourir & coniecturer, aſſauoir ſi noſtre Artichaut eſt celuy meſme des Anciens. Il reſte ſeulement d'aduer-
(encores qu'il ſemble hors de propos) que les Artichauts ſont rudement aſſaillis par deux ſortes d'animaux, & qu'ils en ſont fort friands: premièrement des Rats, leſquels eſtans vne fois aſſiandez de leurs racines, viennent à grandes troupes, & de bien loin pour en manger: Pareillement des Taupes, leſquelles nous auons quelque-
fois veu en vne nuit auoir gaſté toute vne Cardonniere & Artichaudiere à force de remuer la terre & cauer. Quant aux moyens pour remedier à ces maux, il les faut chercher en noſtre traicté des ſecrets des iardins. Ie reuien doncques aux remedes qu'on peut tirer de l'Artichaut. Sa racine eſtant cuitte en vin & beuë, fait vriner en abondance, & ſi l'vrine ſent fort mauuais, comme l'enſeigne Oribafe: elle abolit auſſi la mauuaife



senteur qui procede du corps de plusieurs, qui sentét comme le Boucquin, comme nous auons ia dit ci deuant. Et pource Iean Langius tresdocte & bié expert medicin des Cōtes Palatins, a escript auoir experimenté avec heureux sucés, que ceste racine est vn remede souueraī cōtre ceste maladie que les medecins appellent Gonorrhea. Au reste, les iettōs tendres des Artichauts, cuits dans du bouillon, & aprestez avec Beurre, resueillent ceux qui sont laches au ieu d'amour, soit homme soit femme: asçauoir les hommes en Este, & les femmes en hyuer, comme auoyent remarque deuant Pline, Hesiode & Aristote. Ce n'est donc pas de merueilles, si les femmes sont si curieuses d'auoir des Artichauts, & si elles les nourrissent si soigneusement.

Des Cardons sauuages on en fait des artichaux.

Des Fraises & Framboises, & des aides & remedes qu'on en peut tirer.

Quarreau. V.

LES François appellent communement le fruit du Fraisier, Fraises: & le fruit du Framboisier, Frâboises, cōme s'ils vouloyent dire, Fraises de bois, lesquelles ne sont gueres differētes des meures rouges, hormis que ce fruit a vne odeur & vn goust beaucoup plus plaissant: D'ou est venu que quand on vent louer vn vin, comme estant de bōne faueur,

on

on dit en nostre commun langage, il sent la framboise. Le fruit tant des Fraises que des Framboises se corrompt fort aisément & bié tost: parquoy ceux qui en mangent beaucoup, tombent facilement en fièvre. Toutefois les fucilles du Fraiser cuittes dans du bouillon, & beuës, seruent de remede aux rateux: leur suc prins avec miel a la mesme faculté & vertu. Les mesmes fueilles avec les racines, guerissent les playes & vlcères, arrestent le flux des femmes, & les disenteries & flux de ventre, & si prouoquent l'vrine. La decoction tant de l'herbe que de la racine, profite grandemēt aux inflammations du foye, & si nettoye les reins & la vescie. La mesme tenue dans la bouche & gargarisee, renforce les genciues, r'asfermit les dēs branlantes, & arreste les fluxions. L'eau de son fruit meür, tiree par distillation, efface fort, voire abolit du tout les dartres, & les lentilles qui gastent le visage des femmes. La mesme eau beüe aide grandement les graueleux, & ceux qui ont quelque inflammation intérieure: comme Pierre Pena médecin fort excellent l'a enseigné. Le vin qu'on tire des Fraises, ou par distillation, ou par pourriture, sert grandement à ces petis vlcères qui viennent en la face, de trop grāde chaleur de foye, & efface les varons ou bourgeons du visage, les toiles des yeux, & les defluxions chaudes qui

y furoiennent, si on s'en laue ou qu'on l'applique dessus. Voire plusieurs m'ont asseuré, comme chose bien experimentee, que ce vin peut effacer les taches & tumeurs des ladres. Dauantage que l'herbe des Fraises, ensemble la racine, cuits en vin, & baillez à boire à ceux qui ont la iaunisse, à ieun, par quelques iours leur aporte vn secours asseuré. On confit les Meures du Framboisier, qui sont de couleur azuree purpurine, pour les manger avec plus grand plaisir, & pour estancher la soif.

Du Groiseliér tant blanc que rouge, & aide de leurs remedes.

Quarreau V I.

LE Groiseliér est fort commun, non seulement és iardins, mais mesme parmy les hayes & lieux champêtres, principalement celuy qui porte son fruit blanc, & qui auant qu'il soit meur, a vne aigreur fort plaisante: à cause de quoy, tât les riches que les pauvres le mettent ordinairement en leurs potages, lors qu'il est en sa saison, & dans les tartres & farces, au lieu d'aigrets: pour cela aussi les femmes enceintes en sont fort friandes. Il y a vn autre sorte d'Arbrisseau és iardins, qui est fort semblable au premier, lequel porte vne grande quantité de grains rouges pen-

dans

dans & amassez en forme de Raisin, qui sont ^{seles rouges}
 fort propres à resueiller l'appetit perdu (cō- ^{ou raisins}
 me sont aussi les grains de la Grenade) que ^{d'outre}
 nos François appellent communément Groi- ^{mer.}
 sele rouge ou d'outre-mer. Il y en a plu-
 sieurs qui la prennent pour le Ribes des A-
 rabes. Au reste le fruit tant de l'un que de ^{Vertu des}
 l'autre Groiselier, asçavoir tant du blanc ^{groiseliens.}
 que du rouge, rafreschit fort l'estomach trop
 chaud, estanche la soif qui tormente coustu-
 mierement les febricitans & autres. Il arre-
 ste les vomissemens, renforce l'estomach af-
 foibli, appaise le flux de ventre procedant de
 cholere, & si corrige les rongemens de ven-
 tre & les extorsions qui viennent d'humeur
 bilieux. Outre ce il adoucit la trop gran-
 de chaleur de sang, amortit la violente acri-
 monie de la cholere, retient la trop abon-
 dante purgation des femmes, & si est gran-
 dement utile à ceux qui sont tormentez de
 colique & disenterie: voire à ceux qui sont
 affligez de vomissement qu'on ne peut arre-
 ster, procedant de cholere. Les vendeurs
 de confitures confissent le fruit de l'un &
 de l'autre, avec sucre ou miel, pour les gar-
 der toute l'année. Je scay bien que plusieurs
 tiennent que tout ceci doit estre entendu
 du fruit de l'Aubespain, ce que ie ne veux
 pas nier opiniastrément, mais aussi ie puis
 bien dire que ceci conuient fort bien à nos

Groiselles, comme ie l'ay souuent experimenté.

LE CINQVIEME SILLON

du Iardin medicinal, contenât le discours des fleurs, tant de celles qui sont odorantes, que de celles qui sont sans odeur, diuisé en neuf Quarreaux.

Des Roses, & des remedes qu'on en peut tirer.

Quarreau I.



POURCEQUE les Roses sont, par tout estimees sur toutes les autres fleurs, comme par vn priuilege special, tant à cause de la beauté de la fleur, que pour l'odeur souëfue: car elles resiouissent merueilleusement la veüe, & sont comme l'embellissement des iardins: pourtant traitant des fleurs, i'ay voulu premierement traiter des facultez des Roses, & à bon droit comme il me semble, pour à quoy paruenir, il m'a semblé bon de remarquer en premier lieu leurs parties. Or les anciens nous en ont proposé six bien notables, & lesquelles il ne faut pas negliger à ceux qui font la medecine. En la fucille, ou si tu aimes mieux, en la fleur, se trouue deux parties, l'vne est du costé

sté qu'elles sont attachées au bouton, ou petit calice, laquelle est blancheastre, comme l'ongle: aussi l'appelle on vulgairement l'Ongle des Roses: l'autre contient tout le reste de la feuille. Apres celles-ci suyuent deux autres parties, lesquelles sont au milieu de la Rose, comme petites semences de couleur iaune, attachées à des petits filamens, les petits grains sont vne partie, & les filamens l'autre. Les autres parties de la Rose sont contenues dans le bouton ou petit calice, asçauoir l'vne tout au dessus, & l'autre au fond. Quât aux facultez de ces parties, les feuilles fortifient le cœur, l'estomach, le foye & la vertu retentrice, elles moderent les douleurs précédantes de chaleur, & resoluent les inflammations. Quant aux Ongles, elles sont propres à mettre dans les laniemens, fomentations clisteres, qu'on fait pour arrester les fluxiōs. Les petits grains ou mouchets qui viennent au milieu, avec leurs filamens, ont vne vertu admirable pour arrester les fluxiōs des gēciues, & les blāches fleurs des femmes. Le Calice, qu'aucuns appellent teste ou bouton, avec tout le pied, arreste le flux de ventre & les crachemens du sang. Outre les parties des roses florissantes dont nous auons iā parlé: il s'en trouue encores trois autres au fruit, lors qu'il est venu à maturité. L'vne en la substance de la chair qui est rouge: l'au-

tre en la semence : & la troisieme en ceste
 bourre qui est enclose dedans : toutes ces
 trois parties ont vne manifeste vertu de re-
 steindre , parquoy on les tient pour estre vn
 remede singulier contre les flux de ventre, &
 contre les purgations & vuidanges des fem-
 mes, de quelque sorte qu'elles soyent: sem-
 blablement contre la perte de la semence
 genitale, que les medecins appellent Gonor-
 rhœa, à laquelle elles seruent principale-
 ment. Apres auoir discoursu aucunement de
 ces choses, ie viens à traiter plus particuliere-
 ment des remedes qu'on peut tirer des Ro-
 ses. Si on fait vn chapeau de Roses toutes
 fresches & recentes, & qu'on l'agence genti-
 ment sur la teste, celà seruira pour appaiser
 les douleurs d'icelle procedâtes d'auoir esté
 trop au Soleil, ou d'auoir trop beu: mais à fau-
 te de pouuoir recouurer des Roses fresches
 on pourra prendre des seiches, & les faire vn
 peu tremper en eau avec vn bien peu de
 vin-aigre, & s'en seruir, comme l'a ensei-
 gné Galien : lequel conseille d'vser de la de-
 coction de Roses seiches contre la chassieu-
 seté des yeux qui vient en esté, bassinant de
 ceste decoction les paupieres, avec vne es-
 ponge. Le mesme est d'auis d'vser de Roses
 seiches pilees & broyees en vin blanc, & ap-
 pliquees sur les coins des yeux, contre la
 chassieu seté coniointe avec demangeison,
 proce

*Remede
 contre la
 douleur de
 teste.*

procedante du soleil & de la poussiere :
 mais il faudra oindre les yeux avec huyle,
 lors qu'il voudra aller dormir, & si sera
 necessaire que le malade s'abstienne de tou-
 tes choses acres & fortes . Les Roses sei-
 ches bouillies en vin blanc , iusques à la
 consumption de la tierce partie , & don-
 nees pour s'en lauer souuent la bouche , ap-
 paisent fort la douleur des dents , mesme-
 ment si elle prouient de matiere chaude .
 Les mesmes Roses bouillies en eau , ser-
 uent de remede souverain contre les inflam-
 mations de la bouche , du gosier , & de la
 Luette . Que si tu prens trois onces de Ro-
 ses, deux iaunes d'œufs cuits durs , & que tu
 broyes le tout en vin blanc , & puis que tu
 les incorpores avec Cerat Rosat , tu appai-
 seras les grandes chaleurs & violentes dou-
 leurs du fondement , comme aussi des He-
 morrhoides . Mais auant que passer plus a-
 uant, il sera bon & plaissant d'entendre ce que
 Damascenus Mesue a escrit des vertus des
 Roses, fort doctement & en medicin, & voi-
 ci son discours . La Rose est froide au pre-
 mier degre , seiche au second , & est com-
 posee de diuerſes substances , lesquelles on
 peut separer : ascauoir de substance aqueu-
 se moyennemēt, de substāce terrestre, laquel-
 le est astringente : de substāce aëree, laquel-
 le est douce & aromatique , & finalement de

*Cerat ro-
 sat est vne
 certaine cō-
 position
 ainsi appe-
 lee par les
 mediciens.*

*Les diuer-
 ses substan-
 ces conten-
 nues en la
 Rose.*

substance ignee, en laquelle est contenue l'amertume, la rougeur, la perfection & la forme. Les Roses fresches tiennent plus de l'amertume que de l'astringion, & à cause de ceste amertume, elles laschent le ventre, & mesmement leur suc; Mais estans seichees elles retiennent la faculté astringente & qui reserre, les blanches plus que les rouges. Elles ont vertu de resoudre, d'ouurer & de nettoyer, & si corrigēt les intemperies chaudes, & fortifient les parties par leur vertu astringente, principalement ces petits pōils, & la semence qui se trouue dans le bouton ou calice. Entre les deux sortes de Roses (asçauoir les rouges & les blanches) celles qui ont la couleur plus naïfue, & qui ont moins de feuilles & lissées, sont les meilleures. Les blanches ne sont point laxatiues du tout, ou bien peu, mais elles sont plus astringentes & confortatiues que les rouges. L'eau ou les Roses sont esté mises en infusion estans fresches, ou mesme leur suc, purge le sang des veines & arteres de l'humeur bilieux qu'y peut estre, ouure les obstructions de l'estomach & du foye, profite grandement à la iaunisse, remédie aux fieures causees d'humeur bilieux, fortifie les entrailles, guerit le battement de cœur, entretient la faculté retentrice, amortit toute inflammation & appaise la douleur qui en procede, prouoque le sommeil

Plusieurs
belles facultés
de l'infu-
sion & du
suc des Ro-
ses.



meil & repos, referre l'Aluette prolongee, fortifie le gosier, oste l'yurognerie, & si contraire fort aux catharres & fluxions. Au reste d'autant que c'est vn médicament benin, mais fort foible pour purger, on le fortifie ordinairement avec quelque autre chose, comme avec petit lait ou avec miel: car vne once de suc de Roses, avec deux onces ou trois de petit lait, & vn biē peu de Nard purge cōmodēmēt. Semblablement les fueilles de Roses mises en infusio dans du petit lait, & qu'en l'expressiō on adioustē vn peu de miel, cela purge sans aucune facherie. Les roses confites en miel, nettoient, purgēt & fortifient; mais incorporées avec sucre, elles ne font pas tant mōdifcatiues, mais elles sont plus astringentes & confortatiues. Le vinaigre Rosat appaise toutes inflammations, il est incisif, il purge & cōforte. Les Roses fresches ne peuuent souffrir d'estre rien esuittes, ou bien peu: car la vertu laxatiue & deterfiue qu'elles ont, s'en va incontinent au feu. Leur suc cuit moyennement se fait plus cler, & est rendu plus deterfif. Voila ce que Meluē en dit. Je reuien donc à mon propos, à scauoir à traicter des remēdes qu'on peut tirer & receuoir des Roses, en quoy ie ne laisseray rien de ce que i'ay leu dans les bōs auteurs, ou que j'aye aprins de ceux qui l'ont expérimenté, ou que j'aye obserué moy mesme. Que

si quelqu'un se plaint de ce que ie suis si long en ce discours, qu'il considere que ie le fay à cause du populaire, qui ont leurs Iardins & leurs cofres tous farcis de Roses. Or pour ne rien laisser en ce recit, tant commun & vulgaire soit-il, ie veux descrire en brief la conserue de Roses, qu'on appelle : Laquelle on faict coustumierement de Roses rouges seulement, estans encores fresches, & leur ayant

*On appelle
l'Ongle des
Roses ce
qui est blanc
au fin bout
de la fucil
le en bas.*

osté l'Ongle, les pilant dans vn mortier de pierre, puis y adioustant au double de sucret. Apres cela on les serre sans les rien mettre au Soleil: mais il ne faut pas du tout remplir le pot, de peur qu'il ne verse, & afin qu'il y ait assez d'espace pour pouuoir bouillir. Ie reuien maintenant à traiter des remedes des Roses. Zoroaster en ses obseruations Grecques d'agriculture enseigne, que celuy ne sentira aucune douleur aux yeux toute l'annee, qui aura remarqué tous les boutons des Roses, auant qu'elles espannissent, les touchant tout doucement, & se nettoyant les yeux avec trois desdits boutons, les laissant toutesfois sur le Rosier. Ce que plusieurs assurent estre veritable, en celuy qui premier remarquera les boutons cachez en leur plante. Quoy que soit, la rosee qui se trouue sur les Roses recueillie avec vne plume nette, ou avec vne spatule, & mise sur les cillons des yeux, guerit la chassieusete d'iceux. Le ius es-

pez des Roses seiches cuittes en vin, & fort pressées, est fort estimé contre les douleurs de la teste, des yeux, des genciues & des oreilles. Il est aussi bon & profitable contre les maladies du fondement, & du boyau culier, si on l'en oinct avec vne plume, ou qu'on en verse dedans. La Rose pilée & appliquée apaise le feu qu'on appelle de saint Anthoine, & si adoucit la trop grande chaleur de l'estomach & de la poitrine. Elle arreste le flux de ventre, & la trop grande abondance des mois, soit qu'on la boiue avec vin, ou qu'on la siringue dedans. Il faut encores adiouster ceci, que la poudre des Roses seiches, sert de remede singulier contre les maladies de la bouche, appliquée toute seule, ou bien avec miel. Je suis content de passer sous silence sans faire aucune mention de l'eau Rose, laquelle on tire communément par la vertu du feu, avec diverses sortes d'instrumens & alambics: mais celle est bien meilleure & de meilleur odeur, qu'on tire avec alembics de verre, suspendus en vaisseaux d'eau chaude: ou à la façon des anciens dans le bain d'eau chaude mesme, qu'on dit communément Bain marie, comme nous le monstrerons ailleurs.

Je diray seulement pour la fin, que les Roses, comme aussi toutes autres fleurs, seichees au soleil qui ne soit par trop violent, ou au four

Comme il faut seicher les Roses & toutes autres fleurs.

lors qu'on en a tiré le pain, retiennent mieux leur odeur & leur vertu, que si on les faict secher à l'ombre, pourueu qu'on ne les y laisse pas trop longuement. Il en est de mesme des herbes & racines odorantes. Je me contenteray doncques de t'en auoir aduertit à ceste foys, m'assurant que tu entendras le mesme des autres fleurs. Il reste beaucoup de secrets & merueilles des Roses, lesquels ie te communiqueray quelque iour, avec plusieurs autres choses incogneues iusqu'à present, en nostre traité des secrets des choses medicinales.

*Du Lis des iardins, & des remedes
qu'on en peut tirer.*

Quarreau II.

DAutant que le Lis fuit de bien près l'excellence de la Rose (comme l'a escrit Plin) & qu'il iette sa fleur enuiron le milieu de la recueillie des Roses: nous le mettons aussi incontinent apres les Roses, comme voulas faire vn couple de deux excellentes fleurs, & comme disent les Grecs, que les fleurs des fleurs soyent mariees ensemble par vn lien estroit: à cause qu'elles produisent vn odeur continuél presque diuin. I'escriray donc tant plus volontiers de ceste noble fleur, d'autant qu'elle sert d'enseigne & marque à nos rois & à ceux qui sont fortis & issus de leur sang,

mesme



mesme aucuns pour son excellēce l'appellent fleur royal; ou fleur de Iunō estant fort plaisante, à cause de sa naïfue blancheur qui est sans aucune tache, & sa souëfue o'deur. Ses racines beües en vin, seruent de remede singulier contre la picqueure des serpens: & auales auec vin-miel, elles purgent le mauuais sang par embas, & par ce moyen profitent grandement à la ratte. Elles effacent les dartes & peaux mortes de la face, & derident la peau. Cuites auec grēsse & huyle, elles sont bonnes cōtre les brusleures, mesme font renaistre le poil es lieux bruslēz; elles amolissent aussi les durtez de la matrice: les fueilles cuites en vinaigre s'appliquent auec profit sur les playes: & le suc qu'on tire en les pressant est fort vtile pour derider la matrice: pour prouoquer les sueurs; & pour faire meürir les apostumes. Les mesmes fueilles seruent de remede aux morsures des serpens si on les applique dessus; & aux brusleures si on les fait bouillir. Les racines rosties auec huyle rosat ferment les playes, & auec miel appliquees sur les nerfs coupez, & sur les parties deslouees, y seruent de souuerain remede, & si effacent les taches blanches qui viennent au corps, que les Latins appellent Viti-
ligines: ce que font bien aussi les fueilles si on les fait bouillir & qu'on les reduise en forme de cataplasme. On tire vn certain suc des

Remede cōtre les dartes & brusleures,

fleurs de Lis, qui sert à meurir les apostumes & à amollir la matrice, que les anciens ont appelé miel & Syrion, & non pas Syraon, comme plusieurs escriuent, qui est celle liqueur douce comme miel, qu'on fait de la decoction des Figues seiches, fort propre à mondifier & amollir. La racine du Lis qui est faite en façon d'Eschalote, cuite en vin & broyée, sert contre les clous qui viennent es pieds, mais il la faut laisser là sans l'oster iusques au troisieme iour. Les mesmes racines avec fucilles de Iusquiamme & farine de froment meslez, appaisent & adoucissent les inflammations des testicules. On tire vne certaine eau des fleurs de Lis, avec Alembics de verre au Balneum mariæ, merueilleusement exquise pour polir & derider le visage des femmes, & le rendre blanc comme neige, laquelle nous descrirons en son lieu. La racine appliquee en quelque façon que ce soit, ouure les hemorroides: L'onguent qu'on en fait avec huyle d'Amandres ameres & cire blanche, deride merueilleusement, nettoye & polit le visage des femmes. La mesme racine cuite sous la cèdre, & broyée avec huyle d'olive sert de remede contre les brusleures, soit qu'elles soyent faites avec feu ou avec eau bouillante, comme tesmoigne Galien. Si on la fait cuire en vinaigre, elle corrigera les apostumes chauds des testicules: si on la broye

avec

*Eau singu-
liere des
Fleurs de
Lis,*



avec miel, elle nettoiera la teste des furfures & peaux mortes qui en sortēt ordinairement, mais se faut tōdre premieremēt, puis s'ē oindre & frotter. Elle est aussi bonne contre la rache où tigne. Les fueilles cuittes en vinaigre, & appliquees sur la ratte, seruent de remede singulier contrē la durtē d'icelle, mais il faudra premierement boire vn peu de la decoction. Le suc aussi tiré d'icelles, pilé avec la semence, & beu, aide merueilleusemēt aux picqueures des animaux venimeux: Et le suc tiré des fleurs, aide grandement aux apostumes qui viennent en la matrice. Dauantage, la racine cuite sous la cendre, & broyee avec huyle: puis mise dans la matrice, avec vn linge en forme de Pessaire, prouoque les mois, amollit la matrice, & ouure l'amarri: outreplus la semence pilee dans du vin blāc, & beuē, fait soudain sortir l'enfant mort dās le ventre. L'huyle qu'on fait des fleurs freschement fait, y adioustant vn peu de saffran, resout toutes inflammations. Si on bassine les parties secretes des femmes avec eau de la decoction des fueilles & racines de Lis, ce sera vn bon moyen pour leur prouoquer les mois, & les purgations qui doyuent sortir apres l'enfantement avec l'arriere-fais: Vray est qu'apres la fomentation il sera bon & profitable de tremper vn linge dās la mesme decoction, & le mettre iusques à l'orifice de

la matrice, & continuer cependant la fomentation au dehors. Que ceci soit la fin. La racine cuitté avec des Auls, & broyée dans la lie de vin claret, corrige fort bien la mauuaise couleur que les femmes ont apres l'enfantement, à cause des douleurs qu'elles ont eues; mais il faudra oindre la face de la femme le soir, & la lauer & nettoyer avec eau d'orge le matin, ce qu'il faudra reiterer iusques à ce qu'elle aye recouuré sa premiere couleur, voire encores plus naifue. J'escris ces choses pour les villageoises, auxquelles les Auls sentent le musc, & non pas pour les mignardes des villes ou de la cour qui ne veulent rien sentir que Ciuette, Ambre & Roses: mais quoy? il ne sent sinon ce qu'il doit sentir, & tous ne prennent pas plaisir aux bonnes senteurs. Mais tout ceci ne fait rien à nostre propos.


Des sortes de Violiers & de leurs remedes

Quarreau

III.

JE trouue qu'entre les anciens les Violiers ont esté enpris après les Roses & Lis. Toutes les especes se trouuent coustumierement (tant sous le nom de Violette que de Giroflee, pource qu'elles sentent le Girofle) és iardins & en leurs murailles, comme aussi és murailles des maisons & des temples: & sur toutes les iaunes, que les Arabes & les Apotichaires

tichairés, appellent Keiri. Elles viennent incontinent au printemps, & sentent meilleur que pas yne des autres. On void aussi les fenestres, toutes tapissées & les petits iardinetts de toutes les especes de Violiers diligemment cultivez & nourris par les femmes, & par ceux qui habitent és cloistres & monasteres, & c'est merueille de combien de diuerses couleurs on en trouue: car il y en a de blâches, de rouges, de couleur cœleste, de iannes comme safran, & de bigarrees & marquetees, & c'est vn plaisir que de les veoir & sentir leur odeur plaisante, mesme de bien loin, & toutes les especes sont fort fertiles. Mais les plus estimées sôt les iaunes, lesquelles viennent les premieres, & ont vne odeur si forte que bien souuent elles font mal à la teste & faschent le nez. Ces Violettes iaunes hyuernent d'elles mesmes parmi les murailles, & ne craignent pas l'hyuer, la glace, la neige, la gresle, ni les autres iniures de l'aër: elles ont leur racine dure comme bois, & qui a beaucoup de filaments, par le moyé desquels elles sont tellement attachees & enlaccées aux fentes & creuasses des murailles que difficilement les en peut on arracher. No^r en auôs veu quelquesfois de fleuries en uiron Noé: Bien est vray que toutes ces choses ne seruent de rien aux facultez & remedes des violiers, desquels nous voulons à present



sent traiter. Les fleurs seiches du Violier estans bouillies prouoquent les mois, avec miel guerissent les vlceres de la bouche, avec cerat corrigent les fentes & creuasses du fondement, & les trop grâdes purgations, comme escrit Dioscoride, elles sont de merueilleuse vertu contre les inflammations de l'amarri. Les racines enduites avec vinaigre diminuent la ratte, & aident grandement ceux qui ont la goutte aux pieds. La semence prise avec vin au pois d'une drachme, ou enduit avec miel sur les parties naturelles des femmes, attire les mois. l'arriere fais, & l'enfant encores qu'il soit mort, La plante de tous les Violiers, comme dit Galien, a vne vertu deterfiue, & est de subtiles parties: mais principalement les fleurs, & les seiches ont plus de vertu que les verdes, pource que toute l'humidité superflue est consumee: aussi ont elles ceste faculté d'amoindrir & subtilier les cicatrices des yeux, quelques espees qu'elles soyent. Si quelcun reprime avec force eau, on autrement, la grande force qui est cachee és fleurs, il aura vn medicament fort propre contre les inflammations, tant de la matrice que des autres parties: principalement contre celles qui pour estre enuieillies, se sont endurcies: & avec cerat il seruira de remede singulier pour resoudre les vlceres qui sont difficiles à consolider. Aucuns pour guerir
les in-

les inflammations endurcies des iointures, font cuire la racine du Violier, la pilent & l'appliquent dessus. La semence du Violier iaune pillee en vin blâc (s'il n'y a point de fièvre) & beuë, prouoque efficacement les mois: & si on s'en bassine elle soulage grandement les douleurs de la goutte froide. Les fleurs du mesme Violier iaune prinſes à la mesure d'un demi Ciathe, avec trois ciathes d'eau, seruēt aussi pour prouoquer les mois si on continue d'en prendre quelques iours. Je me suis aduifé de faire ici cest aduertissement, que i'auois oublié en nostre discours des secrets des iardins, asçauoir que par la diligence des iardiniers, & en replantant souvent les Violiers, soit les iaunes, les rouges, ou les autres, on fera que leurs fleurs viendront si grandes & leurs fueilles si espesses, qu'elles ne seront gueres moindres qu'une Rose musquee.

Le Ciate est vne certaine mesure qui pèse deux drachmes, qui sont vne once & demie comme dit Oribasius.

*De la Violette de Mars, & des remedes que
on en peut tirer. Quarreau IIII.*

ENTRE les Violettes que nous appelôs de Mars, pource qu'elles viennent pour la pluspart au mois de Mars & font l'entrée du printemps, il s'en trouue non seulement de couleur violette, mais aussi de blanches

qui ne sont pas pourtant de moindre odeur que les autres, quoy que Mathiol. médecin tresdocte & fort diligent soit d'autre aduis, comme il le testifie en ses commétaires que il a fait sur Dioscoride. Quant à leurs vertus & facultez, Tarentinus auteur bien versé & expérimenté en l'agriculture & médecine des Grecs, escrit que les fleurs des Violettes de Mars refroidissent, à cause dequoy elles seruent de remede contre les inflammations comme aussi l'huyle & le vinaigre qu'on en fait comme nous dirons incontinent apres. L'eau de leur infusion & ou elles auront trempé quelque temps, sert de remede pour soulager les petits vlcères & apostumes qui viennent en la bouche des petits enfans: & si aide grandemât les pleuresies, Squinances, & les apostumes & tumeurs qui viennent en la poitrine. La senteur de ces fleurs seulement, est bonne contre l'yurognerie & pesanteur de teste, ou bien agencees en forme de chapeau & mises sur le deuant de la teste. Je di dauantage, que ceux qui sont suiets au hant mal, sont fort resiouis par la seule senteur de la Violette (ce que peut estre se doit entendre du Violier iaune) mesme en font aucunement, soulagez, & principalement les enfans: & non pas seulement de l'odeur, mais s'ils boyuent de l'eau ou ses fleurs auront trempé. Ses racines broyees avec Mirrhe & Safran, aident mer-

ueilleu-

Squināce
est la mala
die que les
Latins nom-
ment *An-*
gina, qui
est une in-
flamma-
tion du go-
ser.

ueilleusement aux inflammations des yeux:
 & les fueilles pilees avec miel & vinaigre,
 guerissent les vlcères de la teste. Les mesmes
 fueilles bouillies guerissent toutes les tumeurs
 de la matrice, si on la bafine avec la deco-
 ction encores tiede. Elles sont aussi bonnes,
 meslees avec Cerat: cōtre les fentes & creuas-
 ses enuieillies du fondement, qu'on appelle
 Rhagadies. Les semences pilees avec vin blanc
 soulagent la goutte chaude, si on s'en laue:
 mais après la fomentation il faut mettre des-
 sus les fueilles pilees en huyle rosat, lesquelles
 il faudra appliquer avec vn linge, & les chan-
 ger souuēt. Le m'estois presque oblié de dire
 que les semēces broyees en vin blanc (pour-
 ueu qu'il n'y ait point de fleur, & beuēs,
 purgent l'estomach, de la cholere, comme
 feroit le Rhubarbe, de qu'on attribue aussi
 aux fueilles verdes, & aux fleurs trempces lon-
 guement en eau ou Oximel, & changees sou-
 uent. Voire elles aidēt aussi aux maladies du
 costé & des poulmons, engēdrées d'humeur
 bilieux ou de sang, comme nous auons ia dit
 & appaisent la toux & difficulté de respirer
 des petits enfans. Les mesmes fueilles toutes
 seules, ou avec Griotte seiche, appliquees ser-
 uēt de remede cōtre l'ardeur de l'estomach,
 contre les inflammations des yeux, & contre
 la descente du fondement. Le desir & affe-
 ction que i'ay d'aider à la posterité, me con-

*Oximel est
 une cōpo-
 sition faite
 avec vin-
 aigre &
 miel.*

traint de ne laisser point en arriere vn ou deux secrets des Violettes, lesquels m'ont esté communiquez familièrement depuis peu de temps par vn medicin Italien, lesquels neantmoins i'ay depuis leu en vn auteur digne de foy, & que i'ay bien remarqué. Si Vos de la teste disoit-il, a receu quelque coup violent, soit en vn ieune homme ou autre, baillez luy incontinent à boire des Violettes pilees, & continuez par quelques iours. Outre ce, si queleun a le pied droit blessé & offensé, qu'il lie sous la plante du pied gauche des Violettes pilees avec du vin: que si la blesseure est au pied gauche, qu'il les lie au pied droit, ces choses sont assez aisees à esprouuer à ceux qui les voudront experimenter, & qui seront curieux de tels secrets. Mais il sera bon de mettre en auant ce que Mesue a dit touchant les Violettes. La Violette, dit il, recente est froide & humide au premier degré, mais estant seichee elle ne l'est pas tant: car en celle qui est toute fresche, l'humidité superue qui est en la superficie, & qui rendant les parties glissantes purge, & ambindrit la chaleur: mais estant seichee, celle humidité se resout, de sorte que la chaleur se manifeste dauantage, de laquelle procede toute l'amertume qui purge par attraction. La Violette donc fresche & recente refroidit, appaise les douleurs

*Vertu des
violettes se-
lon Mesue.*

leurs procedantes de chaleur, comme font les choses Narcotiques, c'est à dire qui rendent les membres stupides & endormis, e-teint les inflammations, adoucit la poitrine & la canne du poulmon, purge l'humeur bilieux, & rabat aucunement la chaleur: outre ce, elle prouoque à dormir, profite à la matrice & à l'esquinance, appaise le mal de teste procedant de chaleur, aide fort aux inflammations & obstructions du foye, & à la iaunisse, appaise la soif, & adoucit les fieures procedantes d'inflammation, mais elle engendre defluxion d'humeur au nez que les medecins appellent Coryza. Au reste il faut cueillir la Violette de matin, lors que sa vertu n'est point encôres resolue ni esuanoüie par la chaleur du soleil, ou par la pluye. Si on'en fait de la conferue avec miel, elle est plus deterfiue, mais elle refroidit moins: mais avec sucre au contraire. Son suc & le sirop qu'on fait de son infusion plusieurs fois reiteree, rendant les parties glissantes purge doucement, comme celuy des Roses, parquoy il est bon pour dōner à ceux qui ont mal de costé, pour lâcher le ventre. Le vinaigre aussi qu'on en fait, corrige les ardeurs & violentes chaleurs des fieures. Voi la ce qu'en dit Mesué, sur lequel recit nous mettons fin au discours des Violettes,

*De l'Oeillet des iardins, qu'aucuns appellent
Gyroslee, & des remèdes qu'on
en peut tirer.*

Quarreau V.

LE commun peuple François appelle cette fleur dont nous auons à discourir maintenant, Oeillet; à cause de sa forme: laquelle est en tel pris & estimé entre les femmes & les moines, à cause de son odeur plaisante & de sa couleur viue, qu'ils la nourrissent & cultiuent avec vn soin & diligence nonpareille; non seulementrés iardins, mais aussi dans des pots de terre & en des caisses quasi par toutes les fenestres. Ces fleurs sentent naifue-
ment le Gyroslee, d'ou est venu aussi qu'on leur a donné le nom de Gyroslees, & leur peut on donner encores vn odeur plus plaisant, par l'artificie que nous auons monstré en nostre traité des secrets des iardins. C'est mer-
ueille qu'une fleur si remarquable, tant plaisante & belle, & qui peut bien debatre contre la Rose & pour la beauté & diuersité, & iene scay mesme si elle emportera le pris, à neantmoins esté enseuelie sous silence par les anciens: car à la verité elle ne doit rien à la Rose, ni en couleur ni en odeur, sauf que la Rose se fait sentir de plus loïn; mais aussi apres estre cucillie elle ne se peut garder fresche qu'un iour au plus, au lieu que l'Oeillet
se gar-

se gardera frais & beau quatre iours ou plus: Je scay bien qu'aucuns estiment que c'est le *Lychnis coronatus* dont les anciens ont escrit. Quant à ses vertus & facultez, & aux remedes qu'on en peut tirer, encores que les anciens medecins & agriculteurs n'en aient dit pas vn mot, pour le moins que ie sache: si suis ie deliberé d'en dire ce qu'André Matthiol en a escrit. Il est aisé à coniecturer, dit il, que l'Oeillet a vne faculté chaude & seiche tant par sa bonne odeur que par l'amertume qui est en luy: ses fleurs, principalement les rouges, sont bonnes contre toutes les affections du cœur, comme sont defaillances & tremblemens de cœur. Elles seruent aussi contre les tournoyemens de teste, contre le haut mal, la paralysie, le retirement des membres qu'on dit conuulsions, si on les boit avec decoction de Betoine ou de Mariolaine: on en fait de la conserue avec sucre, comme on fait des Rosés: & sont fort profitables non seulement pour les choses susdites, mais aussi contre tous venins & morsures venimeuses. On en baille communément pour faire mourir les vers du ventre, & contre la contagion & infection de la peste: Vray est que le suc tiré de toute la plante pilée & pressée, est meilleur & de plus grande vertu contre ces choses: car ce suc estant beu au pois de quatre onces, mesme apres qu'on est saisi

du mal, il guarétit. On fait aussi de ses fleurs du vinaigre fort exquis.

Tout ce qu'on recite du Hyacinthe n'est rien au pris de ce qu'on peut dire de l'Ocillet. Quant à l'Ocillet sauvage & ses facultez, outre ce qu'en a esté traité par les auteurs Grècs & Arabes, il y en a vn traité fort beau & proprement décrit, que Anth. Musa médecin d'Auguste, en a fait, qu'il a dédié à M. Agripa.

Des Pensées, & des Marguerites,

des iardins appellees autrement Pasquettes, & de

leurs remedes.

Quarreau VI.

CELLE plante & celle fleur sans odeur que les François appellent vulgairement Pensées, & les apotichaires herbe de la trinité à cause que sa fleur est composée de trois couleurs, est à mon aduis le Phlogium. Pierre Pena médecin tresdocte & bien disant, l'appelle Viola flammea. Elle fleurit au printéps incotinét apres la Violette de Mars, & porte vne fleur fort propre pour faire chapeaux & bouquets, qui est faite a trois quarrés, & est enrichie de plusieurs couleurs, encoré qu'elle soit sans odeur, comme nous auōs ia dit: elle dure fort long temps entre les autres fleurs,

car on

car on en trouue en nos iardins iusques en automne, voire iusques en hyuer, ie di en ces quartiers ou l'air est fort doux & les iardi-
niers soigneux de les cultiuer. Quant à ses
vertus & remedes, ie puis bien dire le mesme
que i'ay dit de la fleur precedēte, a sauoir que
ie n'en trouue riē escrit ni és auteurs grecs,
ni és Arabes, ni és Latins qui ont escrit de la
medicīne, que ie sache. Je diray neantmoins
par l'experience qu'aucuns en ont fait, que
ceste plante est fort bonne pour consolider
les playes, tant appliquee au dehors comme
prinse au dedans: pareillement aux relaxa-
tions & descentes des boyaux: & pour ce fai-
re ils font prendre de la poudre de ceste her-
be à la mesure d'vn demi cuillier, en vin
brusc & rude, & s'en trouuent bien. Aucuns
disent que ceste plante porte grand soulage-
ment à ceux qui respirent avec difficultē, &
aux inflammations de poulmons: voire ils as-
seurent qu'elle guerit & nettoye la galle &
& toutes autres maladies & affectiōs du cuir.
On tient aussi que l'eau qu'on en tire par di-
stilation, est fort bonne contre les trenchees
de ventre qu'ont les petits enfās. On appli-
que aussi toute la plante, ou bien on la fait
manger aux porceaux qui ont l'esquinance.

*Vertu de
la Pensée.*

Je vien maintenant à traiter de la Belis
des iardins (car il s'en trouue aussi bien de
sauuage par les prez en grand abondance) &

auant que discourir ses facultez, ie veux donner cest aduertissement, asçauoir que les François appellent ses fleurs Marguerites; & nos Borbonnois Pasquettes, pource que, comme ie croy, elles viennent enuiron Pasque, ou bien, pource que par leur couleur plaisante & tant bigarree, elles paissent les yeux, encôres que elles n'ayent point d'odeur. Mais tout ceci ne sert de rien a la medecine, il est donc tẽps d'y venir & traiter en bref ce que les modernes en ont obseruẽ & remarquẽ, car ie ne trouue pas aussi que les anciens en ayẽt rien escript. Les Pasquettes donc pilees toutes seules, ou bien avec Armoise, guerissent gentiment les escrouelles. On en fait aussi cas cõtre les gouttes des pieds, contre la sciatique & la paralysie, d'ou est venu qu'aucuns l'ont nommee l'herbe de la paralysie. Elle est aussi bonne contre les fractures de la teste, & cõtre les playes de la poitrine, lesquelles entrent iusques a la cavitẽ du thorax: & pour ceste fin est bon de faire mesler leur suc parmi les bruuages. Les fueilles estans maschees guerissent les petites vescies vlcerees tant de la bouche que de la langue: & pilees elles amortissent les inflammations des genitoires & les resoluent. L'herbe mesme mangẽe en salade, amolit le ventre reserrẽ: ce qu'elle fait semblablement si on la fait cuire en bouillon gras, ou bien avec beurre frais. Aucuns

*Remedes
des Pasque
tes,*

mettent

mettent ceste plante au nombre de la petite
 Consoulde.

*Du Glay ou Glayeul ou Flambe, & des
 remedes qu'on en peut tirer.*

Quarreau. VII.

LE Glay ou Glayeul est ainsi appellé en-
 tre les François à cause qu'il a sa fucille
 pointue & faicte en forme de glaive: & à
 cause de la couleur de sa fleur composee de
 couleurs diuerfes, comme l'arc en ciel, on
 l'appelle Iris. Et outre les fleurs violettes
 qu'il porte ordinairement, on en trouue
 des blanches, des palles, des iaunes, & des
 rouges, le tout par le moyen & artifice que
 nous auons monstré & enseigné en nostre
 traicte des secrets des iardins. Aux champs
 on l'appelle en quelques lieux Flambe, à cau-
 se, comme ie croy, de la couleur reluisante
 comme feu dont elle a quelques rayes & li-
 gnes, desquelles elle est marquettee & enri-
 chie: ou bien pource qu'elle eschauffe, com-
 me la flambe du feu, ce qui se void clairemēt
 en ces racines encores fresches. Ces racines
 sōt cōposees de plusieurs nœuds, & sont fort
 odorantes: parquoy aucuns enuirō la fin du
 Printemps les arrachent, & les ayant coup-
 pées en petites roëlles les enfilent & les font
 seicher à l'vmbre pour les garder: D'autres

le font tremper dans de la lèxiue, afin de consumer l'humidité superflue, à cause de laquelle elles s'ot fort subiettes à vermoulisseure, & apres cela ils les font seicher: car ces racines sont tellemēt suiettes aux vers & à la tigne, qu'elles n'en sont pas seulement gastees estans seiches, mais mesme estans encores verdes & en terre. Estās dōc ainsi acoustrees on les garde dans les armoires, cofres, & garde-robes, afin qu'elles facent sentir bon les habillemens & le linge. Mais laissons deduire ces choses, si ainsi vous semble bon, aux femmes, & venons à discourir diligennmēt les vertus & facultez medicinales du Glay. La racine a vne vertu qui eschauffe & atténue, à cause de laquelle on l'estime propre contre la toux: car elle subtilie les humeurs gros qui sont mal-aisez à cracher, parquoy on la tient pour vn bō remede cōtre les trēchees. Avec vin-aigre elle profite à ceux qui ont la ratelle grosse & enflē, aux transis de froid, à ceux qui ont les nerfs retirez, & à ceux qui perdēt leur semence. Cuite avec vin & beuē, elle prouoque les mois arrestez, & fait cracher aisément: on l'enduit avec grād profit sur la longe & sur la hanche, meslee avec Resine: & sa poudre est propre à mettre dans le nez pour faire esternuer, aussi est bien le suc: Elle purge le cerueau, fait lārmoyer, & par sa decoction guerit la difficulté de respirer. Estant machée

machee elle oste la puâteur du soufflé, & si on s'en laue & bassine, elle oste la puanteur & mauuaïse senteur des aissellés. Le vin de sa decoctiō guerit la toux, & prouoque vn doux sōmeil. Sa poudre prinse avec du vin, s'il n'y à point de fieure, fait sortir la matiere purulente qui nuit aux entrailles pres du cœur, & qui empesche la poitrine. La mesme poudre avec vin-aigre appaise les grandes tranchees. On fait quelques compositions de ses racines avec miel, qui sont fort efficaces pour faire sortir l'arriere-fais. En la douleur de la hâche, le suc de la racine fresche, clisterizé apporte grand alegement, si fait bien aussi si on se bassine de sa decoction: Elle oste entierement les ennuis & empeschemens des femmes, amollissant les dūrtez qui suruiennent à leurs parties secretes, & les relaschant si elles sont retirees. La mesme racine seichee & mise en poudre, nettoye les vlcerez, & remplit les fistules & cauitez ou il y a faulte de chair. Elle sert aussi contre les apostumes qui viennent à la racine des ongles, que les medecins appellent Paronychia, & contre les clous & verruës, avec vin. Elle fait sortir les os rompus, si on l'applique avec miel, & les reuestit de chair quand ils en sont desnuez. Les lentillès & taches du visage sont effacees par le moyen d'icelle, & la douleur des dents appaisee, si on les laue & bassi-

ne de la decoction de ces racines, & si la matiere qui cause la douleur est froide: Elle remplit de chair les vlcères caues: & si on la melle avec du miel, elle les mondifie & nettoye: Ce qu'on peut aussi faire (comme on dit) avec la poudre d'un os humain brulé, incorporée avec Aloës & miel, & mise dans la cavité de l'ulcere, cōme l'a escrit Rhasis. Mais ces choses doiuent estre reseruees au traicté que nous voulōs faire des secrets de Medicine. La racine de Glay mise en poudre, incorporée avec huyle d'Aspic, iusques à ce qu'elle aye la consistence d'un liniment, purge le cerueau de toutes superfluitez phlegmatiques; si on la tire par le nez, & si a vne odeur fort plaisante, mais il faudra premierement purger tout le corps. Le suc de la mesme racine mis dans le nez, corrige la puanteur qui en sort, & beu avec vin-aigre abolit les douleurs de la rate. Il est temps de proposer ici ce que Iean Mesué en dit. La racine de Glay, dit-il, est chaude & seiche au troisieme degré, voire elle est acre; Elle deterge & mondifie, resout, meurit, adoucit, ouure, appaise les douleurs, purge la phlegme & l'humour bilieux qui est parmi, voire les eaux claires, & le tout doucement & sans facherie. Elle cuit & meurit les matieres grosses & visqueuses qui sont en la poitrine & aux poulmons, elle les atténue, & les rend plus propres à cracher aisément,

ment, & si mondifie toutes les entrailles. Elle oste toutes les obstructions & empeschemens du foye, de la rate & des parties voisines, & tous les accidens qui en peuuent suruenir, comme hydropisie, douleur, tension, durté, & semblables, pour le moins les amoindrit. Elle digere & resout toutes tumeurs dures, mesme les Escruëilles, & principalement és nerfs & iointures, & mesmemēt avec ius de Bette ou de Chou, ou avec vin, miel, & huyle de Camomile. Outreplus elle guerit le mal de teste enuieilli, principalemēt si estant reduite en cataplasme on l'applique dessus, & qu'on tire son suc par le nez: car elle fait esternuer, & par l'esternuement les humeurs qui estoyent prests à tomber sur quelque partie, sont mis hors par des conduits & voyes secretes. Prinse avec vin-cuit elle aide grandement à la vieille toux causee par vn humeur grosier & gluant, & à la difficulté de respirer qui en procède. Dauantage elle purge la matrice: & appliquee en forme de Pessaire, ou en façon d'emplastre appaise les douleurs d'icelle, prouoque que les mois, & fait auorter la fême. On la met es clisteres, ou on l'applique en façon d'emplastre à ceux qui ont la Sciatique. Si on se laue la bouche avec vin-aigre ou elle aura bouilli, il oste la douleur des dens & arreste la defluxiō: mise en façon de suppositoire ouure les hemorrh-

*Pessaire est
vne forme
de medica-
ment qui
esttellemēt
approprié
qu'on le
peut metre
dās la ma-
trice de la
femme.*

des. Son suc incorporé avec farine de fèves & de Chiches & enduit, nettoye la face, & la mōdisie de toutes taches & macules. Au reste, pour empescher qu'elle ne nuise à l'estomach, on la prend avec eau-miel & vn peu de Nard; ou avec petit lait, miel & Mastic. Jusqu'ici nous auōs recité ce que Mésué en dit. Paul Aegineta enseigne que prise au pois de huit oboles, ou de quatre scrupules qu'elle purge comme l'Agaric, sinō que la racine soit enuieillie & vermoulue. Dioscoride met vn peu plus grāde quātité. On la peut piler & faire cuire mediocrement. Pour la choisir il faut prendre celle qui a force neuds, qui est mas siue, de couleur rouslastre ou blāche tirée sur le rongé, mal-aisé à rōpre, ayant l'odeur de la Violette aromatique, d'vn goust acré & piquant, & qui fait esternuer quād on la pile. En toutes ces choses celle de Florée & celle qu'on cuillit en Prouence & Languedoc, est plus à estimer, que celle qu'on trouue en nos quartiers: & vne autre marque de bonté est, quād elle a la fleur violette, car celle qui a la fleur blanche, cōme aussi les autres couleurs, est moins estimée, d'autāt que cela se fait par artifice. Il la faut cueillir lors que la fleur cōmence à cheoir. On en fait de l'huyle, qu'on appelle huyle de Glay, qui est fort bon & de grande vertu en plusieurs choses, cōme nous dirons, Dieu aidant, quelque iour en vn petit

ceuvre

ceuvre que nous deliberons, faire des huyles
qui se peuent cōposer des herbes des iardins.

3 Du passe-velours & de ses remedes.

220 must de Quarreau. VIII.

ENcores que Pline appelle le Passe-velours
pl^r propremēt Espi purpurin que nō pas
fleur, si ne laisseray-je pourtant de le mettre
ici entre les fleurs: car il surpasse par sa relui-
sante couleur les plus belles fleurs: parquoy
les François n'ont pas mal rencontré de l'ap-
peler Passe-velours: car il ne cede en rien en
couleur, au velours cramoisi, il est neātmoins
sans aucune odeur: Et c'est merueilles que
lors que toutes les autres fleurs defaillent, si
on met ceste-cy tremper dans de l'eau elle re-
uerdit, & enrichit les chapeaux & bouquets
qu'on fait en hyuer: à cause dequoy plusieurs
l'ont appellee Amaranthus, pource qu'il ne
flestrit point, tellemēt que les Latins ont ain-
si emprunté le nō Grec. Les modernes medi-
cins le tiennēt pour froid & sec: & pourtāt on
croit que sa fleur beuē dās du bouillō, aide à
ceux qui ont la disenterie ou la colique: d'a-
uantage qu'elle atreste la trop grande abon-
dante des mois. Et qui plus est elle profite à
ceux qui crachent le sang, principalement
s'il procede de quelque veine rompue es
poulmons ou en la poictrine, comme l'a e-
scrit André Mathiol tresdocte & trefexpert
medicin, en ses commentaires qu'il a faits sur

Dioscoride. Il y a plusieurs qui disent qu'il est contraire à l'estomach, encores que beuë avec vin elle arreste les vomissemens & les defluxions. Si on fait tremper ceste fleur dās de l'eau, elle prendra vne telle couleur qu'on la prendroit pour du vin, qui est vne bonne tromperie pour ceux qui ont la fièvre, & par ceste inuention nous en auons trompé plusieurs qui s'en sont bien trouuez. Que ce soit ici la derniere chose que ie diray du Passeueclours, & ce pour faire plaisir aux ieunes filles: La fleur du Passeueclours seichee dās le four apres que le pain en est tiré, retient vne couleur merueilleusement belle, pour faire festons & chapeaux en hyuer, & se pourra bien garder ainsi beau & de couleur naïfue, iusques à sept ans ou plus.

*De la Soulcie, & des remedes qu'on en fait
on peut tirer.* Quarrean. I. X.

Plusieurs se trompent bien lourdement, prenant la Soulcie pour le Heliotropiū, soit pour le grand ou pour le petit: Non pas que la Soulcie ne suīue le Soleil, comme nous dirons tantost, mais d'autant que la description d'Heliotropium ne luy conuient aucunement. Les Apotichaires l'appellent communément Calendula, pource qu'elle fleurit presque tous les mois, le premier iour desquels

quels on appelle Calendæ, ou cōme d'autres estiment, pource qu'elle germe & produit tous les mois: Les poètes la nommēt Caltha, & les François Soulcie, qui vient du mot Latin Solsequiū, pource que ceste fleur suit no- toiremēt le Soleil à mesure qu'il s'en va d'O- rient en Occident, cōme si elle se resiouif- foyt de le veoir, tant il y a de conuenance entre ces fleurs & le Soleil. D'ou est venu qu'on appelle ceste fleur l'horologe des paisās, la fiāce du Soleil & l'herbe du Soleil, cōme nous auōs amplement mōstré en nostre trai- té des secrets de nature, & ailleurs. Le vien maintenāt à traitter des remedes qu'on peut tirer de la Soulcie. Le parfum de ses fleurs sei- chées, receu par les parties naturelles des femmes, fait sortir l'arrirefais: & les mesmes fleurs fresches, broyees avec du vin & beuēs, prouoquent les mois: mais le suc de l'herbe est biē de plus grāde vertu pour celā: duquel si on se laue la bouche avec vn peu de vin ou vin-aigre vn peu chaud quand on a douleur de dents, ce sera vn bon & soudain remede. Le mesme fera la feuille amollie vn peu avec les doigts, & appliquee sur la dēt malade, mais il la faut premierement vn peu monstrier au feu pource que le froid (cōme dit Hypocra- tes pere de la médecine) est ennemi des nerfs, des dents, des os, du cerueau & de l'espine, & leur est fort contraire. Aucuns affirment que

l'eau de Soulcie est bonne à toutes maladies des yeux, soit qu'elles procedēt de chaleur ou de froidure, & qu'elle oste les douleurs de teste. Peu s'en a salu que ie n'aye ici laissé passer sans en dire mot, vn grand secret souuent esprouué par moy & par mes amis, qui faisons estat d'experimenter les secrets de nature. Si vn personnage se sent saisi d'une fièvre pestilentielle, & que tout au commencement il boiue deux onces de suc de Soulcie, & puis qu'il se couche dans son liēt & se faisant bien couvrir qu'il sue, il se releuera tout garenti d'une telle contagion: ce que comme ie confesse franchement l'auoir prins d'Alexander Benedictus, aussi le te presente- ie liberalement. Il y a bien d'autres secrets medicinaux de ceste plante, cogneus à bien peu de gens, lesquels avec plusieurs autres, iusques ici incogneus, nous produirons quelque iour en lumiere. I'estois sur le point de mettre fin à ce discours de la Soulcie, lors qu'un medecin mien ami & familier me vint visiter familièrement, cōme c'est sa coustume, lequel ayant leu ce recit des facultez de la Soulcie, m'assura auoir cogneu vn Moine, qui guerissoit les fièvres quartes, en baillant à boire deuant l'acces, du vin blanc dans lequel on auoit broyé sept grains de Soulcie, reiterant ce brusage par quelques iours: ie suis esté biē aise de t'aduertir de ceci, ensemble de ce que les

fueil-

feuilles de Soulcie se mettent ordinairement dans les potages; qui n'y donnent pas mauvais gouſt ni mauuaife odeur: Les femmes les meſlent auſſi parmi les ſalades, comme elles font auſſi les fleurs, contre les maladies du cœur, contre la iauuniſſe, les pales couleurs des filles, & contre la difficulté de reſpirer. On a auſſi trouué par experiencé que le ſuc & les cymes de la Soulcie, reduites en forme de

tourteau avec iauies d'œufs, & mangées, arreſtent les fleurs trop abondantes des femmes, & les prouoquent ſi elles ſont arreſtees, l'auteur de ceci eſt Pierre Penna me-

dicin treſdocte, & bien verſé en la cognoiſſance des ſimples.

L E S I X I E S M E S I L L O N D V
 Lardin medicinal contenant, le diſcours
 de quelques herbes qui ne ſont pas bon-

nes à manger diuiſe en onze **Quatreaux**

De l'Aluine ou Fort, & de ſes remedes

Quatreain I.

E veux icy enſuire nature qui eſt la mere qui produit toutes choſes, car cōme elle meſle ordinairement les choſes ſacheuſes parmy celles qui ſont plai-

santes, & les ameres parmy les douces : ainfi
 veux-je faire en ce discours des remedes ti-
 rez des iardins, ie melleray les choses plaissan-
 tes parmy celles qui ne le sont pas, & les chò-
 ses facheuses parmy les agreables: Et pourtāt
 apres les herbes & fleurs de bonne senteur ie
 veux descrire quelques herbes sans odeur &
 de gouſt mal-plaisant, cōmençant par l'Ab-
 ſinthe, lequel comme chacun ſcait, eſt faſ-
 cheux & au gouſt & à l'odeur. Les anciēns en
 ont faict de trois ſortes, & ont appellé l'vn
 vulgaire, que les François nomment Aluine,
 pource qu'il a vne grande amertume, cōme
 l'Algēs: nōs Bourbonnois l'appellent fort, à
 cauſe de ſa forte odeur & ſauēur, auquel eſt
 ſemblable le pōtique, comme dit Galien: Le
 ſecond eſt celuy qu'on dit Seriphiū ou Ma-
 rin, de la ſemēce duquel les médecins ſe ſer-
 uent pour faire mourir les vers qui s'engen-
 drent dans le corps, à cauſe dequoy ils l'ap-
 pelent Semen contra: le cōmun peuple Fran-
 çois l'appelle Barbotine & la mort aux vers,
 & les Apotichaires entendent fort bien ce
 langage. Le troiſieſme eſt nommé par quel-
 ques vns Romain, nous l'appellons Sain-ton-
 geois, à cauſe qu'il croiſt en abondāce en ce
 pays là: or ceſtuy-ci, cōmmē c'eſt le plus pe-
 tit, auſſi eſt-il moins amer, il a ſes fueilles
 blanchaſtres, polies & plaines: il a auſſi vn o-
 deur plaisant & vn gouſt qui n'eſt pas trop
 fa-

Trois ſor-
 tes d'Ab-
 ſinthe.

facheux. Il est aujourd'huy fort frequent en nos iardins, & le melle-on parmy les salades d'ou il reuiet vn grand profit pour l'estomach & pour le foye. Mais laissant ces choses ie vien à traiter de ses facultez & remedes. Le parfum de la decoction d'Aluine oste la douleur des dents & oreilles: & si est bõ d'en distiler dedans, si elles iettent de la bouë. Plusieurs condánent d'en faire breuuages, pour ce disent-ils, qu'il cause douleur en l'estomach & à la teste, principalement le cõmun, quoy qu'il y profite si on l'applique dessus. Il corrige les cruditez, prins avec Poiure, Rue, sel & vin: il nettoye la poitrine si on le prẽd avec Glay, mesmemẽt le Saintongeois. Cuit en eau de pluye, & refroidi à l'aër, est reputé auoir vne singuliere vertu pour renforcer l'estomach & le foye, & prouoque l'vrine si on le boit. Il est bõ & profitable de le boire avec Ache, ou avec Capili veneris, contre la iaunisse: Et si prins avec miel, ou appliqué avec de la Laine, il profite pour prouoquer les mois. Si on se laue de sa decoction, il oste la demangeison: & beu avec vin empesche les souleuemens de cõeur qui trauiillẽt ceux qui vont sur la mer, ou si seulement on le sent, ou qu'on le pende droit sur la region de l'estomach. Toutes les autres facultez & remedes de l'Absinthe sont compris & clerement exposez par le poëte herboriste, en ces vers

comme ie les ay traduits. *Ben avec du vin-aigre il suruient à la rate
Et beü avec du vin dechasse le poison
De la Ciguë Mortelle, du malin mousseron
Et la mauuaise dent qu'enuionime & qui gaste.
Si sur les lieux meurtris on le met il profite:
L'esquinance guerit, pourueu que bien tu l'ayes
Méslé avec nitre & miel: si à la façon ia dite.
Tu l'appliques dessus, guerit du chef les playes.
Si avec linge prins en façon de ceinture
On s'environne & ceint sans doute il guerira
De l'Eine molle la tumeur & enflure.
Et avec fel de bœufelle dissipera
Tout tintement & bruit qui fasche les oreilles.
Que si la Rate est dure, les grandes merueilles
Il l'amollit font bien, si comme vn cataplasme
On l'applique dessus: & cuitte encorés verde
Avec de l'huyle aide fort l'estomach.*

Voilà ce qu'en dit ce poëte, l'ayant pres-
que tout prins de mot à mot des Arabes. Je
m'estois presque oblié de dire que la cendre
de l'Aluine meslée avec onguent rosat, est
bonne pour noircir les cheueux: & qu'une
branche d'icelay mise sous la teste, par sa seu-
le odeur fait dormir, pourueu que le malade
n'en sache rien. Le vin prend le goust de l'A-
luine, lequel on appelle apres, vin d'Absin-
the, qui est la chose la meilleure qu'on sau-
roit trouuer contre les maladies & affectiōs
de l'estomach, comme nous dirons en no-
stre

stre traicté des vins medicinaux. Il ne faut pas cacher que l'Absinthe mis dans les coffres & parmy les habillemens, les preserue des Artres & autres animaux qui les gastent: d'auantage que si on destrempe l'encre des imprimeurs avec l'infusiō d'Aluine, les rats ne mangeront ni ne rongeront les liures, cōme Plin ne l'a remarqué l'ayant prins de Dioscoride, dans lequel aucuns auoyēt mis des mouches au lieu des rats, asçauoir Muscis au lieu de musculis. C'est vne belle chose dit Aegineta, de boire de l'infusion d'Absinthe, auant que boire autre chose: car on le met entre les remedes qui empeschēt l'yurongnerie: Quāt à la façon de le faire boire, les Anciens faisoient boire le suc aux enfans, enduisant seulemēt le bord du gobelet avec du miel, cōme le poëte Lucretius l'a bien monstré par ces vers.

*- Comme les medecins qui veulent faire boire
L'Aluine trop amer aux bien ieunes enfans,
Enduisēt tout premier de miel le bord du voirre.*

☉ D'autres bailloyent ses fueilles dans vne Figue pour couvrir l'amertume, & pour luy donner vn peu meilleur goust, qui est vne fort salutaire trōperie. Si on le fait cuire avec Roses dās du vin rude, puis en bāsiner l'estomach, oste les douleurs d'iceluy, ou qu'ō y applique toute la decoctiō: Et si on l'applique avec raisins secs sur les yeux, il corrigera la douleur d'iceux cōiointe avec battemēt: ce q̄ fait biē

aussi le parfum de sa decoction en vin blâc, si on le reçoit les yeux ouuers. Galiē escrit que le bondonnement & tintement d'oreilles se peut guerir par le moyē de la decoctiō d'Aluine si on s'en bassine: ou bien si on y distile du suc de Reffort meslé avec huyle rosat. D'auantage que l'herbe pilee, puis mise sur vne tuile biē chaude & arrosée de vin, elle guerit les coups, playes & meurtrisseures: outre ce sa decoctiō faite avec Son, Chamomile, Melilot, Malue, vin & eau, y adioustât d'huyles sedatifs de douleur, d'huyle Rosat, de Lis, de Aneth, ou de Chamomile. Appliquee sur les contusions & foulemens des muscles y sert merueilleusement. Et si on applique les fueil les pilees avec miel, sur les parties naturelles de la femme, elles serōt ruisseler les mois. Si on fait cuire la semēce d'Aluine avec racine de Glay, puis qu'on la face boire, elle nettoiera la poitrine, & seruira grandemēt cōtre la iaunisse: Mais ce sera vn plaisir d'entendre Iean Mesué, recueillāt toutes ces choses & plusieurs autres en peu de paroles. l'Absinthe dit-il, est composé de deux substances, l'vne chaude amere, & nitreuse, à cause de laquelle il est laxatif, & ouure les opiliatiōs: l'autre est terrestre, astringente & par icelle il cōforte & fortifie les parties, principalement quand il est sec. Or pource que la substance chaude est en la superficie, quand on le boit elle fait

fait premierement son operation, & puis la substance terrestre & astringente la fait apres: par laquelle aucuns ont pensé qu'il l'achoit le ventre, asçauoir en serrant & pressant, mais ils se sont trôpez: car il purge l'humeur bilieux & les eaux qui sont en l'estomach, dans les boyaux, au foye, & dans les veines, mesme quelquesfois par les vrines. Mais quât à la phlegme, il ne la purge point ou bien peu, quoy que Auenzoar l'ait mis entre les medicamens qui purgent la phlegme. Il empesche toute corruption & pourriture: si tous les iours on prend vne once ou deux de vin ou eau dans lesquels on l'aye fait tremper ou cuire, ou bien de son eau distillée. Enduit auec miel & vn peu de Cumin, & chauffé puis mis sur les parties meurtries & frappees, y aide grandement. Si on fait tremper vne esponge dans du vin, ou d'eau, ou d'huyle, ou l'Aluine aura cuit, & l'ayant vn peu pressée, on l'applique sur les temples, ce sera fort bon pour guerir la Migraine, qu'on appelle. L'oreille aussi parfumée de la decoction de Absinthe, soit vin ou eau, sera deliurée de toute douleur, tintement, & durté d'ouïe qui y pourroit estre. Dauantage le vinaigre ou le vin dans lequel l'Aluine aura cuit, avec escorce de Citron, corrigera la puanteur de la bouche procedante de la pourriture des dents ou de quelques matieres corrompues en l'e-

ftomach: ce que fait bien auffi fon eau diftillée. S^o fuc meflé avec noyaux de Pefche, tue & fait fortir les vers qui s'engendrent aux oreilles, & és autres parties du corps. Mais fur tout voici vn electuaire qui eft fingulier pour faire mourir les vers: D'Absynthe deux onces, d'Euphorbe vne drachme & demie, de corne de cerf bruslée demie once, de miel autant que befoin fera. On fait vn breuuage fort propre contre la gratte & la rongne, qui eft composé d'Aluine, de Fumeterre, de Raisins secs nettoyez des petits pepins de dedás, & de Mirabolans citrins. Et d'autant qu'il purge trop doucement, on y adiouste fort bien a propos le petit lait, la Fumeterre, le Nard, les raisins secs mondez, afin qu'il purge mieux & plus feurement. Il fortifie l'estomach & le foye, ouure l'appetit, ouure les opilations, & ofte les maladies, qui en procedent, comme font l'hydropisie & la iaunisse, il profite auffi contre les fieures putrides & longues. Il faut cueillir l'Absynthe au printemps, & en tirer le fuc sur le milieu du printemps, & le faire seicher au soleil ou sur les cendres chaudes, dans vn pot de verre, comme on fait l'Aloës. Quant à la fleur, il la faut cueillir à l'entree de l'Ésté, elle endure d'estre moyennement cuite. Iufques ici nous auons produit ce que Mesué dit touchant l'Absynthe, par le dire duquel nous acheuerons

rons l'histoire au discours de laquelle si nous nous sommes vn peu eslargis, & auons esté vn peu longs, qu'on en impute la faute à ce, qu'vne herbe si commune à tant de remedes & si singuliers qu'on ne les peut pas tous reciter en brief.

De l'Auronne, & des remedes qu'on en peut tirer.

Quarreau. I. I.

POVRCE que l'Auronne a la mesme amertume de l'Aluine, ie l'ay aussi voulu descrire incóntinent apres. On le diuise communément, comme chacun scait, en masculine & femelle: laquelle plusieurs appellent Cyprez, ayant les fueilles blanchastres, mais le masculin n'est pas ainsi blanchastre. Les Parisiens appellent l'vn & l'autre Auronne, petit Cipres de Garderobe, pource que mis dans les cofres, contregarde les abillemens des artres & tignes. Les anciens l'ont tenu pour vn contrepoison, si on le boit avec du vin, & enduit avec huyle il est bon aux transis & roides de froidure: voire contre tous venins qu'on baille pour rendre l'homme inhabile à habiter avec les femmes: mis dans le liét ou parfumé seulement, chasse tous serpens & bestes venimeuses qui se trainent. Sa cendre incorporee avec huyle de Reffort,

de Palma Christi, ou de Sauinier ; fait sortir la barbe qui est trop tardie à venir : & la decoction de ses fueilles aide grandement aux maladies des nerfs & de la poitrine : & pour-tant on estime qu'il sert de remede à ceux qui respirēt avec difficulté, à ceux qui ont la toux & aux douleurs de la longe & de la matrice, si on le boit avec vin & vn peu de miel. Et en ceste sorte il remede aussi a la sciatique & aux mois retenus. On tiēt que l'Auronne apaise les frissons des fieures, si on le boit avec eau tiede avant que la frisson commēce, ou bien si on se fait frotter l'espine du dos avec son huyle, aupres du feu. D'autres pour ce faire pilent les fleurs & summitez de ses branches, & les reduisent en forme de liniment, avec d'huyle, duquel apres ils oignent les plantes des pieds, le poignet des mains, & l'espine du dos. Avec la semence d'Auronne on fait mourir les vers, comme l'experimentent iournellement les femmes mesme. Je di dauantage, que la mesme semence prise au pois d'vne drachme, avec quelque peu des fueilles, & pilez dans du vin blanc, y adioustant vne noix & vn peu de Bol armeniē, puis coulez & beus, est vn remede admirable contre les venins, cōtre la peste, comme moy & plusieurs autres l'auons souuent heureusement experimenté. La semence de l'Auronne, bien broyee & destrēpee en vin blanc fait
sortir

fortir les mois. Que veux tu dauantage.

Si la douleur & chaleur de tes yeux

Tu veux guérir, applique sur iceux

L'Auronne cuit en pure eau de riniere

Coins, mie de pain, en voila la maniere.

Il fait sortir toutes espines, esguillôs, & autres choses qui sont plantées en la peau, si on l'applique tout seul, où bien broyé avec graisse. Dauantage, soit qu'on le prenne par la bouche, ou qu'on l'applique; ou qu'on le clisterize, il chasse & extermine la vermine du ventre, aussi bien que l'Aluine: on dit aussi qu'il rend hardi au ieu d'amours; si seulement on le met sous le cuisin: or de dire si cela est vray ou non: j'ayme mieux en douter que de asseurer opiniastrément & temérairement ceux donc qui sont mariez le pourront esprouuer.

*De la Rue des iardins, & des remedes qu'on
en peut prendre. Quarrean I I I.*

Il ne se trouue point de iardin soit à la ville ou aux chaps, qui n'aye la Rue tousiours verdoyante, & d'odeur forte & malplaisante. Plin & Pallade tiennent que sa nature est telle, qu'elle vient mieux quand elle est desrobée, & se plaist d'estre sous l'ôbrage d'un Figuier: parquoy Theophraste estimoit la meilleure Rue estre celle, qui estant fichée

en l'escorce de Figuier, estoit apres enterree. Ce que Plutarque a bien aussi recogneu, escriuant en ceste sorte en s^{on} traité des festins: La Rue dit-il qui croist sous vn Figuier, ou qui vient tout ioignant, est estimee plus plaisante & de meilleur goust. Dioscoride n'est pas beaucoup esloigné de l'opinion de ceux-ci, recommandant d'vser és viandes & pottages de la Rue qui croist pres d'vn Figuier, & reiettant l'vsage de toutes les autres: Voila qu'elle est la conuenance qui est entre la Rue & le Figuier, laquelle Pline a tant magnifié: & au contraire la grande cōtrariété d'entre la Rue & la Ciguë, de laquelle nous auons vn manifeste argumēt, en ce que ceux qui veulent cueillir la Rue, se frottent premierement les mains avec ius de Ciguë, pour empescher que la Rue ne leur cause des mauuais vlceres aux mains: ce qu'il faut entendre auoir esté escrit de la Rue sauuage, comme l'experience mesme, qui est la maistresse des choses douteuses, le fera cognoistre. Mais tout ceci ne sert en riē aux facultez & remedes de la Rue, lesquels estans excellēts, aussi les veulx ie traiter amplement & au long. Florētinus tres-diligent interprete de l'agriculture grēcque dit, que si on bousche les oreilles avec la mouëlle de la Rue, ou avec vn de ses bourgeons nouueaux, elle fera cesser la douleur de la teste: Si on oint les yeux avec son suc melle

meſlé avec bon miel, ou avec du laiſt d'une femme qui ait enfanté ou qui alaiſte vn maſle, il oſtera tous eſblouiſſemés & obſcuritez de la veuë; ce qui ſe pourra bien auſſi faire par le moyen du ſuc tout ſeul, le mettant ſur le coin des yeux:& ceci ſeruira non ſeulement pour les hommes, mais auſſi pour les brebis & pour les cheuaux. Ce que Salernitanus n'a pas oublié diſant ainſi en ſes vers.

La Rue eſt noble qui fait veoir clair les yeux.

Car par icelle clair void le chaſſieux.

Et le poëte herboriſte,

La Rue mangée rend les yeux nets & purs:

Encores mieux ſi avec les liqueurs

De Fenoil tendre, de ſiel & miel enſemble

Les yeux malades tu oints quand bon te ſemble.

Le meſme ſuc beuauec vin, reſiſte aux venins des ſerpens, & aide à ceux qui ſont affligez du haut mal: meſme la Rue cuite avec des Figes iuſqu'à ce qu'il n'en reſte que la moitié, eſt bonne aux hydropiques:& ſert de beaucoup contre les douleurs de la poitrine, des flancs, & de la longe: voire contre la toux & contre les maladies des poulmons, du foyé, des reins & contre les friffons & tremblemens des fieures qui viennent par interuales. La meſme Rue cuite en vin & Hyſope, aide merueilleuſement pour apaifer les trêchees de vêtre & à

prouoquer les mois, soit qu'on la prenne par la bouche ou qu'on s'en bafine: Mise dans le nez elle arreste le sang qui en sort: & flaire fouuent guerit celle maladie que les medecins appellent Ozena: & si on s'en laue, elle profite grandement aux dents. La semence est fort estimée de plusieurs medecins, contre la goutte, contre les amas de chair qui s'engendrent dans la matrice des femmes, & contre les humiditez d'icelle. Chacun scait que le Basilic, qui est vne espece de serpent, guette & espie l'homme & les autres animaux pour leur nuire: & qu'il infecte par son attouchemēt & par son souffle venimeux, les fruits & les plantes: & qu'il n'y a aucune forte d'animal qui l'ose attaquer au combat sinon la Moustelle: laquelle par le moyen de la Rue qui luy sert de contrepoison & de deffence, ne fait point de difficulté de l'affaillir, & quand elle le treuve hors de son creux le fait mourir: le Basilic estant mort, si la Moustelle ne se retire soudain ailleurs, & si elle ne preuient le mal, en mangeant de la Rue, elle est en grand dāger d'estre suffoquee par l'infection de l'aēr qui est au tour. Et pourtant il me semble que ceux là sont bien aduisez, qui plantent force Rue à l'entour des maisons champestres, des estables ou ils hebergent le bestial, pres des maisons & loges des bergers, puisque par sa vertu & faculté elle
resiste

refiſte aux venins, & que nul ſerpent n'oſe habiter en lieu où ſon ombre ſeulement puiſſe paruenir: comme Plinẽ eſcrit auſſi du frẽſne. Que ſ'il aduiẽt que quelcun aye mangé de la Mandragore, du Iuſquiame, de la Ceruſe, de l'Opium, ou quelque autre choſe ſemblable qui par ſa grande froidure cauſe vn aſſoupifſement mortel, il pourra eſtre guerrien beuuant du ſuc de Rue, ou du vin de ſa décoction. Mais il ne faut pas oubliẽr que la Rue par ſa grande chaleur & brulãte faculté, nuit au corps, ſi on en prend trop grande quantité, ou ſi on la flaire trop longuement: d'où eſt venu, comme i'ay ſouuent remarqué, que en temps de peſte, ceux qui portoyent ordinairement de la Rue pour la ſentir, ſe faiſoyent venir des petites veſcies aux leuẽs, au nez & aux parties voiſines, comme nous l'auons deſia remarqué en noſtre traicté des remedes & ſecrets contre la peſte: car ſi on la met ſur vnẽ partie exterieure, elle l'vlcẽrera, & ſi on ſ'en frotte ſeulement, elle fera leuẽr des petites veſcies. Parquoy il eſt fort bon de la mettre ſur les charbons & autres tumeurs de la peſte: car elle attire le venin au dehors, & ne laiſſe point retourner au dedans les mauuiſes & venimeuſes vapeurs. Et à ceſte fin on la pile, avec du leuain bien aigre & de la graiſſe de porc, voire avec vn Oignon & des Figues on la fait cuire, y

adioustant vn peu d'Ammoniac, de chaux viue, de saumon, de cantharides & vn peu de Theriaque, on en fera vn emplastre fort singulier, lequel estant mis bien à propos sur la partie malade, fera soudain rompre les tumeurs pestilentiales: ce que tu trouueras estre veritable, si tu en veux faire l'experience, & seras ioyeux de l'auoir apprins. Mais d'autant qu'en nostre traicté, dont i'ay ci deuant fait mention, i'ay mis en auant vn grand nombre de tels remedes, ie suis deliberé & d'aduis de n'en adiouster ici plus pas vn mot, mais de poursuivre les remedes de la Rue par bon ordre, & le plus brief que faire se pourra, mesmement ceux où il ne faut pas beaucoup d'artifice pour le preparer. Si on fait chauffer le suc de la Rue dans vne escorce de Grenade, puis qu'on le mette dans l'oreille, il en osterá la douleur, corrigera le tintement d'icelle, & fera mourir les vers qui s'y sont engendrez. Les fueilles maschees ostent la puanteur de la bouche, causee pour auoir mangé des Auls ou des Oignons, mais il se faudra apres, lauer la bouche avec du vinaigre. Si on fait cuire les fueilles de Rue, puis qu'on les pile avec du souphre, & vn peu de vinaigre, & qu'on les applique sur les mammelles en façon d'emplastre, laissant le bout du tétin, il dissipera le laiët figé, & toutes les tumeurs qu'y peuuent

uent estre . Galien escrit que la Rue resiste fort à tous vlcères malins, soyent pourris & corrompus , ou corrosifs : mais en vn corps delicat, il la faudra faire cuire & piler avec mie de pain ou farine d'Orge . Mais en vn corps robuste & grossier , il conseille plustost d'ysur de la Rue sauuage, que non pas de celle des iardins. Sa semence cuitte en vin & beuë, corrige les sanglots qui sont causez & engendrez par la phlegme , & deliure de tout danger de suffocation qui s'en pourroit ensuyure. Les fueilles pilees & mises sur les escruelles en façon d'emplastre , aneantissent entierement leur durté. Et les mesmes fueilles seichées & prises en vne certaine quantité avec la moitié d'autant d'encens, & beuës avec du vin ou avec sirop de Menthe, arreste les vomissemens , si on mange quelque nombre de fueilles fresches , puis qu'on boyue vn traict de quelque bon vin , cela ne guerira pas moins la morsure de la moustelle, que fait vne febue maschee & appliquee soudainement , la morsure du chat & du singe. Si on forme aussi vn pessaire, comme parlent les medecins , avec suc de Rue, il attirera puissamment les mois . Et les fueilles pilees & cuittes avec huyle de Lis, & avec graisse de poule ou de canard, & appliquees bien chaudement deuant & derriere sur la region de la matrice en façon d'emplastre,

corrigent les suffocations & subuersions de l'Amarris : lequel remede est aussi singulier contre les inflations du colon, de la matrice & du lōg boyau. Mais les fueilles seiches meflées avec les graisses susdites ont bien plus grāde vertu. Ce que dit Arnaud de Villeneuve est bien remarquable, aſſauoir que la Rue trempée en vin blanc ou en eau rose, puis pilée & chauffée, iette vne vapeur qui se conuertit aisément en eau, & pourtant si on la recueille avec vn vaisseau de verre, qu'on mettra dessus, on aura vn remede fort propre pour guerir les maladies des yeux. Ce que i'ay leu en Auicena n'est pas moins digne d'estre notté. Si quelcun, dit-il, prend des fueilles de Rue & de la semence, vne Noix avec vn peu de Bol armenien, & que il pile le tout en du bon vin blanc, & que l'ayant passé il le boiue à ieun, il sera asſeuré que nul venin ne luy pourra nuire ceste iournee là, non pas mesme la contagion de peste quelque grande & forte qu'elle puisse estre. Les mesmes fueilles pilees seruent grandement contre les morsures des animaux venimeux, voire quand ce seroit vn chien enragé : pourueu qu'on les applique avec miel & sel sur la morsure, ou qu'on les face cuire avec vinaigre & de la poix, pour s'en seruir à mesme vsage, mesme il s'en trouue plusieurs qui afferment, que si vn person-

nage

nage, s'est frotté avec suc de Rue, ou s'il porte de la Rue avec soy, il ne pourra estre offensé par les animaux venimeux. C'est bien vne chose asseuree que ceux qui en mangent, sont rendus mal propres à la generation, parquoy les femmes qui desirent d'auoir lignee de leurs maris doiuent hair la Rue comme la mort: car elle ouure la matrice & prouoque les mois. Je di dauantage que mangée ou beue, elle esteint & consume la semence genitale, amortit le desir d'habiter avec les femmes, & principalement aux hommes. Et pourtant les Grecs l'ont appelée d'un mot qui signifie cela, asçauoir que par sa grande chaleur & siccité, elle consume la semence genitale la rendant seiche & aride, & pourtant la semence estant comme caillee & diminuee ils sont rendus steriles, principalement les hommes, ce qui aduiert tout à rebours aux femmes, comme Salernitanus l'a remarqué par ces vers que j'ay ainsi tournez disant.

*La Rue esteint aux hommes le desir d'habiter
Avec femme: & à elle le luy peut augmenter.*

Estant pilee avec miel elle ouure toutes suffocations de matrice, si on enduit toute la partie qui est depuis le penil iusques au fondement. Ce qui est bon aussi contre les douleurs des iointures: & avec huyle pour chasser la vermine du ventre. Si on la fait cuire

avec feuilles de Laurier, ce sera vn bon reme-
de pour oster l'inflation des genitoires, estât
enduite dessus: & avec miel & alum, elle est
fort bonne pour frotter les dartres & feux
vollages. Avec Poiure & Nitre elle efface les
taches blanches qui viennent sur le corps qu'on
dit vitilignes: & si on prend quelque nombre
de ses feuilles auant le repas avec vne Figu-
seiche, & des vieilles noix, y adioustant vn
bien peu de sel, cela rabattra la force des ve-
nins, & rendra l'homme assure des inconue-
niens qui en pourroyent suruenir, & si resi-
stera au mauuais aer & contagieux. Et attri-
bue on ceste inuention à Mitridates, telle-
ment qu'on appelle ceste composition le Dia-
tessaron de Mitridates, lequel & moy & plu-
sieurs autres auons heureusement esproüé
au milieu de grandes pestes & contagions.
Mais il sera bon d'entendre le poëte herbo-
riste discourant & philosophant de la Rue.

*Beüe avec vin ou mangée crüe surmonte
Tous les venins: comme ce Roy de Ponte
Mitridates l'a souuent esproüé.
Car de matin soudain estant leué,
Mangeoit vingt feuilles de Rue avec du sel,
Deux Noix, deux Figues rendu come immortel
Contre poisons par ce beau Antidote.*

Mais nous deduisons ces choses plus am-
plement, quand ce viendra a parler de la
Noix quand nous traiterös des arbres. Théophraste

pompe

pompe attribue semblables & pareilles vertus à la Rue qu'au Citron, contre les venins: disant que Clearchus qui estoit tyran en la ville d'Heraclee, auoit de son temps fait mourir plusieurs avec de l'Aconit, & que ses suiets pour se garentir de sa rage & violence, ne sortoyent de leurs maisons que premierement ils n'eussent mangé de la Rue, par le moyen duquel remede ils furent guarentis de la violence de Laconit: plusieurs attribuēt cela au Citron, comme nous monstrerons ci après en son lieu. Il ne faut pas ici oublier ce que Hyppocrates & Galien disent de la Rue & de la Menthe, asçauoir qu'estans verdes elles engendrent ventositez, & rendent habile au ieu d'amours, mais qu'estās seiches ou frites, principalement leur semence, dissipent les vétositez, rēdent l'hōme lasche a se iouer aux dames, & arrestēt la perte de semēce que les medecins appellent Gonorrhoea: & encores qu'il sēble que ceci cōtrarie aucunemēt à ce qui a esté dit ci deuāt, toutesfois si on y régarde de bien près, & qu'on examine le tout diligemment, on trouuera qu'il n'y a point de contradiction. Luc. Apulee Platonique escrit que la Rue verde cuitte en huyle, & enduite avec cire neufue, a vne singuliere vertu contre les douleurs des Aines, mais il la faudra appliquer avec vn linge en forme de Cerat. La mesme Rue pilee avec Griote appaise

les defluxiōs des yeux appelees des medecins Epyphoræ: enduite avec vinaigre & huyle, elle esteint le feu saint Antoine: & la rosee du matin cuillie sur la Rue & distillee dans les yeux, en oste tout esblouissement & obscurité: ce qu'on peut faire aussi par le moyen de la vapeur qui en sort, quand elle est trempee & mise sur le feu. Si vn homme perd sa semence genitale sans y penser, qu'il mange de la Rue cuittē en vin avec quelque chose grasse, ou avec beurre frais, ou avec huyle fresche d'Amēdrēs douces. Si tu veux arrester le flux des femmes (comme enseigne le mesme Apulee) enuironne la Rue avec or, argent & yvoire, & l'ayant ostee attache la dessous le talon. Aristote & Plinē enseignent que la Moustelle ayant à combattre le serpent ou le crapaut, quand elle les trouue estant à la chasse des rats, elle mange premieremēt de la Rue comme vn bon & souuerain preseruatif. Et pourtant tous les anciens ont tenu la Rue cōme vn excellent cōtrepoison, contre tous enforcelemens, venins & contagions: & Pythagoras s'est abusé quand il a iugé qu'elle estoit domageable aux yeux: car au contraire les tailleurs, graueurs & peintres, en vsent ordinairement pour leur aider à la veuē: elle est tellement contraire aux serpens qu'ils n'ont garde de se loger aupres, mesme l'odeur les fait fuir bien loin, & pourtant i'ay esproué qu'estant

qu'estant appliquee avec vn peu de sel & d'Oignon, sur la morsure venimeuse des serpens, y sert de singulier remede. Ceux-là donc font à mon aduis, sagement, qui enuironnēt les fillons de leurs iardins, de Rue, afin de contregarder les herbes potagieres des animaux venimeux. Que ceci soit pour la fin, encores qu'il ne semble gueres appartenir à la medicine. Les chats n'approcherōt point de la voliere ni des poussins, si on les frotte avec suc de Rue, ou biē si on garnit la voliere tout à l'entour de l'herbe mēme: ce que tu pourras aisēmēt esprouuer, ensemble ce que dit Democrite, ascauoir qu'on chassera les mouscherōs & qu'on empeschera qu'ils n'approcheront aucunemēt, si on arrose la maison ou la chambre d'eau, avec vn rameau de Rue verte, ou qu'on l'arrose de la decoction de l'herbe mēme. Ce qu'aucuns raportent aussi aux puces, & disent pour l'auoir experimenté, qu'il est vray. Pourtant ce que le poëte herbioriste a escript se trouuera veritable, ascauoir,

*La Rue cuite deschasse, les puces & leur
race*

Or c'est assez discours des facultez & remedes de la Rue: que i'ay voulu traiēter amplement & au long, pource qu'elle est fort commune es iardins, & incāntmoins elle est enrichie de beaucoup de vertus singulieres,

qui ne sont pas cogneuës de chacun, mais sont comme des merueilles, le discours desquelles nous reseruons ailleurs, afin que ie ne sois trouué trop long, & sans pouuoir trouuer le bout.

De l'Ortie, & des remedes qu'on en peut tirer.

De l'Ortie. Quarreau. IIII.

POurce qu'en plusieurs iardins, tant de la ville que des champs, il vient ordinairement vne grande quantité d'herbes (si les iardiniers sont negligens de les arracher) qui ne sont pas seulement inutiles à mettre és potages, mais mesme sont facheuses à la veüe, au toucher, & au sentir: voila pourquoy ie veux ici en traicter, entant qu'elles peuuent seruir à la medicine, car elles ne laissent pas d'auoir de grandes facultez, pour secourir le corps humain. Je commenceray doncques par l'Ortie, laquelle a cela de particulier, que sans auoir aucuns aiguillons ni espines, mais seulement vn certain poil folet & certaine bouvre, laquelle pique de telle façon & a vne vertu tellement bruslante, que pour peu qu'on la touche, elle fait sortir des petites vescies semblables aux brusleures du feu: ie croy que les gramairiens Latins luy ont donné ce nō d'Vrtica qui signifie bruslate: & les Grecs luy ont donné le nō d'Acaliphe & de Chide,

vou-

voulans dire qu'il ne la faut point toucher ni manier, à cause de la douleur & demâgeison qu'elle engēdre, par ce poil folet dont elle est reueſtue, quoy qu'il ſemble delié & mol. Mais ceſte mordacité & aſpreté (laquelle ſe peut guérir avec d'huyle ſeulement) ne ſe manifeſte pas incontineſit, mais à meſure quelle croiſt elle ſe monſtre : car au commencement du printemps, ceſte plante n'eſt pas trop mal plaiſante au gouſt, meſmes aucuns en mangent, eſtimās que cela les preſerue de maladie tout le reſte de l'année. Nicander aſſeure que la ſemence d'Ortie eſt du tout contraire à la Ciguë, aux potirons, à l'argēt viſ, au Iuſquame, aux Serpens & Scorpions. Ses ſueilles pilees & miſes dans le nez, arreſtent le ſang qui en coule, & ſur tout ſa racine : ce que fait auſſi ſon ſuc enduit ſur le front. Phaniās médecin fort renommé entre les Grecs, a deſcrit les louanges de l'Ortie, & dit qu'elle eſt fort profitable ſi on la fait cuire parmy les viandes, ou ſi on la conſit. Avec vn bien peude ſel elle aide à la morture des chiens : cuite en huyle, elle faiet ſuer : cuite avec des Limacēs ou coquilles elle laſche le ventre : avec priſane nettie la poictrine : avec Thym ou Poliot, prouoque les mois arreſtez : avec ſel arreſte les vlcères rampātes. Mais l'aſpreté & mordacité qu'elle a, fait retirer la Luetē prolōge, la matrice

qui est cheute, & le boyau des ieunes en, fans quand il sort par le fondement, si seulement on les en touche: & si faict que les bestes à quatre pieds s'eschauffent à chercher le masle. Ce que le poëte Macer (que ie nomme ordinairement le poëte herboriste) a biē sceu, aussi ne l'à-il pas oublié, disant.

*S'on frotte la matrice auec fueilles d'Ortie
Soudain retourn' amont: la beste refroidie,
Qui ne veut nullement le masle supporter:
Qu'on l'en frotte hardiment, pour nature es-*
chauffer.

Plusieurs disent qu'on pourra esueille les Lethargiques, si on leur frotte les cuisses avec quelque Ortie bien forte, & piquante, & encores mieux le front. Dioscoride escript & Galien consent à son dire, que les fueilles d'Ortie corrigent les Gangrenes, voire les chancres qu'on appelle malins. Outre ce elles guerissent les Escrouelles, les vlceres sales, les apōstumes & tumeurs, & remettēt les deloëures: les mesmes fueilles pilées avec vin & vn peu de mirrhe, & appliquees, prouoquent efficacement les mois: & avec Cérat, elles aidēt fort à la Rate. Prinſes dans du bouillon elles irritent aucunement le ventre, à cause qu'elles le chatouillent & ont vne certaine vertu deterſiue. La Sauvage (que les Grecs appellent Agria, & est nommée des François Ortie Grièche) beuë en vin, efface les

tumeurs qui viennent au visage, comme de ladrerie: ce qu'aucuns attribuent aussi à l'Ortie mauuaise & mordante: le suc de laquelle, comme on dit, prouoque l'vrine arrestee, rôt la pierre, & si fait retirer l'Aluette prolongee pour quelque inflammation qui y est suruenue. Aucuns estiment pouuoir faire ^{Remede} fortir les choses qui sont plantees dans le ^{contre la} corps, par le moyen de sa racine, y adioustât ^{Pierre.} seulement vn petit de sel: & avec ses fueilles, broyees avec graisse, dissiper & dissoudre les Escrouelles: que si elles se viennent à suppu- rer, ils disent lors qu'elles sont completes. Plusieurs broyent l'Ortie avec huyle vieil, & l'enduisent aux gouteux, & à ceux qui ont douleurs de iointures, pour lequel vsage la ra- cine pilee avec vin-aigre, est estimee fort profitable.

Sa semence avec miel sert fort à la Colique ^{Vertus de} *l'Ortie.*

Et à la vieille toux si souuent on la boit:

Au polmon refroidi & au ventre tumide:

Et si fait vriner qui avec eau-miel la boit.

La mesme semence beuë semblablement en eau-miel, au pois de deux oboles, qui sont vn ^{Vn Scrupule est le tiers d'v-} Scrupule, fait qu'on vomit aisement apres souper: & beuë avec vin cuit remede aux in- flatiôs de l'estomach: elle profite aussi à ceux ^{ne Once.} qui respirent avec difficulté, si on la prend avec miel, car elle nettoye la poictrine. Elle est aussi bonne au mal de costé, si on la

fricasse avec semence de Lin & Hysope . On fait vn certain liniment composé de fueilles d'Ortie, d'huyle & de sel, lequel contregarde le corps de toutes froidures & frissons violentes , encores qu'elles procedent de la fieure , si seulement on s'en oinct l'Espinne , la plante des pieds & le poignet des mains. Il est bon aussi contre les vlcères causés de froidure & glace . I'ay cogneu plusieurs grands chercheurs des secrets de nature, qui pour rabatre aucunement la grande chaleur du cœur , procedante de la fieure, & pour le rafraischir, ils prenoient le suc d'Ortie, & en enduisoient les arteres , y adioustant vn peu d'onguent de Peuplier, que les apothicaires appellent Populeum . D'autres pour ce mesme effect, pilent seulement les fueilles d'Ortie & les appliquent sur le poignet, & sur les temples, avec vn bien peu d'huyle Violat ou d'huyle de Pauot . T'auois presque oublié de dire, que la vapeur procedante de la decoction des Orties, receüe par les narines, les ouure & deliure de tout empeschement: Ce que fait bien aussi l'Auronne, mais ie l'auois oublié en traictant son histoire, de haste que i'auois de venir au reste, ce qui est aduenü par negligence, afin que ie ne die pas par imprudēce, Les fueilles d'Ortie pilees & appliquees sur la matrice, en forme d'emplastre, la font retourner en son lieu, si elle est sortie.

sortie . La semence beuë avec vin cuit ouure les suffocatiōs de matrice: & le suc de ses feuille avec vn bien peu de myrrhe, esmeut puissamment les mois. Au surplus il ne faut pas cacher, que si quelcun a de l'apostume dans le corps (que les medecins appellēt Emphyique) qu'il prene vn scrupule de semēce d'Ortie reduite en poudre, avec quelque sirop pectoral l'auant peu à peu, il crachera aisément c'est humeur gluant, & en sentira vn merueilleux soulagement . Quant à l'Ortie qui ne pique point, à cause dequoy on l'appelle morte, plusieurs disent qu'elle a de singulieres vertus cōtre les escruelles, les chācres & gangrenes. Ils enseignent aussi touchant la sauuage, laquelle à sa semence cōme le Lin, que ceste semēce est fort propre pour inciter & nettoyer la phlegme grosse & gluante cōme colle, quād on craint de tumber en vn Asthme, ou grande difficulté d'aleine: car non seulement elle prepare l'humeur gluāt qui empesche, mais aussi l'euacue particulieremēt, cōme fait la semence de Carthame, prins' au mesme pois. Voici pour le dernier, encores qu'il semble ne conuenir gueres à la medecine: Les racines d'Ortie cuittes avec la chair, la font cuire plus soudainement. Et la racine de Blanc-d'eau mise dedans les pois qui cuisent, les fait tous sortir l'vn apres l'autre, sans qu'il en reste pas vn, comme si le pot mesme

les chassoit. Il sera bien aisé de l'esprouuer, quant à moy ie ne l'ay pas encores essayé.

*Du Plantain & des remedes qu'on en peut
recevoir. Quarreau. V.*

S'Ensuit maintenant le Plantain, lequel on trouue par tous les iardins les louanges duquel, sont amplement recueillies par The mison. medicin; duquel Plin^e fait mention. Si quelqu'un prend ses fueilles apres les auoir faites tremper en eau-miel, ou bien apres les auoir broyees & pressees, deux heures deuât l'acces, au pois de deux drachmes, il rendra les acces des fleurs tierces beaucoup plus courts, & plus aisez: ce que fera bié aussi le suc de sa racine trempée ou pilee: ou la racine mesmè trempée en eau ferree. Aucuns baillent trois racines à boire en trois ciathes d'eau, ou comme dit Dioscoride, en trois ciathes moitié eau & moitié vin, à ceux qui ont la fleur tierce: & quatre racines & autant de ciathes d'eau & de vin à ceux qui ont la fleur quarte. Les fueilles sont fort bonnes pour mettre sur les gouttes chaudes, pour les rafreschir, & sur tout au commencement. Son suc guerit les vlceres de labouche, si on s'en laue: voire la fueille mesme appliquée, ou sa racine machée, encores qu'il tumbe de la defluxion en la bouche.

On don

On donne le Plantain à ceux qui ne sentent point la viande, c'est à dire, qui n'en tirent point de nourriture (que les Grecs appellent Atrophous) à diuers iours: & pourtāt on tiēt qu'elle guerit la Pthise, si on la fait cuire en vin & qu'on la baille à boire. Il aide à ceux qui ont le haut mal, à ceux qui respirent avec difficulté, & sert de remede contre les Escrouelles, si on y adiouste vn peu de sel. Avec le Plantain on guerit les brusleures, si on le mesle avec blāc d'œuf, de telle sorte qu'on ne s'apperceura pas de la cicatrice. Il arreste le sang qui coule d'une playe: & pilee elle fait ouurir les charbons. On la donne avec profit à ceux qui ont disenterie & flux de vētre, l'ayant premierement faitte cuire en vin aigre & sel: ou bien son suc avec Ris ou Froumentee: on le peut bien aussi clisterizer. Avec terre Cimolienne & Ceruse, il sert de remede au feu sainct Anthoine, encores qu'il auroit desia occupé la moitié d'un homme, lequel mal on appelle Zoster, & s'il enuironne vne fois vn homme il le fait mourir. La semence pilee beuë en vin brusc & rude (pourueu qu'il n'y ait point de fieure) arreste fort bien tous crachemens de sang, aucuns disent toutes euacuations & pertes de sang, soit par la bouche, par le ventre ou par la matrice: si fait bien aussi le suc des fueilles beu ou clisterizé: lequel aussi firingué dans les

fistules, leur sert de singulier remede. On fait cuire le Plantain avec la Lentile de marais, comme on fait la Bette, pour s'en seruir contre l'hydropisie. Et si vn homme est affligé de celle maladie que les medecins appellent Leucophlegmatia, que nous pouuons appeler mauuaise habitude, il luy faut faire vser du Plantain bouilli, apres toutesfois que le malade aura mangé du pain tout sec, de sorte que le Plantain se trouue comme au milieu de la viande. Les fucilles pilées ostent la douleur & l'enfleure des desflouëures, y adioustant vn peu de sel. Elles amoindrissent aussi les gros bords des vlceres, & arrestent les vlceres corrosifs: bref, elles remedient à toutes sortes d'vlceres, principalement des femmes, des gens vieux & des enfans: mais, si on les fait vn peu amollir au feu, elles en seront meilleures: & pour le mesme vsage on se pourra seruir du suc avec Cerat: Lequel beu tout seul sert aux suffocations de matrice, & distilé dedans les oreilles sert aux douleurs d'icelles: & est bon pour mettre és colires qu'on fait pour les chassieux, & pour ceux qui ont inflammation aux yeux. Il proufite aussi contre les genciues sanglantes, si on s'en laue la bouche: & mis és lieux naturels des femmes avec de laine, les garde de tomber en suffocation de matrice,

&

& arreste les fluxions dicelles , encores qu'elles soyent avec sang. La racine machée appaise la douleur des dents, si fait bien aussi si on se laue de la decoction d'icelle . Laquelle sert contre les vlcères de la vescie & contre les maladies des reins, si on la prend, ensemble les fucilles , avec vin cuit . Aucuns disent que si quelqu'un attache vne de ces racines avec vn filet , & qu'il la porte pendue au col, cela dissipera les Escrouelles & les gardera de croistre . Je reuiens à parler des fueilles, lesquelles guerissent les vlcères vieux & inegaux , si on les met dessus : outre ce elles consolident les fistules , & remedient à la morsure des chiens : & apropiées avec laine en forme de pessaire , elles purgent la matrice . Sa semence pilee & saupoudree sur les playes & vlcères, les guerit bien tost : Son suc donné à boire avec eau miel, deux heures deuant l'acces de la ficure quarte , y aide fort , & si on le continue en fin la fera perdre, ce que plusieurs ont expérimenté , comme i'ay entendu . Les fueilles du moindre Plantain pilees avec sel , & appliquées en façon de cataplasme, adoucissent peu à peu la douleur des nerfs & l'enfleure de la goutte : l'emplastre aussi composé de son suc, d'un blanc d'œuf, & de Bol armenien, appliqué sur le front, arreste le sang qui coule du nez : & le suc beu ou siringué dedans

la matrice retient la trop grande abondance des mois.

Son suc guerit l'ulcere qui vient aupres des yeux

Si avec laine molle on le met sur iceux

*Et par neuf diuers iours souuent on le re-
change:*

*Que si par long chemin quelque douleur e-
strange*

*Vient aux pieds, dont souuent on est bien tor-
menté:*

Le Plantain en vin rude te donnera santé.

Les fueilles ont vne vertu admirable pour refroidir, nettoyer, & desfleicher, comme l'ont tesmoigné Dioscoride & Galien: & pourtant on les enduit avec heureux succés sur les vlceres malins, & sur les tumeurs de la lepre: & si sont bonnes aux vlceres humides, & à ceux qui pour la grâde abondance d'humours que s'y amasse sont malaisez à nettier. Je ne puis que ie ne die que i'ay souuent experimenté vne vertu singuliere du Plantain contre la contagion de peste, en quelque sorte qu'on le print: d'auantage ie puis bien affirmer, pour l'auoir bien experimenté, que s'il s'engendre des vers dans vne playe ou vlcere, il ne faut sinon les saupoudrer avec de la poudre de Plantain sec, car cela les fera mourir. Tu trouueras d'autres secrets & remedes bien certains & esprouuez pour cela
mesme,

mesme, en nostre traicté des secrets de nature, & en nos Centuries des choses mémorables, qui seront bien tost acheuecs.

*De l'Armoise & de la Tance, & des remedes
qu'on peut tirer & de l'une & de l'autre.*

Quarreau. VI.

IE me suis prins garde que plusieurs dames riches, plantent & nourrissent soigneusement l'Armoise en leurs iardins, à cause des commoditez qu'elles en reçoient, comme nous monstrerons ci apres: & c'est ce qui m'a donné occasion, de recueillir ici en peu de paroles les remedes qu'on en peut prendre. On en void en nos quartiers de deux sortes: L'une iette force branches, comme l'Aluine ayant les fueilles grandes, & de couleur de verd-brun, & c'est celle qu'on appelle communémēt Armoise. L'autre vient le long des leuees & fosséz, voire parmy les champs labourables, ayāt les fueilles plus petites, & c'est celle qu'on appelle communément en France l'herbe de saint Iean. Toutes les deux, selon dioscoride & Galien, ont vertu d'eschauffer, de deseicher, & d'attenuer, & les met-on avec profit es remedes qu'on fait pour les defauts des femmes, pour faire sortir les mois, l'enfant, & l'arrierefais: elles laschent les retresissemens

de l'amarris, appaise les inflammations de celle:rompt la pierre, & fait vriner. Pour faire venir les mois arrestez, il faut mettre de poignées d'Armoise toutes chaudes sur le penil: ou bien faire boire de ses fucilles au pois de trois dragmes. Les fucilles de la petite Armoise bien pilee avec huyle d'Amâdres ameres, & mises sur l'estomach, appaisent la douleur d'iceluy; & son suc avec huyle Rosat, guerit la douleur des nerfs. Toutes les deux fortes pilees en huyle de Glay, avec des Figues & de la Myrre, est vn bon remede pour la matrice, car cela la purge & nettie, soit qu'on la siringue dedans ou qu'on l'applique. Le suc meslé avec huyle violat, & oinct sur l'espine, corrige les chaleurs des fleurs des enfans.

Aux Escrouelles avec suif Pline fort la recommande,

Pour l'appliquer: ou la boire avec du vin il commande.

La racine beue purge tellement les femmes qu'elle fait sortir, mesme les enfans morts. Les fueilles cuites, & appliquees sur le petit ventre avec farine d'Orge, font sortir les mois & l'arricrefais: Et si vne femme est au trauail d'enfant & qu'elle ne puisse deliurer, il luy faut mettre ces fueilles cuites & encores chaudes sur le nombril & sur les cuisses, & tu verras l'enfant sortir, comme
par

par miracle. On baille aussi la decoction des deux Armoises, faite en vin doux, contre la grauelle, & contre la difficulté d'vriner. Aucuns tiennent que si quelqu'un porte de l'Armoise avec soy, il ne pourra recevoir dommage d'aucun mauuais médicament, ni d'aucune beste, non pas même du Soleil. Et si celuy qui a à cheminer la porte avec soy, il ne sentira point de l'asistude. I'oublis icy vne chose bien notable & bien belle, asçauoir que l'Armoise broyée entre les doigts, ou autrement pilee, puis mise dedans les parties secretes d'une femme en forme de pessaire, seruira de beaucoup pour deseicher la matrice de celles qui l'ont trop humide & glissante. La mesme, comme nous auons desia dit, estant cuite & appliquee sur le petit ventre, voire sur le dedans de la cuisse, attire l'enfant & l'arrière-fais: mais il la faudra oster bien tost, autrement elle attireroit la matrice aussi. Si tu broyes le suc de l'Armoise avec quelque nombre de iaunes d'œufs cuits, & que tu mette tout cela sur la matrice, incontinent tu appaiseras les douleurs qui suyuent l'enfantement.

Plusieurs prennent la Tance pour vne troisieme espeece d'Armoise, & luy attribuent mesmes facultez: A quoy cōtredisēt plusieurs excellens medecins, disant que la Tance est

pluſtoſt le Parthenium maſſe. Les facultez & vertus aprouuees duquel ſont, qu'il diſſout les ventofitez de l'eſtomach & du ventre, & chaſſe la vermine. Pluſieurs ſ'en ſeruent auſſi comme d'un ſouuerain remede pour rompre la pierre, & pour faire vriner. Mais comme la Tanee eſt plus propre pour les hommes, auſſi la Maronne eſt meilleure pour les femmes; laquelle les Latins appellent *Matricaria*, pource qu'elle remedie & guerit les douleurs de la matrice. Les Pariſiens la nomment cōmunément *Eſpargoutte*: pource que ſes fueilles eſtans pilees & appliquees à la bouche & aux oreilles contre la douleur des dents, elles eſpardent les gouttes de la phlegme, & attenuant la ſaliue la font ſortir.

De la Chelidoine ou Eſclere, & des remedeſ qu'on en peut tirer.

Quarreau VII.

LA grande Chelidoine (car c'eſt d'icelle que nous voulons parler principalement icy) croiſt en pluſieurs murailles des iardins & eſ lieux ymbrageux: on l'appelle cōmunément en France *Eſclere*: pource qu'elle eſclarcit la veuë & en chaſſe toute obſcurité & eſblouiſſement. Quant au nom de Chelidoine, elle l'a prins des hirondelles (que les Grecs appellent *Chelidones*) pource que cō-

me

me dit Theophraste, elle fleurit quand les hirondelles viennent, & quand elles s'en retournent, elle flestrit & se meurt. D'autres, comme Aristote & Pline affirment, que la vertu de ceste plante a esté cogneuë par le moyen des hirondelles, car elles font venir la veuë à leurs petits, qui naissent aveugles, avec ceste herbe: que si les petits estans encores dans le nid on leur pique les yeux avec vne espingle, tellement qu'ils ayent la veuë perdue, ils la recouureront par le moyen de ceste herbe que la mere apportera, & leur en touchera les yeux: mesme Dioscoride dit, que quelques vns ont bien esté de cest aduis: mais Cornelius Celsus tient cela pour vne fable & pour vn côté fait à plaisir, & dit que si la veuë de ces oyselets est blessée par quelque chose externe, qu'avec le temps elle retourne peu à peu en son premier estat, & se guerit; de sorte qu'on attribue à la mere par le moyen de ceste herbe, ce qui se fait de soy-mesme; de là on a recueilli que le sang des hirondelles sert de remede contre les blessures des yeux, par quelque cause externe, ne plus ne moins que celui de palumbes & de pigeons, au deffaut de celui d'irondele. On tire vn certain suc de la fleur de l'Esclere, lequel estant mis en vn pot bien net, avec de bon miel, on le fait cuire sur les cédres chaudes, & s'en sert on apres pour oster l'esblouif

fement des yeux. Sa racine beuë avec Anis dans du vin blanc remédie à la iaunisse, & aux obstructions & opilations du foye, & sert aux vlceres rampantes, si on l'applique dessus, voire à ceux qui sont enuicillis, & qui sont conuertis en fistule; ce que Q. Serenus a confirmé par ces vers.

*Si vieille playe en fistule se tourne
L'esclere & miel fort bon secours luy donne.*

Je ne me taiscray pas ici de ce que plusieurs tiennent pour vn grand secret: asçauoir que l'herbe de la grande Chelidoine portée dessous la plante du pied, guerit ceux qui ont la iaunisse, comme on dit, mais il la faut porter nuit & iour & la changer souvent; Ils disent aussi que si on applique la mesme herbe sur les māmelles des femmes, qu'elle arrestera l'abondāce des mois: Et dauantage que l'herbe pilee avec la racine, & bouillie avec huyle de Chamomile elle oste les trenchées de ventre, & les douleurs de l'amarri: & la poudre de toute la plante, guerit les playes & vlceres. Les verruës tomberont & seicheront, si on les frotte souvent avec suc de Chelidoine. Si quelcun desire d'en scauoir dauantage, qu'il lise nostre Chiliade des choses memorables, Mise sur les mammelles elle arreste fort bien la trop grande abondance des mois: & desseiche tellement les vlceres que plusieurs s'en seruent au

uent au lieu de Spodium : meſme on l'applique ſur les vlceres qu'on ne peut guerir, uec graiſſe. Galien dit qu'elle a vne vertu chaude & fort deterſiue, & que ſon ſuc eſt fort propre pour eſclaircir la veuë: principalement à ceux auſquels ſ'amaffe ſur la prunelle quelque choſe d'eſpez, qui a beſoin d'eſtre digéré & diſſipé. Pluſieurs ſont d'aduiz de n'en gueres vſer au dedans, mais qu'il eſt plus commode d'en vſer au dehors, comme contre la gratelle & le mal S. main ddes enfans & pour les remedes des métaux dont les Alchimistes vſent.

De la Mercuriale, & des remedes qu'on en peut tirer. Quarreau V I I I.

C'EST Eſte herbe a retenu entre les Frâçois le nō meſme latin : & en fait on de deux fortes, aſçauoir maſle & femelle: La femelle a les ſueilles plus blanchaſtres, & le maſle les a chargees de couleur plus brune. C'eſt merueille de ce qu'on dit de l'vne & de l'autre, aſçauoir que le maſle fait qu'on engendre vn maſle, & la femelle fait auſſi qu'on engendre vne femelle, ſi incontinent apres auoir conceu on boit leur ſuc avec vin cuit, & qu'on mange leurs ſucilles cuittes avec huyle & ſel, ou biē crues avec vinaigre: Dioſcoride eſt d'accord en cela avec Plinē, ſinon qu'il

dit qu'il faut boire ce suc incontinent apres la purgation des mois, & qu'il faut appliquer les fueilles pilees sur les parties seruans à la generation: l'experience y a adiousté ceci, asçauoir qu'un iour ou deux apres les purgations il faut faire prédre à la femme ce suc par trois diuers iours, & le quatrieme, apres que elle sera sortie du bain, auoir sa compagnie. Q. Serenus medicin autant docte qu'ancien: discourât sur ceci tant de la conception que de l'enfentement, en a ainsi parlé en quelques vers, comme ie les ay traduits.

*Si le fruit des enfans, qu'on cherche au mariage
Et l'esperoir de lignee plusieurs ans te deçoit:
Par les Mercuriales grand profit on reçoit
Si ensemble on va coucher soudain apres l'usage*

Hipocrates, comme le recite Pline, a fort magnifié l'une & l'autre Mercuriale pour l'usage des femmes, l'appliquant avec miel, ou huyle rosat, ou huyle de Glay, ou huyle de Lis, pour faire concepuoir, pour prouoquer les mois, & pour faire sortir l'arrierefais: & dit qu'il aduiendra le mesme, si on la boit ou qu'on s'en bafîne. Il distiloit aussi le suc d'as les oreilles de ceux qui oyent dur, & les oignoit avec vin vieil: il mettoit aussi les fueilles cuittes avec graisse fresche, à ceux qui auoyent difficulté d'vriner, l'appliquant sur la vefcie. Pour lascher le ventre, encores qu'il y ait de la fieure, on en prend vne bonne poignée,

gnée , & la fait on cuire en deux sestiers d'eau, iusques à ce qu'il n'en reste que la moitié: ou bien on boit le suc avec miel, y adioustant seulement vn petit de sel: ou bien on fait aussi cuire l'herbe avec de la Malue, dans vn bouillon de poulet, ce qui est bien meilleur. Dioscoride ordōne de la faire cuire dans le potage, pour lascher le ventre: & dit que le bouillon purge l'humeur bilieux & les caux par le bas. Le suc meslé avec vinaigre remédie aux maladies rampantes. La semence de l'vne & l'autre Mercuriale, mise dans ce qu'ō boit, ou cuite avec Aluine ou Chiches, guerit la iaunisse, & ses fueilles enduites ou son suc, ostent toutes fortes de verruës, nettoient la poitrine, mais elles nuisent à l'estomach. Galien enseigne que chacun vse de la Mercuriale, pour lascher le ventre & pour purger: que si on s'en veut seruir en cataplasme, on trouuera qu'elle a vne vertu digestiue. L. Apulce Platonique donnoit la semence de Mercuriale broyée en vin cuit, à ceux qui auoyent le ventre dur: & appliquoit les fueilles avec vin blac vieil, à ceux qui auoyent des defluxions sur les yeux, & à ceux auxquels les yeux larmoyent continuellement. Outre ce il distiloit le suc tiede dans les oreilles de ceux qu'y auoyent de l'eau qu'y estoit entree

De l'herbe appelee Parietaire & des remedes qu'on en peut tirer. Quarreau I X.

CESTE herbe a prins son nom de Parietaire, des parois ou murailles où elle croist le plus souuent, encores qu'on en trouue bein aussi pres des hayes & parmi les vignes. On l'appelle aussi Helxine, pource que elle a des petites boulettes aspres & piquantes, par le moyen desquelles elle se prend & attache aux habillemens. D'autres la nommēt Perdicium, pource que les perdrix en font fort friandes, & se vcautrent volontiers sur icelle. Elle s'apele pareillemēt Vreccolaris ou Vitreola pource qu'elle est fort propre pour nettoier les cruches & verres. On tiēt que si les griues, pigeons, & poulets mangēt de ceste herbe, ils en font degouttez vñ an entier: On l'applique avec profit sur les gouttes, avec suif de cheure ou de bouc, & contre les rompures, cheutes, precipitations & renuersemens de chariots, elle y sert diuinemēt. Elle guerit les apostumes & inflammations, & toutes brulures. Son suc incorporé avec Ceruse, dissout les tumeurs qui viennent en la gorge, & les goitres qui ne font que commencer: fritte avec beurre frais, ou avec graisse de chapon fraische, & mise sur le ventre toute chaude en façon de cataplasme, appaise la violente douleur de la colique, mais il la faut chager souuent: cōme aussi elle appaise les douleurs de la grauelle, & les cruels tormens de la pierre, si on prend son suc avec du vin blanc, &

mellez

meslez avec d'huyle frais d'Amâdres douces, on les mesle bien ensemble, puis on le boit. Elle guerit aussi les inflammations de ces glandes qui sont à la racine de la langue que les medecins appellēt Tonsilæ, si on la mesle avec huyle rosat. Les fueilles, comme dit Dioscoride, ont vertu d'incrasser & refroidir, & pourtāt enduites elles guerissent le feu saint Antoine, comme nous auons desia dit: & corrigent aucunement le mal qui vient au fonde mēt, qu'on appelle le mal saint Fiacre, & tous vlceres qui rampent & s'eslargissent. Tant l'herbe que le suc: enduits ou gargarisez, profitent grandement aux maladies du gosier & distilé dans les oreilles enflambees avec huyle rosat, les soulage fort, & bien souuent les termine du tout. Elle a aussi vne faculté deterſiue, comme on le peut aisément cognoistre és pots de verre qu'elle nettoyc si biē: pareillement elle a quelque astringtion, coniointe avec vne humidité aucunement froide: par quoy elle guerit toutes inflammations, si on l'y met au commencement ou en l'augmentation, & iusques à ce que la maladie soit arrestee. L. Apulée la faisoit cuire en eau: de laquelle il bassinoit la partie affligee de goutte, & quant à l'herbe ainsi cuitte, il la piloit avec graisse & la mettoit dessus avec vn linge en façon de cataplasme. Au reste i'ay appris par l'experience certaine, & qui a esté

esprouué d'aucuns que la Parietaire verde pillée avec pain, huyle de Lis, huyle Rosat, ou de Chamomile, & vn peu chauffez, seruēt grandement aux apostemes des mammelles des femmes.

De la Malue & Guimaue, & des remedes qu'on en peut retirer. Quarreau X.

NO V S escrirons ici amplement & autāt que touche la medicine de l'vne & de l'autre Malue, asçauoir de celle des iardins & de la sauuage: car elles sont toutes deux fort en vsage, aussi sont elles fort communes. Anciēnement on la plantoit és iardins, & s'en seruoit-on pour mettre és pottages, & pour se nourrir, avec ce qu'elle tenoit le ventre lasche & mol, d'où est venu le nom Grec de Malachi & le nom Latin de Malua: ce que le poëte tesmoigne plaisamment, disant.

Ma fermiere m'apportoit Malues pour lacher le ventre.

Et l'autre poëte, comme nous l'auons desia remarqué, au commencement quand nous parlions de la Laiëtuë.

*Phebe tu as la face d'un qui est dur de vêtre
Mange donc de viande ou Laiëtuë & Malue
entre*

C'est bien vne chose admirable de ceste herbe, asçauoir que non seulement la fleur
mais

mais aufsi la fueille (comme a eſcrit Theophraste) ſuit & r  marque le ſoleil , encores qu'il ſoit cach   & couuert de nuees:tellem  t que c'eſt comme vne vraye marque & ſignal pour cognoiſtre o   eſt le ſoleil:&    cauſe de ce on le nombre entre les herbes qui ſuyu  t le ſoleil,comme nous en auons aduertit il n'y a pas long temps,en noſtre trait   des ſecrets de nature & ailleurs. Damageron qui eſt vn auteur fort celebre entre les medecins & agriculteurs Grecs,a laiff   par eſcrit    la poſterit  , qu   le ſuc de Malue eſt bon pour adoucir l'aſpret   de la gorge : & qu'il corrige les cuiſons qui ſuruienn  nt    la peau: Item qu'il aide    la faſcherie des reins,& ſurui  nt grandement aux irritations de la veſcie : Si on la mange bouillie elle eſclaircit fort la voix, & avec huyle & murete de poiſſon , que les medecins appellent Garum,elle laſche le ventre . Ien'ay pas voulu oublier ni paſſer ſous ſil  ce ce que Pierre Pen   a eſcrit en ſon liure des plantes. Les medecins,dit-il,& les apothicaires plus experim  tez de Veniſe, font des petites tablettes avec de la mucilage tiree de la racine de Guymauue,leſquelles ils font en durcir les faiſant cuire avec du ſuc , mais il les faut touſiours remuer de peur qu'elles ne bruſlent:& ſe ſeruent de ces tablettes contre les defluxi  s ſubtiles & deliees des poulm  s: tous ne ſont pas bien experts pour les bien

faire à cause de la lenteur & viscosité qui est en la mucilage . Les fueilles de Guymauue ou de Malue pilees avec vne brâche de Saulx font vne emplastre qui empesche les inflammations de venir ou de croistre, & si arreste le sang qui coule. Estant aussi pilee avec Oignons ou Pourreaux , elle guerit les picqueures des serps, si on l'applique dessus. Son suc distilé dâs les oreilles, appaise la douleur d'icelles: & beu avec miel sert de remede à ceux qui ont douleur de foye: le mesme suc asiste à ceux qui sont affligez du haut mal: & sert de remede singulier aux graucleux & à ceux qui ont la sciatique. Si quelcun est oint avec suc de Malue sauuage & huyle , ou qu'il porte la plante avec soy, il n'a garde d'estre piqué des mousches guespes. Que s'il a esté piqué depuis n'agueres, mesme que l'esguillon y soit demeuré , le mesme suc y seruira de secours, ou l'huyle seul. Le bouillon de la Malue ou Guymauue bouillie beu , fait cesser les difficultez d'vriner, & deliure la femme qui est au trauait de l'enfañtemēt. On a trouué par experience, que piquer les dents qui font mal, avec la racine de la Malue qui n'a qu'une tige y sert beaucoup: pareillement qu'une femme deliure plus aisément, si on luy met des fueilles de Malues dessous: mais incontinent que elle sera deliurée il les faudra oster, de peur que la matrice ne sorte aussi: à quoy sert aussi si on

si on leur fait prendre à ieun du suc avec vin. Aucuns ont enseigné, que si les femmes prennent vne poignée des fucilles avec huyle & vin, que cela les purgera suffisamment. Elle guérit aussi les escrouelles, les parotides, oreillons, & enflures de la gorge, y adioustant vn peu de saluë humaine, sans aucune playe. Aucuns attachent sa semence pilee, au bras de ceux qui ne peuuent contenir leur semence genitale. Xenocrates a bien remarqué ceci (pourueu que ce soit d'une Malue n'ayant qu'une tige) qu'estant saupoudrée sur les parties secrettes des femmes, cela leur accroist merueilleusement le desir d'habiter avec le male. Quoy qu'Olympias de Thebes die que les Malues font auorter, si on les met dās la matrice en forme de pessaire, avec graisse de canard: ce qu'il eust peut estre mieux vallu taire. Dioscoride dit que celle des iardins est meilleure à manger que la sauage, mais qu'elle nuit à l'estomach: les tiges de laquelle comme elles sont aisees au ventre & aux entrailles, aussi sont elles fort propres pour la vescie. Sa semence cuitte dans du vin & de l'eau, & vn bien peu de vinaigre, profite grandement contre les piqueures & morsures des animaux venimeux, si on en boit vne partie, & qu'on applique l'autre sur la partie blessée. Et aussi les fucilles toutes

crues pilees avec huyle rofat aidēt grādemēt aux brusleures, comme aussi l'eau de leur decoction. Les mesmes fueilles avec pain s'appliquent avec vtilité contre la vehemēce des playes. Le suc beu tout à par soy, ou siringué avec huyle de Lis, amollit la matrice. Je di d'auantage que la fomentation de la decoction de Malue, ou Guymauue, oste les durtez de la matrice, & ouure ses conduits. Aucuns tiennent que sa racine, portée, retiēt l'enfant conceu au ventre, voire si elle touche la matrice: ce que plusieurs attribuent aussi à la Parietaire. Il y en a qui la pilēt avec huyle rofat & l'appliquent chaudement, contre la tumeur des māmelles. Elle a vne singuliere vertu, cōme nous auons dit contre toutes piqueures des mousches guespes, des mousches à miel & semblables. Si on la laisse pourrir dans l'vrine, elle guerira la mauuaise rache: elle guerira aussi les dartres & feux volages, & les petits vlceres qui viennent en la bouche des enfans, avec miel. Quintus Serenus semble attribuer à la decoction de sa racine vne singuliere vertu contre les surfures & peaux mortes qui tombent de la teste quand on se pigne, escriuant de cela fort proprement en ces vers comme s'ensuit.

*La racine de Malue cuistte peut guerir bien
seurement*

L'abon-

L'abondance de peaux mortes qui tombent en se pignat

Ses fucilles pilees en huyle rosat & bouillies, profitent grandement au feu S. Antoine & aux brusleures, si on les enduit dessus: Et la semence beuë en gros vin rouge, deliure de la phlegme, & de tous appetits de vomir: & clisterizee ou beuë, aide grandement à ceux qui ont vn desir continuel d'aller à selle sans y pouuoir rien faire, & aux dissenteries: pareillement aux asthmaticques, & aux melancholiques: ausquels toutesfois, cōme aussi à ceux qui sont transportez de leur sens, aux graueleux, & à ceux qui sont trauaillez d'inflation, & qui ont le col retiré vers les espaulles, sans se pouuoir plier (que les Grecs nomment Opistotonos) le suc leur est beaucoup meilleur, soit qu'ils le boyuent ou qu'ils l'enduisent. La racine de celle qui n'a qu'une tige, sert de remede aux maladies des tetins, si on la lie avec laine noire: & prise avec lait en façon de breuuage, elle corrige la toux en peu de temps. Le bouillon de toute la plante racine & tout, est de grande efficace contre toutes choses venimeuses, si apres l'auoir beu on le vomit. Hippocrates (selon que Plin l'a remarqué) faisoit boire le ius de la racine cuittë, à ceux qui auoyent receu plusieurs playes, & qui estoient alterez pour auoir perdu beaucoup de sang, de quoy ils receuoient

grand foulagement: il appliquoit aufsi ladite racine avec miel & refine, fur les playes avec falutaire fucces: comme il faisoit aufsi aux de flouëures, cõtuſions & meurtriſſeures, & aux enſleures des muscles, & aux nerfs & iointures malades. Mais c'est merueille que l'eau dans laquelle on aura pilé la racine de Malue & laiffé tremper quelque temps à l'aër, ſe prédra & caillera comme laiët, ce que nous ſauons bien pouuoir ſeruir à pluſieurs choſes, & tant plus freſche & recente elle eſt, tant meilleure elle eſt aufsi. Je ſcay bien aufsi que Theophraste attribue cela pluſtoſt à la Guy mauue, que non pas à la Malue.

Du Lathiris, ou petite Catapuce, ou Eſpurge & du Tiquet, ou Palme Chriſt, ou grande Catapuce, & de leurs remedes.

Quarreau. XI.

EN ce recit des remedes medicinaux que l'on peut tirer des iardins, il reſte ſeulement à traiter de deux herbes, aſçauoir l'Eſpurge & le Tiquet, deſquels nous deliberõs de traiter avec meſme methode & ordre que nous auons traité les autres. J'auois certes de liberé de n'en dire mot & les paſſer ſous ſilence, à cauſe de ceux qui en abuſent, au grãd dommage de pluſieurs, mais l'importunité & les frèquêtes prieres de quelques miens amis m'ont induit à en traiter, leſquelles ſont cauſe qu'on change bien ſouuent d'aduiſ, meſme és

me és bons confeils. Je desirerois bien, Dieu le scait, que ces plantes tant dangereuses fussent entieremēt arrachees des iardins, & que on ne print pas tant de peine, ni qu'on n'eust si grand soin de les cultiuer, mais i'espere que parce que i'en discourray ici, on apprendra à n'en plus abuser, & qu'on apprendra quel en est le legitime & vray vsage. Puis dōc qu'il a semblé bon, mesme aux grāds, que ces plantes fussent au nombre des herbes des iardins, ie suis content d'en traiter avec le mesme ordre & methode que i'ay fait les autres: Je commenceray dōc par la Lathyris, que les François & les laboureurs appellent Espurge pource qu'elle purge le ventre. Les apotichaires la nomment petite Catapuce, pource, si ie ne m'abuse, qu'elle porte sa semence en petites boulettes rondes comme pilules, que les Latins appellent Catapotia, ou bien pource que plusieurs, non seulement entre payfans, mais aussi plusieurs grāds & courtisans se seruent assez inconsiderément de ceste semēce, pour se purger le vêtre, & faire vomir, au lieu de pilules. Toute la plāte abōde fort en lait, & ses fueilles approchēt fort des fueilles d'Amandrier, de sorte toutesfois que celles qui sont aux plus hautes brāches, sont beaucoup moindres que celles qui enuiroinnēt le trōc, elle portē semblablement au plus haut des petites boulettes, lesquelles sont miparties.

en trois petits espaces: & dans ces espaces & cauitez on trouue sept ou huit grains separez par les petites peaux qui y sont: lesquels grains sont ronds, & vn peu plus gros que la semence d'Ers: quand ils sont despouilleez de leur peau & escorcee, ils se monstrent blancs, & ont vn goust doux: vingt de ces grains beus en eau pure, ou en eau miellée, gueriffēt les hidropiques: ceux qui veulēt estre purgez dauantage, prennent ces grains avec leur escorce & gouffe: mais d'autant qu'ils nuisent bien fort à l'estomach, on a inuenté le moyē de les prédre avec bouillon de Pois, ou bouillon de poulet. Il est permis d'en prendre sept ou huit grains en pilules, pour vider le ventre, mais il y faut mesler quelque chose parmi, de celles qui ont vertu de fortifier l'estomach, comme sont la Cānelle, le Mastic, l'Anis, ou le Fenoil, autrement elles tormentēt & troublent l'estomach & les boyaux. On les mange aussi coustumierement avec Figues seiches, Raisins secs, ou Dattes, mais il faut boire apres de l'eau froide, ils euacuent les eaux, la cholere, & la phlegme. On fait aussi cuire les fueilles avec vn poulet, ou parmi des autres herbes, ou en quelque autre bouillon, pour la mesme fin & vsage. La quantité est vingt grains des petits, & quinze des plus gros, plus ou moins ayant esgard à l'aage, & à la force du malade. Ceux aussi qui desirent
d'estre

d'estre purgez d'auantage, selon que dit Aëce, doiuent macher les grains: ceux qui ne le veulent pas tant estre, les doiuent aualler tous entiers, mesmement ceux qui ont l'estomach foible & debile. Quoy que ce soit i'admoneste chacun d'en vser fort peu souuent, & avec discretion & bon aduis.

La plante du Ricinus est nommee des modernes herboristes, grande Catapuce, pource que ses semences, sont encloses dans des boulettes & pilules plus grandes que non pas la petite: ou bien pource qu'elle purge comme feroiēt des pilules. Le commun peuple François l'appelle avec les apotichaires Palma Christi, pource que sa fueille est formee en facon d'une main d'homme. On la plante en plusieurs iardins, pour l'opiniō qu'on a que elle chasse les taupes, qui gastent & renuersent la pluspart des iardins. Ceste plante croist grande comme vn petit arbre, ayant la fueille fort aprochäte de celle de vigne, plus noire toutesfois: ses tiges sont creuses & caues dedans comme d'une Canne, sa semence est enclose dans des gouffes piquantes comme vn herisson de chasteigne, & est appelé des apotichaires Kerua. Or ceste semence estant ostee de dedäs la gouffe, ressemble entierement cest animal vilain & de couleur liuide que les Latins appellent Ricinus, & les François Tiquet, & n'y a autre difference si-

*De la grā
de Catapu
ce & de
ses appela
tions.*

*Ricinus
ou Tiquet
est vn ani-
mal noir
& sans for-
me, qui fa-
sche fort les
i. estes.*

non que c'est animal a vie, & la semence n'en a point: & de la est venu qu'on a donné à ceste plante le nom de Ricinus ou Tiquet. Trente grains de ceste plante, ou bien comme Iean Mesué trouue bon, & que i'approuue aussi, quinze grains pour le plus, & sept pour le moins, nettiez & mondez de leur escorce, purgent l'humeur bilieux & les eaux par le bas & par vomissemens, si on les boit: Ils font aussi vriner, mais le breuage en est fort mal plaisant, comme en parle Dioscoride: & si apres l'auoir beu il y suruient vn facheux renuersement d'estomach. La mesme semence pilee & enduite corrige les bourgeons & les taches qui viennent au visage par l'ardeur du Soleil: & les fueilles pilees avec Griote, appaisent les tumeurs & defluxions qui viennent és yeux, & repriment les inflammations & tumeurs des mammelles. Enduites avec vin-aigre elles amortissent le feu saint Anthoine, & appliquees toutes seules les trois iours durant nettoient la face. Mais on prendra plaisir & profit d'ouir ce que Iean Mesué discourt de ceste plante, qu'il appelle grain Roial, & des ses vertus & facultez. Le Ricinus, dit-il, euacue avec violence la phlegme, & quelque fois l'humeur bilieux tant par le bas que par vomissement: il attire aussi les matieres & eaux des iointures. On baille à boire ses grains pilez & cuits en bouillon

bouillon d'un vieux poulet ou chapon: ils sont vtils contre la colique, & contre les douleurs des iointures, cōme sont la goutte des pieds & mains, & la Sciatique: Ou biē on les fait cuire en petit laiēt, ou on tire du laiēt de Cheure dessus & les coule-on, & ainsi on le baille à boire aux hydropiques, dont ils reçoient grand profit. L'huyle qu'on tire de ses semences par expresseion, & que les medecins appellent Cicinum ou Ricinium, est fort profitable à la colique causee de phlegme & de ventositez, & aux maladies des iointures. La mauuaistiē de ceste plante, se peut corriger en la mesme façon que nous auons dit de l'Espurge. La quantité qu'il en faut prendre est depuis sept grains iusques à quinze, comme nous auons dit ci deuant. Mais il est deormais tēps de mettre fin au discours de ces herbes des iardins, & venir à la description des arbres domestiques, & de leurs fruiets, lesquels nous poursuurons avec le mesme ordre & methode que nous auons fait les herbes.

LE SEPTIESME SILLON DV

Iardin Medicinal, contenant le discours des arbres portans fruitz qui ont l'escorce deliée & tendre, & de leurs fruitz. Des parti en treize Quarreaux.

*Du Pommier & de son fruit, avec les reme-
des qu'on en peut tirer.*

Quarreau I.

V S Q V E S icy nous auons discoursu (ie desire que ce soit heureusement) des herbes potagieres des iardins, des racines bonnes à manger, des herbes odoriferantes, des fruitz qui ont nature d'herbes, des fleurs tant de celles qui ont odeur que de celles qui n'en ont point, selon nostre petite portee . Il reste donc que par mesme ordre & methode, nous traictiõs des arbres fruitiers qu'on trouue esvergiers, desquels l'homme peut tirer quelque commodité, & principalement de leurs fruitz, commençant par ceux qui ont leur escorce deliée & tendre, que les Latins appellent d'un nom general Poma: apres lesquels nous viendrons à ceux qui estans paruenus à maturité sont reuestus d'une peau & escorce dure comme bois, lesquels les Latins nomment d'un mot general aussi Nuces . Nous commen-
cerons

cerons donc par les Pômiers, l'arbre desquel
les est fort commun, tant aux champs qu'és
iardins, vergiers & lieux de plaisir qui sont
pres des villes. Diphilus medicin & agricul-
teur Grec, dit que les Pommes qui ne sont
eneores meures, engendrent vn mauuais suc
dans le corps, & produisent abondance d'hu-
meur bilieux, & force maladies, & esmeuuet
les causes des frissons: mais celles qui sont biē
meures, dit-il, sont de meilleure nourriture
& engendrent meilleur suc: car elles sortent
plus aisément par le bas, à cause qu'elles ne
sont pas si aspres ni rudes. Les aigres engen-
drent mauuaises humeurs, & sont plus astrin-
gentes. Et pour dire en vn mot, nous deuons
vser des Pommes sobrement & prudemment
selon que nous pourrons cognoistre leur na-
ture & faculté par la diuersité du goust. On
pourra vser de celles qui sont austeres & as-
pres, lors que l'estomach est affoibli par
trop grande chaleur ou par trop grande
abondance d'humidité: Des brusques &
rudes, quand ces choses sont fort acreuës:
Des aigres, lors que tu crains que dans l'e-
stomach ne se soit amassé vn humeur gros,
lequel neantmoins n'est pas par trop froid:
car l'humeur froid ne peut pas estre cor-
rigé ni veincu, par choses aigres, mais par
choses acres & fortes. Celles qui se sont gar-
dees tout l'hyuer, le printemps, & iusques en

Esté, sont bié souuét fort profitables és maladies, mais il les faudra couvrir de farine pestrie avec eau, & les faire cuire dans le four, ou les faire vn peu cuire sous les cédres chaudes, ou les faire vn peu mortifier à la vapeur d'eau chaude: Et est bon de les manger incōtinent apres le repas: quelquefois aussi on les fait manger avec du pain pour renforcer l'estomach, & le ventre de ceux qui sont desapetissiez, & qui cuisent difficillement la viade, ou qui sont molestez de vomissemens ou flux de ventre, soit avec sang ou sans sang: & pour celà les aspres sont propres: car apprestees comme i'ay dit, elles sont moyennement astringentes. Il me semble que ce ne sera point hors de propos (encores que ne touche pas la medicine) de remarquer icy ce que Plinē a dit, asçauoir, que les Pommes chargent tellement les iuments qui les portent sur le doz, qu'encores qu'il n'y en ait pas beaucoup, & que les bestes soyēt assez puissantes pour en porter beaucoup d'auantage, neantmoins elles defaillent sous le fais: ce qu'Apulee auteur Latin attribue à la senteur, laquelle les fâche de telle sorte que le cœur leur en faut. Ce que ie croy deuoir estre plustost entendu des Coings qui ont vne odeur forte & violēte: quoy que soit, il se rabiē aisé de l'experimenter qui voudra. Le souuerain remede, à cela est de leur donner du

du pain, car incontinent qu'elles en auront mangé, comme l'a escrit Plinẽ, elles reprendront cœur. Quant aux diuers moyens pour bien garder les Põmes, tu les pourras voir en nostre traitté des secrets des iardins. Peu s'en a falu que ceci ne me soit oublié: asçauoir, que la Põme douce & de bõne odeur, estant mondee au dedans de ses semẽces, & rēplie d'Encens, puis qu'on remette la piece qu'on en auoit ostee pour la pouuoir monder, & qu'on la face cuire sous la cendre, puis qu'on la face manger à celuy qui est detenu de Pleuresie, on verra qu'elle fera vne opperatiõ admirable: cẽ que nous auons expérimenté vne & deux fois, en des personnes deplorees.

Remede
excellent
contre la
Pleurisie.

Du Poirier & de son fruit & des remedes qu'on en peut receuoir. Quarréau. II.

SI on fauoit rapporter aux Poires ce qu'auõs dit des Põmes, il ne feroit ia besoin de nouveau discours: car on scait bien qu'entre les poires il y en a aussi des aspres, des brusques, des aigres, des douces, & beaucoup d'autres qui ont vn goust meslé de ceux-ci. Il y en a aussi qui n'ont point de qualité notable qu'on puisse remarquer, parquoy estans aqueuses & de moins de goust, elles n'ont aucune vertu pour renforcer: L'vsage des Poires sera semblable à celuy des Põmes, cõme l'a

tresbien escrit Galien : lequel attribue presque à toutes les sortes de Poires vne douceur aqueuse, avec vne aspreté lente: qui est vn argument manifeste de diuers temperamens, parquoy il tient que la Poire mangée à la fin du repas, profite à l'estomach, mais si on la mange deuant, elle resserre le ventre. Certainement l'usage de toutes les sortes de Poires crues, quoy qu'on soit robuste & ait bon estomach, est facheux, mesmement si on les mange à ieun: mais estans cuittes elles sont beaucoup plus saines. Aucuns les mettent en quartiers, & les font seicher au Soleil, ou au four, apres auoir osté les grains de dedans, puis en hyuer ou en Careme ils les mangēt, les faisant tremper en vin ou en eau chaude, & mettant force sucre par dessus, qui est vne viande fort plaisante. Toutes les sortes de Poires astringentes, sont propres à mettre dans les cataplasmes repercussifs: Elles sont aussi contraires aux Mousserons & Champignons, car elles les chassent par leur pesanteur, & par leur suc qui presse & restraint. Aucuns ont laissé par escrit que si dans la chambre d'une femme qui est au travail d'enfant y a des Poires, encores qu'elles soyent cachées, cela fera qu'elle deliurera avec plus de peine: Mais cela doit estre entendu des Coings, comme nous dirons ci apres, & comme quelques miens amis m'ont asseuré, qui se dele-

ctent

Etent à experimenter les secrets de nature.

*Du Coignier & de son fruit, & des remedes
qu'on en peut tirer. Quarreau III.*

ON ne peut pas descrire la forme de ce fruit comme des precedens: car il s'en trouue les vns qui ont des rayes, & leur couleur est aprochante de la couleur d'or, d'où est venu que les Grecs les ont nomméz Chrysomela, & Vergile Pommes d'or, comme plusieurs estiment. Les autres sont plus blanchastres, & ont vne senteur excellente. Il y en a des autres qui sont surnommez Struthea, qui viennent plus tard & plus gros, & ont ie ne scay quelle senteur plus plaisante que les autres. Il y en a aussi des sauages, qui sont petits, & qui viennent en abondance es hayes. Toutes les sortes sont couuertes d'une certaine bourre ou cotton, & ont vne odeur fort plaisante au nez, & qui conforte le cerueau. Plutarque auteur fort estimé, a laissé par escrit que les Pommes de Coing, par leur odeur plaisante rabatēt la violēce des venins mortels, & leur ostēt la force: Il adioust que le Pharicum, qui est vn venin, fort violent & qui tue soudain, ayant esté mis dans vn vaisseau qui sentoit encores le Coing, ou sa cōfiture, il perdit sa force & violēce, mesmes que ayant delassé son naturel, il n'eut aucune vi-

gueur:& par ce moyen tous ceux qu'on vou-
loit empoisonner furent garentis & sans
dommage:ce qui fut apres descouuert par
ceux-mesmes qui auoyent vendu le poison,
qui s'apperceurent du faict & comme le tout
alloit. Les Coings tant cuits que crus pro-
fitent à ceux qui ont l'estomach debile, de
forte que la viande s'en va par embas sans e-
stre cuite :à ceux qui ont la disenterie, dif-
ficulté d'haleine, qui abondent en humeurs
bilieux, & à ceux qui crachent pourri. Ils
font fort bonne haleine, & pour ce Solon
commandoit aux femmes, comme Plutar-
que le recite, qu'elles n'allassent point cou-
cher avec leurs maris, qu'elles n'eussent pre-
mierement mangé du Coing. La liqueur dās
laquelle les Coings auront trempé, sert aux
fluxions de l'estomach & du ventre. Ceux
qu'on confit tous crus dans le miel sont pro-
pres à faire vriner: & le miel prend & reçoit
leur nature,asçauoir de restraindre & espes-
sir. Mais ceux qu'on confit au miel les fai-
sant cuire, sont vtiles à l'estomach, & plaisans
au goust, mais ils perdent la vertu qu'ils ont
de restraindre:Les Coings tous crus reduits
en forme de cataplasme, arrestent le ventre
par trop lache, & renforcent & fortifient
l'estomach s'il est trauaillé de vomissemens,
ou bruslant par grande chaleur. Simeon Se-
thi, envn liure qu'il a cōposé des viandes, en-
seigne

seigne que les Coings portez en la chambre où il y a vne femme qui est au trauail d'enfant, ou mesme s'ils y sont cachez, font que non seulement la femme demeure plus longuement à enfanter, mais elle deliure avec plus grande difficulté, & neantmoins si durant sa portee elle a souuēt mangé de Coings, elle enfante-
ra des enfans fort ingenieux & de bon esprit, cōme ce mesme autheur à remarqué. Quant à la cōfiture qu'on fait des Coings, qu'on dit vulgairement Cotignat, pour le faire excellēt (afin que i'aduertisse de ceci en passant) il faut fendre les Coings, & les bien nettoyer dedans, puis les mettre en petites pieces, sans rien oster la peau de dessus qui est de fort bonne odeur, & les faire cuire en eau iusques à tant qu'ils soyent mols: estans ainsi cuits il les faut passer par vn linge, & les serrer & presser bien fort, puis les faire recuire, asçauoir ce qui sera passé, avec bon Sucre. Que si pendant qu'il cuit tu y adioustes vne suffisante quantité de poudre de bon Rhabarbe, tu feras vn Cotignac non-pareil, non seulement pour lacher le ventre & purger le corps, mais aussi pour renforcer l'estomach, le foye, & toutes les entrailles: beaucoup plus seurement & avec plus de profit, que non pas avec celuy que on fait à Lion où on met de la Scammonnue & du Diagridé, lequel aussi ie conseille

de fuir comme la mort, à ceux qui sont curieux & soigneux de leur santé, à cause des grans & dangereux accidens que nous auons souuent veu aduenir à ceux qui en vfoient, avec perte de leur vie, sans y pouuoir remédier en sorte que ce fut: Ce sera assés que i'en aye aduertí, se seruira de l'aduertissement qui voudra. Ce que ie veux dire maintenât est bié plaisant & confirmé par l'expérience que plusieurs en ont faite: fendez vn Coing par le milieu, & le nettiez bié de toutes ses semées & pelures de dedans, puis réplissez la cauité de quelque bon Rhabarbe, mis en poudre fort delice, ou de semée de Carthame mōdee ou d'Agaric trochisé ou de l'autre, ou d'Epithyme, ou bié de fueilles de Sené oriental, ou de quelque autre simple medicamēt laxatif, tel que te semblera bō: cela fait tourne assembler les deux pieces, & les enuelope dans du papier, & apres les auoir bié liees ensemble, fai les cuire dās le four ou au foye, iusqu'à tāt que le Coing soit deuenu mol: Apres que le Coing sera cuit il le faut ouurir, & ietter là le medicament qu'on auoit mis dedās & māger seulement la chair du Coing: Il purgera sans aucune facherie ni dōmage (voire en purgeant il réforcera) l'estomach, le foye & tout le corps, de l'humeur qui est propre au medicament qu'on aura mis cuire dedans: Que si tu y mets des medicamens diuers & de diuer-

diuerſe faculté, tu euacueras auſſi diuerſes humeurs. Meſme ſi le Coing eſt gros, tu pourras eſlargir la cauité & la rendre plus ample que n'eſt pas celle où ſont les grains, afin qu'il y ait plus d'eſpace pour mettre les medicamēts que le medicin bien expert aura ordonnez : mais il ſera meilleur de le prēdre plus petit, afin qu'ayant eſlargi la cauité on puiſſe apres manger tout ce qui reſtera. Et tout cela ſe fera ſans aucune facherie ni mal de cœur, ſi tu veux croire à ceux qui l'ont eſſayé, & qui m'ont remercié de ce que ie leur auois enſeigné vn ſi gentil ſecret, duquel m'a ſemblé bō te faire participāt gratuitement. Ie poursui maintenant les autres facultez & vertus des Coings. Si tu fay cuire le ſuc des Coings aſtringens avec pareille quantité de miel roſat, & qu'avec cela tu enduiſes les glādes qui ſont à la racine de la lāgue enflāmees ou la Luette enflam mee, ou les putrefactions de la bouche, tu en ſentiras vn grād ſecours: l'adiouſte encor que la decoctiō des Coings entiers ſert grandement à ceux qui ont des trēchees, ou qui ont la diſenterie, ſoit qu'on la leur face boire ou qu'on leur en baille des cliſteres. Le ſuc des Coings crus, eſt vtile aux douleurs des mammelles, & la decoction des fleurs de Coignier, empêche que la matrice ne tumbes, ou que l'enfant ne glisse, ſi on s'en baſſine. La decoction de la chair ou poulpe

R.iii.

de Coings, arreste la cheute du fondemēt & de la Matrice, & les contregarde de tomber en inflammation, Mais c'est assez parlé des Coings.

*Du Prunier & de son fruiēt & des secours & fa-
cultez de l'un & de l'autre.*

Quarreau. IIII.

LA diuersité des Prunes est entre nous pres-
qu'infinie, & mal-aisémēt les peut-on nō-
brer: mais les plus estimees de toutes, sont cel-
les qu'on appelle Prunes de Damas, pource
qu'on les a aportees de Damas mōtagne de
Syrie, cōme dit Galiē, qui sont neantmoins
aujourd'huy fort communes entre nous. Les
Prunes Dates tiennēt le secōd reng, lesquel-
les i'estime auoir prins le nom de ce qu'elles
sont longues cōme le doigt: elles sont de figū-
re presque ouale, & ont leur chair fort plaīsan-
te. On en trouue aussi qui sont entees sur vn
Noyer, lesquelles tiennent de la forme & du
goust de la Noix, aussi sont elles appelees
d'un nō cōposé des deux, asçauoir Noixpru-
nes. Mais tout ceci ne sert de riē aux remedes
des Prunes. Les prunes donc, mesmemēt les
douces, cuites en eau-miel ou autre, & prin-
sēs deuāt le disner laschent doucement le vē-
tre: mais il ne faut pas disner ou māger incon-
tinent apres les auoir māgees, ains mettre v-
ne petite demie heure entredeux. Celles qui
sont aigrettes doiuent estre presentees à l'issue
du

du repas, afin de renforcer l'orifice de l'estomach. Les fueilles du Prunier cuites en vin seruent à la Luette, aux genciues, & aux glandes qui sont à la racine de la langue, quāt elles sont molestees de quelque defluxiō, mesme les resserre si on s'en gargarise ou qu'on s'en laue la bouche. Les pruneles sauuages seiches quād elles sont meures, font le mesme: Que si on les fait cuire en gros vin rude, elles arrestēt le flux de ventre, & appaisent les trāchees. La Gōme qui viēt au pied des prune- liers & des Pruniers, a vertu de cōsolider, & beuē dās du vin rōp la pierre: & si on l'enduit avec vin-aigre, elle guerit les Dartres & feux volages des enfans, cōme l'escriit Diosco ride. Mais il est tēps d'entendre ce que Iean Mesué traite en medicin & assez subtilemēt, des facultez & vertus des Prunes, & voicy ce qu'il en dit. Les Prunes laschent le ventre & l'esmeuent, mais les blanches, les iaunes & les rouges, ont moins de vertu que les noires: entre lesquelles celles qui sont de moyen goust, asçauoir aigres-douces, esmeuent d'a uantage. Les douces lachent d'auātage le ven tre, toutesfois & les vnes & les autres laschēt le ventre, les vne plus les autres moins. Celles de Damas & les Armesines font & l'un & l'autre, mieux que pas vne des autres, mais mieux estās fresches que seiches: bien est vray qu'estās fresches elles se corrōpēt plustost en

l'estomach quand elles sont seiches. Toutes les fortes de Prunes ont vertu de nettoyer, adoucir, rafreschir, & euacuer l'humeur bilieux: parquoy elles sont bônes aux fieures & autres maladies causees d'humeur bilieux: elles nuisent à l'estomach, & sont de peu de nourriture. Pource qu'elles laschēt le ventre trop foiblement, on y adioustē principalement en infusion la Cassē la Manne, les Tamarins, & les Violettes confites. On fait vn electuaire de la chair des Prunes cuites, qui est propre à tout celà. Au reste si tu perces le tronc du Prunier en deux ou trois lieux, de sorte que les pertuis soyent distans l'vn de l'autre d'vne palme, puis que tu mettes dans ces trous de la Scāmonee, & que tu les bouches tresbien avec de terre grasse, les Prunes qui viendront apres seront plus laxatiues. Iusques icy nous auons recité ce qu'en dit Mesuē. Je diray ceci pour la fin, pour faire plaisir aux malades: Si tu fais cuire vn peu les Prunes seiches, & que tu les piques en plusieurs & diuers lieux, puis que tu les faces trēper en eau fresche, tu les verras enfler & deuenir fort poulpues: Il t'auindra le mesme sans les rien faire cuire, si tu les piques en plusieurs lieux, & que tu les faces tremper deux iours entiers en eau fresche. On peut faire le semblable des raisins secs & des autres fruiets. Mais nous escrirons de ces choses plus amplement en peu de iours.

*Des Cerisiers, de leurs fruits, & des remedes
& facultez d'iceux. Quarreau V.*

LE Cerisier porte le fruit le plus plaissant de tous les autres arbres fruitiers, & les plus diuers, & de plus de fortes, aussi leur a on donné diuers noms & diuerses appellatiōs, lesquelles ie ne me trauaille pas beaucoup de raconter, me contentant seulement de dire que les François appellent Cerise ce fruit qui vient en vn arbre de moyenne stature, le quel fruit est rond, & pendu à vne queue courte, lequel on voit rougir parmi les feuilles verdes comme vne scarboucle quād il est paruenu à maturité: lequel a beaucoup de chair, molle & pleine de suc, l'usage duquel est fort plaissant à cause de sa petite aigreur: & partant il resiouit merueilleusement les malades qui sont desgoutez, & les femmes enceintes qui sont desappetissees en sont fort frandes, deuant mesme qu'il soit du tout meur. Diphilus Siphnius, qui a esté vn medecin fort renommé quelque temps après Hippocrates (car il viuoit du temps de Lysimachus qui estoit successeur d'Alexandre) escrit ainsi des Cerises. Les Cerises, dit-il, engendrent bon suc, mais elles sont de peu de nourriture: elles sont plaissantes à vn estomach par trop chaud, & luy seruent de remede, si on les prend en eau froide: mais les rouges sont les

meilleures, & les Milefiènes, pource qu'elles prouoquent l'vrine: voila ce qu'il en dit. Or i'ay esté bien aise de remarquer le temps de ce Diphilus, afin de rembarrer l'erreur de ceux qui disēt que les Cerises ont prins leur nom d'une certaine ville de Ponte nommee Cerasunta, ou Cerasuntia, laquelle iouissoit de mesmes priuileges que la ville de Rome, & que Lucul⁹ les porta premieremēt en Italie apres auoir vaincu Mitridates. Mais ie reuiens aux remedes qu'on peut tirer de ce fruit. Les Cerises qui sont douces laschent le ventre & le rendent mol, au lieu que les aigres & les seiches le reserrent & arrestent, lesquelles, asçauoir les aigres, refroidissent & restraignent, d'où vient qu'elles amortissent l'humour bilieux, & deliurēt le foye de tous empeschemens. La gomme qui sort du Cerisier destrempee en vin, adoucit les aspretez de la gorge, rend la couleur de la peau plus recommandable & belle, esclarcit les yeux, sert de remede à la vieille toux, guerit les dartres & feux volages des enfans si on la destrempe avec vinaigre: Et prinse en vin blanc profite beaucoup aux graueleux, comme plusieurs ont experimenté avec leur grand profit. L'auois presque oublié une chose qui me semble bien memorable & digne d'estre nottee: L'eau tiree par distillation des Cerises, peu de temps apres qu'elles sont cueillies, mise
dans

dâs la bouche de celuy qui tûbe du hautmal, toutes les fois que l'acces le prendra, cela empeschera la violence & impetuosité du mal: chose certes fort à priser, & qui a esté souvent approuuee par Iean Manard, qui estoit vn medicin fort renommé en la ville de Ferrare. Il reste encores quelque petite chose à dire: Le trouue dans les auteurs, dit Pline, que si quelcun auale de matin quelque nombre de Cerises avec leurs noyaux, lors que la rosee est encores dessus, le ventre luy est tellement alegé que les pieds sont deliurez de maladie. Aucuns les font seicher à l'ardeur & chaleur du soleil, iusques à ce qu'elles soyent ridees. D'autres font le mesme dans le four, le faisant chauffer modérément, & estans seichees les gardent pour en vser, tant pour les sains que pour les malades.

Du Meurier & de son fruit, & des aides & facultez de l'un & de l'autre.

Quarreau. V^e I.

ENTRE tous les arbres domestiques, cõme Pline l'a escript, le Meurier fleurit tout le dernier: car il ne iette ses bourgeons que bien tard, & lors que le froid est du tout passé: & de là est venu qu'on l'a appelé le plus sage de tous les autres arbres, quoy que les Grecs luy ayent donné vn nom qui signifie

fol & sot, car ie croy qu'ils ont fait cela par vne antiphrase. Le suc de la fucille du Meurier ou de sa racine est fort vtile contre l'esquinance, & contre le danger d'estre suffoqué si on s'en gargarise: & les fueilles enduites avec vinaigre, seruent de remede aux bruſſeures. Si aucun préd des Meures à demi meures, vne once: de Roses seiches autant, & qu'il mesle le tout avec miel, il aura vn medicamēt fort bon contre les inflammations des glandes qui sont à la racine de la lāgue, de la lucte, & contre les putréfactions & corruptions qui viennent en la bouche, mais il les faudra vn peu faire cuire & presser apres les auoir meslez avec le miel. Le suc de sō escorce peut consolider & refermer les playes. Quant à la nature du fruiēt de cest arbre, qu'on appelle Meures, si elles sont paruenues à maturité el les laschent le ventre, & le font glissant, mais elles se corrompent soudain en l'estomach: Elles humectent aussi & rafraischissent quelque peu, sinon qu'on les mange actuellemēt froides: que si on ne mange point d'autre viā de apres les auoir mangées, elles s'enflent aisément. Et encōres qui plus est, quand elles ne sont pas meures, elles referrent le ventre: que si on les fait seicher au soleil, ou dans le four chaud, & qu'on les reduise en poudre, elles ne seront pas seulement plaisantes pour mettre parmi les sauces, mais aussi seruiront de re-

de remede à ceux qui ont flux de ventre, ou
dissenterie : elles seront aussi bonnes contre
les vlcères qui s'eslargissent & rongent les
parties voisines. Aucuns lauent la bouche de
ceux qui ont les dents & les gencives pour-
ries avec ceste poudre destrépee en vin . Les
fueilles de l'arbre pilees & enduites avec huy
le, seruent contre les brusleures: Les mesmes
fueilles cuittes en eau de pluye, avec les fueil-
les de vigne noire & de Figuier, seruent pour
noircir les cheveux . Si on fait tremper ces
fueilles dans de l'vrine, elles serviront pour
oster le poil des cuirs . Si on rôpt vn rameau
de l'arbre à la premiere lune, lors qu'il com-
mence à produire son fruit, il profite contre
la trop grande abondance des mois (comme
disent les magiciens, & Pline l'a remarqué) si
on l'attache au bras de la femme : mais il ne
faut pas que ce rameau ait iamais touché à
terre ni deuant ni apres ; il dit dauantage, que
ce rameau n'arrestera pas seulement les mois
des femmes, mais aussi le sang qui coulera
d'une playe, de la bouche, du nez, ou des he-
morroides, & pour ces fins plusieurs gardēt
ce rameau fort soigneusement : si quelcun le
vent experimēter il sçaura s'il est vray ou nō.
Plusieurs ont senti grand soulagement à la
douleur des dents, en se lauant la bouche de
la decoction des fueilles & de l'escorce . Je
ne me taiseraý point ici d'une chose admira-

ble que Pline dit du Meurier, encores qu'il semble n'estre gueres a propos de la matiere que nous traitons. Le Meurier, dit-il, le Laurier & le Lierre frottez l'un contre l'autre, font aisément du feu: ce qui a esté trouué par les gardes des armées, & par les gardiens du bestail: car n'ayans pas tousiours la commodité de trouuer de la pierre à feu, ils frottent vn bois contre l'autre, & avec d'amorce bien seiche, reçoivent le feu: Mais il n'y a rien meilleur que le Lierre frotté contre le Laurier & le Laurier contre le Lierre. C'est assez parlé du Meurier & des Meures.

*Du Peschier & de son fruit, & des remedes
& vertus de l'un & de l'autre.*

Quarreau VII.

NOVS auons en ces quartiers trois sortes de Pesches. L'une est appelee Auât-pesche, pource qu'il vient long temps deuât les autres Pesches: d'où aussi il a prins le nom d'Abricot entre les François, qui est autant à dire que primerouge: anciennemēt on l'appeloit Armenien: il nous est assez commun au commencement de l'Esté, car lors on en mange à force. L'autre est populaire & cogneu de chacun, lequel meurit sur la fin de l'Esté, plus tost ou plus tard selō la diuersité des regions & climats. Le troisieme est appelé Pesche dur, à cause qu'il a la chair dure & ferme,

ferme, laquelle est tellement attachee au noyau, que mal-aisément l'en peut on separer: d'où est venu qu'on l'a appelé vulgairement *Pesche pressé*, pource que la chair estant cōme attachee au noyau, semble estre pressee: Entre lesquels on en trouue qui ont la chair rouge comme sang, & quand on les fend, le noyau de dedans s'ouure en deux, & se mi-part par le milieu, lequel on trouue tout couuert d'une chose blanche comme farine ou sucre iointe avec la poulpe. De laquelle sorte on en trouue grande quantité, & plus gros qu'en autre part, au terroir de *Moluffō*, qui est le lieu de ma natiuité au duché de *Borbonnois*. Il s'y en trouue aussi de ceste troisieme sorte & de la seconde, qui sont fort iau nes & dehors & dedās, cōme sont les *Coins*. Il y en a bien d'autres sortes qui sont venues par l'artifice des iardiniers, & par la diuersité d'enter, lesquels ie laisse tout à esciēt pour venir au discours des remedes qu'on peut tirer tant de l'arbre que du fruit. *Galien* semble condamner toutes les sortes de *Peschcs*, cōme estās de mauuaise nourriture, à cause que ils se corrompent fort aisément. Ce que ie croy deuoir estre entendu des *Peschcs* communs, cōme aussi les doctes l'ont interpreté, lesquels du temps de *Pline*, à plus forte raisō du tēps de *Galien*, estoient incōtinēt gastez, tellemēt que le plus qu'on les pouuoit garder

c'estoit deux iours, à cause dequoy ils estoient contraints de les vendre incontinent, comme encores aujourdhuy nous en voyons qui sont de ceste nature là. Et pourtant Galien estoit d'aduis de les manger incontinent à l'entree de table, principalement ceux qui ont la chair humide, & la poulpe aqueuse: car si on les mange à l'issue, ils nagent sur l'estomach, & en se corrompant ils corrompent tout le reste de la viande qu'on a mangé: mais si on les a mangés deuant, ils rendent les voyes & conduits glissans, afin que le reste de la viande passe plus aisément. A cause dequoy on estime les Abricots, & les Pêches qui n'ont la chair nullement humide, comme sont à Paris les Pêches de Corbeil, les moins nuisibles: car elles ne se corrompent pas aisément, ni s'engraissent facilement, & pourtant elles sont plaisantes à l'estomach. Le peuple François se fait à croire que le noyau de Pêche corrige la nuisance que la chair pourroit auoir apportée: & ne sont pas trop mal fondez, car le noyau a vne vertu incisive, deterſiue & aperitiue, par le moyen desquelles il corrige la mauuaiseſté de la chair. On peut bien aussi corriger la mauuaiseſté de la Pêche, avec quelque bon vin & puissant, soit qu'on le boyue apres auoir mangé la Pêche, ou qu'on la face tremper dedans auant que la manger. Ce qui est souuent mis en auant és festins & banquets ou on

où on allegue vn certain vers fait en rime par vn prebstre

Petre, quid est pesca? cum vino nobilis esca.

C'est à dire,

Qu'est-ce pesche ie te demande?

Avec vin fort bonne viande.

Les noyaux de pesche seruent beaucoup en temps de peste, font mourir les vers, & ouurent les obstructions. Mesme plusieurs à cause qu'ils sont amers & mal plaisans à la bouche, les confissent avec sucre pour s'en servir. Pilez avec huyle & vin-aigre, sôt bõs contre les douleurs de teste si on l'enduit, mais à quelles douleurs de teste, ni de quelle cause, Pline n'en dit mot, qui est assez coustumier de mettre en auant des remedes, sans rien specifier, & pourtant il le faut lire avec prudẽce & bon aduis. Les fleurs du Peschier laschent le ventre, soit qu'on les mange ou qu'on les mette dans le bouillon: mais ce n'est pas sans fascherie, & sans dommage de l'estomach & du foye: Ce qu'on pourra faire avec moins de dommage, faisant tremper ces fleurs ameres en eau: & les changẽat par sept fois, y en mettant à chasque fois des nouuelles, faisant apres cuire cestẽ eau avec sucre, iusques à ce qu'elle soit reduite en forme de Iulep. Car outre ce que ce Iulep lasche le ventre, il chasse aussi & fait sortir les vers: lesquels on fait mourir pilant les fueilles du

Peschier, & les appliquant sur le nombril des petits enfans. Je ne veux pas icy oublier que les pesches qui viennent en lieux aquatiques & arrousez, nuisent grandement aux dents, au cœur, aux yeux & aux poulmons: & ceux qui viennent és lieux secs au contraire, comme a fort bien remarqué Albert, à bon droit surnommé grand. Je ne veux pas aussi oublier, que qui remplira vn pot de terre de fleur de peschier, & l'ayant bien bouché, le laissera ainsi dans terre quelque iours, où les fera pourrir dans le fumier, il en tirera apres vne huyle duquel si on en oinct les poux, les temples, & l'espine deuant l'acces des fieures putrides, indubitablement il les guerira, comme l'experience l'à fait cognoistre: Ce que ie confesse franchement auoir appris d'vn certain medicin Alemand.

Du Neflier & du Sorbier, de leurs fruiçts & des vertus & remedes de l'vn & de l'autre.

Quarreau. K. I I I.

NOUS descrirons icy ensemble les fruiçts de deux arbres que nous pouuons appeler plustost sauuages que domestiques, asçauoir du Meslier & du Sorbier. Le premier est nommé des François tantost Neflier, tantost Meslier: duquel on trouue de deux fortes: l'vn qui est semé d'espines picquantes, & vient ordinairement parmy les lieux espi-
neux,

neux, parmy les bois & viues hayes, comme estant sauuage : aussi a-il son fruit fort petit, & si rude au commencement, qu'il est bien malaisé de le pouuoir manger, sinon que par la froidure del'hiuer il soit deuenu mol & comme cuit. L'autre a son fruit plus gros, de sorte qu'il vient quelquefois aussi gros qu'une pomme, sans qu'il ait point d'espines : lequel est deuenu tel pour auoir esté souuent enté & bien cultiué, tellement que de sauuage il est deuenu domestique & priué.

Le Sorbier est appelé des François tantost Sorbier tantost Cormier : duquel on trouue de quatre sortes : car les vnes sont rondes comme pommes : les autres vont en appointant comme vne poire : les troisiemes sont languettes comme vn œuf : les quatriemes sont surnommées torminales, approuuees seulement pour seruir de remede, comme il en escrit. Je viens à discourir des remedes tant du Neflier que du Sorbier. Chacun se sert du fruit du Neflier encors verd, pour arrester le flux de ventre. Mesme plusieurs se seruent des fueilles seiches & reduites en poudre, pour mettre es clisteres de ceux qui sont trauaillez de disenterie, dequoy ils sentent vn grand soulagement. C'est veritablement vne chose remarquable & fort esmerueillable, que encors que la chair des Nefles soit fort astringente (ie di

S.ij.

des verdes) neantmoins sa poudre rompt efficacement la pierre au reins: Ce qu'Antonius Musa medicin tresdocte & bien expert en la ville de Ferrare, dict auoir experimenté luy-mesme. Je scay bien qu'aucuns assurent le mesme des noyaux, entre lesquels est Braßauolus, & d'autres, qui disent l'auoir souuent esprouué par experience bien assuree, & de moy i'en ay souuent fait prendre pour la mesme fin, en faisant boire vne cueilleree en vin blanc, avec de la poudre d'Anis: Mais nous parlerons plus amplement de ces choses en nostre Chiliade des choses memorables. Quant au fruit du Sorbier, Galien dit qu'il a mesme vertu & faculté que le fruit precedent: & est d'aduis de ne manger pas beaucoup de ces fruits ni tout à la fois, comme on fait des figues & des raisins: car nous n'auons pas grand besoin de manger de ces fruits pour viande, mais seulement pour medicament. Dioscoride faisoit fendre les Sorbes auant qu'elles fussent meures, & les faisoit seicher au Soleil, pour s'en seruir comme d'un remede assure pour arrester le flux de ventre. On se sert pour mesme usage de la poudre des Sorbes seiches, pilees dās vn mortier, laquelle poudre on prend en façon de Griotte seiche, ou biē on le mesle parmy les bouillons & potages, ou parmy de la bouillie, & dans les clisteres: à quoy sert pareillement

ment la decoction des Sorbes verdes, cōme
 affeurent ceux qui l'ont experimenté. C'est
 bien aussi vne chose bien memorable, & qui
 ne merite pas qu'on l'oublie, que si quelque
 vn a esté autresfois mords d'un chiē enragé,
 & il demeure couché sous vn Sorbier, il se
 met en dāger de retomber en sa rage: car on
 tiēt que l'vmbre de cest arbre a faculté de res-
 ueiller la rage desia passée & amortie. Du-
 quel arbre, comme aussi du precedent, c'est
 assez parlé, car on ne les void encores gue-
 res plantez parmi nos iardins & vergers de
 France.

*Du Citronnier, de son fruit, & des remedes de
 tous les deux. Quarreau I X.*

EN ce recit medicinal des arbres portans
 pōmes, il nous reste a traiter de quelques
 arbres notables, & de leurs fruits. Lesquels
 encores que difficilement peuuent-ils venir
 ésiardins de nos quartiers Septentrionaux,
 si ne laisserons-nous pas pourtant d'en trait-
 ter, afin que chacū puisse recueillir profit de
 nostre œuure. Entre ceux-ci nous mettrons
 le Citronnier en premier rang, le fruit du-
 quel est appelé par fois Medien ou Persien,
 & d'autres Afsirien, cōme Theophraste ap-
 pele l'arbre Medien & Persien, & Pline le nō
 me Afsirien. Or plusieurs ont anciennemēt
 beaucoup trauaillé d'atirer & le fruit & l'ar-
 bre en leurs quartiers, à cause de l'excelen-
 S. iij.

ce des remèdes qu'on en peut tirer, mais leur labeur a esté vain, Du temps de Pline il n'y en auoit encores point en Italie : & tient on que Paladius Neapolitain fut le premier qui en apporta l'engéance de Mede en Italie, & là par vn soin & diligence merueilleuse il le nourrit: lequel a depuis esté suyui par l'industriuse posterité, mesmes qu'on en a porté en Espagne, & és parties meridionales de la Gaule. Du temps de Theophraste on ne mangeoit point ce fruit, ni aussi du temps de Plutarque, cōme l'a escrit Atheneus. Les plus notables d'entre les Parthes faisoient seulement cuire les grains parmi leurs viandes, pour auoir bonne halaine, ce que plusieurs rapportēt aussi aux feuilles, qui ne sont pas moins odorātes que le fruit mesme: par quoy on mettoit ordinairement & l'un & l'autre parmy les coffres des habillemens, cōme le monstrēt bien Homere & Neuius, quand ils donnent aux habillemēs ce beau titre, sentans le Citron. Mais d'autant que tout ceci semble estre hors de nostre propos & intention, ie suis deliberé de venir à la description des remèdes qu'on peut prendre des Citrōs. Tous ceux qui ont escrit de la medicine & de la chose rustique entre les Africains, Arabes, Grecs & Latins, disent tous d'un commun acord, que le Citron est ennemi des venins, & pourtant qu'à bon droit on s'en sert contre

contre iceux, cōme d'un Antidote & cōtrepoison. Ce qu'Atheneus confirme par le recit d'une histoire bien notable. Un certain Roy d'Egypte, dit-il, ayant condamné deux hōmes de neant & malfaiçteurs, pour punition de leurs malefices, suyuant les loix & ordonnances d'Egypte, à estre exposéz en proye aux aspics: aduint d'adventure qu'ils mangèrent par chemin, allans au supplice, vne pomme de Citrō, laquelle vne certaine tauerniere leur auoit dōnée, aduint qu'estans entrez dedans le parc ou les bestes estoient, ils furent mordus en plusieurs parties de leurs corps par ces bestes cruelles & affamees, mais ils n'en sentirent aucun dōmage: le Preuost estat estonné, cōmença à demander aux officiers à sauoir si on leur auoit point baillé quelque contrepoison & preseruatif, à quoy fut respondu qu'ils n'auoyent rien mágé sinon un Citron, qu'on leur auoit donné sans y mal penser, pendāt qu'on les menoit au supplice. Le lendemain le mesme Preuost commanda qu'on fit mäger du Citron à l'un & nō pas à l'autre, puis qu'on les ramenaist dans le parc receuoir la peine de leurs malefices. Ce que estant executé, celuy qui auoit mangé le Citron estat mordu comme l'autre n'en receut aucun domage, mais celuy qui n'en auoit point mágé ayant esté mordu, deuint incōtinent tout violet, & mourut sur le chāp. Estat

depuis expérimenté par plusieurs, & approuvé, on a en fin trouué vray & a esté recogneu que le Citrô est vn remede excellent & bien soudain contre tous venins, quelque mortels qu'ils soyent, & qu'estant pris par la bouche il resiste à toutes morsures venimeuses, iusques à tant qu'il soit cuit en l'estomach. Si quelqueun tient ce recit pour vne fable, & n'y veut adiouster foy, qu'il regarde ce q̃ Theopompus de Chio, autheur bien veritable & fidelle, dit de Clearchus d'Heraclee tyran de Ponte, lequel ayât fait mourir plusieurs par poison, estoit en volonté d'en faire encores mourir dauantage, & n'eust esté que le peuple se seruit du Citron pour se cōtregarder, ayant esté aduerti de sa vertu & faculté: ce qu'aucuns attribuent aussi à la Rue, comme nous auons dit au recit & discours de ses remedes. Les Citrons donc resistent vertueusement aux venins: & mesmement leur semé ce beuë en bon vin. Leur suc fera le mesme, car il fait sortir la poison par embas. Il ne faut pas aussi oublier que l'escorce du Citrô corrige la puanteur de l'haleine. Surquoy il ne sera pas hors de propos de mettre en auant le tesmoignage de Virgile, comme ie l'ay tourné.

*Mede produit Citron qui a ius aigre & lent
Citron heureux, propre medecament
Pour s'en aider, si par cas d'adventure*

Poison

*Autre re
cit bien no
table.*

*Poison au pot mettoit maratre dure
Ou nuisante herbe, ou parole enchantee
Par ceste pomme elle sera dontee*

Et vn peu apres il adioust.

*Les Mediens leur haleine en fomentent
Leur bouche aussi quand puantement sentent;
Aux bons vieillards qui respirent à peine.*

Si on mâge les Citrons tous crus, ils sont de difficile digestion, & s'y engendre vn suc gros, & espais, parquoy les mediciens trouuent meilleur de les manger confits au miel ou au sucre: car par ce moyen ils eschauffent & fortifient l'estomach: A quoy ne regardent pas ceux de nostre aage, estans par trop addonnez à leur gorge & à leur plaisir, car ils les donnent à manger tous crus en leurs festins & banquets, ce qu'ils font assez imprudemment. Quoy que soit nous auons cogneu que le Citron sert de fort bon remede contre l'humeur melancholique & contre les maladies longues qui en prouiennēt. Son suc reprime l'humeur bilieux, & chasse toute contagion de peste: à cause dequoy les modernes mediciens vsent contre les fieures pestilenciales, du sirop composé de ius de Citrō, avec heureux succés. La semence profite merueilleusement contre la picqueure des Scorpions, soit qu'on la boyue, ou qu'on l'applique dessus. Si quelcun fait cuire vn Citron tout entier dans du bouillon, ou dans

quelque autre liqueur, & ayant pressé le dedâs, il boit le suc, il aura l'aleine fort souëfue & plaisante. Si aussi on fait cuire le mesme tout entier, dans de l'eau rose & du sucre, iusques à ce qu'il soit tout creué & conuerti en suc. Celuy sera garenti de tout venin & contagion qui prendra tous les matins, vne ou deux petites cuilleres de ce suc, ou decoctiõ ou si tu l'aimes mieux appeler electuaire : ce qui a esté experimenté & approuué par moy & par mes amis singuliers, par plusieurs fois en temps de peste. Toutesfois pource que à Paris & en plusieurs autres villes les Citrõs se recourent difficilement, & s'y en trouue bien peu, il ne sera pas mal fait de prèdre des limons au lieu de citrõs, & la faute n'en sera pas fort notable : ie di ces limons qu'on crie par les rues sous le nom de citrons,

*Des Orangers & Limonniers, & de leurs
fruiëts, & des remedes & secours qu'on
en peut prendre. Quarreau X.*

CES deux sortes de fruiëts, & les arbres qui les portent se plaisent si peu en ces quartiers de la Gaule septentrionale, que quoy qu'on les y mignarde & cultiue avec grand soin & diligẽce, si ne s'y peuuët-ils ap priuoiser, encore qu'on leur cherche les lieux les plus doux & plus à l'abri, & qu'on y face tout son possible pour les nourrir, tant a de
vertu

vertu l'amour de la patrie & du lieu de la natiuité. Mais laiffans la longueur de ces prefaces, venons au faict, & enfermons ces deux fortes de fruits, cōme dans vn mefme coffret, c'est à dire traitons les tous deux enſemble. Les Oranges ont pris leur nom, & à bon droit, de ce qu'ils ont vne couleur luyſante comme fin oſ: & de là auſſi pluſieurs eſtiment, que Vergile a pris occaſion de les nommer Pōmes d'or: ce que aucuns aimēt mieux entendre des Coings, comme nous l'auons remarqué en traitāt leur hiſtoire. Quant aux limons, on en met de trois fortes, leſquelles nous pourrōs recognoiſtre par les vers fort elegans de Iouinian Pontanus en ſon iardin des Heſperides: voici donc comme il diuiſe les Limons.

*L'un a ſon fruit petit, & ſon ſuc fort faſcheux,
L'autr' avec fruit plus gros iette auſſi plus de ius:
Et tous les deux eſtāns longuets en leur figure,
Le tiers iette ſon fruit fort gros de ſa nature
Et de figure ouale: reſſemblant au Citron
En ſes replis & boſſes: mais n'eſt nullement bon
Augouſt.*

Ces choſes ainſi diſpoſces ie vien au diſcours & recit des remedes & facultez de l'vn & de l'autre. On trouue de trois fortes d'Oranges, aſcauoir des douces, des aigres, & des moyēnes qu'o dit cōmunēmēt aigre douces les douces ſont chaudes en toutes leurs par-

ties : mais le suc des autres deux rafreschit, plus ou moins scôlô que l'aigreur est plus grâde ou moindre, ce qu'on pourra cognoistre au goust:parquoy on fait fort bien de dônner le ius des aigres à ceux qui ont la fieure, pour leur estancher la soif. L'escorce de toutes les sortes d'Oranges, est fort chaude & ardente, ce qui se peut bien cognoistre au goust, car il est acré & amer:& de là vient que le suc qui sort de l'escorce quand on la presse contre la flamme de la chandelle, reçoit incontînêt le feu, & passe soudain à trauers le verre, & le vin en reçoit le goust, encores qu'on le iette de bien loin, à cause de la subtilité de sa substance. Les Limôs sont plus aigres beaucoup que ne sont pas les Citrons ni point d'oranges:parquoy leur suc est aussi plus froid & plus sec:duquel on fait vn syrop fort propre pour amortir l'ardeur de l'humeur bilieux: pareillement fort bon aux fieures pestilentiales, & à celles qui sont contagieuses. Mais il ne faut pas oublier ceci, assauoir que

*Le Limon mis au feu, & cuit tout à son aise,
Perdant force & vigueur se conuertit en eau:
Fort propre à nettoyer le visage & la peau
De la pucelle, afin que tant mieux elle plaise.*

Auiourd'huy on tire dans le Bain marie (qu'on appelle) avec alâbics de verre, de l'eau du suc des Limons, laquelle outre ce que les femmes s'en seruent fort, pour se faire belles,

& pour blâchir & derider la peau de leur visage, elle efface toutes tâches, en quelque partie du corps qu'elles soyent, tous varous & autres macules, encorés qu'elles seroyent causees de ladrerie. Laquelle aussi meslee parmi les syrops propres, sert de remede aux fieures aiguës & contagieuses: ce que nous auons heureusement experimenté souuent. Pour faire plaisir aux ieunes filles & ieunes femmes, qui prennent si grand plaisir de se faire blanches & belles, & en sont si soigneuses, ie ne m'espargneray, ni ne refuseray point de leur enseigner ici vne sorte de fard fort exquis, & digne de quelque Roine que ce soit. Il faut prendre vn Limon de bonne grosseur, & l'ouurer par dessus, de sorte qu'on puisse oster de la chair & de la mouëlle de dedans, la grosseur d'vne petite noix, puis faut remplir la cavité de sucre rosat, ou de sucre candi, & de quelques fueilles d'or, & remettre la couuerture dessus: puis le faut mettre sur les cédres chaudes, & pendât qu'il bouist mesler bien le tout puis le retirer du feu. Le moyé d'en vser, c'est de tréper vn linge dans ceste mixtion, & s'en lauer tout doucement la face & tu verras vne belle face. T'estoye sur le point de faire fin, lors qu'il m'est souueni bien à propos, que si on fait tréper des perles toutes entieres dans du suc de Limôs, passé & coulé deux ou trois fois, & qu'on les mette apres au Soleil, on

trouuera qu'en cinq ou six iours elles seront tellement fondues, qu'elles seront reduites à la consistance du miel, & de ceste matiere tu en pourras apres former ce qu'il te plaira, & en peu de temps deuenir riche : dequoy est authcur Ierosme Cardan, auquel nous sommes beaucoup tenus, voire si tout ce qu'il dit est vray. Il y a encores vne autre chose admirable, que i'ay leu & remarqué en Leuinus Lemnius medicin fort docte, ascauoir que les Limons ont leur suc si aigre & de nature si corrosiue, que si tu fais tréper dedans quel que espace, vne piece d'or, tu trouueras qu'elle sera amoindrie de pois. Mais nous passons legerement ces choses, pource qu'elles sont hors de nostre propos; mais nous en discourrons quelque iour plus amplement, quand l'opportunité & occasion s'en offrira, s'il plaist à dieu nous en faire la grace.

*Du Grenadier & de son fruit, & des reme-
des qu'on peut prendre d'eux. Quarreau XI.*

LE fruit du Grenadier est au nombre des fruits que nous manions, que nous mangeons, voyons, & auõs en grand estime; mais quant à l'arbre qui les porte, nous ne scauõs que c'est, & en ce quartier de la Gaule septentrionale nous n'en auons point. Aucuns estiment que la Grenade a prins son nom de la grande multitude des grains dont elle est remplie: d'autres tiennent qu'elle est ainsi nommee,

mee, à cause du Royaume de Grenade, qui est en Espagne, où il en vient en fort grande quantité. Mais laissons, si vous le trouuez bõ toutes ces questions & controuerses aux grammariens qui n'õt gueres à faire, & qui sont assez opiniastrés, & venõs au discours des remedes qu'õ peut prẽdre des Grenades & de leurs vertus & facultez. Pline tiẽt q̃ les Grenades douces sõt inutiles à l'estomach à cause qu'elles cõflent, & nuisent aux dẽts & aux gẽciues. Mais celles qui approchèt du goust de celles ti (qu'on dit vineuses) elles arrestẽt le vẽtre p trop lasche, & si sont fort profitables à l'estomac, pourueu qu'on n'en mange gueres. Aucuns ne sont nullement d'aduis d'en dõner à ceux qui ont la fieure, car ni leur suc, ni leurs grains ne sõt nullement vtiles, parquoy elles ne sõt aucunemẽt bõnes à ceux qui sont affliges de vomissemẽs, ou qui iettẽt de l'humeur bilieux: voila ce qu'en dit Pline: avec lequel n'est pas d'accord Dioscoride, car il dit que toutes les sortes de Grenade sont de bonne nourriture, & vtiles à l'estomach, biẽ est vray qu'elles sõt de peu de nourriture: les douces cõme elles sõt tenues pour les pl^r vtiles à l'estomach, aussi y causẽt elles quelque peu de chaleur, & des inflatiõs: qui est la cause pour quoy on les defẽd à ceux qui ont la fieure: les aigres seruent grandement à l'estomach par trop chaud & brullant, & prouoquẽt l'vrine.

vray est qu'elles nuisent aux dents & aux gencives. L'escorce (qu'on appelle vulgairement Malicoriū, à cause qu'il est fort propre pour conroyer les cuirs, ou bien pource qu'il sert de cuir & couuerture à ce fruit) cuitte dans du vinaigre : y mellant vn peu de Noix de galle, raffermist les dens qui branlent. Et si on met vne Grenade toute entiere dans vn pot de terre tout neuf, puis l'ayant bien couuert, on le met dans le four, & que là on le laisse tellement rostir, qu'on la puisse mettre en poudre, elle seruira pour arrester le ventre, & pour guerir les trenchees si on la boit avec du vin. Ce qu'on pourra aussi faire par le moyen d'vne Grenade toute entiere cuitte, en beuant la decoction ou bien la clisterisant. Les fleurs (qu'on appelle balauſtia) arrestent les mois des femmes si on les boit, & guerissent les vlceres de la bouche si on s'en laue: dauantage elles donnent grand secours aux glandes qui sont à la racine de la langue enſlees, à la luette, aux crachemens de sang, & aux desuoyemens de l'estomach & du ventre: & corrige les vlceres des parties seruans à la generation, & de quelque autre partie du corps que ce soit. La poudre de ces fleurs pilees, a deliuré de mort plusieurs personnes affligees de disenterie. Les grains de Grenades aigres estans seichez, & mis en poudre & la poudre mise parmi les viandes, ou cuits
feu-

feulement dans les potages, reserrent le ventre par trop lasche, arrestent les vomissemēts & si il est bon que ceux qui crachent le sang en prennent : outre ce ils sont fort vtils au flux disenterique, & aux humiditez & sales fluxions de la matrice, que vulgairement on appelle fleurs blanches. Dioscoride enseigne que celuy qui auatera trois biē petites fleurs de grenadier, il ne sera chassieux de toute ceste annee là. On fait vn vin medicinal des ^{vr infort} grenades, dont voici la façon de le faire, cō-^{profitable} me nous l'auons desia descrit en nostre trai-^{fait de Gre} té des secrets des vins. Il faut tirer les grains ^{nades.} hors de l'escorce, lors qu'ils sont meurs, & les bien môder de toutes pelures, les mettre au pressoir & les presser tresbiē, puis on fait passer le vin par des sacs propres à cela, & le met on dans des phioles ou autres vaisseaux conuenables, iusques à ce que la lie soit rassise, & en fin on met le clair à part, lequel on garde, & pour le conseruer de corrompre, ou s'enaigrir, on met de l'huyle par dessus. Aucuns le gardent en des barraus sans y mettre point d'huyle, mais quand l'esté vient il s'enaigrir aisément. Nous enseignerons ailleurs d'autres moyens, Dieu aidant, avec les facultez & remedes de ce vin. Ce sera pour la fin, quand nous aurons monsté que l'escorce de la Grenade cōuertit le fer en acier, comme a fort biē remarqué Hierome Car-

dan, lequel neantmoins a teu le moyen comme il le faut faire, mais ailleurs où nous verrons estre conuenable nous le declarerons: car d'autant que ceci semble plustost conuenir à vn marschal, que non pas à vn medecin traitant des remedes des iardins, ie ne passeray pas plus outre, afin que chacun se mesle de son mestier. Je laisse donc les Grenades & vien à discourir des Figues. Mais comme ie suis oublieux, ie laissois vn secret souuent esprouué par moy & par mes amis. Tu me demanderas, quel est ce secret? Si tu passes vne Grenade douce toute entiere avec son escorce, apres l'auoir bien pilee, & que sur six parties de son suc tu y en mettes vne de miel, & que tu les face cuire iusques à ce qu'il soit espessi, tu auras vn remede singulier contre les inflammations de la bouche, de la luette, & du gosier, encores qu'une personne seroit sur le point d'estre suffoquee: pareillement contre les vlceres du nez, cõtre le poupe, contre la puãteur de la bouche, & à plusieurs autres maladies qui me seroyent longues à raconter, mais tu les pourras aisément penser.

Des Figueurs, de leurs fruiçts, & des remedes qu'on en peut tirer.

Quarreau XII.

On peut

ON peut bien cognoistre que le fruit du Figuiers estoit fort cogneu & commun, non seulement à nostre aage, mais aussi anciennement, par le recit qu'on fait de la dextérité d'esprit & prudence singuliere de Caton: car luy estant ennemi capital de la ville de Cartage & curieux de la seurte de sa posterité, & qui ne faisoit que crier iournallement au senat qu'il falloit raser Cartage, apporta vn iour en plein senat vne Figue primeroûge, qu'on auoit apportée de la prouince des Cartagiinois, & la monstrant aux Sénateurs (comme l'a escrit Plin) leur dit. Je vous demande depuis quand pensez vous que ceste Figue ait esté cueillie? Or chacun voyoit bien qu'elle estoit toute fresche. Il leur dit lors, sçachez qu'il n'y a que trois iours qu'elle a esté cueillie à Cartage, tant auez vous l'ennemy pres de vos murailles: & soudain apres fut entreprise la troisieme guerre contre les Cartagiinois, en laquelle la ville de Cartage fut rasée & destruite, & l'année apres Caton mourut: lequel par vn argument fondé sur vne Figue, qui est chose admirable sceut bien persuader & en fin obtenir la ruine & subuersion d'vne si triomphante, tant renommée, & opulente ville: laquelle auoit par l'espace de six vingts ans, esté parangonnée sur toutes les villes de la terre, à la ville de Rome.

Mais tout ceci ne sert de rien au recit

des remèdes des Figues, auquel ie vien maintenant, apres toutesfois vous auoir donné ce petit mot d'aduertissement, ascauoir que anciennement les Figues tant fraïches que seiches, seruoyét de pain & pour toute autre viande: de sorte que les anciës luiteurs ne se nourrissoyent d'autre viande, iusqu'à ce que Pythagoras leur enseigna de manger de la chair: on auoit aussi trouué le moyen de les garder salees, & les manger au lieu de fromage, selõ le dire de Plin. Les meilleures & pl' faines, sont celles qui ayans senti la chaleur du soleil, se sont meuries de leur propre naturel. Celles qui ont grande abõdance de laiët ou qui ont vn fruit aqueux, encor qu'elles se blët plus plaisâtes à la bouche & à l'estomac, si sont elles neâtmoins plus fascheuses & pesâtes: & à cause de ce, elles descédët plustost & laschent le ventre, cõme font les noix fraïches. Demetrius Sceptius dõne cest aduertissement, que ceux qui desirent auoir bõne voix se doyuët garder de mäger de Figues: proposât pour exẽple Egesianactis Alexãdrin, qui deuint excellët ioueur de tragedies, pour s'estre abstenu de mäger des Figues dixhuit années entieres. Cuites avec Hysope elles purgent le corps, guerissent la toux enuieillie, & corrigent les lõgues maladies des poulmõs. Avec Rue, elles sont fort vtiles cõtre la colique, & contre les trenchees, soit qu'on prêne
la deco-

la decoctiō par la bouche, ou qu'on la cliste
rise. Pilees, & appliquees, elles dissipent les
durtiez qui viennent au corps, soit qu'on les ap
plique seules, ou bien avec huyle de Lis, ou
quelque autre huyle propre & cōuenable: &
ainsi aprestees amolissent les escrouelles &
les frōcles. Cuittes en vin avec Aluine & fari
ne, & biē pestries, sont propres aux hidropi
ques, si on les enduit: & bruslees avec de la ci
re, seruēt de remede aux mules qui viennent
aux talōs. Je di encores q̄ les Figues mesleēs
avec farine de Fenugrec & vinaigre, s'appli
quēt avec profit à ceux qui ont la goutte aux
pieds, & à ceux qui sōt tōrmētez du mal des
dens, prenant leur suc tout frais avec delaine
ou coutō, & l'appliquant. Le mesme suc effa
ce les verrues, si on les en oinēt tout autour:
mesmemēt celles qu'ō surnōme Myrmecies,
pource qu'ō sēt vne petite piqueure cōme si
on estoit mordu d'une formi: les autres peu
uēt estre ostees par le moyē des fueilles de Fi
guier, si on les en touche seulement, & puis
qu'ō enterre lesdites fueilles cōme on dit: Les
figues cuites en vin, pilees & appliquees sur le
fōdemēt, guerissent les apostumes qui suruiē
nēt, les excroissances de chair (q̄ les medecins
nōmēt cōdyloma) & les creuasses d'iceluy: si
on les mäge à ieun avec des noix, du poiure,
ou des Amandes ameres, elles ouurēt les opi
lations du foye, fortifient l'estomach & le

nettoient. Eubolus medicin defendoit de mâger des Figues à gouster, pource qu'elles causent maladies, disoit il, & que la fieure s'en suit soudain, laquelle prouoque vn vomissement d'humeur bilieux: parquoy Aristophanes ayant vn iour d'Esté visité vn malade, cogneut incontinent qu'il auoit mangé des Figues à gouster: ce que ie pense deuoir estre entédu des Figues fraïsches: ou des nouuelles & qui ont encores leur lait, lesquelles font suer, & causent eschambouilleure, aussi les tient on pour fort mal saines en autône. On fait vne lexiue de cendres de Figuier, apres auoir fait brusler ses branches, laquelle tant plus est reiteree & enuieillie, tant meilleure elle est: ceste lexiue, dit Dioscoride, est fort profitable aux vlceres qui sont en danger de tomber en gangrene, mesme pour consumer les excroissances de chair: La façon d'en vser c'est de tréper vne esponge dans ceste lexiue puis l'appliquer soudain. Ceste mesme lexiue sert aux vlceres grâds & cauerneux, si on les en laue bien fort: car elle les consolide, remplit de chair, restraint, nettoye, & rassemble les leures separees, ne plus ne moins que feroit vn emplastre de ceux qu'on applique sur les playes sanglantes. Elle sert aussi pour dissoudre le sang figé en l'estomach, si on en boit vne drachme avec vn peu d'huyle. Mais ie croy qu'on prendra plaisir d'ouir Galien discourant

discourant des vertus & facultez des Figues
côme s'ensuit:encores que les Figues engen-
drēt moins de mauuais suc que pas vn des au-
tres fruiçts, non seulemēt de ceux qui ne sont
pas de garde, mais aussi de ceux qui viennent
en autōne: si ne sont elles pas exēptes de tou-
te nuisance: & bien que tous les fruits d'autō
ne soyent de bien petite nourriture, si n'en
est il pas ainsi des Figues: bien est vray que
elles n'engēdrēt pas vne chair ferme ni serree
comme fait le pain ou la chair de porc, mais
aucunemēt enfle & lasche, telle que l'égēdrēt
les febues. Au reste elles ont vne vertu de
tersiue, d'où viēt que les gravelleux fōt force
grauier apres en auoir mangé. Les Figues sei-
ches ont plusieurs vtilitez, mais si quelcun en
māge quātité il en receura dōmage: car elles
n'engendrent pas bō sang, aussi voit on que
elles produisēt grāde quātité de poux à ceux
qui en vsēt. Ce grād antidote tāt renōmé de
Mithridates, cōtre les venins & cōtagion de
peste, est cōposé de Figues, Rue, & de Noix,
nous l'auōs desia dit ci deuāt. Je dis que si on
fait cuire des tendres bourgeons de Figuier
parmi la chair de bœuf, cela fera qu'elle fera
plustost cuitte, qui fera vne grande espargne
de bois, de quoy Plīne est autheur: ce qu'ō at-
tribue au Figuier sauuage. Columela dit que
si on fait cuire des figues sauuages, & qu'on
baille à māger aux poules ou autres oyseaux

parmi leur mangeaille, on les degoustera de manger plus de Figues, desquelles autremēt ils sont fort friāds. Outre ce Africain, qui est l'un des agriculteurs Grecs, fort renommé, enseigne que si on fait vn bien peu chauffer le laiēt, puis qu'on le remue avec vn baston de figuier, il se prendra & caillera incontīnēt. Ce qu'on pourra bien faire aussi, si on met dans le laiēt le ius qui sort du Figuier quand on fait vne quuerture à l'escorce: ou bien le laiēt que le Figuier domestique iette, mais non pas celuy du Figuier sauuaige. Il m'estoit quasi eschapé de la memoire, de dire, que les Figues bruslees corrigent les mules des talōs & la tigne: si on les mesle avec Cerat. Et le laiēt du Figuier, enduit sur la picqueure des scorpions, y est grandemēt salutaire. L'estois sur la fin quand deux choses merueilleuses, (œures toute fois de nature) me sōt venues en memoire, lesquelles ne m'ōt pas sēblé dignes d'estre oubliees ni cachees, encores qu'ellēs semblēt n'estre gueres conuenables au recit des remedes qu'on peut prendre des Figues. La premiere est que les taureaux quelques farouches qu'ils soyent, serōnt apriuoīsez & rédus dociles si on les attache cōtre vn Figuier de sorte qu'ils ne bougerōt point: ce que Pline me sēble auoir attribué au Figuier sauuaige, si on le met autour du col. L'autre est, q la chair des volailles & autres animaux morts se rend

Deux choses remarquables du Figuier.

se rend en peu de tēps fort tendre & friable, si on la pend seulemēt à vn figuier: Plutarque rend raison de ceci en son traicté des conuiues, disant: Aduint qu'entre les viandes d'Aristion, le cuisinier seruit vn Coq qui auoit esté offert à Hercules, tout freschement tué, & neantmoins fort tendre & friable, ce que Aristion attribuoit au figuier, affirmant que la volaille morte, quelque dure qu'elle soit, deuendra tendre si on la pend à vn figuier: Ce qui n'est pas sans raison, car le figuier iette vne certaine vapeur penetrante & digestiue, par laquelle la chair est cōme cuite & attēdrie: il aduiēdra le mesme, afin que ie die cela en passant, si on les couure ou enseuelit du tout en vn mōceau de bled. Or c'est assez parlé du figuier. Mais ie suis fort oublieux, peu s'en a fallu que ie n'aye oublié ce que Plutarque n'a pas dissimulé ni caché. C'est que les cheuaux & asnes tumbēt en cœur failli, si on leur faict porter des figues ou figuiers sur le dos. Mais le remede est encores plus esmerueillable, par lequel on secourt & à ces bestes, & aux hommes: Si les cheuaux sont presque morts, & les hōmes quasi trespassez pour estre tūbez en cœur failli, ils serōt soudain reuenus à eux, si on leur presente du pain, pour peu qu'ils en mangent, ils reprendront leur vigueur & poursuuyront gayemēt leur chemin entrepris.

*De l'Oliuier de son fruit, & des remedes
qu'on peut tirer de l'un & de l'autre.*

Quarreau XIII.

LE vulgaire François appelle l'arbre qui porte les Oliues, Oliuier, lequel comme chacun scait, a souuent serui pour coronner les cheualiers en leurs triumphes & magnificèces, avec grãd applaudissemēt & resiouissance. Les rameaux de cest arbre portez, estoient marques & enseignes de paix, d'où est venu que les poëtes luy ont donné à bon droit le titre de pacifique. Mais le mal est, que nous n'auons pas cest heur, nous di-ie, Septentrionaux d'auoir c'est arbre vrayement doré, en nos iardins & champs, & encores moins de recueillir son fruit en abondance: mais quoy? Dieu par vn conseil admirable regit ainsi ces choses, ne donāt pas tout à tous mais seulement ce qu'il cognoit estre bõ & expedient. Pour cela donc ie ne laisseray pas de mōstrer ce qui est necessaire de sauoir de cest arbre, de son fruit & de l'huyle qu'on en tire, que i'ay aprins des medecins, tant anciens que modernes, & que i'ay cogneu par l'experience mienne & de plusieurs autres, ce que ie feray franchement & fidelement, cōme ie fay tout le reste. Sans m'amuser donc d'auantage aux paroles ie vien au fait. Les fucilles de l'Oliuier machees, & mises sur les vlcères y apportent grand secours. Leur decoction
avec

avec miel, arreste le flux de sang, soit qu'on la boyue ou qu'on l'applique: elle oste aussi les croustes & esquarres, & efface les cicatrices. Le suc qu'on tire desdites fueilles aide merueilleusement aux vlceres enflamez cōme charbons, qui viennent pres des yeux aux pustules, à la cheute de la prunelle, & à la chassieufeté & larmoyement enuieilli. La façon de le tirer c'est de mettre par dessus les fueilles apres qu'on les a pilees, du vin blanc avec de l'eau de pluye. Et le marc, on le pourra faire seicher au Soleil qui voudra, & puis le ferrer pour s'en seruir au besoin. Appliqué sur la matrice avec laine, en forme de Pessaire ou autrement, arreste les mois par trop abondans: & si est fort vtile aux Erisipeles & feu saint Antoine, & aux vlceres qui rampent & s'eslargissent: pareillement aux oreilles, soit qu'elles soyent vlcerées ou boueuses. L'humidité qui sort du bois d'Oliuier verd, lors qu'on le brûle, guerit les dartres & & feus volages, les surfures, le mal saint main, & la tigne, ou rache. L'escorce prise de sa racine, la plus deliée qu'on pourra, sert de remede merueilleux à ceux qui crachent le sang, & qui crachent pourri, s'ils la machent souvent ou la lichen avec miel rosat. Et la cendre de la mesme escorce, meslée avec graisse, fait refoudre les tumeurs, & oste le vice des fistules.

Voila ce que i'auoys à dire de l'arbre, selon que iel'ay prins de Dioscoride, de Pline & de Galien:il faut maintenant dire quelque chose du fruiet.L'oliue qui est encores iaune & fresche,est vtile à l'estomach, mais difficile au ventre: mais quand elle est noire & paruenue à maturité, elle se corrompt aisément & pourtāt elle est fort nuisible à l'estomach. La fresche mēgee toute seule,auant qu'on la mettē confire,ā vn fort bon vsage,car elle aide à ceux qui font du sable parmi l'vrine, à ceux qui ont les dents cassēes, & à ceux qui ont les membres retirez. La saumure où les oliues auront trempē,resserre les gensiuēs si on s'en laue, & rafermit les dents branlantes&prestes à cheoir:Le grumeau qui se trouue dans le noyau des Oliues, meslē avec graisse ou suif & farine,est propre pour oindre les ongles raboteuses. Quant à la liqueur qui sort des Oliues,qu'on appelle communemēt huyle simplement ou huyle d'Oliue, qui n'a son pareil entre toutes les liqueurs que nature ā produites,après le vin, voicy ce que i'en veux dire pour le present. C'est vne chose cōgneue & confessee de tous ceux qui ont ēcrit de la medicine & de l'agriculture, soit Cartaginois, Arabes, Grecs & Latins, que l'huyle d'oliue frez, & qui ne soit point gastē ni corrompu, sert grandement pour restaurer & pour cōseruer les forces, si on s'en oinct

oint & exterieurement : ce qui est cōfirmé par l'exemple bien remarquable de Polion Romule: lequel estant desia aagé de cent ans ou plus, comme dit Pline, aduint que D. Auguste qui estoit son hôte, luy demanda le moyen cōme il s'estoit conserué en vne telle vigueur de corps & d'esprit si longuement. Sa responce fut: par vin mielé au dedans & huyle au dehors : ce qu'il pouuoit auoir aprins de Democrite, comme Diophanes le dit en ses Georgiques Grecques: Car ce Democrite estant enquis, comme les hommes pourroyent viure sans que leur fanté fust offensée, & conseruer la vigueur du corps & de l'esprit longuemēt en son entier, Il respond; s'ils fortifient le dehors avec huyle & le dedans avec miel. L'huyle d'Oliue donc sert pour conseruer les forces du corps, & pour se garder des grandes froidures : ce que cognoissant fort bien ce magnanime & nompereil Annibal, qu'on appelloit autresfois l'effroy des Romains, ayant a passer les Alpes commanda à tous ses soldats d'oindre leurs corps avec huyle, pour se preseruer de grandes froidures & geles: scachant bien que l'huyle seul est propre pour guarétir les hommes d'estre offencez des glaces, avec ce qu'il les rend plus habiles & dispos. Si on le prend par la bouche pourueu qu'il soit frais, il amortit le ventre par trop dur, & si amortit aucu-

nement la violence des venins, voire les fait fortir par vomissemens. Si on le boit tout chaud avec suc de Rue, il appaisera soudain les trâchees: & si est fort bõ clisterizé à ceux qui ont l'Iliaque passion, & qui sont subiects à la colique. Il nettoye fort bien la face: mis dans les narines des bœufs, iusqu'à ce qu'ils ronflent, appaise l'inflatiõ. Je laisse les autres remedes qu'on peut tirer de l'huyle d'Oliue, de peur que ie ne soye trop lōg, & pour pou uoir dire quelque chose de sa lie: laquelle estoit fort en vsage entre les rustiques & vilageois. Or la lie n'est autre chose que la crasse des oliues qu'on a pressé, & la fõdraille de l'huyle: laquelle M. Caton dit auoir des vertus singulieres sur toute autre chose: desquel les vertus nous en remarquerõs icy quelques vnes, nous arrestans principalement à celles qui peuuent seruir aux hõmes ou aux bestes. Les bœufs qui sont degoustez, & ont perdu leur appetit, le recouureront fort bien si on arrouse leur mangeaille de la lie d'huyle, car gueris par ce moyen ils seront dispos, & s'il y a quelque maladie elle fera chassée. Si on oinct les bestes à quatre pieds & les bœbis apres estre tondues, avec de la lie meslee avec eau de la decoction de Lupins, de sorte qu'elles sient deux ou trois iours: apres lesquels on les laue d'eau salee, elles n'ont garde de deuenir galeuses, & si les Tiquets ne

les tourmenteront point. Mais nous laisserons ces choses rustiques sans passer plus avant, esperant d'en discourir plus amplement ailleurs. Il reste seulement trois choses, lesquelles sont vrayemēt plustost domestiques & du mesnage, que non pas de la medicine. La premiere est, que si on tient les habillemens dās vn coffre ou garderobe, le fons de laquelle soit engraiscé de lie d'huyle & bien seiché apres, les Artres & Tignes n'y toucheront aucunement ni y feront aucun dommage. La seconde est, que si on frotte le meuble de bois avec lie d'huile, on le rēdra fort beau & luisant, tellemēt que ce sera vn plaisir que de le voir. La troisiēme, que si on fait tremper le bois ou qu'on l'oigne seulement avec lie, la fumiere ne le gastera point. Voila en somme ce que i'auois à dire de l'Oliuier & des autres arbres portās fruiēt à escorce deliee, ce sera donc assez, pour faie place au discours des arbres portans noix.

L E. H V I C T I E S M E S I L L O N
 du Iardin medicinal, cōt enant le discours
 des arbres portans noix & de leurs fruiēts;
 Desparti en cinq Quarreaux.

*Du Noyer, de son fruiēt, & des remedes qu'on
 peut prendre des deux.*

Quarreau I.



Es anciens gramariens appelloient le Noyer Iuglans, comme qui diroit glád de Iupiter, mangeant seulement quelques lettres: même plusieurs disent qu'il print ce nom bien peu de temps apres la creation du monde: car les hommes ayant vescu quelque temps de gland, ayans en fin trouué l'arbre qui portoit des noix, & les ayans goustees & trouuees de si bon goust, les nommerent incontinent gland de Iupiter, à cause de leur excellence & bonté. Les gramariens qui sont venus apres l'ont appelé noix, comme s'ils vouloyent dire nuisante: car la forte odeur & penetrante de ses fueilles offense le cerueau, & la mauuaistié de son vmbre nuit grandement à ceux qui dorment sous cest arbre. Il n'y a point d'arbre apres le Cérifier qui vienne plus aisément ni mieux que le Noyer. Ce qu'il tesmoigne de luy-mesme en Ouide, se plaignant en ceste sorte.

*Je prouien de moy-mesme en terroir mesprisé:
Pres le lieu où ie germe, est le chemin froissé.*

Les François en leur langue vulgaire l'appellent Noyer: l'vmbre duquel, comme Plin le tesmoigne, est vrayemēt marastre non pas nourrice, de tout ce que s'y rencôtre: car par sa mauuaistié elle empoisonne & gaste tout ce qu'elle touche: parquoy és champs & iardins où il vient on le met tousiours au bord

bord:comme le mesme Noyer en fait sa cō-
plainte en Ouide, en ce sens.

*Pour l'estime qu'on a que ie suis dommagea-
ble,*

On me met tout au bord de terre labourable.

Mais sans nous arrester d'auantage à l'ar-
bre, venons (si bon vous semble) au fruit: le-
quel cōme chascū scait, est couuert de double
couverture. La premiere est verte & tendre
cōme herbe, & l'autre ferme cōme bois, ioin-
te avec vne autre petite peau delice par de-
dans, qui contient le noyau, de sorte qu'il
est enueloppé d'autant de peaux qu'est l'en-
fant dans le ventre de la mere, comme Plin
l'a subtilemēt escrit: Et cela a esté cause qu'o
a estimé les Noix saintes & sacrees en tēps
de nopces. Elles ont esté autresfois transpor-
tees de Perse par les Roys, d'où est venu
qu'on les a surnommees Royales & Per-
siennes. Heraclides Tarentin demandoit, a
scauoir s'il falloit mager les Noix à l'ētree de
table ou à l'issue: Il est bien certain que si on
les mange à l'issue, comme est la coustume,
mesmement estans seichees, elles feront ve-
nir l'appetit de boire, & par le moyē du boi-
re elles se mesleront parmy la viande, de sor-
te que l'estomach estant desia tēdu & plein,
& par leur pesanteur chassant la viande, elles
causeront des ventositēz & inflations, & cor-
rompront la viande: car à cause de la substance

huyleuse qu'elles ont, elles nagent sur l'estomach, & sont mal-aisées à cuire, & de là viennent les cruditez, & les euacuations extraordinaires du ventre. Diphilus Siphnius dit que par cela elles engendrent douleurs de teste, & qu'elles nagent par dessus le reste de la viande avec lequel s'accorde Diocles, adioustant que la noix par sa graisse refait ceux qui sont maigres & clancez, pourueu que leur estomach la puisse cuire. Quoy que soit, quand elles sont fresches, & qu'on en mange sobremét, elles sont bien plaisantes à l'estomach, mais quand elles sont seiches, elles sont nuisibles, bilieuses, mal-aisées à cuire, & causent douleurs de teste, si on en mange quantité. Elles sont aussi fort cōtraires à ceux qui ont la toux: mais fort propres à ceux qui vomissent fort souuent à ieun. Rosties, elles fâchent moins la personne: & c'estoit ainsi que Mnesitheus Athenien disoit qu'il les faisoit manger, la substâce huyleuse estant cōsumee par le feu & par la chaleur. Pilees avec vn Oignón du sel, & du miel, elles seruent de remede cōtre la morsure des chiens, des hommes & des animaux venimeux. Et avec vn peu de miel & de Rue, elles aident fort aux douleurs de mammelles, aux inflations, & aux desflouëures, si on les y applique. Bruslees avec leur escorce, & appliquees sur le nombril, elles appaisent fort bien les tranches de ventre, celles

Celles qui sont fort enuieillies, remediēt proprement aux gangrenes; aux charbons, & aux meurtrisseures & ternisseures. La cendre des noyaux bruslez, incorporee en vin, & appliquée par dessous aux femmes, arreste la trop grande abondance des mois. Les mesmes noyaux maschez, & enduits tout soudain qu'ils sortēt de la bouche, font reuenir le poil aux places peelees qui sont en la teste, mais il le faut reiterer souuēt. Aux espreintes pour faire sortir le phlegme; on les mange avec grand profit. Je di encores, que les marques de ceux qui ont esté battus ou frappez; & les meurtrisseures qui restēt apres auoir eu du fouēt, s'effaceront fort biē si on les oinct du suc de l'escorce des noix fresches. Que si on fait cuire ce suc avec vn peu de miel, ce sera vn fort bō remede contre les maladies de la bouche, cōme aussi contre les grandes inflammations des glandes qui sont à la racine de la langue, & contre les dangers d'estre suffoqué & estouffé. La lexiue faicte de ses escorces, sert pour noircir les cheueux & pour les brunir. Mais il ne me semble point mauuais de rafraeschir la memoire & parler deteches plus à plein; de cest excellēt cōtrepoison de Mithridates, composé de quatre choses, dōt auons fait mention au discours de la Rue. Cneus Pōpee (dit Pline) ayāt vaincu Mithridates, trouua dās sō cabinet, en vn liure à part;

escriit de sa propre main, la compositiō d'un preseruatif de deux noix, autant de figues, vint fueilles de Rue, pilé le tout ensemble avec vn bien peu de sel: promettant que quiconque mangeroit tous les matins à ieun ceste composition, il ne luy faloit craindre aucun venin de tout ce iour là. Les vers de Q. Serenus poëte & medecin fort ancien, s'accordent fort bien au dire de Pline, desquels voicy la teneur.

On tient que l'antidote dont Mithridate v-
soit,

Fust trouué par Pompee, lors qu'il s'en retournoit
Victorieux & fier: mais voyant ce meslange
Simples de petit pris, & non de pays estrange,
Il ne fit que s'en rire: car il ne voyoit là
Que vint fueilles de Rue, de sel vn petit grain,
Deux noix, & puis trois figues, rien autre que
cela:

Puis il le faloit boire à ieun avec du vin
Pour ne rien apres craindre, ne poison ne venin.

Ce mesme Antidote ou preseruatif, sert merueilleusement cōtre la contagion de peste, cōme pourroyent bien tesmoigner plusieurs personnes cogneues & incogneues à moy, qui se sont garenties au milieu des plus grâdes pestes & les plus mortelles qu'on scauroit penser, par le moyé de ce seul preseruatif, duquel ils vsoyēt par mon aduis & cōseil. Je ne veux pas oublier en ce lieu, que les noix
encores

encores verdes , & cuillies enuiron la fin de Iuin, auant que l'escorce deuienne dure, confites avec sucre ou miel, & gardees, cōme nous dirons tantost, sont fort vtilēs à l'estomach, & plaïsantes à la bouche. Voire on fait vne certaine eau de ces noix là, laquelle est fort propre à plusieurs choses, & mesmemēt à guerir les fieures tierces. Gargile Martial en son traitté des Iardinages, que Seruius Virgilianus luy attribue, affirme auoir experimenté, qu'on aura les noix toutes fresches vn an apres auoir esté cucillies, si apres auoir osté leur pelure, on les plonge dans du miel: & dit dauantage, que ce miel là acquerra vne telle vertu & faculté, que le breuage qu'on en fera. seruira de remede aux maladies de la gorge & de la Canne du poulmō. Mais ie ne veux pas icy oublier ceste confiture tant excelente des Noix, laquelle tu pourras parfaire en vn iour en ceste forte. Il te faut prédre de noix tendres & verdes, auât que l'escorce s'endurcisse, & oster la pelure verde de dessus, iusqu'au blanc, avec vn couteau, & quant & quât afin qu'elles ne se noircissent, les faut ietter dans de l'eau clere, & les faire cuire iusqu'à ce qu'elles deuiennent tendres & molles, puis les percer a trauers avec canelle & Gyroflēs: & en fin les faut mettre dans le sucre reduit en sirop cuit parfaitement, & leur faire faire trois ou quatre bouillons ensem-

ble : & afin de leur laisser prendre .le sucre, les y faut laisser tremper troys ou quatre iours: Et d'autant que le sucre se rend liquide & creus, à cause de l'humeur duquel les noix estoient abruuees, il faut faire recuire le mesme sucre a part, & reiterer cela par deux ou troys fois: Voyla ce que dit Pierre Pena medicin en Angleterre, hōme docte & bien disant. Au reste ie ne veux pas qu'on me puisse dire, que i'aye oublié ni caché deux choses que mes amis mesmes m'ont rapportee, & qui ont esté esproouees par eux par plusieurs experiences, & que les anciens ont bien remarqué en leurs liures & escrits. La premiere est, que si on prend vne bōne noix vieille, qu'on la pille biē, & qu'on l'applique sur la morsure d'un chien, qu'on soupçonne de rage, le mesme iour qu'on a esté mordu, & qu'on la laisse là quelques heures, puis le ayant ostee on la donne à manger à vne poule ou coq: si il la mange & qu'il ne meure point, c'est signe que le chien n'estoit pas enragé: mais si elle meurt, c'est vn tesmoignage que le chiē estoit enragé. Parquoy dās troys iours pour le plus tard, il faudra faire diligence de pēser le malade, & y employer les remedes les plus propres qu'on pourra trouver, autrement il est à craindre qu'il ne tumbē en la crainte de l'eau, laquelle est apres incurable. La seconde chose que i'auoye à te cō-

muni-

muniquer, c'est : Vne noix rācie de vieillesse est de grande efficace à effacer les meurtrisseures & ternisseures : & pour ce faire, il la faut peu à peu brusler à la flāme, ou avec vn fer chaud, pour en faire sortir l'huyle, lequel sera fort propre à cela. Que peux-tu souhaiter d'auantage? Or pendant que ie m'employois à escrire ces choses de la noix, & que ie relisoys ce que i'en auoys desia escrit, comme ie suis accoustumé à y adiouster quelque chose, ie suis d'aduenture tombé en la lecture de l'Antidote de Mithridates, dont i'ay cy deuant fait mention: lequel a esté corrigé par Rasi, médecin Arabe, & enuoyé à Almanzor Roy des Sarrasins. Voicy doncques la vraye description. Pren de noix vieilles bien mondées de leurs peleurs tant de dehors que dedans, vne portion: de sel & de fucilles de Rue; de chascun la sixiesme partie d'une portion: de figues trempées en vin-aigre ou bien en vin, autant qu'il en faudra pour meller tout le reste: & tout bien pilé & bien meslé, faites vostre preseruatif. La façon d'en vser, c'est d'en prendre de la grosseur d'une noisette commune, beuant apres vn bien peu de vin blanc, si bon vous semble. On ne scauroit exprimer combien est grande la vertu de ce contrepoison, non pas seulement contre les venins, mais aussi contre toutes infectiōs & cōtagiōs de peste: Des

quelles nous vueille preseruer celuy qui est sauueur de tous.

De l'Amandier, de son fruit, & des remede: qu'on peut tirer de l'un & de l'autre.

Quarreau I I.

L'A M A N D I E R est tellement cogneu de chacun, qu'il n'y a rien mieux cogneu. On tient que sa nature est telle, qu'il est plus fertile en sa vieillesse qu'en sa ieunesse, & moins fertile tout seul qu'en cōpagnie. Quāt à son fruit qu'on appelle Amandes, elles sont couuertes de double couuerture ainsi que les noix, comme chacun scait: la premiere est y-ne escorce verde, après laquelle vient l'autre qui est dure comme bois, remplie de petites fentes & trous, dans laquelle est contenu le noyau ferme & solide, lequel les vnes ont doux & de bon goust, les autres l'ont amer & fascheux au goust: mais propre a chasser l'yurognerie, comme dit Plutarque, duquel voici les paroles. Il y auoit vn certain medecin chez Drusus fils de Tibere Cæsar, lequel mangeoit d'ordinaire des Amandes ameres, puis il assailloit chacun à boire, & n'y en auoit pas vn qui fut plus vaillāt au combat du vin que luy: en fin on s'apperceut que auant que boire il mangeoit cinq ou six Amandes ameres, pour se garder d'estre surpris de vin. Or aduint que ses compagnons beueurs le garderent de manger ces amandes, telle-
ment

ment qu'il se trouua le plus foible à boire, & ne pouuoit resister tāt soit peu en ce cōbat. Atheneus est d'accord avec Plutar que en ce ci, & en attribue la cause à l'amertume, laquelle desseiche & consume l'humidité, empeschant que les veines ne se remplissent, du remplissage & troublement desquelles ils estiment que vient l'yurognerie, à cause des vapeurs chaudes, & fumees obscures qui empeschent le cerueau, siege de l'entendement & raison. Nous auōs de ceci vn argumēt manifeste, en ce que le renard ayant mágé quelque chose d'amer & par consequent d'Amādes ameres, il mourra soudain (comme dit le mesme Plutarque) s'il ne trouue de l'eau pour boire incontinent, l'humidité interieure estant consumée par ceste amertume. Ce que Dioscoride & Pline ont aussi attesté par leurs escrits. Mnesitheus Athenien au traicté qu'il a fait des aliments, defend de manger toutes sortes de noix, si premierement elles n'ont senti le feu, hormis d'amādes fresches: mais quelquefois il commande de les rostir, d'autrefois de les cuire parmi l'autre viande, afin que le feu cōsume, & emboyue leur graisse & substance huyleuse. Les Amandes beuës en eau, seruent de remede aux maladies des poulmons & des reins: & prises en façon de loch avec tormentine, seruent de remede aux graueleux: & pilees en vin-cuit, aidēt à ceux

qui vrinent avec difficulté. La gomme qui sort de l'arbre a fort grande vertu d'incrasser & espessir les matieres, & aident fort à ceux qui crachent le sang. D'auantage elle sert à effacer entierement les grateles & feux volages, qui viennent sur la peau, si on les en oint avec du vinaigre. Les Amandes ameres peelees, pilees, & liees dans vn linge, & mises dans les lieux secrets des femmes, purgent & nettoient la matrice de tous humeurs corrompus. Si on les pile dans du vin, & qu'on s'en laue la teste, elles la guarétissent des furfures & peaux mortes qui y abondent. Que si on les brusle toutes entieres, & qu'on les face tremper en fort vinaigre, & les ayât bien broiees, on les enduise sur la teste, elles gueriront la pelade, & les places vuydes de poil qui y suruiennent par fois, selon l'aduis de Galien. Si on les fait tremper en vinaigre, puis les ayât bien pilees: on les met en petites panettes & trociscques, les faisant seicher à l'ombre: on aura vn fort bon remede pour effacer les taches & bourgeons qui viennent au visage: pour lequel usage, il les faudra destremper en vinaigre, toute les fois que besoin sera, les enduire: & apres qu'elles seront seichees les nettoyer avec du saou. La mesme composition seruira aussi pour les gratelles, dartres & feux volages, en fleurs de la face, qui sont comme preparatifs à la lepre & mesclerie. On tire de
l'huyle

l'huyile des Amâdes, tant douces qu'ameres: Les vertus & facultez duquel i'ay mieux aimé laisser, que non pas d'en traiter seulement en passant, esperant d'en traiter amplement ailleurs en lieu propre.

Du Pin & de son fruit, & des remedes qu'on peut tirer de l'un & de l'autre.

Quarreau III.

COMME les Grecs ont appelé les noix du Pin, Coin & Striboli (cōme le tesmoigne Galien) aussi Hippocrates a nōmé les pōmes du Pin Coccali: d'où les Artichauts on pris leur nō, cōme nous l'auons monstřé ci deuyāt au chapitre des Artichauts ou Cardons de iardin. Ces noix sont attachees à l'arbre fort haut de terre, & contiennent dans leurs escailles & creux de petits noyaux, couuerts d'une peau de couleur comme de fer enrouillé: lesquels on peut garder à peine s'ils ne sont mondez. Aucuns assurent que si on les enseuelit avec leur peau dans des pots de terre neufs remplis de terre, ils se garderōt fort bien. Le Pin est reputé pour estre de nature contraire au Noyer: car on tiēt qu'il profite à tout ce qui est plāté au dessous. Les noyaux encōres qu'ils soyēt malaisez à cuire en l'estomach, si sōt ils de bōne nourriture, si n'estoit qu'ils engēdrēt vn humeur grossier. Ils apaisēt la soif, adoucissēt l'acrimonie & rōgemēs

de l'estomach, renforcent ceux qui sont foibles, & tient ont qu'ils sont profitables aux reins, & à la vefcie: il semble neantmoins que ils rendent la gorge aspre, & qu'ils irritent la toux: encores qu'ils chassent l'humeur bilieux, si on les boit en eau, en vin-cuit, ou en decoction de Myrabolans. Contre les rongemens violens de l'estomach, on mesle avec iceux de la greine de Concôbres & du ius de Pourpié: & mesme contre les vlceres de la vefcie & des reins, car ils font vriner, & amortissent l'acrimonie de l'urine. Ces noyaux repri-mēt les humeurs corrompus & pourris, qui s'amassent en l'estomach. Et estans encores fraischement tirez de l'arbre, si on les pile en vin-cuit, on les pourra vn peu faire cuire pour s'en seruir avec profit contre la vieille toux & pour ceux qui deuiennent tabides & secs, mais il faudra boire tous les iours de ceste decoction là. Et de là ont pris argument plusieurs graues autheurs de dire, qu'il est bō à ceux qui deuiennent etiques, de conuerser parmi les bois de Pin, qu'on racle ordinairement pour en tirer la poix & la raifine: & pareillement à ceux qui sortans de quelque longue maladie, ne se peuuent remettre: de sorte qu'ils assurent qu'un tel aēr leur seruira plus que la nauigation iusqu'en Ægypte, ou que de boire quelque laiēt medicinal qu'on voudra. Mais ce sera assez dit du Pin & de son

son fruit, aussi bien ne s'en trouue il guercs, és iardins de nos quartiers septentrionaux.

*Del' Auelanier & de son fruit, & des reme-
des qu'on peut prendre des deux.*

Quarreau I I I I.

LE S noix Auelanes, sôt produites par cest
Larbre qu'on appelle Couldrier, lequel est
assez frequent és iardins. Elles sont premie-
remēt reuestues d'un petit gobelet mol & té-
dre, puis apres d'une escorce ressemblant au
bois, mais fort aisee à rompre, sous laquelle
on trouue vne escorce deliée qui environne
le noyau qui est rond, au milieu duquel s'en
trouue vn autre enclos tout separé: Les mon-
tagnes de France mesmement celles où il y a
du bois, sont toutes remplies de Couldriers,
où il vient des Auelaines languettes & rôdes
en si grande quantité, que les villageois les
portent vendre à pleins sacs dans les villes.
Il est tout notoire, que celles qui sont lôguet-
tes sont meilleures & de meilleur goust que
non pas les rondes, & principalement celles
qui sont fort rouges & dehors & dedans, &
qui ne sôt pas mal aisees à casser: car elles ont
le noyau plus ferme, & se gardēt plus longue-
ment. On les a nommees fort diuersement,
car premierement on les appeloit Auelaines
comme s'ils eussent voulu dire Abelines, pre-
nans ce nom d'une certaine ville de Campa-
nie (comme disent les Gramariens) où elles

vindrent premierement en abondance : On les a appellees Pōtiques, à cause qu'ō les apporta de Pōte en Asie & en Grece. Les Grecs les ont nommees Heracleotiques, Prenestines, & Leptocarya. Les villageois Frāçois les appellent Noifetes, Noifilles, & Auelanes. Quāt à leurs vertus & facultez & aux remedes qu'ō en peut tirer: Galiē soustiēt qu'elles ont plus de substance terrestre & froide, que n'ōt pas les Noix: elles sont aussi de plus de nourriture, car elles sont plus fermes & moins huyleuses & grasses. Philotime en son liure qu'il a fait des alimēts, dit qu'elles causent douleur de teste, mais moins que ne fōt pas les Noix: il dict aussi qu'elles nagent en l'estomach par dessus les autres viandes: si toutesfois on les passe par le feu, elles sōt moins nuisibles, d'autāt que le feu consume la substance huyleuse, qui est ce qui nuit. Elles engendrent donc douleur de teste si on en mange trop & mal à propos, & si sont contraires à l'estomach le remplissant d'inflatiōs & vētositez. Elles font renaistre le poil és lieux qui en sōt desnuez, si on les mesle avec graisse, ou suif d'ours. Avec ce elles seruēt aux distilatiōs, si on les fait premierement rostir: pilees en eau mielee & beuēs, elles soulagēt la vieille toux: Rosties avec vn peu de poiure, puis pilees & beuēs avec la mesme eau mielee, elles meurissent les distilations, comme Dioscoride

l'a es-

l'a eſcrit. D'autres ſont d'aduiſ de les boire en vin-cuit . Il y a meſme des auteurs qui ont laiſſé par eſcrit, que pour noircir la prunelle des yeux aux enfans qui l'ont perſe , il ne faut qu'incorporer la cendre des creuſes d'Auelanes avec huyle , & l'appliquer ſur le derriere de la teſte. Dauantage elles ſont fort bones pour faire deuenir gros, & gras, & ne ſcauroit on croire combien elles ſont propres à celà. Diocleſ fort renommé entre les Agriculteurs Grecs, à laiſſé par eſcrit à la poſterité, que les Auelanes ſont de moindre nourriture que les Amandes , & qu'elles na- gent en l'eſtomach par deſſus les autres vian- des , comme nous auons ia dit : que ſi on en mange en quantité, elles feront mal à la te- ſte : il dit toutesfois , que verdes elles ſont moins nuifibles que ſeiches. Mais il ne nous faut pas ici oublier ce que les payſans meſme ont obſerué, aſcauoir que ſi on frappe vn ſer- pent avec vne verge de coudrier , il demeu- rera là tout engourdi, & en fin mourra. Plu- tarque dit dauantage , qu'un ſcorpion n'en- trera iamais en l'habitation où il y aura vne noiſette pendue au plancher. Ces deux cho- ſes ſont bien aiſées à experimenter qui vou- dra, pour en ſcauoir la verité.

*Du Chaiſtaignier, de ſon fruit, & des remedes
qu'on peut prendre des deux.*

Quarreau V.

Encores

ENcores qu'il puisse sembler que le Chastaignier soit plustost arbre sauuage que domestique : & qu'il deuroit plustost estre nombré entre les arbres portans fruiçts à escorce deliée , que non pas entre les noix & fruits à dure escorce : si suis-je deliberé pourtāt, d'en faire ici vn sommaire discours, à cause qu'en hyuer on en void d'ordinaire les tables des riches & des pources toutes chargees : avec ce que tous les escriuains les mettent au nōbre des noix : bien est vray qu'elles seroyēt mises plus proprement au reng des glands, comme mesme quelques auteurs Grecs ont bien recogneu, lesquels ont appelé les Chastaignes Glād de Iupiter : mais il me semble que ce nom conuient mieux aux noix , pour les causes que nous auons deduities ci dessus, quand nous auons parlé du Noyer : mais ie laisse debatre ces choses aux Gramairiens & non aux medecins . Il se trouue en nos quartiers de deux sortes de Chastaignes : les vnes sont domestiques & cultiuees, lesquelles sōt beaucoup plus grosses que les autres , & les appelle-on communément Marrons : pource qu'on les tient entre les Chastaignes comme les masles, lesquels en toutes choses sont tousiours mieux nourris que les femelles, cōme l'enseigne Galien. Les autres sont beaucoup moindres, & les tient-on comme les femelles, aussi sont-elles plus maigres que non pas

) pas les Marrons. Les Marrons donc seruent pour desserte aux riches: les petites des bois seruent pour saouller les pauures quand ils ont faim. Les riches font cuire les Marrons à la braise ou sous les cendres chaudes, & les pauures font cuire les petites dás l'eau, pour appaiser la faim qui les presse: d'où est venu q Plin les apele populaires & aisées à cuire, mais auát que faire cuire ni les vnes ni les autres, il les faut fêdre avec vn cousteau iusques à la chair, de sorte que la peau soit percee, afin que par l'ouuerture, le vent que le feu agite & esmeut, puisse sortir, autrement elles feront vn bruit comme vn tonnerre, qui ne sera pas sans faire peur, & mettre en danger ceux qui seront presens. Bien est vray que tout ceci ressalt mieux sa cuisine, que la médecine: le vien donc à traiter des remedes. Les Chastaignes sont propres à arrester les fluxions tant du ventre que de l'estomach, selon le dire de Dioscoride: & principalement l'escorce desliee qui passe entre la chair & l'escorce. Quand elles sont seiches, elles sont vtilles à ceux qui crachent le sang: pilees avec sel, & pestries avec miel, sont propres pour appliquer sur la morsure des chiens enragez. Enduites avec Gridotte & vinaigre, elles dissipent les durtez des mammelles. Fraischemēt cuittes, & vn peu saupoudrees de poiure, resueillent l'appetit d'habiter avec les femmes,

à cause de l'humidité ycteuſe qu'elles ont. Si toutesſois on en mäge par trop, elles cauſent douleur de teſte, conſient, reſerrent le ventre & ſont de mauuaife digeſtiõ, principalement ſi elles rencontrēt vn eſtomach foible & debile. Bien eſt vray, que celles qu'on fait cuire à la braiſe ſont moins nuifibles, meſmement ſi on les mäge avec du ſel, du ſucre, d'anis, ou canelle. Aucuns ſe ſeruent des Chaſtaignes trempées en vin, peſtries avec farine & reduites en forme de peſſaire, pour arreſter les mois. Quoy que Galien ait eſcrit que les Chaſtaignes ſont de grande nourriture, ſi ne ſont elles paſ fort bonnes à manger: car ſoit qu'on les mange bouillies, ou roſties, ou frites, elles nuifent touſiours à celuy qui en mange ſouuent, & encores plus quand on les mange crues. Je ſcay bien que ceux qui habitent eſ montaignes, & qui n'ont paſ promiſſion d'autres viures, viuent tout l'hyuer pour la pluſpart de Chaſtaignes, leſquelles ils ont faiët premierement ſeicher ſur vne claye à la fumee, & mondées de leurs peaux & eſcorce: voire ils en font de la farine, de laquelle ils font du pain, qu'ils font cuire pour le mäger, ou bien avec du laiët ou autre bouillon, ils en font de la bouillie, de laquelle ils rempliſſent leur ventre; & cela les nourrit fort bien, & ſont en bon point, meſme n'en ſentent aucun dommage à cause du grand exercice & trauail

travail qu'ils font, pource aussi qu'ils habitent en vn aër fort salubre.

*Du Laurier & de ses Bayes, & des vertus
& remedes d'iceux. Quarreau V I.*

LE Laurier qui est proprement dedié aux triomphes: & comme dit Pline, c'est le huisier des Empereurs & des Papes, seruant de pareure & tapisserie à leurs palais, & d'embellissement & garde en leurs portes: se pourroit iustemét plaïdre de moy, si ie l'oublois en ce discours & recit des remedes des arbres: mesmement veu qu'il est non seulement cogneu par son nō entre les Frāçois mais aussi deligemment cultiué & bien cheri. Je tourne donc ma plume pour en escrire & suis deliberé d'en discourir assez amplement, & vn peu dauantage que ie n'ay pas fait des arbres precedens: tāt à cause de son excellence, que pource aussi qu'en nostre traicté des secrets des iardins nous n'en auons pas touché vn seul mot, nō plus que des autres arbrisseaux suyuant. Mais soit assez parlé, il faut venir au faiēt. Le Laurier est vn arbre de fort bonne odeur, reuestu d'vne escorce polie & lissée & deliée, estant tousiours verdoyant, qui a son piedou, tronc fort haut, abondant en vn suc gras, & qui a fort peu de nœuds. Il produit des fleurs petites & toffues fort sembla-

bles aux fleurs d'Oliuier, de couleur iaune ti-
 rant sur le blanc: desquelles sortent apres les
 Bayes qui sont verdes au commencement,
 mais estans paruenues à maturité, elles sont
 noires, & ont au dedans vn noyau gros. Le
 Laurier ne vient point en lieux froids, ni és
 lieux suiects aux gelees, d'autant qu'il est
 chaud. Il vient de semence, ou bien si on re-
 plante vn surgeon qu'on aura arraché d'vn
 autre arbre: son bois est fort propre pour fai-
 re bastons pour appuyer les gens vieux, car
 ils sont beaux & legers. On le tient pour e-
 stre vn arbre de diuination: qui est la cause
 pourquoy on le dit estre sacré à Apollo plein
 de lumiere, & ardent, comme tesmoigne Por-
 phire en son liure du sacrifice & de la magie:
 parquoy il chasse le feu en petillant (selon
 que dit Pline) & resiste manifestement aux
 foudres en flammez & bruslans, comme nous
 dirons ci apres. Il est aussi aucunement de-
 dié à Iupiter: car toutes les fois qu'on se res-
 iouissoit de quelque victoire obtenue, on
 mettoit le Laurier dás le giron de l'image de
 Iupiter au temple des payens. Cest arbre pa-
 cifique, a tousiours esté l'enseigne des vi-
 ctoires & messager de ioye: à cause dequoy,
 les soldats en ornoyent leurs armes, les Pon-
 tifes leurs palais, & les Empereurs leurs scep-
 tres & bastons imperiaux. Ce que le poëte n'a
 pas ignoré, comme il estoit de gentil esprit,
 aussi

aussi l'a il exprimé introduisant Apollo, parlant à son Laurier, & s'adressant à luy en ces paroles.

*Mon Laurier tu seras tousiours à moy
sacré*

Verden toute saison: & mon arc & ma lire

Seront faits de ton bois: tu seras consacré

*Pour seruir aux triôphes de ceux qui leur empire
Ont orné de victoire, non de fureur & d'ire.*

L'entree des grands palais ta presence ornera

Et gardienne loyalle on t'en renommera:

Comme donc de cheueux mō chef blond est tressé,

Ainsi de verds rameaux tu seras entassé.

On le tient aussi pour estre vn arbre de bonne fortune: & comme contraire aux malins esprits: car en quelque lieu que le Laurier soit, les malins esprits s'en retirent, comme ie l'ay trouué remarqué, & escrit dans Cassius Dionisius d'Vtique, interprete de l'agriculture de Magon. Il dit dauantage, que les esprits, ni quelque maladie estrange, ne pourrôt nuire au lieu où le Laurier sera, non pas mesme la foudre, laquelle est souuent dardee par les malins esprits qui sont en l'aër, par vne iuste permission de Dieu. On dit aussi de cest arbre qu'il cause la santé; d'où venoit la coutume que le peuple Romain obseruoit de donner aux magistrats le premier iour de Ianuier, des fueilles de Laurier avec des Figues seiches, pour vn signe de bon encontre

*Notex la
gentille fa-
ble.*

comme Pline en parle. Anciennement quād on presentoit deuant l'armee des ennemis des branches & rameaux de Laurier, c'estoit vn vray & assureté tesmoignage de paix. Entre tous les arbres cestuy-ci seul fut enuoyé du ciel par Iupiter à Rome, afin d'en coronner les empereurs: Car Liuia Drusila (laquelle fut puis apres appelee Auguste, à cause du mariage) estant promise & fiancee à Cæsar, aduint qu'elle estât assise en son iardin, vne aigle luy laissa choir en son giron vne poule de blancheur exquisite: elle donc regardant celà d'un visage assureté & avec vne assurece merueilleuse, il y furuint encores vn autre miracle, car on s'apperçeut que ceste poule portoit en son bec vne branche de Laurier toute chargee de bayes: Or ayant rapporté ceci aux deuins & pris leur conseil, ils furent d'aduis de garder soigneusement ceste poule & les petits qu'elle produiroit, & quat au rameau qu'on le deuoit planter & bien garder, ce qu'estant fait il creust & multiplia de telle forte (encores qu'il n'eut point de racines) qu'il produisit en peu de temps vn grand bois: duquel Cæsar print la brâche qu'il portoit en sa main, & la coronne qu'il auoit sur sa teste lors qu'il triôpha: Ce qui fut depuis obserué, & fait par les autres Empereurs: & de là vint aussi que des lors on planta plusieurs bois de Lauriers à Rome: mesme eclā
vint

vint en coustume de planter la branche de Laurier que les Empereurs auoyēt porté en leur main : & se print on garde que la mort d'un empereur approchât, l'arbre qui auoit esté establi par luy, s'affoiblissoit : & la derniere annee de Nerō, la forest & toutes les poules moururēt, selon que dit Suetone en la vie de Galba. Entre les argumens qu'on a que le Laurier est fort plaisant aux Dieux, cestuy ci en est vn, asçauoir qu'entre tous les arbres plantez à la main & domestiques, cestuy-ci seul n'est point frappé de la foudre : encores que nous voyons souuent la foudre sans auoir esgard ni à la dignité, ni à la grandeur & magnificēce des Empereurs, ne laisser d'abatre les hautes tours des temples, ruiner entièrement les palais superbes & magnifiques du monde, & bien souuēt consumer mesme les personnes, sans oser toucher tāt soit peu au Laurier, ou ce seroit vne chose prodigieuse & vn presage de quelque grand malheur : mesme on dit que la foudre ne touchera point aux maisons où il y aura des rameaux de Laurier. Parquoy Tibere Cæsar, qui craignoit extrememēt les foudres, quād il oyoit tonner, faisoit mettre vne couronne de Laurier sur sa teste à la façon des poëtes, les temples desquels on a accoustumé d'environner de Laurier verd, comme pour le pris & recōpense de ceux qui s'adonnēt aux

Muses d'Apollo. Le pris & recompence que ie donne ordinairement à Phebus, dict Maro, sont le Laurier, & le rougissant Iacinte avec bonne senteur. Anciennement on n'auoit point acoustumé de poluer le Laurier ni l'Oliuier, les employans à vsages cōmuns & prophanes : mesme on ne s'en seruoit point pour brusler sur les autels, quand on vouloit sacrifier & apaiser les Dieux. Au reste les corbeaux ayās combatu & occis le Chameleon, auāent vne petite branche de Laurier, pour amortir la malice du venin. Par le moyen du Laurier les gays, les pigeons ramiers, les merles, & plusieurs autres oyseaux, sont passer le desgoutemēt qu'ils ont tous les ans. Je di d'auantage, que les rameaux de Laurier verd, ont vne si grande force & vertu, que si on les plāte parmi les terres labourables, la rouille qui est vne peste fort dōmageable aux bleds, en sera ostee & sera transportee (si ce que Plinē & les anciēns agriculteurs en ont escrit est vray) aux rameaux mesmes de Laurier. D'auantage ie ne veux pas laisser en arriere que ie ne die que le Laurier a vertu de produire feu de soy-mesme : car si estant sec on frotte quelque temps vn bois cōtre l'autre, mettāt vn peu de souffre en poudre par dessus, ou quelque autre amorce bien seiche, on en verā sortir le feu: vray est que Plinē est quelque peu differend à Mathiol en ceci. Si, dit-il, on frotte

on frotte le Laurier contre le Lierre, & le Lierre contre le Laurier, on en fera sortir du feu: de sorte que le frottement d'un bois contre l'autre bois, conçoit la flamme, laquelle on reçoit avec quelque amorce seiche, comme seroit du champignon ou des fucilles: l'usage de ces choses a esté inuenté par les gues-tes & espies qu'on met és armées, & par ceux qui gardent le bestail, d'autant que pour auoir du feu on n'a pas tousiours commodité de recouurer des pierres. Aucuns attribuent la mesme vertu au Meurier, & à plusieurs autres arbres, desquels on faict des fusils. Peu s'en est failli que ie n'aye oublié ce qu'on dit d'un Laurier qui estoit en Ponte au pres d'Heraclee, & qui couuroit le sepulchre du Roy des Bebryciens, lequel on nommoit Laurier fol: d'autant q si on en prenoit un rameau ou vne branche, & qu'on la portast dás le nauire, il y auoit continuel debat iusques à tât qu'on l'eust iette là. Les fucilles de Laurier seruent pour conseruer les figues seiches cōme l'a escrit Pierre Crescence Agriculteur assez renommé: lesquelles sont propres, cōme dit le mesme autheur, pour mettre parmi la gelee, pour la faire sentir bō, pourueu que celuy qui la doit manger n'ait point de fièvre. Il y a mesme aucuns qui la meslēt parmi le Cotignat: mais laissons traicter de la cuisine aux cuisiniers, & nous arrestons à traicter

ce qui touche la medicine. Je vien d'oc à traiter des vertus & remedes du Laurier & de ses Bayes, tirez des escrits & obseruations des Grecs, des Latins, & des Arabes. Galien dit que l'escorce de la racine de Laurier, rompt la pierre & profite au foye, si on en boit au pois de trois oboles avec bon vin odorant. Les cymes les plus tendres du Laurier pilees avec Calament & vn peu de sel, puis, beuës en eau tiede, laschent le ventre, purgent la phlegme, & font soudain sortir les vers. Les mesmes cymes bouillies en vin avec Nard, guerissent la durté d'ouye & les tintemens des oreilles, si seulement on reçoit la vapeur de la decoction encores chaude, dans les oreilles avec vn entonnoir. Le Laurier (ce que ie deuois bien auoir mis au commencement) à vne faculté & vertu d'eschauffer & amollir tant en ses fueilles, qu'en son escorce & en ses Bayes. Parquoy le bain de sa decoction aide à la matrice, & aux maladies de la vesic. Sa fueille verde pilee & enduite, resiste aux piqueures des mousches guespes, des freillons & des mousches à miel: & pareillement au venin des serps. Cuite en huyle elle aide aux mois des femmes: & avec pain & griote, appaise les inflammations. Trois fueilles bien tendres, mäsées par trois diuers iours avec beurre, guerissent la toux. Les bourgeons broyez avec griotte aident aux inflammations

tions des yeux : avec huyle rofat & Rue , aux inflammations des genitoires : & avec huyle de Glay aux douleurs de teste . Les mesmes bourgeons pilez avec miel, sont bons à ceux qui respirent avec difficulté : mais estans beus ils font vomir . Quoy que l'escorce de la racine soit tenue pour vn propre remede pour rompre la pierre, si faut-il bien que les femmes enceintes se gardent d'en boire, car elle fait mourir l'enfant dedans le ventre. Entre les remedes dont on se sert quand la Luette est alongee, la decoction des fueilles ou des Bayes de Laurier faicte en trois parties d'eau, & gargarisee toute chaude , en est l'vn : La mesme decoction beuë est propre aux douleurs de ventre & des boyaux. Les fueilles de Laurier broyees & souuent flairees, empeschent la contagion & infectiõ de la peste : & encõres mieux si on les brusle. Aucuns estimēt que la racine de Laurier sert beaucoup pour haster l'enfantement, si on la prend à la mesure d'vn acetabule avec eau, mais elle est meilleure à ceci fresche que seiche : les fueilles encõres biē tēdres, pilees en vin & enduites, ostēt la demageisõ de nuict. Les bayes de Laurier que les Grecs nōment Daphnides, eschauffēt beaucoup plus que ne font pas les fueilles. Prinsez avec miel ou vin cuit, ou en forme de loch avec eau miel, elles profitent à ceux qui deuiennent tabides &

secs:& en ceste mesme sorte, elles seruent à toutes defluxions de la poitrine:car elles cuisent la phlegme, & font qu'on la crache aisément. Elles remettēt la luette prolongee, si on les mesle avec pareille quantité de Cumin, d'Hysope, d'Origan & d'Euforbe, & qu'on incorpore & assemble le tout avec miel, puis qu'on l'applique tout chaudemēt sur le sommet de la teste. Les mesmes Bayes pilees avec son de fromēt, grains de Geneure Auls, & mis sur vne tuile chaude, les arroulant souuent de vin, appliquees sur le penil prouoquent l'vrine arrestee. Si on les broye en nôbre imper, avec huyle, & les ayant chauffees qu'on les applique, ce sera pour soulager les douleurs de la teste. Beuës en vin, seruent de remede contre la piqueure des Scorpions: Pilees & appliquees, ou beuës en bon vin, pourueu qu'il n'y ait point de fieur, prouoquent les mois. Enduites avec huyle, elles effacent les petits vlceres qui viennent d'eux mesmes sur la peau, que les Grecs nomment Epinyctides, & les taches blanches qu'on nôme Vitilignes, & guarissent les lentilles, la tigne & vlceres de la teste, & les furfures ou peaux mortes qui tombent quand on se pigne. Leur suc corrige la demangeison & grattelle qui viēt à la peau. Si la femme qui aproche son terme d'acoucher, aualle sept Bayes de Laurier le soir quād elle s'en va coucher, cela

cela rendra son enfantemēt aisé & heureux. Elles guérissent la toux & la difficulté d'haleine. Les Bayes de celle sorte de L'aurier qui a les fueilles plus menues, résistēt aux serpens, araignes & scorpions, si on les prend en vin : & est bon de les enduire sur la rate & sur le foye , avec huyle & vin-aigre : semblablement aux gangrenes si on les enduit avec miel. Le suc de ces Bayes fresches est bon pour mettre dans les oreilles avec vin vieil & huyle rosat , pour appaiser la douleur d'icelles, oster la durté d'ouye , & le tintement. Aussi pour oster les lassitudes, & guerir ceux qui sont gelez par la froidure, il les faut oindre du suc des Bayes , & y adioustant vn peu de Nitre, & cela leur profite grandement. Si quelqu'un est oinct d'huyle Laurin , les animaux venimeux n'ont gardé d'en approcher lequel seul est fort propre pour resoudre les maladies des nerfs , dissiper les douleurs de costé, & si est bon aux fieures procedātes de matiere froide : semblablement pour guerir la durté d'ouye , si on le fait vn peu chauffer dans l'escorce d'une grenade. La façō de faire cest huyle est telle . Il faut faire cuire vne bonne quantité de ces Bayes bien meures, dans de l'eau chaude , & apres les auoir fait bouillir longuement, il faut ioliemēt recueillir avec vne plume, l'huyle qu'elles aurōt rendu, & qui nagera par dessus, & le serrer dans

vn vaisseau propre, pour s'en seruir au besoin. I'adiousteray ceci pour le dernier que i'ay prins de Pline & de Columela, & qui à la verité ne semble pas conuenir au propos precedent. Ses Bayes seruent de viande fort propre aux poules qui sont trauaillees de phlegmes, quand elles ont biẽ faim: ou si on les fait ioucher à la fumee faite de Laurier, ou bien de Sauinier. Je mettray donc ici fin au discours du Laurier, pour venir au Geneure, à ses Bayes & à sa gomme, qu'aucuns apelent Vernix.

Du Geneure, de ses Bayes, & de sa Gomme, & des remedes & facultez d'iceux.

Quarreau VII.

IE discours tant plus volontiers en ce lieu du Geneure (cõme il est appellé entre nous François, d'autant que ses branches & sa tige seruent d'apuis & eschalias pour soustenir les vignettesmens & treilles, qu'on fait és iardins, les belles & magnifiques loges que les riches y drescent. D'autãt aussi qu'on en apporte à Paris à belles batellees, pour s'en seruir à diuers vsages, & puis les crocheteurs le vôt criãt par les rues à qui en veut acheter, l'ayãt premierement mis en beaux petits fagots, desquels on fait du feu pour resiouir par sa chaleur & bõne odeur, & le corps & l'esprit car en les bruslant ils produisent vne senteur
qui

qui n'est pas mal plaisante. Le Geneure par son odeur souëfue chasse le mauuais aër & la cōtagion de la peste, & nettoye l'infectiō. Mais ie vien au recit de son histoire. On trouue de deux fortes de Geneure entre nous, si fait-on bien ailleurs, qui croissent ordinairement és montagnes. Les vns sont bas & ont leurs rameaux qui traident par terre, sans se leuer iamais gueres haut de terre: leurs fueilles sont piquantes comme espines, & sont fort semblables à celles du Rosmarin, plus estroites toutesfois: leurs Bayes sont verdes au commencement, mais estans paruenues à maturité elles deuiēent noires & en void-on ordinairement des nouuelles parmy les vieilles. Les autres viennent plus hauts, & ont leur tige plus haute, & leur es-corce fort fraisle & entr'ouuerte en plusieurs lieux: leur bois est iaune & de bonne odeur: ses rameaux s'estendent plus au large, & sont enuironnez de force espines: & ses Bayes sont du tout semblables aux Bayes de l'autre. Et l'vn & l'autre sont facheux, & armez d'espines qui menacent de piquer ceux qui en approchent, ils sont verts en toute saison, & ne portent point de fleur. Ils aiment tous deux les montagnes, & les lieux pierreux & pleins de rochers: mais à la plaine il y vienēt fort difficilement, & à peine, ou s'il y vient il est petit

& bas, & fert d'un giste fort plaissant aux conils : car ils sont fort friands de ses Bayes & grains : aussi dit-on communément , quand on les fert sur la table, qu'ils sentent le Geneure. Au reste encores que le Geneure germe & bourgeonne au printemps, comme les autres arbres, si produit-il son fruit bien tard : car le fruit nouveau se void és Geneures en automne, & ce nouveau fruit succede en la place du vieil, comme nous auons ià dit, de sorte qu'il demeure deux ans sur la plante, y en suruenant d'autres, qui y demeurent aussi deux ans, que si on les laisse sur l'arbre sans les cueillir ils se seichent & flestrissent : parquoy on les cueillit, & les garde-on quelque temps, pour s'en seruir aux vsages que nous dirons ci apres. Le bois de Geneure est vne matiere fort propre pour faire bastimés & ouurages, tant dans terre que hors de terre, car il dure plusieurs centaines d'annees, sans se gaster ni corrompre : ce que nous ferons clairement cognoistre par le recit d'une histoire memorable, dont Pline fait recit. En Espagne, dit-il, les Saguntins tiennēt que le tēple de Diane Ephesienne, qui fut apporté par Zacynthus & par les autres qui on basti Sagunte, fut dressé deux cens ans deuant la ruyne de Troye, selon le recit de Bochus, & qu'il estoit au dessous de la ville : lequel tēple fut espargné par Annibal, lors qu'il brula Sa-

*Histoire
notable.*

lla Sa-

la Sagunte, estant esmeu par religion, & les poutres & souliueaux qui estoient de Geneure durent encores aujourd'huy, dict Plin. Il ne se faut donc pas estonner si les alchimistes assurent qu'un charbon de Geneure allumé & couuert de ses cendres, gardera son feu vn an tout entier. Mais c'est assez parlé de l'arbre, parlons maintenant de sa gomme. Aucuns tiennent que le Geneuriere vne certaine larme au temps des grandes chaleurs, laquelle estant deseichée & endurcie par la chaleur, se cōuertit en gomme, à laquelle ils ont donné le nom de vernix: Il est de couleur blanche quand on le cueillit & quelque temps apres, mais quand il est longuement gardé il iaunit, & estât fort enuieilli, il deuiet du tout rous. Le meilleur est celuy qui est cler & luisant, & que mis sur le feu iette vne senteur qui n'est rien moindre que l'odeur de l'Encens. Les escriuains s'en seruent pour polir & lisser le papier: Si les teinturiers meslent quelque peu de ceste gomme parmi leurs teintures & couleurs, elles prendront tellement qu'elles ne s'effaceront pas aisément apres: Que si on iette par dessus vn peu de ceste gomme puluerisee, elle leur donnera vn merueilleux lustre. Je ne veux pas oublier que de ceste gomme destrempee en huyle de semence de lin, on fait vn vernix liquide, duquel on se sert pour

donner lustre aux peintures, & pour polir le fer: Il est bon aussi contre les brusleures, mais son principal vsage c'est contre les douleurs & enfleures des hemorrhoides: mais ceci deuoit estre reserué au traitté des remedes du Geneure, desquels il est temps de parler: Mais auant qu'en venir là, & auant que entrer au recit des remedes qu'on peut tirer du Geneure, il me semble que ie feray fort bien de donner c'est aduertissement à ceux qui font estat de la medecine, de peur que au lieu d'un remede salutaire, ils ne donnent vn venin, asçauoir que là où les Arabes ordonnent en leurs compositions de la Sandaracha, il faut entendre de ceste gomme de Geneure: mais quand les auteurs Grecs parlent de la Sandaracha, il faut prendre ce mineral qui est roux & fort semblable à l'orpiment. Car du tēps de Dioscoride, ni de Galien, la gomme de Geneure n'estoit point encores en vsage, sinon qu'elle le fut sous le nô de Succinum, auquel elle est fort conuenable & en ses vertus naturelles & en ses facultez. Il est temps maintenant de m'arrester à la deduction des vertus du Geneure & de ses parties.

Si on fait de la lexiue des cendres du Geneure avec du vin, & qu'on en face boire au poids de quatre onces, cela prouoquera fort bien l'vrine: par lequel remede on a veu mesme

me des hydropiques gueris, en peu de iours, sans autre remede. Ceste mesme lexiue guerit la rogne, & oste la demangeison, si les malades s'en lauent. On fait aussi avec du Geneure, vn bain qui a vne vertu singuliere & admirable contre les gouttes, duquel voicy la façon. Pren du bois de Geneure rapé & limé menu, douze liures: fay-les cuire avec eau en vne grande chaudiere, iusques à ce que la troisieme partie soit consumee: puis iette la decoction & les raboteures du bois aussi, dans la cuue, & y fay entrer le patient iusques au nombril, & que là il bassine & laue bien les membres tormentez de douleur, mais il faut auoir purgé le corps premieremēt. Nous auons veu (dit Mathiol) des gouteux en Boheme, qui estoient tourmentez d'une douleur continuelle, & gisans ordinairement au liēt, lesquels ayans vsé quelque temps de ce bain: sont deuenus tellement sains & dispos, qu'ils estoient plus propres à faire leurs negoces, qu'ils n'auoyent esté auparauant. On fait aussi vn certain huyle qu'on tire du bois de Geneure, (per descensum que disent les Alchimistes) mettāt deux pots de terre l'un contre l'autre, ou deux vaisseaux de verre: lequel estant mis tout chaut dedans la bouche: appaise merueilleusement la douleur extreme des dents, si elle procede de la defluxion de quelque matiere froide: Bien

*Recepte
pour les
gouttes.*

est vray que celuy qu'on tire de ses Bayes est meilleur, & est fort plaisant à l'odeur. Le suc tiré de ses fueilles, est bõ cõtre les morsures des viperes, soit qu'on l'enduisse dessus, ou qu'on le boiue. La cédre de l'escorce du Geneure efface la ladrerie: & la senteur des fueilles & du bois de Geneure, alumez, chassent les serpens. Il nous faut maintenant parler des Bayes. Les Bayes ou grains de Geneure, seruent contre les douleurs de l'estomach, de la poitrine & des costez, soit qu'on les boyue ou qu'on en bassine seulement ces parties là. Si on prend sept de ses Bayes, & autant de Bayes de Laurier, & de canelle cõmune, vne drachme, & qu'on les pille grossierement, puis qu'on les mette dãs le vêtre d'une tourterelle, & pendant qu'elle rostira la faudra arrouser de graisse de poule, & en fin la faire manger à la femme qui dãs peu de iours doit acoucher, le soir, vn iour & l'autre non, cela fera que ceste femme deliurera fort aisément & sans trauail: qui est vn remede bien facile à faire & bien plaisant. Les mesmes Bayes beuës en gros vin rouge, arrestēt le vêtre, & les tumeurs d'iceluy, & si profitent aux suffocatiõs de matrice: Confites en sucre, ou cuites en quelque vin puissant, elles dissipent les inflations, les tranches, & les douleurs qui en procedent: meurissent la toux, & prouoquent l'vrine: Estans concassees on les fait cuire

cuire en vin blanc, ensemble avec des Roses, des noix de Ciprez, & des fueilles de Meurte, contre les douleurs des dens: il est biẽ certain que si quelqu'vn se laue la bouche de ceste decoction chaude, y adioustant seulement vn petit d'eau de vie, ou bien s'il y fait seulement tremper vn linge & qu'il l'applique sur la dent, il experimentera combien ce remede est soudain & merueilleux. Il est bon à ceux qui sont subiects à la sciatique, de prendre en vin blanc, quatre Bayes ou grains de Geneure. Je di encores d'auantage, que la decoction, tant des Bayes que des fueilles beuë, prouoque & fait sortir efficacemẽt les mois. Mais c'est assés parlé des Bayes, pour donner lieu au discours que nous voulons faire de la gomme, de laquelle on se fert à plusieurs vsages. La gomme de Geneure, qu'on appelle vernix, comme nous auons dit, est bonne pour arrester le sang coulant du nez, si on la broye avec vn blanc d'œuf, & qu'on l'applique sur le front & sur les temples: Elle arreste la violence des vomissemens bilieux qui tormentent l'estomach, si on met sa poudre dans vn œuf molet & qu'on le boye: & en ceste mesme façon elle arrestera le flux de ventre sanglant. Elle aide grandement à la resolution des nerfs, causée d'humeurs froides: arreste les defluxions du cerueau, si on s'en parfume; enduite supprime les hemor-

Y. iij.

rhoides qui fluent : & meslee avec quelque matiere conuenable , elle retient le crachement de sang . meslee avec poudre d'encens, & vn blanc d'œuf, appaise les vomissemens: si on l'applique chaudement sur l'estomach: elle arreste aussi le flux de ventre, si on s'en oinct. Iointe avec huyle rofat, ou huyle Martin, elle guerit les fentes & creuasses du fondement : si fait bien aussi les creuasses des pieds & des mains, engendrees de froidure. Le parfum de ceste gomme arreste les Catarrhes, & empesche qu'ils ne tombent avec violence sur les parties basses. Elle d'espistre avec grand vertu, l'estomach & les boyaux, de la phlegme qu'y est attachee : & retient fort bien l'humeur qui tombe soudainement du cerueau sur les parties basses. Sa fumee receüe par vn entonnoir appaise la douleur des dents, soudain qu'elle parviendra aux dents qui font mal. La poudre de ceste gomme mise dans les cautez des fistules humides & moittes, les desseiche, & arreste l'abondance des mois. Son parfum aide grandement à la distillation du cerueau. Bref, ceste gomme à les mesmes vertus & facultez que le Succinum, comme nous auons ia dit: car elle est chaude & seiche au second degre, avec quelque peu d'amertume, ce que sera pour la fin.

*Du Sureau qui croist en arbre, & de celuy qui est
comme vn' herbe, appelé Yeble: & de leurs
facultez & remedes.*

Quarreau V I I I.

L'Arbre que les Latins appelēt Sábucus,
ou selō Q. Serenus, Sabucus, & les Grecs
Aête, & les François Sebu ou Sureau ou Su-
seau, est de deux sortes. L'vn est fort cōmun
& frequent parmy les hayes & clostures des
iardins & des vignes, & à force mouëlle, il
porte vn mouchet de fleurs fort blâches: les-
quelles ont vne senteur si plaisante, que ceux
de nostre nation en font du vin-aigre qui
est fort plaisant, les faisant tremper dedans:
Sa semēce, ce sont des petites Bayes ou grains
mols, remplis d'vn humeur gluant, qui tei-
gnent les mains de couleur de sang. La ma-
tiere ou bois du Sureau est merueilleusemēt
ferme & solide, à cause dequoy elle est pro-
pre à faire boucliers ou targes, comme affir-
me Pline: Car estant transpercée (comme le
mesme autheur dit le semblable du Figuier,
du Tillet, du Saulx, du Bouleau & des deux
Peupliers) elle se reserrē incontinent, à cau-
se dequoy le fer le pēce mal aisément, ou si
elle est percée, on n'en peut après retirer le
fer, qu'avec difficulté. L'autre sorte de Sureau
est sauuage plustost que domestique ou croif-
sant és iardins; & est appelée des Grecs Cha-
meacté, pource qu'il n'est pas si haut de

terre que l'autre, comme s'ils vouloyent dire, petit Sureau: les Latins le nomment Ebulus, & les François Yeble: il approche plus de la nature des herbes, que non pas des arbres, sa tige est quarree; ayant force nœuds, desquels sortent ses fueilles par interualles, lesquelles fueilles sont fort semblables aux fueilles d'Amâdier, horsmis qu'elles sont dételées tout autour en façon de scie. Ceste plante fait sousleuer le cœur, & fait venir appetit de vomir, par sa forte odeur & mal plaisante: elle a la fleur, les grains & le mouschet, semblables au Sureau, mais l'odeur en est du tout diuerse. Elle vient és lieux ombrageux, moites & aquatiques. Voila ce que i'ay bien voulu dire sommairement de la forme & figure de l'un & de l'autre Sureau: il reste maintenant que d'un mesme train ie poursuyue à discourir de leurs facultez & remedes, selon ma petite portee. L'eau distillée des racines tât du Sureau que de l'Yeble, aide merueilleusement à ceux qui sont detenus de celle sorte d'hydropisie qu'on appelle Timpanite: si on prend de ceste-ci deux onces, & de celle là quatre onces, & si ayât le tout meslé ensemble le patient continue d'en boire trente iours durant. Les fueilles tendres du Sureau, cueillies incontinent qu'il commence à germer, avec le mesme poids de racines de plantain, pestries & broyees avec viel oing, appaisent soudainement

nement les douleurs de la goutte. Le suc tiré de ses fueilles adoucit les apostumes & amas d'humours qui se font au cerueau, & principalement en la membrane qui enuironne le cerueau, si on le verse par dessus. Sa decoctiō comme aussi du yeble refroidit l'ardeur & inflammation des brusleures nouvellement faites: & avec Griotte il guerit les morsures des chiens, si on y applique des fueilles les plus molles. L'eau tiree des fleurs de Surcau, appliquee sur le front & sur le deuant de la teste, amoindrit les douleurs causees par vn humeur chaud. On fait manger les fueilles tendres, & les ieunes germes & bourgeons avec sel, pour euacuer la phlegme & l'humeur bilieux: les grains seruēt à teindre les cheueux: La decoction faite en vin, des fueilles de la semence, ou de la racine de l'vn & de l'autre Surcau, & beuë à la mesure de deux ciathes, purge les eaux par embas: biē est vray qu'elle nuit fort à l'estomach, sinō qu'on se soit pre-muni par choses confortatiues & par dehors & par dedās. Le suc tiré de l'escorce de sa racine prouoque fort à vomir, & fait sortir l'eau qui est entre la chair & la peau: autant en fait le suc de la racine mesme: les fueilles de Surcau bruslees & mises en poudre, arrestent le sang qui coule par le nez. La decoction de la racine, faite en vin, vuyde du tout les hydro-piques: & la decoction de ses fueilles amolit

les parties secrettes des femmes & la matrice, si elles s'asscent dedans. Les fueilles beuës en vin, resistent aux picqueures des serpens: & les tiges appliquees avec suif de bouc, profitent grandement aux goutteux. Mais l'Yble est de plus grande vertu & efficace, à toutes ces choses. Le suc tiré des grains de l'un & de l'autre, raisis, & purifié, cuit avec miel, iusques à ce qu'il ait la consistance d'un iulep, oste les douleurs d'oreilles, si on le met chaudement dedans. Les excroissances qui ressemblent à champignons, qu'on trouue au bas du tronc du Sureau (qu'aucuns appellēt l'oreille du traistre Iudas) trempées en eau Rose, appaisent les douleurs de teste, & les inflammations de la luette. Je ne veux pas oublier longuemēt qu'on fait du Sureau, qui est la chose la plus exquise qu'on pourroit dire, contre les brusleures, & voici la façon comme on le fait. Il faut prendre de l'escorce verte du Sureau, laquelle on trouue incontinent apres la premiere petite peau, & qui est de couleur d'herbe, vne liure (ou tant qu'il te plaira, ayant esgard à la quantité des choses suyuant) d'huyle lauë par plusieurs fois en eau distillee des fleurs de Sureau deux liures: faire bouillir cela ensemble quel que espace de temps, & apres qu'on les aura coulez & bien presséz, il y faut mettre de cire neufue & bien odorante, ensemble du suc
tiré

tiré des tiges du Surcâu, de chacun quatre onces: puis les faire encores vn peu de temps bouillir, iusques à tant que tout le suc soit entierement consumé: cela fait, les faut retirer de dessus le feu, & les bien remuer avec vne spatule, afin que le tout soit bien meslé: sur la fin, il y faut adiouster deux onces de vernix liquide, & deux blancs d'œufs, apres les auoir longuement batus avec vn cuillier: & finalement mesler le tout bien ensemble, & le ferrer en vn pot bien net, pour s'en seruir au besoin: J'ay prins ceci de Mathiol. Je vien maintenant au recit des facultez de l'Yeble. Les reiettonstendres, & les cimes du Yeble, qu'on peut aussi pareillement nommer Surcâu, cuits avec beurre frais, ou avec huyle & sel, laschent le ventre: & si on arrouse de la simple decoction des fucilles, elle fera mourir les puces. Le suc tiré de ses racines fait retirer le fondement qui sort, guerit l'esquinance si on l'applique chaudemēt sur la gorge, & qu'on mette au dehors vn lingetrempé dans ce suc. Si on laue tant & tant de fois sa semence, que le suc noir, qu'elle a autour s'en soit allé, elle fera apres fort propre pour donner dans la decoction de Chamepytis, aux goutteux & à ceux qui ont la Sciatique, & aux verolez ou mal de Naples: car par sa vertu laxatiue elle appaise grandemēt les douleurs, diuertissāt en partie les humeurs

qui tombent sur les parties malades, & les euacuent aussi en partie. La racine cuite en vin, & baillee à mâger, aide aux hydropiques, ouure les conduits de la matrice, & corrige les maux qu'y suruiennent. Aucuns tirent le suc des racines d'Yeble, & quant & quant le mettent au soleil, & le formét en petits pains ou trociques, pour les garder, afin de s'en seruir au besoin. Ce suc estant mis dans les clysteres, aneantit les douleurs tant des boyaux que de la hanche, si elles sont causees de froidures ou de ventositez. Il est aussi vtile à prouoquer les mois: si on le met aux parties secrettes des femmes, mesmement si on le reçoit avec laine, laquelle on mette apres de dans leurs lieux naturels. Il est fort bon & profitable d'estuuer, & parfumer avec la decoction d'Yeble: ceux qui ont esté detenus de l'ongue maladie, à cause de laquelle ils sont tōbez en vne mauuaise habitude: mais il faudra ce pendant fortifier l'estomach & le foye avec choses odorantes & astringentes propres & conuenables à celà.

Epilogue ou Conclusion.

I V S Q V E S ici nous auons traité autant briueuement qu'il a esté possible, mais non pas si soigneusement que nous eussions bien desiré, les remedes qu'on peut tirer des iardins

dins, & les facultez des plantes qu'y sont, avec la methode & ordre le plus conuenable & le plus clair, qu'il a esté possible: nos contentans neantmoins d'enseigner, & non pas enrichir par beaux discours. Et nostre principal but à esté de pourueoir aux pauvres gens, tant de la ville que des champs, comme la charité chrestienne le nous cōmande: qui ne peuvent pas auoir les medecins toutes les fois qu'ils voudroyent bien: & qui n'ont pas le moyen d'acheter bien cherement les drogues des apotichaires. Dauantage i'ay bien voulu faire ouuerture à ceux qui sont soigneux de la medecine, pour s'employer à dresser de tels iardins medecinaux à leurs patries & parés, selō la diuersité des lieux, & les enrichir encores dauantage s'il en a le moyen. Si ils se proposent ce but, ils donneront ordre & s'employeront à ce que l'ancienne medecine & l'vsage ancien de medeciner soit repurgé de toute tromperie & imposture, & remis en sa premiere splendeur comme de nouveau: dequoy la posterité receura vn grand & indicible profit.


F I N D V I A R D I N

M E D I C I N A L.

METHODE ARTIFIELLE POUR AVOIR DES FRUITS ES IARDINS, D'HER- bages, racines, raisins, vins, chairs, & bouil- lons, qui purgeront doucement & beni- gnement le corps, & par le moyen des- quels on pourra secourir à plusieurs & di- uerfes maladies sans fascherie, & sans que ils facent mal au cœur.

*Composée par Antoine Mizant docteur
medicin de Moluffon en
Bourbonnois.*

Epistre de l'auteur au lecteur debonnaire.

 L m'est souuent venu en la pen-
see (amy lecteur) d'où pouuoit
proceder ce qu'aujourd'huy
on a les remedes de medicine
si à contrecœur, si iamais on
les eut, & mesmement les composez: voire
plusieurs les haissent de sorte, que pour les a-
uoir, ie ne di pas veus ou goustez, mais seule-
ment entendus nommer, ils tremblent sou-
dain, le cœur leur souleue, & deuiennent pa-
fles comme s'ils estoient à demi morts. Et
cest pource que la medicine est venue tant di-
uerse & embrouillee (laquelle seule commā-
de aux Empereurs & Monarques (dit Pline)
que

que pour chasser & guerir vne maladie tant petite soit elle, il faudra faire vn amas d'herbes, racines, semences, fleurs, & autres choses qui ont bien souuent vn goust, & vne odeur bien fort mal plaisante, & entasser tant de diuerses sortes de medicamens, qu'apres auoir ordonné vne chartee de telles drogues tant bigarre'es & diuerses, comme si c'estoit pour faire vne farce: il faudra aussi que l'apotichaire les mesle, les trouble, les vire & tourne, & puis que les malades aualent cela qui est assez pour leur faire rendre leur gorge cent fois: au lieu qu'anciennement, comme Seneca mesme le tesmoigne, la medicine estoit simple & consistoit en la cognoissance de peu d'herbes, au contraire aujourd'huy elle est venue à vn tel meslange de drogues & medicines, que le seul regard d'en ouyr seulement parler, ou de les sentir, prouoque la pluspart des hommes à rendre leur gorge, ou pour le moins leur fait soufleuer le cœur comme nous auons ia dit par ci deuant: & bien souuent ils se deschargent & par dessus & par dessous, ne plus ne moins que s'ils auoyent prins quelque medicine laxatiue: selonque la vertu expultrice de leur estomach s'esmeut ou en haut, ou en bas. Et sur ceci Antoine Guainier medicin bien experimenté en la ville de Pauie, escrit qu'il a veu vn medicin du Duc de Sauoye, lequel en

rapportant des pillules d'une boutique d'apothicaire, pour les auoir seulement senties, il fut aussi bié purgé cōme s'il eust pris les pillules mesmes. Mais il me semble que le recit qu'Antonius Musa medicin fort renommé entre les Italiens fait, tant de soy que de sa mere & de sa sœur, n'est pas moins admirable que remarquable, & voyci quel il est. Il m'est aduenü que moy maniant de la Coloquinte, & l'ayant ouuerte en la presence de ma mere & de ma sœur, moy pour l'auoir seulement maniee, & elles pour l'auoir sentie, eufmes le vêtre esmeu, de sorte, qu'il n'y eut personne de nous qui n'allast dix fois à selle avec grande emotion. Il ne se faut donc pas esmerueiller, puisque ainsi est que par l'odeur des compositions ou ces medicamens forts & violens, & mesme i'oserois dire venimeux, entrent, & pour les auoir touchez ou sentis, ou goustez, le ventre en est esmeu, si l'imagination ou apprehension en offense quelques vns, & si fait en eux l'operation que feroit, s'ils auoyent pris vne medicine laxatiue. Et à ce propos ie veux reciter ce qui m'est aduenü à moy mesme quelquesfois. J'auois vn iour ordonné à vn certain prestre des pillules, lesquelles il haysoit fort, mais la maladie de laquelle il estoit pour lors affligé requeroit vn tel remede : Or luy ayant pris l'ordonnance par escrit, il porta tout ce iour vn billet en sa main

main estant en grand souci, ne pensant à autre chose sinon au moyen comme il se pourroit descharger de ses pillules, qui luy estoit vn fardeau fort pesant, & eust bien desiré, que quelcun autre les eusse aualees pour luy. Or sur le soir estant pressé du mal, & s'acheminant à regret vers l'apotichaire, aduint que le ventre luy fut tellement lasché & se deschargea d'une telle quantité de matiere, que le lendemain il s'en reuint tout ioyeux vers moy, & me rendit mon escrit, disant, que pour l'auoir seulement porté, il auoit esté sept fois a selle la nuit precedente, tellement qu'il se portoit bien, & qu'il me remercioit bien fort. Tu entens lecteur, tu entens combien peut, non pas seulement l'odeur ou le goust de tels medicamens, mais la seule apprehension, en plusieurs corps. Je feray vn autre recit que i'ay veu moy mesme de mes yeux, d'un personnage de scauoir, qui toutes les fois qu'il passoit pres d'une boutique d'apotichaire où on faisoit quelque medicament laxatif, l'ayant seulement senti, à grand peine auoit il loisir de retourner en sa maison, que il auoit le ventre tellement lasché, qu'il sembloit qu'il eust pris le medicament mesme. I'en cognois aussi vn autre, qui est d'assez bon lieu, & de maison notable, que s'il demouroit tant soit peu en la boutique d'un apotichaire, il sentoit son ventre tellement

esmeu, qu'il estoit contraint de sortir soudain, pour s'aller descharger, la faculté expultrice estant irritée par l'odeur de quelque médicament fascheux & puant, ou bien par l'aprehension de quelcun qu'il auoit en horreur, ce qui luy estoit cōmun avec plusieurs autres. Mais ie me suis assez arresté à ces choses, par lesquelles tu peux aisément recueillir (amy lecteur) que l'v'sage des medicaments est tellement odieux & fascheux à plusieurs, & contre leur naturel, qu'ils aymeroient mieux mourir cent fois, que d'estre ainsi bourrelez (car voilà comme ils en parlent) vne fois seulement, par ces drogues: & ce pour les raisons que nous auons ci deuant amenees. Moy donc recognoissant cela, suyuant les traces des anciens, & m'accommodant à la mignardise de ces gosiers tant delicats, seruant aussi aux estomachs douilletts & sēsibles: & pour plaire à la veuë & au goust de tous, me suis employé à recueillir ce petit traicté, de plusieurs bōs & notables auteurs, & les mieux receus & approuuez, lequel i'ay accru, corrigé, & augmenté en plusieurs endroits: lequel i'ay mis en lumiere pour le bien public. Ie desire & prie Dieu qu'il en puisse sortir beaucoup de bien.

*Methode pour faire par artifice: que les fruiſts des iardins, aſſauoir les herbes, racines, raiſins, vins, chairs & autres, purgeront tout doucement; & ſans aucune ſaſcherie ni dom-
mage.*

P R E F A C E.



LE grand & tant renommé me-
dicin Arnâud de Villeneuve,
enseigne au traité qu'il a fait
des reïgles generales de la cura-
tion des malâdies, qu'un pru-
dent & fidele medicin doit donner ordre &
trauailler sur tout; de chasser les maladies;
pluſtoſt par viandes qui ont quelque vertu
medicinale, que par pures medicines. Il faut
donc que le medicin bien aduiſé & ſage, em-
ploye là toute la dextérité de ſon eſprit & tout
ſon eſtude, que le gouſt & l'odeur & meſme
la couleur des medicamens laxatifs qu'il veut
faire prendre ſoit aux ſains, ſoit aux malades;
ſoit plaiſante & agreable, afin que les yeux
de ceux qui les doyuent prendre n'en ſoyent
point offenzés, qu'ils les ſenteſſent ſans regret,
& les ſauourent avec plaiſir & non pas à cō-
tre-cœur, & ainſi que l'eſtomach, avec le cōn-
ſentement de toutes les parties du corps, la re-
çoïue avec contentement: ce qui ſe doit faire
avec raiſon, car cōme les choſes de mauuaiſe
odeur & mal plaiſantes renuerſent l'eſtomach

& le faschent, aussi les choses de bonne odeur & plaissantes le resiouissent & fortifient: car la bonne odeur fait que le medicament n'est pas seulement plus plaissant, mais aussi les esprits animaux & vitaux en sont fortifiez avec plaisir: & voila aussi pourquoy les sains & les malades, fuyent volontiers les choses de mauuaise odeur. Les medicamens laxatifs donc doyuent estre bien plaissans entant qu'il se peut faire, afin qu'estans receus volontiers par l'estomach, & retenus ioyeusement, ils puissent tant mieux faire leur operation: & que pour estre mal-plaissans, ils ne causent appetit de vomir, ventositez & agitation de l'estomach. Si ceci qui est à la verité bien difficile, fut iamais à souhaiter, c'est de nostre temps: auquel les estomachs ne sont pas si facheux, comme les palaiz sont delicats, & mal aisez à contenter, intractables & ennuyeux: car s'ils oyent seulement le nom de medicament, comme si on leur parloit de quelque bourreau, sans l'auoir ni veu ni gousté, ils tremblent soudain, le cœur leur soufleue, ils sont esmeus, ils tressuent, deuiennent pâles, tellement que s'ils estoient morts ils ne changeroient en rien. Ce que moy considerant de pres, j'ay estimé que ie ferois vne bonne œuvre si selon ma petite portee, ie proposois quelque aisee & briefue methode, par laquelle on fust guidé & conduit pour desormais

mais pouuoir prédre en nostre iardin, sans aller plus loin, des herbages, racines, fruits, raisins, & pour dire en vn mot les viandes accoustumées desquelles on se pourra seruir au lieu de dogues & medicines laxatiues, & ce sans dommage & avec plaisir: lesquelles n'estans point moins plaisantes pour cela, seruiront pour tromper ceux qui puis apres en receuront vn benefice qu'ils n'attendoient ni esperoyent pas, pour le moins ceux qui n'en scauoient rien, qui sera vne bonne tromperie pour eux. Car soit qu'on les mange, ou qu'on les prenne en decoction ou autrement, ils purgeront le corps si doucement, & sans fascherie aucune, & le deschargeront de toutes superfluitez, & excremens qui luy faschent, que celuy qui les a pris, estimera n'auoir rien pris que les viandes accoustumées, ordinaires, & celles mesmes qu'il mange tous les iours, n'y ayant rien qui deplaise à la veüe à l'odeur, ni au goust, & l'estomach le receuant avec plaisir, & avec contentement de tout le reste du corps. Or il apert clairement que les premiers inuenteurs d'un si notable artifice & industrie, furent il y a deux mille ans, ou plus, les plus experts & industrieux agriculteurs d'entre les Cartaginois & Grecs, qui estoient aussi bien versez en la medicine; desquels comme de main en main ceste belle & salutaire inuention, paruint à Marc Caton

lequel l'orna grandement : Dioscoride l'approuua , Columela la cogneut , Pline la proposa, Iean Mesué l'entendit , Palade ne l'oublia pas & Arnaud de Villeneufue l'a enrichie grandement, mais l'experience des medecins modernes, qui sont estat d'esprouer les choses, & s'y prendre garde diligemment, l'a fort bien confirmee, & merueilleusement acreue. Bien heureux sont les medecins dit ce grand philosophe & medecin Arnaud de Villeneufue, auxquels Dieu a desparti la science des secrets de nature , & qu'il a fait tesmoins priuez de ses merueilles. Honore, dit-il, tels personnages, car le souuerain les a choisis, & les a quasi voulus faire compagnons de nature. Mais le mal'heur est, dit il, qu'il y en a plusieurs d'appeler à la medecine, mais bien peu d'esleus. Puis dōc que les choses sont ainsi disposees, il nous faut toucher la chose avec le doigt, comme on dit , & monstrier à chacun par vne façon bien aisee , comme on pourra deormais auoir en son iardin tant pour luy que pour ses amis, des remedes pour se purger doucement & sans fascherie ni dommage. Je vien donc des paroles au fait, comme on dit.

Comme il faut faire pour choisir & recouurer des matieres medicinales conuenables à faire ce que nous en voudrōns faire.

CHAP. I.

Avant toutes choses , il faut tascher
s'il est possible d'entrer en amitié avec
quelque medicin fidelle & bien versé: & en sa
presence aller vers quelque apotichaire ou
herboriste, qui soit bien fourni de toutes ses
drogues seruās à la medicine, & si on ne peut
faire autrement, il faudra choisir & mettre à
part, ce petit nombre de simples medicamēts
suyuans, propres à purger le corps: afin que
tu experimentes les matieres des iardins qui
ont diuerse faculté de purger: mais il faut que
ces medicamens soyent frais, & tant que faire
se pourra bien nourris & choisis entre plu-
sieurs, & non pas sans suc, vermoulus, flectris,
puans, & par consequent sans force ni vertu,
& du tout inutiles à ce que tu en veux faire.
Que s'il n'est possible d'ē recouurer de si exa-
ctement bons, pour le moins il faut qu'ils en
aprochent le plus que faire se pourra: & lors
qu'on les voudra mettre en besongne & s'en
seruir, il les faudra bien monder, lauer, & si
fait besoin, les concasser grossierement & les
faire tremper vn iour entier, ou seulement
quelques heures comme nous monstrerons
en eau, ou en quelque autre liqueur propre
& conuenable: or afin qu'ils reprennent leur
premier naturel, & leur force & vigueur
qui s'en alloit perdue, & que tu ne trauailles
en vain & sans profit, il y faudra proceder par

l'ordre & methode que nous dirons. Toutefois auant qu'en venir là, ie croy qu'on prendra plaisir & profit d'entendre & scauoir les facultez des medicamens, desquels on veut abruuer les plantes des iardins pour les rédre laxatiues, selon le but & intention que tu pretens. Nous commencerons donc par le role, & recit des medicamēs dont M. Caton, & auant luy les agriculteurs & medecins Cartaginois & Grecs, vsoyent coustumierement pour ceste fin : pour venir puis apres aux observations des modernes, lesquels nous sauōs estre riches & abondans en la cognoissance de plusieurs secrets de nature. L'Ellebore, & sur tout le noir, duquel les anciens ont principalement vsé, purge la colere, la melancolie, & la phlegme. La Coloquinte euacue la phlegme, l'humeur bilieux, & les matieres visqueuses des nerfs. La Scāmonee (qui est le suc d'une plante aussi appelee Scammonee) & le Diagrīde, ou Scammonee preparee, purgent la melancolie & l'humeur bilieux qui sont parmi le sang, & es parties esloignees, tout ainsi que la plante mesme. Toutes les especes de Tithimale, desquels Esula est vne espece, euacuent la phlegme, les eaux & la colere noire. Le Concombre sauage, ou Concombre d'asne, le suc duquel on appelle Elaterium, purge la phlegme & les humeurs gluans & visqueux qui sont es parties nerueu-

ueufes . Le Turbith , euacue la phlegme.
L'Espurge les eaux & la phlegme : cōme fait
aussi la grande Catapuce, ou Palma Christi.
La Thymelea , qui est nommee des Perfes
Mezereon, purge les eaux, la phlegme & l'hu
meur bilieux. Voyla de quoy se seruoyent les
anciens pour rendre les arbres & les vignes
laxatiues & propres à medeciner. Que si quel
qu'vn allegue que ce sont tout drogues vio
lentes, & pourtant dangereuses: ie respōd à
cela que leur violence est changee & repri
mee par le meslange des suc de qualité con
traire, avec lesquels ils se meslent, & sont ren
dus comme vn mesme corps & transubstan
ties s'il est permis d'ainsi parler: Je di d'auan
tage que leur force & violence est rompue,
& s'il y a quelque qualité dangereuse elle est
reprimee, par la voye, le moyen & le temps
du changemēt & mutation qu'ils reçoieūt:
outre les autres causes que ie laisse . Les mo
dernes qui sont soigneux & diligens à récer
cher & examiner de pres les secrets de natu
ture, assurent pour l'auoir souuent experi
menté, que les arbres, les vignes, racines &
plantes, seront aussi rendues medicinales &
laxatiues, par le moyen des simples medica
mens laxatifs qui sont aujourd'hui en vsage,
& qui n'ont pas vne telle violēce que les au
tres: Comme sont le Polypode, l'Epithy
me, le Carthame ou Safran bastard, le Sc-

né, les Hermodactes, l'Agaric, le Rhabarbe, les Tamarins, les Myrabolans & autres, comme nous dirons tantost apres. Ayant donc mis ces fondemens & principes, ie vien au moyen comme il faut faire pour rendre ainsi les plantes medicinales, que nous pouuons aussi nommer medicine des Arbres.

*Comme il faudra faire pour rendre laxatifs, les
fruits des Arbes choisis, & qu'ils purgent
le corps doucement & sans fascherie.*

CHAP. II.

QVand tu voudras auoir des fruits qui ayēt vertu de purger, ou qui ayēt quelque autre vertu & faculté, comme nous monstrerons, il te faudra choisir vn arbre entre les autres de telle espeece que tu voudras, mais qu'il porte bons fruits & plaisans, qui soit petit & non gueres esleué de terre, ieune qui n'excede pas deux ou trois ans, nourri en lieu ouuert & libre, nay en bō terroir & fertile, & exempt de tout dommage & iniures, tant des hommes que des bestes. Or quād ce viendra à l'entree du printemps, lors que tous les arbres commencent à produire & bourgeonner, ou quelque temps au parauant, selon que la saison de l'annee & la nature le requerra, il te faudra ouurir & fendre vn tel arbre, au bas du tronc vn peu au dessus

dessus de la racine, mais il te faudra prendre garde de n'offencer pas l'escorce: mais la traicter doucement: Puis ayant mis des petits coins d'os ou de bois, dans la fente, tu la feras ouurir de la longueur d'une paulme & demie, plus ou moins selon la portee de l'arbre: & incontinent il te faudra oster la mouëlle de l'ouuerture que tu auras faicte, si ainsi est qu'il y ait de la mouëlle au tronc. Mais si l'arbre ne peut souffrir d'estre fendu, il faudra percer avec une tariere un peu plus outre que la matrice ou le cœur de l'arbre, & avec quelque instrumēt propre pour tirer quelque portion de la mouëlle, ou en son lieu du cœur de l'arbre. Iean Mesué se contente de faire deux ou trois petits trous à l'arbre, distant d'une paulme l'un de l'autre, sans point oster de la mouëlle, comme nous dirons bien tost: Que si encores l'arbre ne peut pas porter d'estre percé avec une tariere, il y faudra proceder par autre voye comme nous enseignerons cy apres. Apres donc que tu auras bien nettoyé la fente ou le trou, il le te faudra farcir & remplir de quelqu'un des medicamens susdicts, asçavoir d'Ellebore noir pilé, ou de Scammonee ou de suc de Coloquinte, ou de Elateriū ou autre, selon l'humeur que tu auras intention d'euacuer, mais il te faudra premieremēt un peu piler, ou si besoin fait mettre en infusio,

& se souuenir du prouerbe, qu'il faut tout faire par mesure: Car il ne faut pas qu'il y ait là rien de pressé ni trop serré, afin que l'arbre puisse tirer sa nourriture, & que la transpiration soit libre, & que la force & vertu du médicament puisse estre portee en haut avec la nourriture, par le conduit de la mouëlle ou du cœur de l'arbre, & estre distribuée & departie lors que le fruit se forme & croist: Cela estant faict & bien accompli, il faudra oster les coins & rassembler les costez de la fente, & les agencer & ioindre si propremēt qu'il n'y demeure point d'ouuerture, afin que rien ne s'esuente: & sera bon de mettre sur la playe l'emplastre de Caton, lequel est composé d'argile ou croye & de sable avec laquelle on melle de la fiente de bœuf fraîche, & pestrie iusques à ce qu'ils soyent gluants. Aucuns se contentent, avec Columele, d'enduire l'ouuerture avec argile ou terre grasse biē broyée avec de la paille, & en la partie supérieure de la playe ils mettent de la mousse, du glazon, de la cire, ou de la poix enuelpée avec escorce tendre, afin que la pluye ne entre dedans, ou que l'arbre ne soit offensé par la froidure, bruine, neige, gresle ou autre mēt, finalement il faut bien attacher le tout avec vn ozierou avec quelque autre lien, de peur que les matieres n'espanchent, ou que les bestes ne les fassent sortir hors de leur place. Il

ce. Il faudra auoir le mesme soin & obseruer les mesmes choses quād il faudra fermer les trous qu'on aura fait avec la tariere, hormis qu'il faudra ficher dans le trou vne cheuille de mesme grosseur que la tariere, dont on l'a fait, de sorte que le trou soit bien fermé de toutes parts. Ces choses estans exactement & proprement accomplies, il faudra laisser l'arbre en son naturel, afin qu'il puisse produire & bien nourrir ses fruiçts (aidé de la saison) lesquels estans paruenus à maturité seront cueillis en leur temps, & lors tu cognoistras par experience qu'ils auront la mesme faculté qu'auoyent les medicamens que tu as mis dedans l'arbre: qui sera pour verifier le proverbe, asçauoir que l'enfant suit le naturel du pere qui l'a engendré. Iean Mesué docteur excellent en la medicine des Arabes, enseignant le moyen de faire des Prunes qui lascherōt le ventre, & purgeront le corps, en escrit en ceste sorte. On perce, dit-il, le prunier en deux ou trois lieux, les trous estans petits & distans l'un de l'autre d'une paumē, & ayant mis de la Scammonee dās les trous on les bouche tresbien avec argile, & par ce moyen les prunes sont rendues laxatiues. On les baille en leur suc, ou en decoction avec Sucre, au poids d'une once: & croy que en ce lieu là les exemplaires sont corrompus, car il y a vne liure au lieu d'une once. Au re-

ste il se faudra soigneusement prendre garde que tels arbres ne soient gastez par les chenilles, ou autres animaux qui ont de coustume de broutter & destruire les arbres: ce que on void toutesfois aduenir bien peu souuēt, comme on s'en est apperceu par-ei deuant, à cause de la vertu medicinale laquelle s'espād iusqu'aux fucilles: aussi auōs nous remarqué qu'elles seruent à plusieurs choses, & auons peu souuēt veu les fruits de tels arbres produire & engendrer des vers.

Cinq autres moyens pour mediciner les arbres, à fin qu'ils produisent fruits qui purgent doucement le corps.

CHAP. III.

QVand tu auras choisi les arbres tels que nous auons dit ci-deuant, & qu'ils commenceront à entrouuir leurs bourgeons plains de seue, & à espanner leurs boutons, qui sont cōmencemens de leurs fleurs, il les faut lors diligemment deschausser, comme on deschausse les seps de vigne, iusques aux plus petites racines. Quand donc elles seront descouuertes, & que tu les auras bien nettiees, il te faudra mettre tout au tour, & dessus & dessous, quelques faisceaux, ou (pour parler comme les medecins parlent, ou plustost comme Caton parle; à la façon rustique) quelques manipules ou poignées de ces
medi-

medicamens dont nous auõs cy deuant fait mention, apprestez, comme nous auons ordonné, & les enseuelir & enterrer ensemble avec les racines, mettant la terre par dessus deuëment mistionnee avec du bon fient: que si la saison est seiche, il sera bõ de l'arrouser par fois, le soir ou le matin: car cela resiouira l'arbre, & le maintiendra en sa naturel le vigueur iusqu'au temps de la collecte de ses fruiçts. C'estoit icy la façon dont les anciens vsoyent pour medeciner les arbres.

Ceux qui sont d'un naturel plus subtil, & qui s'employent à rechercher plus particulièrement les choses secrètes, m'ont rapporté auoir essayé le moyen suyuant avec heureux succez. Sur la fin du mois de Mars ils coupent quelque branche notable de la racine d'un arbre, & à ce tronc coupé, du costé qu'il tient au pied de l'arbre, ils approprient un pot de terre plein de ces drogues medicales & laxatiues, & le bouchent bien de toutes parts, tellement que rien ne se puisse eschapper ou esuëter: puis ils remettent la terre par dessus & laissent là l'arbre iusqu'à ce que le temps de recueillir ses fruiçts soit venu, lequel estant escheu, & le printemps cõmençant à reuenir, ils reiterent la mesme operation si besoin fait. Ce qui est fort semblable à ce que nous auõs veu practiquer à de bons Architectes, & experts charpëtiers, lesquels de-

firans d'auoir du bois bien madré & marqué-
té de diuerſes couleurs, yſoyent de ceſte meſ-
me adreſſe: Si quelqu'un au lieu de mettre
dans le pot des drogues medicinales & laxa-
tiues, y met quelques ſenteurs, ou quelque
eau de ſenteur, ou quelque choſe ſemblable,
& les enterre comme il a eſté dit, il ſera eſ-
merueillé que non ſeulement les fruits, mais
auſſi les fueilles, & les eſcorces en auront l'o-
deur. Ceci m'a eſté notammēt aſſeuré par
vn mien ami, nommé Pierre Belon, homme
qui s'eſt aſſez fait cognoiſtre par les liures
qu'il a mis en lumiere, & par la deſcription
de ſes voyages & peregrinations tant de l'A-
frique que de toute l'Europe, qui aſſeuroit
l'auoir eſſayé en l'année 156. & le meſme me
diſoit vn peu deuant qu'il fuſt tué par le glai-
ue d'un certain brigand, où comme on tient
par ſon propre glaiue & par la main d'un
ſien ſeruiteur, non gueres loin des faux-
bourgs de Paris, allant viſiter les iardins du
Roy, deſquels il eſtoit ſurintendant, par le
commandement de la Royne mere.

Tu pourras faire le meſme en vne autre fa-
çon plus aiſée: Auant que l'arbre que tu veux
mediciner monte en ſeuë, il faut deſchauffer
ſes racines tout au tour, prenant garde de les
bleſſer, de bleſſeur qui leur porte dōmage,
puis il les faudra arroſer petit à petit de l'eau
où les drogues ou herbes medicinales, pro-
pres &

pres & conuenables au but où tu pretendz, ayent trempé & infusé, ce qu'il faudra reitterer par quelques iours, ou pour le moins le rafraeschir vne fois la sepmaine, iusques à tant que la fleur de l'arbre soit tumbee, & que le fruiet s'apparoisse manifestement. Si la bise soufflé & qu'il gele, il te faudra dōner ordre de les garder du froid : ce que tu pourras aisément faire en mettant sur la racine de l'arbre force paille, & puis par dessus du fumier bien gras : pourueu que le fumier ne touche pas l'arbre, de peur que par sa chaleur pourrie il ne le face mourir. Mais pour te garder de tous ces dangers, il ne faut sinon attendre que les froidures soyent passees. S'il aduient que l'Esté soit chaud & sec, il te faudra arroser ton arbre le matin à l'aube du iour, & le soir le Soleil estant couché avec la mesme infusion, mais plus trempée que la premiere. Ceste façon est bien facile & aisée à preparer; car chacun peut aisément recouurer des plantes laxatiues, & suiuant le rolé que nous en auons mis au premier chapitre, choisir celles qui seront propres à son intention, & les ayant vn peu concassées, les faire tréper vn iour entier en vne bonne quantité d'eau; & finalement en vser à la façon qu'il a esté dit. Arnaud de Villeneuue en sō traitté qu'il a fait des œuures pour medeciner les arbres, plantes & vignes, tiēt que ceste façon est la

plus excellente, comme nous dirons en son propre lieu: car la mauuaise des choses se change fort, par la mutation de leur faculté en vne autre substance: parquoy, dit-il, ces fruits purgent facilement, sans aucun danger ni domage.

Si d'adventure tu n'as pas en tō iardin ou chāp, de ces ieunes arbres propres à faire comme nous auōs ia dit: tu te pourras aider d'un arbre tant gros soit-il, en ceste maniere. Choisi de c'est arbre vne branche notable & bien nourrie, laquelle il te faut percer avec vne tariere, ou quelque autre instrumēt iusques à la mouelle, ou iusques au cœur, & plus outre encores, faisant l'ouuerture assez grande selon la grosseur de la branche: cela fait il faut remplir le trou des drogues que tu auras preparees, comme il a esté dit cy dessus, puis le boucher, couvrir & lier: & ainsi le laisser faire iusqu'à ce que les fruits soyent meurs, lesquels tu trouueras fort laxatifs, sans que les fruits des autres branches du mesme arbre s'en sentent aucunement. Ce moyen est tellement certain & bien esprooué, que ie puis dire auoir veu quelquefois vn pomier tellement agencé & accoustre par vn diligent & adroit laboureur, que i'auois enseigné, ayant parlé à luy vne fois ou deux seulement, qu'en vn mesme arbre il y auoit quatre branches ayans toutes diuerses

facul-

facultez de purger, selō la diuersité des drogues qu'on y auoit mis, & quatre autres brâches desquelles les pōmes estoient diuerses en odeur & en saueur: ce qui n'estoyt point aduenū pour les auoir entées, ni par autre sorte de deguiselement que celuy que i'ay dit. Il y auoit encores vne autre chose en cest arbre qui estoit admirable, asçauoir que les fauilles ni les fruiçts des branches laxatiues, n'estoyent aucunement offencecs par les Chenilles, & le reste de l'arbre en estoit tout rongé, & gasté. Le vien aux autres façons de medeciner les arbres, afin que tu puisses choisir entre plusieurs, laquelle tu voudras.

Aucuns transplantent en temps propre & conuenable, les arbrisseaux qu'ils veulent medeciner: tellement toutesfois, qu'ils mettent bonne quantité de ces herbes medicales au lieu de fiens, dans la fosse qu'ils ont faite pour les replanter, les agençant autour des racines: cela fait, ils iettent la terre par dessus, meslee avec du fiens bien gras. Que si l'Esté est chaud & sec extraordinairement, comme il est es iours Caniculaires, ils arrousent ces arbres à heures propres & conuenables, avec d'eau de l'infusiō des mesmes herbes qu'ils ont mis dans la fosse.

Autres moyens fort faciles, aisez & bien esrouuez.

AVcuns fuiuans le conseil de Dioscori-
de, font semer plusieurs semences de plâ-
tes laxatiues, au pied de l'arbre qu'ils veulent
rêdre medicinal, ou ils y plantent les plantes
mesmes, & mettēt si auant leurs racines qu'el-
les sont entremeslées parmi celles de l'arbre,
s'il est possible: or pour les garder de seicher
& tairir, ils les arrousent souuēt & en temps
propre, & par ce moyen ils font aussi que la
vertu laxatiue des plantes, est cōme condui-
te à la racine de l'arbre pour luy seruir de
nourriture; puis par la vertu que les racines
ont d'attirer & de sucser, pour entretenir la
vie de l'arbre & de ses parties, ceste faculté
monte peu à peu iusqu'au fruit: mais il fau-
dra tellemēt approprier ces plantes, qu'elles
enuiroignent le tronc de l'arbre tout au tour
comme vne corōne, car l'arbre receut quel-
que chose, par vne transpiration insensible,
de la vapeur que ces plantes iettēt & produi-
sent. Ce que nous ne deuons pas trouuer e-
strāge ou esloigné de raison: car nous voyōs
plusieurs fruits d'arbres, tenant du goust &
de l'odeur de quelques plantes, qui naissent
pres de leurs arbres, ou pour le moins non
gueres loin: ainsi voyons-nous quelquesfois
des pommes qui sentent le Chou, pource
qu'il n'en est guetes loin, & qu'elles re-
çoient la vapeur & la senteur nuit & iour,

& en sont embuës d'une façon qu'on ne peut voir, par le moyen de l'air : Voyla d'où vient que nous voyons des vins plus propres à faire vriner les uns que les autres, encores que ils soyent creus en une mesme contree & en un mesme fons : ce que ie croy deuoir estre attribué à quelques plantes ou racines, qui viennent aupres des seps, qui ont ceste vertu de faire vriner.

Il s'en est aussi trouué qui ont répli les fenestres & pertuis des arbres qu'ils vouloyét rendre medicinaux, selõ la façon que nous auõs premierement enseignée, de medicamẽs laxatifs composez, accomplissans tout le reste comme nous auons dit : mais s'ils s'en sont bien trouuez ou non, ie n'en ay encores rien entendu d'eux.

I'en ay cogneu qui arrachoyent par force une branche d'un arbre qu'ils auoyent choisi, tellement mesme que ceste brâche emportoit avec soy quelque chose de l'arbre, & estoit chargée de trèsbons fruiçts & en abondance, puis mettoyẽt ceste brâche en un pot de terre, ou en une caque de boys pleine de terre bien fumée, & l'enfouissoyent bien profond, mettant avec dans la caque des plantes qui fussent laxatiues, & au tẽps des grandes chaleurs d'Esté, ils arrousoyẽt abondammẽt ceste branche avec eau de l'infusion de mesmes plantes, soir & matin: reiterans celà, par

intervalles toutesfois, iusques à ce que les fruits fussent paruenus à leur grosseur & maturité; Or que ceste façon soit bonne & véritable, il m'a esté acertené par vn moine de l'ordre de ceux qu'on appelle Celestins: affirmant qu'il n'auoit vsé d'autres plantes pour ce faire, sinon de celles qui croissent dans les iardins cōmuns de leur conuent, asçauoir de l'Espurge, de Palma Christi, de Titimale, de Violette de Mars, de Maluë & seblables: par le moyē desquelles & en la façon qu'il a esté dit, il auoit des cerises, des prunes, d'abricots qui laschoyent le ventre doucemēt & sans facherie, iusqu'à faire faire trois, quatre, cinq celes, ou plus ou moins, selon la quantité qu'on en auoit prins. Mesmes il disoit qu'il en auoit acquis la bōne grace & faueur de plusieurs grāds personnages & riches, auxquels il auoit fait part de ses fruits medicinalx: ce que i'ay bien voulu escrire & remarquer en ce lieu, pour induire & inciter chascun de prouuer telles inuentiōs, desquelles on peut tirer & plaisir & profit.

Je mettray pour le dernier vne chose que i'ay experimentee vne fois ou deux heureusement, & dont i'ay eu l'issue telle que ie desirois. Il se trouue de fortes de pommes fort primeroges & de peu de duree aussi, lesquelles on plante & nourrit dās des grās pots de terre ou de bois: quand ie parle de pom-

mes i'enten à la façon des Latins, qui prennent ce mot pour toutes sortes de fruiçts qui ont l'escorçee mole & deliee. Quand doncques les arbres qui les portent, qui sont fort petits, sont defleuris, & que le fruiçt n'est pas encores formé, mais il commence à se former, alors i'arrouse & trempe ces fruiçts qui sont encores tendres & comme laiçt distilant, tout doucement par dessus cōme si ie les vouloys allaiter, en quelque liqueur où les medicamens laxatifs que i'auoys choisi, comme propres & conuenables à mon intention, auront trempé, & ce en temps & heure qui me semblera propre: & continue de faire cela quelques iours, me contentant de petit nombre de fruiçts & d'arbres: bien est vray que ie choisis tousiours les mieux nourris, & ceux qu'on a le plus soigneusement cultiuez. Si la saison est fort chaude & seiche, tellement que ie me apperçoyue qu'ils ont soif, ie les recrec en les arroufant avec mēme liqueur, à heures propres, & à cause de la grande secheresse i'abreuē la terre alteree, iusques à ce quelle soit toute trempe & cōme enyuree, le me contente d'auoir discoursu briuevement ces choses, touchant les manieres de faire que les fruiçts seront rendus laxatifs, & lascheront le ventre. Il nous faut maintenant traiter les autres manieres de medier

les arbres, lesquelles seront fort plaisantes & profitables.

Autre maniere de mediciner les arbres, pour des effets particuliers: qui sont fort belles & dignes d'estre remarquées.

CHAP. V.

SI tu desires de tirer des arbres de ton iardin, d'autres remèdes que les précédens (lesquels n'estoyent appropriez à autre chose qu'à l'ascher le ventre, & à purger l'humour que les drogues mesmes eussent euacué), tu pourras faire que tes arbres produiront leurs fruits de telle faculté que tu voudras, & propre au but & intétion que tu te proposes, par les moyens ci-deuât enseignez. Si donc tu veuX auoir des fruits pour t'en seruir contre la peste & contre les venins: au lieu des medicamens & drogues laxatiues, tu pourras prendre de bonne Theriaque, ou du Mithridat, ou des racines qui seruent de preseruatif, & autres telles choses resistans à la peste & aux venins, desquels nous auons fait vn assez ample catalogue en nostre traicté des secrets contre la peste, & d'iceux abreuer tes arbrisseaux à la façon que nous auons dit. Que si tu veuX auoir des fruits qui fassent dormir, il ne faudra sinõ approprier de plantes, racines & semences qui
ayent

ayent eeste faculté de faire dormir, par vn
mesme ordre & methode. Mais auant que
mettre fin à ce discours, ie veux produire vn
discours que Iean Langius fait contre les lar- *Gentil se-*
rons de fruiçts des iardins & des arbres. Ie *cret contre*
n'ay iamais dit il, aperceu que les Cantarides *les larrons*
seruent à rien mieux qu'à ceci, ascauoir, si tu *de fruiçts.*
mets leur poudre toute crue dans les Pômes,
Prunes, Figues, Pefches, & autres bons &
beaux fruits, qui sont encores sur leurs petits
arbres, & ayant retiré la peau, tu caches la
fente, où tu as mis ladite poudre, afin qu'on
ne s'en apperçoyue pas: car s'il aduient que
les larrons desrobent ces fruits, & qu'ils les
mangent, ils auront vne douleur d'vrine, & v
ne difficulté qui descouurira leur larcin, & se
ra comme vne iuste punition de leur malefi-
ce: Mais de ces choses il vaut mieux s'en taire
que d'en escrire dauantage. Le lecteur dili-
gent & de bon esprit, pourra inuenter mille
autres adresses & gaillardises plaisantes & v-
tiles, sur les projets, & traicts grossiers que
nous en auons ici donné: car comme dit le
prouerbe, à bon entendeur peu de paroles.

*Pour faire auoir aux fruits tel goust, tel odeur,
& telle couleur qu'il te plaira*

C H A P. LV I.

CE que nous auons discoursu iusques ici
des façons & moyens de medeciner les ar-
bres, peut aussi seruir pour les mesmes adre-

ses, faire auoir à tes fruits tel goust, tel odeur & telle couleur que tu voudras, y appliquant des choses propres & conuenables à ton intention, lesquelles tu pourras choisir. Par ce moyen donc tu pourras faire que tu auras des fruits tousiours aspres & rudes, quelques meurs qu'ils soyent, d'autres aigres, d'autres doux, & du goust du miel, ou du sucre: tu en pourras auoir qui sentiront le musc, la canelle, ou autre tel odeur, ou faueur, ou plaisante, ou facheuse: & pour dire en vn mot, telle que le bien-adroit ouurier voudra & souhaitera: or que ceci soit veritable ie ne le puis pas asseurer, tant pour l'auoir ouy dire, comme pour en auoir senti & gousté moy-mesme par plusieurs fois: voire mesme (ce que ie croy bien que plusieurs ne croiront pas) i'ay quelque fois veu, manié, ouuert & gousté des Meures iaunes, des Poires rouges, des Pommes de couleur cœleste, tant par dehors, que par dedans, chacune pendant à son arbre, qui estoit certes beau & plaisant à merueilles: vray est qu'elles n'auoyent aucun goust ni faueur en quoy on peut prédre plaisir: car il auoit esté corrompu par le fard de la couleur, de sorte que tels fruits ne seruoient plus de rien, sinon de repaistre les yeux & non pas la bouche. Ceux s'en esmeruilleront qui ne sauent pas, ni entendent qu'il y a beaucoup de choses en ceste grande machine du monde,

monde, lesquelles on tient comme miracles, & qui ne sont aduenues, sinon par l'adresse & industrie des gens de bon esprit, par la diligence & façons de desguiser, enter, & plâter de plusieurs: parquoy il me semble que le poëte a fort bien dit.

*Pour le profit inuentez & cogneus
Sont plusieurs ars, beaucoup d'experiences,
Par grands labours les hommes sont venus
A esprouuer les effets des sciences.*

Or ce que plusieurs ignorent la cause, fait qu'ils en sont estonnez cōme d'un miracle, & pensēt que ce soit vne chose cōtre nature: ce qui se peut voir, tāt en ce que nous auons traité iusques ici, qu'en ce que nous traiterōs encores par ci apres, & principalement és diuerses façons d'enter & en la diuersité des fleurs: par le moyen desquels comme aussi par diuers artifices, & desguisemens artificiels de medicamens & couleurs, nous voyons aduenir bien souuent qu'un mesme arbre produira des fruits de diuerses especes, de diuers goust, de diuerse odeur, couleur, & faculté, mesme produira des Pommēs, des Noix, des Rafins, des fleurs & autres choses. Ce que ie veux monstrier clairement par deux exemples presque incroyables, encores qu'il pourra sembler que ce soit hors de propos.

Description de deux arbres fort grands & admirables.

C H A P. V I I.

C'EST un pareil truchement de nature, as-
 sauoir Plin, escrit d'un certain arbre
 fort remarquable comme s'ensuit. Nous au-
 uons veu un arbre enté aupres de Tiuali,
 chargé de toutes sortes de fruits: Vne
 branche estoit chargée de Noix, l'autre de
 Bayes, l'autre de Raisins, l'autre de Figues,
 Poires, Grenades, & de plusieurs sortes
 de Pommes: mais il ne vesquit gueres: voila
 ce qu'il en dit. Mais l'arbre que Ieā Baptiste
 Porta, Neapolitain décrit, en son traicté de
 la Magie naturelle, me semble bien endores
 plus admirable & monstrueux. Nous auons
 dit il, veu & cogneu, un arbre qu'on appelloit
 communément le delice, & plaisir des iardins,
 qui en sa grosseur & grandeur n'estoit pas
 mal-plaisant. C'est arbre estoit miparti en
 trois grosses branches: en l'une on y cueil-
 loit de deux sortes de Raisins qui n'auoyent
 point de pepins, & estoient de diuerses cou-
 leurs & medicinaux: car les vns prouoquoient
 à dormir, & les autres laschoient le ventre.
 La seconde branche portoit des Pesches, pro-
 duisant par interuales des Pesches, & des noix-
 pesches separément, sans qu'il y eut point de
 noyau dedans: que s'il s'en trouuoit quelcun
 qui eut noyau, il estoit doux & de bon goust
 comme vne Amande: & mesme representoit
 la face tantost d'un homme, tantost d'une be-
 ste qu'autre animal, ayant diuers lineamens.

La troi-

La troisieme produisoit des Cerises sans noyau, & des aigres & des douces, ensemble des Orangēs. Son escorce estoit toute semee & comme composee de fleurs & de Roses : au reste, ses fruits surpassoyent la grosseur ordinaire, & estoient plus doux beauconp, & de meilleure senteur que les autres. Il iettoit sa fleur au printemps, & nourrissoit ses fruits plus outre que du temps legitime: car ils demouroient sur l'arbre, & par sa faculté continue, il suppeditoit des fruits toute l'année à chacun: car les fruits venoyent par ordre les vns après les autres, & la portee se renouvelloit. Les branches estans courbees panchoyent bien fort. Bref le ciel & la terre fauorisoÿēt tellemēt à cest arbre, qu'en ma vie ie n'en vis vn plus beau ni plus plaisant: voilà ce qu'il en dit. Laquelle histoire d'un arbre si exquis, nous auons bien voulu ici mettre en auant pour faire entendre à chacun

*Combien vaut l'art, combien peut l'industrie:
Combien l'enter rend les iardins fertiles:*

D'herbes medeciner tant de façons gentiles:

Tointes avec labeur, qui de repos n'a enuie

Inuenteur de tous arts-

Mais sans m'arrester à parler de la façon d'enter, de laquelle i'ay fait n'y a gueres, vn traicté à part, ie reuiens à mon propos, duquel ie me suis voulu aucunement destourner, en ayant trouué quelque occasion pour

monstrer que l'inuention d'enter, iointe avec la façõ de mediciner les arbres, sont des choses admirables, principalement quand l'ouurier est bien instruit & adroit.

De la façon comme il faut cueillir, serrer, garder & user des fruiçts medicinaux, & des autres choses qu'il faut observer en cest art.

CHAP. VIII.

A Vant qu'entrer en la tractation de la matiere proposee, ie yeux aduertir ceux qui seront curieux de cest art, que tant plus petits seront les fruiçts des arbres qu'on voudra mediciner & plus mols, tant moins il faudra de matiere, & tât moins les faudra il arrouser & y auoir de peine: & au contraire quand ils seront gros & durs. Nous mettons au premier reng le Cerisier, Meurier, Prunier, Peschier, Auât-peschier, Abricotier, Oliuier, & Vigne. Au second nous mettõs le Pommier, Poirier, Coignier, Amandier, Noyer, & semblables arbres. Or & les vns, & les autres de ces fruiçts, ne mōstrerõt point leur vertu medicinale, qu'ils ne soyēt paruenus à maturité. Estãs dõc meurs, il les faudra cueillir vn iour clair & ferein, enuirõ la nouuelle lune, lors q le soleil sera desia biē haut, & les prédre tout doucement, se prenāt garde de ne les casser, ou blesser en sorte q ce soit, puis les faut serrer en lieu propre & cōuenable pour s'en seruir au besoin, cōme nous auõs enseigné en nostre

stre traité des secrets des iardins. S'ils ne sōt pas de garde, ou pource que la saiso à esté sujette au vent de midj & à la pluye, de sorte que à cause de ce, ils sont fort dangereux de se gaster & corrompre: ou biē pource qu'on les a cueillis en temps de pluye & de bruynne, qui fait qu'ils sont pleins d'humeur superflu, vraye cause de pourriture & corruption: sans rien attēdre, il les faudra mettre dans le four chaud (à faute de le pouuoir faire au soleil) ou sur des clayes aupres du feu: & s'ils sont petits & tendres, on les y pourra mettre tous entiers, mais s'ils sont gros & durs, il les faudra fēdre en deux ou en quatre, & les nettoyer des grains de dedās, mesme leur oster l'escorce, & les faire seicher peu à peu: estās ainsi accoustrez, il les faudra ferrer dans des pots ou cabats bien nets, garnis de papier au dedans, & les garder soigneusement. Si tu trouues bon de les confire à la façon accoustumee, tu feras biē, & pour ta santé. Le moyen comme il en faut vser, c'est ou de les manger ainsi entiers, ou bien les faire cuire & mâger le bouillon, comme on fait des Pruneaux au tēps qu'on mange le poisson & qu'on ieufne. Quant au temps qu'il est bon de les manger, c'est le matin, ou bien vn peu deuāt le repas, & mesme par fois auant que s'aller coucher. La quantité il la faudra mesurer selon la portee de chacun, ayant esgard à l'aage, au sexe,

à la complexion, & selon que chacun sera aisé ou malaisé à esmouuoir, & selo que la drogüe de laquelle on aura abruué l'arbre, sera forte & violente, ou foible & benigne: pour laquelle chose il te faudra prendre le conseil & aduis de quelque docte & prudent medecin, dequoy ie prie comme ami & t'en exhorte bien fort. I'auois quasi oublié de dire qu'il faut biē serrer & garder les noyaux & les pepins de ces fruiets medicaux; d'autāt qu'ils ont vne singuliere vertu; ie ne di pas seulement contre la vermine du ventre, & pour ouurir les opilations du foye, mais aussi contre plusieurs autres choses; desquelles i'aime mieux me taire du tout, que non pas d'en parler seulement en passant & en peu de paroles. Ils ont ceci de singulier entre autres choses; que si on les plante, les arbres qui en prouideront auront ie ne scay quoy de medicinal: ce qui se trouuera à grande peine aux reiettons ou rameaux qu'on prendra de tel arbre; pour le plâter & prouigner ailleurs: non pas mesme si on veut plâter en autre part l'arbre medicinal. Car ayant perdu sa nourriture naturelle, & le suc dequoy il estoit entretenu; & d'où il tiroit sa faculté, & estant comme priué de la mammelle de sa nourrisse; & ayant laissé son premier laiēt, il ne se faut pas esbahir si laissant son premier temperament, qui estoit medicinal, il change & en préd vn autre.

tre. Et pourtant l'ayant changé de lieu, si tu veux qu'il reprenne sa vertu, & qu'il recouvre ses facultez medicinales, qui estoient presque perdues, il le faudra tourner, nourrir, & arroser avec matieres medicinales, à la façon ci deuant dite. Et ceci ne se doit pas pratiquer seulement és arbres qu'on replante, mais en ceux qui ne changent ni d'aër, ni de terroir: & pourtant il faudra tous les ans, ou pour le moins de deux en deux ans, remettre de nouveau des medicamens, soyent simples ou composez, ou preseruatifs, ou autres, & les y approprier, comme on auoit fait la premiere fois: côme Pallade Neapolitain à tiré & transcrit des Georgiques Grecques de Florentinus, & plusieurs autres encores plus anciens que luy.

Par quel moyen on pourra faire que les fruits qui ne sont pas medicinaux quand on les cueille & les serre, pourront estre rendus medicinaux; & propres à purger le corps.

C H A P. I X.

IE ne veux point en ce lieu passer sous filé ce que ie scay bien estre grandement desiré & requis par plusieurs: Que si tu veux scauoir que c'est: c'est comme soudain & facilement & en tout temps; on pourra faire que les fruits qu'on serre en la maison pout garder, soit qu'on les ait cueillis au prin tēps

ou en Esté, ou en automne, esmeuent & lachent doucement le ventre sans faire aucun mal de cœur, & qu'ils purgent benignement & sans facherie le corps de toutes superfluitez & abondance de matieres: Et si tu veux prendre patience de m'escouter paisiblement, ie suis content de le t'enseigner en peu de paroles. Premièrement il te faut donner ordre, de recouurer de quelque bõ & fidele apothicaire, quelques simples medicamens laxatifs, du nombre de ceux qui ne sont point violents: comme sont le Rhabarbe, l'Agaric, le Sené, le Polypode, l'Epithyme, la semence de Carthame, les Myrabolans, les Tamarins & semblables: apres que tu auras choisi vn ou deux de ces simples, tels que seront propres & conuenables à ton intentiõ, il faudra par l'aduis de quelque medicin expert & bien versé, prendre les parties les plus entieres, & les rompre grossierement si besoin fait, puis les faire treper quelques heures avec vn peu de cannelle & de semence d'Anis, dãs du petit lait, ou d'Oximel, ou de la Ptisane, ou du vin, ou d'eau, ou dãs quelque autre liqueur plaisante, cõme il te semblera bon, ayãt esgard à ta cõplexiõ & à l'estat & tẽperamẽt de ton corps & de la saison de l'annee: cela fait, il faudra couler tõ infusion & l'exprimer tout doucemẽt, & l'ayant mise dans vn vaisseau propre, la faire vn peu chauffer sur les cẽdres chaudes, ensemble
avec

auec les fruiçts, & les laisser là emboire quel que peu de temps ce suc, cōme en parle Columelle; mais il faudra piquer en plusieurs lieux les Prunes, Pesches, Poires, Figues, Coins, ou Cerises: ceux que tu pourras plus aisēmēt recouurer, cela n'importe rien, pourueū qu'ils ayent esté seichez au soleil ou au four, cōme nous auons dit, afin de les pouuoir garder. Lors que les fruits seront bien abreuees de ceste infusiō, & que au lieu de petits & ridez qu'ils estoient, on les verra pleins & biē nourris, lors tu auras vne viande medicinale, laquelle fās aucune fascherie te purgera, lachāt doucemēt le ventre. Tu pourras faire de mesme es raisins qu'on dit de Damas, auec grād profit de l'estomach & du foye, mais il faudra premierēment oster les petits pepins de dedās. S'il aduiēt que ces fruiçts ainsi preparez, ayent quelque goust fascheux, cōme s'ils sont amers, ou aspres, ou qu'ils ayēt quelque autre goust sēblable, tu le pourras couvrir & cacher, mettāt du sucre par dessus, ou de poudre de Regalisse, ou de Canelle, ou biē d'Anis cōfit, ou du Coriādre preparé, ou quelq chose aromatique & douce, selō le goust que celuy à qui tu les voudras faire prēdre aimera le plus. Tu pourras donc prēdre quelcune de ces choses plaisantes, deuāt que māger tes fruits medicinaux, ou biē la mesler parmi, ou la prendre apres, afin que le mauuais goust

de l'un soit corrigé par son contraire.

Il y a vn moyé aisé & salutaire de faire cuire les Coins & autres gros fruicts, au foyer, & en les cuisant les réduire propres pour purger les excréments & superfluitez du corps, sans aucune fascherie, trêchee de ventre, ni degoustement: voire mesme en purgeant réforcent les entrailles. Si quelcun veut scauoir ce moyen, comme ie croy que chacun le desire, qu'il lise attentiuement le troisieme quareau du septieme sillô de nostre iardin medicinal, qui a esté depuis peu de temps reimprimé, estant enrichi & plus correct beaucoup que auparauant, & là, il trouuera chose où il prendra plaisir. Mais nous parlerons plus à plein de ces choses ci apres, traittans du vin de Coins & de l'hydromel. Jean Langius tresdocte medicin des contes Palatins, en vne certaine epistre escrete à Cyrlerus, escrit des fruicts medicinaux en ceste façon. Prenez de l'eau ou du vin, dans lequel vous ayez fait tréper de la Scâmonee, des escorces de Tithymale, de Turbit, ou quelque autre de ces medicaments forts & violens: dans lequel vous mettez apres des Prunes seiches de damas, des Figues, des Raisins secs, & les laisserez tremper iusques à ce qu'ils soyent enflés & engrossis. Ces fruits ainsi apprestez purgeront & lacheront le ventre doucement & sans aucunes trenchées: car ils n'attirent pas la substance des me-

des medicamens laxatifs, mais seulement la vertu. Voyla ce qu'il en dit. I'en ay cogneu qui prenoyent les fruits dont nous auons ci deuant fait mention, fussent ils secs ou recés & ne les faisoÿët rien tréper, mais ils choisiffoÿët par le conseil du medicin, les drogues qui leur estoÿent necessaires & propres, & les ayant aucumement cōcassées si besoin estoit, les lioÿët dās vn lingē clair, & faisoÿët bouillir cela avec les fruits dās vn petit pot, en eau ou en vin, puis mettoÿët parmi, force bon sucre, & les faisoÿent mäger ainsi à ceux qui estoÿent delicats & douillets: ou ils leur faisoÿent prendre le ius seulement: & quant aux fruits qu'ils auoyent fait cuire, ils les passoÿent par vn sacs ou crible, & les serroÿent dans vn pot propre pour s'en pouuoir seruir au besoin trainant, comme on dit, deux bœufs d'vne mesme attache, ou faisant d'vne mesme pierre deux coups.

I'en ay cogneu des autres qui apres auoir lōguement fait tremper ces fruits à la façon qu'il a esté dit vn peu au parauāt, les faisoÿët tremper derechef par deux ou trois fois, les faisant aussi reseicher: en fin estans bien secs ils les serroÿent en vne boîte bien nette, & quand besoin estoit ils en prenoÿent, mais auant que les bailler à manger ils racloÿent force sucre par dessus: Si la chaleur estoit grande, ils les faisoÿent tremper en eau rose:

mais si c'estoit en hyuer, ils faisoient tremper quelques pieces de ces fruits dans du vin, & mettoient du sucre par dessus, & les faisoient manger, & mesme boire le vin apres. Mais pour en dire mon aduis, il n'est pas bon d'essayer ces choses legerement, & sans en auoir l'aduis de quelque docte medicin, i'enté mesme de tout ce que i'ay escrit ci deuant & iusqu'ici: car il choisira des bonnes drogues & conuenables à la guerison des maladies, & à la conseruation de la santé: il cognoistra aussi en quelle quantité & dose, comme on dit, il en faudra prendre, & conduira le tout avec iugement & selon l'art. Voire mesme il inuentera de soy mesme, selon ce proiect, de nouueaux artifices & moyens, car tous ne peuuent pas sauoir tout.

*Adresse pour faire que la Laietue, la Borra-
che, le Pourpié, & autres herbes potageres: pareil-
lement les Concombres, Courges, Poupons, Ref-
forts, Fraises, Groiselles, Framboises, & autres
semblables fruits & plantes, ayent une vertu
laxative, & aient aussi diuerses saveurs & o-
deurs.*

CHAP. X.

(I tu scauois dextrement rapporter aux herbes, racines & plusieurs autres plantes, les moyens que nous auons ci deuant proposez, pour rendre les fruits medicinaux, il ne seroit

feroit ia beſoin de nouveau diſcours. Mais d'autant que ſes plantes n'ont pas leurs racines ſi fermes que les arbres, elles n'ont pas le tronc ſi fort & robuste: avec ce qu'elles viennent pour la pluſpart de ſemence, ou pour eſtre replâtees, & qu'elles ſont auſſi de moindre duree: il nous à ſemblé bon d'en faire ici vn petit diſcours à part. Si donc tu fais tremper les ſemences des plantes mentionnees au titre de ce chapitre ou autres, trois ou quatre iours auant que les ſemer, dans l'infuſion des ſimples medicamens laxatifs, mentionnez au commencement de ceſte œuvre: & les ayant fait ſeicher, tu les fais encores retremper à diuerſes fois, puis que tu les mettes en terre bien ſumee, & bien labouree, tout ce qu'en ſortira tiendra de la vertu & faculté des medicamens où tu auras fait tremper les ſemences. Le meſme aduiendra, ſi tu arroſes de ceſte eau où les drogues laxatiues auront trêpé, les plâtes encores ieunes & tédres & ne faiſas quaſi que naiſtre, les abruuât doucemēt cōme feroit vne nourrice qui allaitteroit ſon enfant, à heures propres & conuenables, reite rant cela par quelques iours: car par ce moyē ces plantes receuront aiſément ceſte faculté de laſcher le ventre doucement, & purger le corps ſans ennuy ni faſcherie. Si les chaleurs ſont grandes, tu pourras par fois, & en temps propre reſiourir ces plâtes, les arroſant

de la meſme infuſion aſſez abondamment, & à propos, comme nous auons dit des arbres.

Aucuns deſchauffent ſes plantes, lors que elles ſont encores ieunes, & deſcouurent iufques aux plus petites racines, ſe prenans bien garde de les traiter trop rudement, ou les arracher du tout: cela fait, ils prennent des drogues laxatiues, propres à leur intention, & les ayant vn peu concasſees ſ'il en eſt beſoin, ils les eſpandent & ſement parmi les racines deſcouuertes (comme nous auons dit des arbres) puis ayans remis la terre deſſus les couurent & enſeuelliffent, & ainſi nourries ils les laiſſent croiſtre & ſuccer la vertu des medicaments. Ce que ie ſcay pour certain auoir eſté experimenté par pluſieurs, fort heureuſement. D'autres ſe contentent de mettre dans le creux qu'ils font en les replantant, les drogues choiſies: puis ayant bien fumé la terre, & ſ'il eſt beſoin bien arrouſé, ils enterrent leurs plantes, & les laiſſent là. Tu trouueras d'autres façons & moyens ſi tu conſideres ce qui a eſté dit & enſeigné des arbres. Or ce que nous auons dit ſe pouuoir faire des liqueurs medicinales, qu'il faut verſer à la racine des plâtes, il faut auſſi entendre que par meſme moyé on leur pourra dōner tel gouſt & ſêteur qu'on voudra (car quât à la couleur ie ne ſcay ſi ie le dois croire) en appropriant dextremēt & ſubtilemēt le choſes cōuenables à l'exem-

à l'exemple d'Aristoxenus Cirenien, lequel, selon que recite Pline, ayant delaisé la modestie & honneste façon de viure de ses de-uanciers, & s'estant mis au reng des gourmâs & gens voluptueux, arroisoit le soir les Lai-ctues qu'il auoit en son iardin, avec vin mielé & les abreuoit iusqu'à ce qu'elles en eussent assez : afin que l'endemain il se peut van-ter d'auoir des tartres toutes verdes que la terre auoit produites : inuention certes di-gne d'un gourmant, non pas d'un philoso-phe . Mais ie me suis desia assez arresté à dis-courir des artifices par lesquels on peut ren-dre les plantes medicinales & laxatiues : deli-bere d'y mettre fin apres que i'auray donné seulement cest aduertissement, asçauoir, que les plantes qui desia de leur naturel ont quel-que vertu de lascher le ventre par leur visco-sité, comme sont les violetes de Mars & les malues : ou qui ont vne substance laiçtuse & douce, laquelle sert aussi à lascher le ventre, comme ont les Laiçtues, ou qui ont vn suc nitreux, & par consequent medicinal & laxa-tif, cōme les Choux & les Bettes : ou qui ont vne humidité lente & superflue, comme le Pourpié : ces plâtes, di-ie, & leurs semblables n'ont pas besoin qu'on y prenne beaucoup de peine, ou qu'on y employe beaucoup de drogues pour les rendre laxatiues, puis qu'el-les le font desia naturellement . Il y a la mes-

me raison aux Poupous, Concombres & autres semblables, à cause de l'abondance du suc & humidité qu'ils ont, qui les rēd glissans.

Comme on pourra en plusieurs sortes rendre les vignes medicinales, de sorte que les raisins qu'elles produiront & le vin qu'on en tirera, laschent doucement le ventre, & purgent le corps sans aucune fascherie.

CHAP. XI.

ENuiron le téps des vendâges, lors qu'on deschausse les vignes, il te faudra dechauffer autât de seps de vignes q̃ tu penseras estre asses pour auoir la quâtité du vin que tu pre tēs, & les marquer: puis les faudra biner tout au tour & les bien môder: Cela fait, il te faudra prendre des racines d'Ellebore, les piler en vn mortier, & les biē agencer tout au tour du sep: puis faut mettre au tour de cecy du fiēs vicil & biē pourri, des vieilles cēdres, & les deux parts de terre: & mettre par dessus les racines du sep, de la terre. Or il faudra recueillir le vin qui viendra en ces seps, à part: si tu le veux garder iusqu'à ce qu'il soit vieil pour lascher le vêtre, tu le pourras faire sans le mesler avec l'autre vin. Si tu prens vn verre de ce vin, avec vn peu d'eau, & que tu le boyues deuant souper, il te purgera sans danger ni fascherie.

Tu pourras faire ceci autrement, aſçauoir lors qu'on deschausse les vignes, il t'en faudra

dra marquer quelques vnes, afin qu'õ ne les melle pas parmi l'autre vin: & mettre tout autour des racines trois faisceaux d'Ellebore noir, puis ietter la terre par dessus: Quand ce viendra au temps de vendanges fay mettre à part les raisins qu'on recueillira és seps que tu auras marquez, & fay serrer aussi le vin à part; duquel tu pourras mettre vn plein go belet parmy le reste de ton boire, & assure toy qu'il te laschera le ventre, & qu'il te purgera sans fascherie ni danger. Ceci est tiré de mot à mot des liures de la chose rustique de M. Caton.

Les agriculteurs & mediciens Africains & Grecs, qui ont precedé de beaucoup. M. Caton, vsoyent de ce moyen. Il fendoyët par le bas le sarment de vigne qu'on vouloit planter, de la longueur de trois ou quatre doigts & ayans osté la mouëlle, ils mettoyent en son lieu quelque simple medicament laxatif & purgatif, du nombre de ceux que nous auons recité au premier chapitre de ce liure, le pilant vn peu premierement: ou bien ils y mettoyent quelque medicamët composé (qui est bien meilleur) puis ils referroyët la fente, & pour empescher que rien ne s'escoula, ils mettoyent vn emplastre par dessus & le lioyent tresbien, & ainsi ils mettoyent le sar mët en terre. Ce recit est prins de Florëtinus vn des Agriculteurs & mediciens Grecs: après

lequel Palade l'a aufsi eſcrit.

Les modernes ne font autre choſe, ſinon qu'ils netoyēt tresbien les racines de la vigne apres qu'elle eſt deſchauffée ; puis ils l'arrouſent tresbien & l'abreuuent du ſuc de quelque medicament compoſé, ou bien de la liqueur dans laquelle quelque ſimple medicament laxatif aura trempé : & reiterēt cela par quelques iours, & principalement au temps que les vignes commencent à ietter leurs nouveaux bourgeons, eſtās pleines de ſeue. Cela eſtant faiēt, ils remettēt la terre contre les racines, & ſur tout ils ſe prennent garde, que durant ce temps la biſe froide ne regne, de peur que le froid ne gaſté les racines, & ne diminue la vertu des drogues & medicamens. Les raiſins qu'une telle vigne produit, ſont laxatifs & purgent le corps : cōme aufſi le vin qu'on en tire, comme le meſme Florentinus l'a remarqué & laiſſé par eſcrit, au premier & ſecond liure de ſes Georgiques. Ce moyen eſt certes bien aisé & tantotſt fait, comme teſmoigne Arnaud de Villeneuve, pour les cauſes & raiſons que nous auons produites en traittant des arbres. Car en ceſte façon, il s'eſt trouué tel raiſin, comme dit le meſme auteur, que chaſque grain laſchoit doucemēt le ventre, ce qu'on tenoit pour vn grand miracle. Ceux qui aiment les raiſins blancs & le vin blanc, en pourront
choiſir

choisir pour medeciner : ceux qui aiment le rouge, pourront prendre des rouges, car en ceci chacun se peut gouverner à sa volonté, & s'accommoder à son goust.

Il y a encores vn autre moyen pour auoir des raisins & du vin laxatif, lequel ie ne veux pas cacher ni taire. Il faut choisir en la saison des sarmens de vigne bien nourris, & de bõne sorte: & les mettre dans quelque vaisseau à demi plein de ces decoctions & breuuages laxatifs, ou de quelques liqueurs medicinales preparees par vne longue infusion d'herbes laxatiues; cela fait on met de la terre parmi, & les acoustre-on si bien, & si long tẽps, & avec tel souci, iusques à ce que les bourgeons du sarment commencent à pousser: & lors on les plâte en lieu propre, cõme on fait aussi les autres vignes, se prenant tousiours bien garde qu'en les traittant trop rudemẽt, les bourgeons ne soyent endommagez, ou qu'on ne les face cheoir. Les raisins qu'une telle vigne produira apres, purgeront le mesmeumeur qu'eusse faict la liqueur ou infusion dequoy on les à arrousez & abreueuez, si fera bien aussi le vin qu'on en tirera.

Autres moyens & adresses fort belles & de bon esprit, par lesquelles on rendra les raisins & les vins qui auront vertu de faire dormir & de resister aux venins.

Combien que ce que nous auôs à present à trãitter se puisse aisémẽt & clairement coliger & entẽdre du precdẽt: l'en parleray neantmoins vn peu en passant, briefuemẽt & en peu de paroles, entant que la matiere le pourra porter. Si au lieu des medicamẽs laxatifs cõposez, ou de leur infusion, ou de la decoctiõ des drogues simples, on met & verse à la racine de la vigne dechauffee, quelque drogue ayãt vertu de faire dormir, destrẽpee en quelque liqueur, & qu'on l'en arrouse en tẽps & saison. Ou biẽ qu'õ enterre au pied du sep & parmi les racines que l'ques plantes ayans ceste mesme vertu de faire dormir: ou qu'on les plante seulement aupres & autour du sep (cõme enseigne Dioscoride) parlant du vin qu'il dit phthoriõ tant les raisins cõme levin qui en sortira au pressoir, aurõt ceste faculté de faire dormir.

On pourra faire le mesme si (cõme nous auôs mõstré és arbres) on perce vn sep choisi, avec vne tariere, ou virbequin ou autre instrument, mettãt dedãs le medicament que tu auras choisi, bouchãt apres le trou, & le liãt tresbiẽ, remettant apres le tout à Dieu & nature. Si tu mets de la Theriaque ou Methridatou quelque autre cõtrepoison dãs le trou du sep (ostãt la mouelle si besoin fait) ou biẽ si tu arrouses & abreues le sep de quelque liqueur, dans laquelle ces choses soyent destrẽ

pres, ou quelques medicamens simples resis-
tans aux poisons soyent infusez, tu auras vn
sep de vigne qui te produira des contre-
poisons, preseruatifs, chasse peste, & vn reme-
de propre pour resister aux venins & à tou-
tes choses venimeuses : tellement que quel-
que beste venimeuse que ce soit, n'aura gar-
de de se loger ou arrester tât soit peu, dessous
vn tel sep. Mesme on dit que le vin-âigre que
on fera du vin recueilli en vn sep ainsi medi-
cine, & mesme les raisins secs, ont vne vertu
& faculté merueilleuse contre tous poisons,
contre la contagion & maladie de peste, cõ-
tre la morsure des bestes venimeuses, & con-
tre plusieurs autres choses. Et à faute de ces
choses, les fucilles de ce sep pilees, & appli-
quees sur la piqueure ou morsure des ani-
maux venimeux, y seruent grandement. Et
si on ne peut recouurer des fucilles, les cen-
dres des farmens cueillis en ce sep, garenti-
rõt l'homme de tout dâger. Car mesme sans
point de Theriaque, la cendre de quelque far-
ment que ce soit, est grandement profitable
cõtre la morsure des chiens, pourueu qu'ils
ne soyent enragez. Les auteurs de ces choses
(afin que personne ne pense que ie parle de
moy-mesme) sont les agriculteurs & medi-
cins Cartaginois & Grecs, & entre les autres
Florentinus, qui n'a pas voulu permettre
que ceci fust caché à la posterité.

Au reste ie n'ay pas voulu mettre fin à ce propos, sans premierement donner cest aduertissement, a sçauoir, que si on prend vn sarment de ce sep ainsi mediciné, pour le replâter ailleurs, mal aisément tiendra-il rien du naturel medicinal du sep, cōme nous auons dit aussi des arbres : parquoy il faudra l'arrouser de nouveau & souuent, pour refreschir & renoueller la vertu enuieillie & amortie, comme escrit Neapolitanus Palladius, agriculteur qui n'est pas à mespriser.

Par quels moyens on pourra rendre la chair des poules, chapōs, perdris, pigeōs, faisans, poulets ieunes canards, tourterelles, alouettes, grües, & autres oiseaux: Pareillemēt des cheureaux agneaux, leuraux, conils, ieunes couchons, & semblables animaux à quatre piēds, medicinale, de sorte qu'elle purge doucement & sans fascherie, le corps de toute superfluité.

CHAP. XIII.

PAr le recit des choses ci deuant dites, & par les enseignemens que nous y auons donné, il est bien aisé à recueillir, que l'opinion de ceux qui tiennent que les vertus & facultez qui sont donnees à vn certain genre de choses, par leur forme essentielle (lesquelles resident au temperamēt & en la propriété de la matiere) ne peuent estre communiquées

muniquées à vne autre espece-separée & diuerse, n'est pas cōuenable à la raison, ni aux siens, ni à l'experience, ni à l'aduis des gens doctes & experimentez: comme nous l'auōs clairement fait cōgnoistre par beaucoup de moyens, & par beaucoup d'exemples des cōpositions & transmutations qui se peuuent faire és fruiçts, herbages, racines, vignes & vins, selon nostre petite portee. Et sur cela Galien tesmoigne en plusieurs lieux, nos pas legeremēt, ni en vain, que le laiçt d'vne chieure qui aura mangé de Scammonce, ou du Tithymale, au du Chou marin, deuiendra laxatif. Ce qu'Hippocrates confirme, nō pas seulement des Chieures, mais aussi des femmes: disant qu'il n'importe pas peu pour le laiçt, de quelles viandes soit nourrie la femme ou la beste, soit que tu vueilles auoir du laiçt de bonne nourriture pour les sains, ou pour les malades, & pour ceux qui sont etiques, ou pour nourrir les petis enfans. Puis donc qu'on void que mesme la chair des animaux tient de l'odeur & de la vertu des choses qu'ils ont mangees, & desquelles ils ont esté nourris: que les brebis & les vaches qui ont du laiçt, si elle lechent du sel, non seulement le laiçt, mais aussi le beurre & le fromage s'en sentent & en font de meilleur goust: que les griues sentent naïfuiement le Geneure, des grains duquel elles sont fort

CC.j.

friandes : Il ne faut pas trouuer estrange si quelques oiseaux, & quelques animaux à quatre pieds encore ieunes, estâs nourris de choses medicinales (comme nous dirons incontinent apres) tiennent quelque chose de ceste vertu & faculté medicinale en leur chair, de sorte qu'elle soit rendue medicinale & laxatiue. Mais comment se pourra faire cela demâderas-tu? Je ne veux point pour le present mettre en auant ce que les anciens philosophes & medecins en ont escrit: & des modernes ie veux entre tous choisir, Thomas Eraſtus, lequel comme ie croy, on entendra volontiers parlant ainsi. Je fus vne fois enseigné par vn de mes maistres, de faire que la chair des poules seroit laxatiue, ce qui me succeda heureusement en ceste sorte. Il faut faire cuire les medicamens laxatifs, cōme sont l'Ellebore, la Scammonee, l'Agaric, le Tithymale & sēblables, avec du fromēt ou de l'orge. Si vous nourrissez quelque tēps les poules de ces grains (apres toutesfois estre seichez) ou quelques autres oiseaux semblables, leur chair mangée laschera le ventre, & si ne fera pas pour cela de fort mauuais goust, ni mal plaisante: Voila ce qu'il en dit: lequel artifice ne peut pas estre practiqué seulēmēt es poules, chapons, perdrix, faisans & autres oiseaux semblables, mais aussi en quelques animaux à quatre pieds, cōme sont cheureaux, agneaux,

agneaux, leur auts, couchōs & autres semblables, les appropriāt dextremēt, & les nourrifant en la maison, de quelque viāde laxatiue. Car nous ne parlōs pas ici des sauvages, mais de ceux qu'on a nourris ou qu'on veut nourrir en la maison. Mais il sera bon d'ouir discourir le mesme Erastus, en vn autre lieu plus amplement & plus clairemēt, touchant ceste matiere. La racine d'Ellebore, dit-il, cuitte en eau, la rend mēdicinale & laxatiue: que si on fait tremper dans ceste eau, de la miette de pain ou du froment, & qu'on en nourrisse quelque temps, des poules: ce pain ou froment estans conuertis en sang (apres que la poule les a mangez & cuits en l'estomach) & le sang en chair, & que là dessus on les tue & mange, il ne faut point douter que elle n'aye attiré la vertu laxatiue de l'Ellebore, & qu'elle n'en retienne encores quelque chose, quoy qu'il y soit suruenue beaucoup de mutations & changemens. Puis donc qu'il est ainsi, qui est-ce qui sera si esloigné de raison de penser que la forme mēme de l'Ellebore, ou sa substance soit transferee en ceste chair? Il faudra donc entendre ce qui a este desia dit ci-deuant, & ce que nous dirons encores cy apres, de la vertu & faculté qui consiste au tempērament, & en la proprieté de la matiere.

Je scay biē que plusieurs ayās plumé les gros

oiseaux, dōt nous auons parlé ci deffus, & es-
corché les autres animaux, & ayant osté les
entrailles aux vns & aux autres, les remplis-
sent & farcissent de drogues laxatiues: com-
me de Rhabarbc, d'Agaric, de fueilles de Sé-
né, de semence de Carthame, de racines de
Polypode, d'Epithyme & semblables: asca-
uoir de l'vn seulement, ou de deux, ou plu-
sieurs ensemble, y adioustant vn peu de Ca-
nele, de semence d'Anis, de Fenoil, mesmes
des herbes conuenables à la partie malade.
Et ayant mis cela dans le ventre de l'animal,
ils cousent le pertuis par où ils les ont mis, &
les font rostir petit à petit: & par ce moyen
la chair estant imbeuë & abruuee de la va-
peur qui s'esleue de ces choses en cuisant, el-
le est rendue medicinale & laxatiue. Dau-
tres ayans rempli le ventre de l'oiseau de ce
mellinge, le font cuire dans quelque bouil-
lon gras, puis vsent de cé bouillon, qui est la-
xatif, ensemble aussi de la chair, & ainsi ils
purgent le corps de tous humeurs superflus,
sans aucun ennuy ni fascherie. Mais c'est assez
escriit de ces choses pour donner lieu aux au-
tres. Je me contenteray donc d'auoir discou-
ru ces choses touchant les moyens de medi-
ciner les arbres, herbages, racines, vignes, rai-
sins, vins & chairs. Que si i'enté qu'on y pré-
ne plaisir, ie mettray en lumiere des choses
plus belles & plus excellentes, qui sont en-
cores

cores comme cachees en mon cabinet, pour le desir & affection que i'ay de profiter au public.

Artifices beaux & plaisans pour faire des vins composez, par le moyen desquels on pourra suruenir à plusieurs & diuerses maladies: avec vn rolee des anciens & nouueaux vins, & des remedes.

IL est bien certain que les anciens medecins ont recherché avec grand soin & diligence, tous les moyens, comme il se pouuoit faire des vins artificiels, qui par leur faculté peussent ou guerir, ou engendrer les maladies tant du corps que de l'esprit: comme nous voyons en Theophraste les vins d'Heraclee d'Arcadie, lesquels faisoient perdre le sens aux hommes qui en beuuoyent. En Atheneus, des vins des Thasiens, qui faisoient dormir, & les autres chassoyent le sommeil: En Plin les vins d'Archadie, qui rendoyent les femmes fertiles & fecondes: & faisoient enragez les hommes: Semblablent les vins Trezeniens, desquels quiconque beuuoit, estoit frustré de generation, & les vins Lyciés, qui arrestoyent le ventre à ceux qui l'auoyent trop lasche, s'ils en auoyent seulement gusté. De là est venue ceste grande diuersité de vins, en M. Caton, lesquels sont composez pour secourir à diuerses maladies: pa-

reillement en Dioscoride:& auât tous ceux-
cy, dans les œuures des agriculteurs & medi-
cins des Cartaginois & des Grecs, comme
nous monſtreronſ tantost en ſon lieu. Or
les medecins qui ſont venus apres, ayans leu
que par les artifices inuentez par ceux-ci, on
pouuoit remedier preſque à toutes ſortes de
maladies, & ce ſoudainement, ſeuement &
ſans faſcherie:voire, afin que ie die quelque
choſe du mien, avec peu de deſpée:ils furēt
eſmeus par cela, cōme ie penſe, de faire trem-
per & mettre en infuſion quelques medica-
mens laxatifs dans du vin, afin de luy faire a-
uoir yne vertu medicinale & laxatiue. Le-
quel on aualle apres avec grand plaifir & cō-
ſentement de toutes les parties du corps:&
lors il monſtre de grandes facultez & ver-
tus au corps humain:il donne vn gouſt plai-
ſant aux drogues, & aux choſes avec leſquel-
les on le meſle. Il fortifie les vertus du cer-
ueau, de l'eſtomach, du foye, du cœur & des
boyaux, par la familiarité & conuenance de
ſa nature avec la noſtre, laquelle nous eſt a-
mie, & commē nee avec nous. Vóyla pour-
quoy Galien ordonne de meſler le vin Fa-
lernien avec le Mithridat & la Theriaque, à
fin de couvrir l'amertume & le faſcheux
gouſt de pluſieurs drogues qui entrent és
cōpoſitions de ces antidotes:& par ce moyē
faire que l'eſtomach qui reiette les choſes a-
meres

meres, les reçoive plus volontiers, & que sa faculté retentrice en soit fortifiée. Les médecins donc bien adroits & expérimentez, ont fort bien & prudemment inventé les moyens de faire ces vins artificiels, afin que par le vin la vertu des drogues y mixtionnées fussent bientôt & avec plaisir transportées par tout le corps, à cause de la subtilité de son essence, & de la familiarité qu'il a avec nous, & ainsi que les corps fussent déliurez de diverses maladies, sans nuisance, sans fascherie, & sans mal de cœur. Or ie ne refuseray point de t'en proposer plusieurs & diverses compositions, fort sincerement, comme ie fay aussi tout le reste: afin que de plusieurs, tu puisses choisir celles qui te semblent les meilleures, & que tu aimeras le plus.

Quelques façons & moyens pour faire par artifice des vins medicinaux, lesquels on pourra faire en temps de vendanges, ou en quelque autre temps que ce soit.

CHAP. I.

AV temps des vendâges, tu pourras mettre à part du moust de raisins blâcs, qui soyent bôz & sans estre pourris ni gastez, si tu aimes le vin blanc, ou bien si tu aimes plus le rouge, tu pourras prèdre d'autres raisins: or il te faudra mettre ce vin dans vn petit tonneau, dans vn baril ou bouteille de quel-

que matiere bien nette & bonne, auant qu'il commence à bouillir: mais il faudra auoir mis premierement dans ce baril, les matieres medicinales dont tu veux que le vin tire la vertu, apres les auoir bien lauees & mondees: soyent herbes ou racines, fleurs, semences, espices, senteurs, fruiçts, grains, ou qlque autre chose que ce soit. Or il faut que la proportion du vin à ces choses medicinales, soit de la douzieme partie, plus ou moins, selon que les drogues aurõt leur saueur, odeur & qualite, forte ou petite. Cela estant fait, il te faudra mettre vne escuelle vn peu ouuerte, d'vn costé, sur le trou de dessus le tonneau, à fin que l'escume & la crasse qui monte peu à peu de bas en haut, puisse libremēt sortir, & que le clair puisse redescēdre en bas. Quand le vin cessera de bouillir & qu'il n'escumera plus, il faudra rēplir du tout le tōneau (ce que soit dit à ce coup pour tous les autres) & le biē boucher, afin que riē ne se perde, puis le reposer en quelque lieu propre, pour s'en seruir quād on en aura affaire: on pourra vser de ce vin deux mois apres. Tu peux voir avec quel artifice on trauaille en ceci, & que nature mesme confit & assemble la faculté des drogues avec celles du vin: car par la chaleur naturelle du moust, & par la force du bouillir, la vertu interieure des choses qu'ō y fait tremper, est cōme attiree & combatue, de forte que

te que le vin eſtât le plus fort, deſpouille ces drogues de leur propre faculté, & la ſ'approprie: ou pour parler Sorboniquement, la tranſubſtantie en ſoy meſme: & par ce moyē il ſ'acquiert vne vertu medicinale, laquelle par la vertu penetrante qu'il a, & par l'induſtrie de l'ouurier, il attire des choſes que on meſle parmi, laquelle il fait apres penetrer ſoudainemēt, & comme en vn clin d'œil par toutes les parties du corps, ſans en rien offencer nature, ſans faſcherie, ennuy, ni mal de cœur: comme nous l'auons eſprouué, experimenté, & bien obſerué, & veu experimenter à des autres. Voyla le premier moyē de faire ces vins artificiels, lequel toutesfois i'ay vn peu pour ſuſpect: car il eſt à craindre, que ces matieres qu'on meſle parmi le vin, ne l'empēſchent de ſe pouuoir longuement garder, & ne le facent aigrir & gaſter bien toſt, ſi on les laiſſe dedans, à cauſe qu'elles empēſchēt que le vin ne puiſſe auoir aēr, & pour autres raiſons: parquoy il me ſemble qu'il vaudroit mieux le changer d'vn vaiſſeau en autre & le frelater apres qu'il aura bouilli, & ietté toute ſon eſcume: & oſter toutes les matieres qu'on auoit mis dedans, les iettant là: ſinon que tu vouluſſes y mettre d'autre mouſt par deſſus, & faire d'autre vin medicinal, pour donner aux pauures qui ſeroient malades, mais il n'auroit pas vne telle vertu que le pre

mier. Il y a vne autre maniere, de laquelle plusieurs vsent ordinairement, dont voici la fa-
çon. Ils mettent les drogues qu'ils ont choisies propres à leur intétion, en vne suffisante quâtité de moust, dans vn vaisseau propre, & les font bouillir à petit feu, sur des charbons bié allumez, l'escumât pendant qu'il boust, iusques à ce que la troisieme partie ou à peu pres soit consumee, & que le moust aiententieremēt attiré à soy la faueur & l'odeur des choses qu'on a fait bouillir avec: cela estant fait, il faut ôster le vaisseau de dessus le feu, le bié couvrir, & le laisser reposer & r'asseoir toute la nuit: le lendemain, il le faut passer par vn panier d'ozier, & mettre le vin qui en sortira dās d'autre moust, nō pas toutefois en si grāde quâtité, en vn vaisseau propre pour le garder, & sera bō de mettre dessus le tōneau vn couuercle approprié cōme il a esté dit ci dessus: lors qu'il aura parfaictemēt bouilli, & qu'il aura ietté toute son escume, qu'on l'aura bien rempli, bié bouché & fermé, il le faudra mettre en lieu propre & cōuenable pour le garder, afin de s'en seruir au besoin. Mais ce moyen aussi est aucunement suspect (encores qu'il ne soit pas du tout à reietter) à cause de l'ebulition des choses qu'on y met, car il pourra aduenir qu'elle fera ou trop grāde ou trop petite, trop longue, ou trop briefue, car il n'y a point de distinction limitee: il se trouue

trouue plusieurs choses qui endurerôt bien d'estre cuittes longuemēt, mais il y en a d'autres qui ne veulēt estre cuittes que bien peu, que si on ne regarde à ceta, la force & vertu de ce qu'on cuit s'esuanouira, & s'en ira en fumee bien tost. Et pourtāt ie trouuerois meilleur de faire tremper les drogues medicinales dans le moust, tant, & si longuement que on peut apperceuoir & cognoistre, & par le goust, & par l'odeur, que le moust a retiré la vertu & faculté desdites drogues: ce qu'estant fait, on les pourroit faire bouillir vn bien peu & tout doucement, puis parfaire l'œuure, comme il a esté dit.

Autres artifices & adresses pour faire vins laxatifs plus accoustumés & ordinaires.

CHAP. II.

Il y a des autres moyens pour faire des vins medicaux, lesquels ie te veux enseigner en peu de paroles. Il faut prendre les drogues medicinales toutes fresches, ou si on ne les peut recouurer telles, il les faut prédre à demi seiches, & estans grossierement pilees, les faut mettre dans vn sachet de toile claire: puis les faire tremper dedans du moust à la façon susdite, que si elles nagent par dessus pour estre trop legeres, il sera bon d'attacher xne pierre au sac, comme Dioscoride l'enseigne. traitēt du vin d'Ysop. Quand ils auront trépé assez longuement, ce qu'on co-

gnoistra quand le vin aura le gouft & l'odeur de ce qu'on y aura fait tremper: finalement il les faudra faire bouillir tout doucement, hastiuement, & si longuement qu'on verra estre necessaire, les escumant tousiours, puis ayant tiré le suc des drogues dehors, & l'ayât bien fort pressé, il faudra mettre ce vin medicinal dans d'autre mouft, non pas toutesfois en pareille quantité, & les remuer & mesler quelque peu ensemble. Or quād ce vin aura bien bouilli dans son tonneau, qu'on l'aura bien rempli & bien bouché, il le faudra soigneusement garder. D'autres choisissent quelque bon vin & puissant (il n'en chaut point s'il est nouveau ou vieil, blanc ou rouge) dās lequel ils mettēt les drogues qu'ils ont choisies, apres les auoir laüees & bien nettoyees, comme il a esté dit, les laissent là tremper, les font cuire, les escumēt, & les coulent: & sans les rien presser mettent ce vin dans vn vaisseau net, lequel ils remplissent tresbien & le bouchent encores mieux, & le gardent ainsi pour s'en seruir au besoin. Ce moyē est tout commun & cogneu de chacun, voire mesme du peuple. Je serois certes tousiours d'auis de mettre les drogues dans vn sachet, ou dans vn linge, afin qu'on les peüst retirer plus commodément & sans point perdre de vin: ce que Dioscoride faisoit bien par tout. Ceux qui sont plus adroits & de meilleur esprit, & qui
recer-

recherchent plus exactement les œuvres de nature, mettent les drogues choisies & preparées comme nous auōs dit, en douze fois autant de raisins, soyent blans ou noirs, les meslent trèsbien, & les foulent comme on a accoustumé de fouler les raisins en temps de vendange: & mettent tout cela ensemble dās vne petite cuue, & les laissent bouillir à la façon des vins, iusques à ce qu'on le puisse tirer clair & rassis: lors ils le tirēt & le mettent en vn autre vaisseau, & quand il cesse de bouillir ils le réplissent, & le gardent soigneusement. Mais de ceci nous en parlerons plus amplement en traitant du vin de Gayac. Quant à ce qui reste des matieres, ils remettent du moust par dessus, le laissēt derechef bouillir, le tirent & le gardent cōme l'autre vin, pour s'en seruir quand quelcun des seruiteurs ou seruantes tombe malade: car il y a autant de difference entre le premier vin & ce dernier, comme entre le pain de fine fleur & celuy de son. Ce moyen ici me plaist fort, à cause que les choses se meslēt fort bien, & puis est bien aisé de separer les matieres, & plusieurs autres causes le recit desquelles ie laisse volontiers, pour n'estre trop long & ennuyeux.

Le sçay biē qu'aucuns font ces vins au tēps des grandes & fortes chaleurs, comme aux iours Caniculiers, mettans & le vin & les drogues, dans des phioles de verre, lesquelles ils

exposent après au soleil : laquelle façon n'est pas du tout à condamner, & si n'est pas sans profit, pour les raisons que nous en auons rendu ailleurs.

Quelques observations, tant sur les choses précédentes, que sur celles que nous traiterons ci après.

CHAP. III.

IL reste seulement de remarquer en ce lieu quelques choses que j'ay prises de Dioscoride & autres, lesquelles ie cōprendray brièvement en huit chefs: Le premier est, que les tonneaux où on met ces vins artificiels doyvent estre pleins : car quand on ne les remplit pas, ils s'aigrissent aisément, & se gâstent bien tost, ce qui est assez commun. Le second est, que les vins medicaux, comme aussi les medicines, ne sont point bonnes ni salutaires aux sains, sinō que ce soit pour preuenir quelque maladie, il faudra donc auoir l'aduis de quelque docte & prudēt medicin. Le troisieme, qu'il faut bien aduiser quād on veut bailler de ces vins medicaux à ceux qui ont fièvre, mesme si nous voulons croire Dioscoride, il les en faut faire abstenir du tout: principalement quād ces vins n'ont riē de cōmū avec les choses qui rafreschissēt car boire du vin en la fièvre: c'est comme mettre du charbon au feu. Le quatrieme que les vins
artifi-

artificiels acquerirēt la vertu des drogues que on y met dedans : parquoy il ne fera malaisé à celuy qui cognoist la nature des choses, de coniecturer quelle est la faculté du vin : comme Dioscoride le monstre en la description du vin de Bethoine, laquelle nous mettrons ci apres. Le cinquieme, que ces vins medicaux sont fort dangereux de se gaster & aigrir, quand on les tire hors du tōneau pour en vser, sinon qu'on y pouruoye bien tost. Or le moyen d'empescher cela, c'est de mettre vn peu d'huyle par dessus, car nageant au dessus, luy seruira de bouchon, pour le garder de gaster. Le sixieme, que en ces vins medicaux (comme aussi en tous autres) il importe beaucoup quel est le tonneau où on les met, & de quel bois il est fait : car l'experience nous fait cognoistre que le vin gardé quelque temps en des vaisseaux ou barils de bois de Tamaris, aide grandement à ceux qui ont quelque maladie à la rate : celuy qui est gardé en tonneaux de Fresno, resiste fort & ferme à la peste & aux venins, & ainsi de plusieurs autres, afin que ie n'ennuye les lecteurs par ma longueur. Le septieme, que les vins medicaux faits au moust, ne sont pas propres pour s'en seruir, sinon quarāte iours apres qu'ils ont bouilli, ou bien deux mois, mais il n'est pas ainsi des autres. Le huitieme, qu'on pourra faire du vin medicinal sans

grande peine ni grâde despence & sans feu & sans le faire bouillir, si tu fais vn petit fagot de ce que tu auras choisi & que tu le faces tréper dans le vin, & pour le faire aller au fonds, il y faudra attacher vne pierre: tu pourras faire le mesme, si tu mets tes drogues dans vn linge cler ou dans vn sachet, comme il a esté dit ci dessus, & que tu le faces tremper dans le vin: quand ces choses auront trempé quelques iours, tu en pourras goustier, & quelques iours apresencores en goustier derechef iusques à ce que tu cognoisses que le vin a tiré le goust & l'odeur de toutes les choses qu'on y aura mises tremper: & lors il faudra tirer hors les matieres, & tu auras du vin duquel tu te seruiras au lieu d'icelles, comme ayant la mesme faculté & vertu, lequel il te faudra soigneusement garder, & afin qu'il ne s'eue le faudra bien boucher: ce ne sera point hors de propos d'adiouster à ce que dessus, que si les choses qu'on veut mettre dâs le vin ont quelque qualité insigne, il y en faudra mettre peu en vne grande quantité de vin, à cause de la grâde force, leur faneur & odeur, lesquelles se presentent soudain au goust, & au flairer: que si ces qualitez sont trop grâdes, & que à cause de ce, elles soyent fascheuses & mal-plaisantes, on les pourra corriger avec choses douces & de bonne odeur, ou pour le moins les couvrir aucunement, com
me nous

me nous auons dit, traitant des fruiçts mediceinaux . Mais c'est assez parlé des artifices pour faire des vins mediceinaux. Il reste maintenant de proposer quelques formes particulieres pour composer de ces vins, y adioustant quant & quant les aides de chacun particulierement & leur vsage: descendant de degre en degre des formes & inuentions des anciens, à celles des modernes . Or afin que tu ne puisses pas te plaindre que ie n'ay que de paroles, ie vien des paroles au fait mesme.

Description de quelques façons particulieres de composer quelques vins, avec les remedes auxquels ils seruent, tirez des Georgiques de Florentinus.

Vin Artificiel, fait de Roses, Aneth, & Anis.

Mettez dans du moust, ou autre vin, des Roses mondees du blanc qui est au bas de la fueille (que les medecins appellent Ongle) & cueillis en lieux monteux, ensemble vne partie d'Anis & de miel, avec vn peu de Safran, liez le tout ensemble: ce vin sera bon pour l'estomach & pour ceux qui ont la pleuresie. Outre cela, liez dans vn linge de la semence d'Aneth, & le plongez dans le vin: il prouoquera lors à dormir, fera vriner, & aidera à la digestion des viandes. Et derechef mets dans le vin, de la semence d'Anis, comme il a esté

dit, & il corrigera la difficulté d'vrine: & profitera grandement aux entrailles.

Vin composé avec Cabaret, Pouliot & Fenoil.

Le premier prouoque l'vrine, aide aux hydropiques & à ceux qui ont la iaunisse, conforte le foye de ceux qui l'ont foible, resiouit ceux qui ont la sciatique, & ceux qui sont tormentez des fieures tierces, & si termine les frissons des fieures. Le second est vtile contre le venin des serpens & autres bestes qui se trainent. Le troisieme fait reuenir l'appetit perdu, renforce l'estomach & fait vriner.

Vin de Bayes de Laurier, de Persil, & de Coniza ou herbe aux punaises.

Le vin composé avec Bayes de Laurier, aide à la toux, à la poitrine, aux trêchees, aux difficultez d'vrine, profite aux gens vieux: sert de remede aux douleurs d'oreilles, resiste aux serpens & aux bestes qui se trainent, & si aide grandement aux femmes qui sont suiettes aux suffocations de matrice. Celuy qui est composé avec persil, renforce l'estomach, dissipe les ventosittez qui s'y engendrent, qui font souuent soufleuer le cœur, resueille l'appetit, prouoque l'vrine, & fait dormir. Celuy de Coniza, ou herbe aux punaises, est propre à l'estomach: aide les paralitiques, ceux qui ont quelque membre stupide, ceux qui tremblent, qui ont des trenchees, & qui sont graueleux: & si profite fort aux maladies pestilentialles.

Vin de

*Vin de Rue, de Fœnugrec, d'Ysopé
& d'Ache.*

Le premier, sert contre les venins & poisons, contre les ventositez; & contre les animaux qui rampent: Le second profite grâdemment au foye, principalement si le Fœnugrec est vn peu pilé. Le troisieme nettoye la poitrine, aide la digestion, est fort vtile au vêtre. Le quatrieme est bon pour faire vriner; excite l'appetit, & est vtile aux douleurs des nerfs & des entrailles qui s'ont autour du cœur mais il faut mettre la semence d'Ache toute pilée dans le vin:

Vin d'Absinthé & de Thym.

Pren huit drachmes d'Aluine, mesmement du Pontique, & les pile, puis les lie dâs vn linge clair, & les mets dans vne phiole avec de bonne canelle; & mets par dessus de bon moust, laissant vne petite ouuerture afin qu'il puisse bouillir: quand il aura bouilli, il faudra remplir la phiole & la serrer: ce vin servira contre les douleurs des entrailles d'alentour du cœur & du foye, mesme cōtre les cruditez de l'estomach & autres maladies qui luy aduennēt. Il chasse aussi la vermine qui s'engēdre dans le vêtre. Quant au vin de Thym, voici comme il le faut faire. Il faut cueillir le Thym quād il est en fleur, le faire seicher & le piller, puis le faut mettre dâs vn tonneau de

Vn Chenix est vne mesure cō-tenant deux sestier. quatre Chenix, & ietter par dessus du vin blanc, & le bien boucher l'espace de quarante iours. Il a vne vertu singuliere pour faire venir le laiët aux femmes, & pour corriger les maladies auxquelles les femmes sont suiettes. Voila ce que Florentin, vn des plus excellës agriculteurs d'entre les Grecs en a escrit.

Description particuliere de quelques façons de vins mediceinaux, & à quoy ils peuuent seruir prinse de M. Caton.

Vin artificiel pour esmouuoir & lascher le ventre.

Mettez vn manipule d'Ellebore noir, en vne certaine quantité de moust, apres qu'ils auront bouilli, retirez en l'Ellebore, & gardez le vin pour vous en seruir pour lascher le ventre. Duquel il faudra prendre vn Ciathe, y meslant vn petit d'eau, & le prendre deuant souper, il laschera le ventre sans aucun dāger ni faschetie, & l'endemain apres il purgera.

Vin pour seruir à ceux qui ont difficulté d'uriner.

Pilez du Geneure en vn mortier; mettez en vne liure dans deux conges de vin vieil, & les faises bouillir en vn pot net: estant refroidi mettez le dans vne bouteille, & en faites boire à ceux qui en auront besoin, vn ciathe de matin à ieun, & ilss'en trouueront bien.

Vin propre à ceux qui ont la sciaticque

Prenez du bois de Geneure de la longueur de demi

Le Ciathe poise douze drachmes, qui sont vne once & demie, d'autres le font de dix drachmes seulement.

de demi pied, & le coupez bien menu, puis le faistes bouillir dans vn conge de vin vieil: quand il sera refroidi, versez le dans vne bouteille, & beuez vn ciathe de ce vin à ieun, & vous en receurez profit.

Vin propre contre les trenchees, & quand la vermine fasche le ventre.

Il vous faut prendre trente Grenades aigres, les piller, & les mettre dans vne cruche: puis mettre par dessus trois conges de quelque gros vin noir & rude: apres cela faut biẽ boucher le vaisseau, & trente iours apres l'ouurir & s'en seruir si on en a besoin: il en faut prendre vne Hemine à ieun.

Vin propre à l'indigestiõ, & difficulté d'vrine,

Cucillez la pomme de Grenade lors que elle fleurit, & en mettez trois hemines dans vn vaisseau qui tiennne vne amphore, qui est la huietieme partie d'un muy, puis y adioustez du vin vieil vne bõne quantité, avec des racines de Fenoiil bien mondees & pilees, au pois d'une hemine: bouchez bien le vaisseau, & trente iours apres vous le pourrez deboucher & vous en seruir. Lors que quelcun ne pourra cuire la viande en l'estomach, ou vriner librement, il en pourra boire telle quantité qu'il voudra sans aucun danger. Le mesme vin chasse toute sorte de vermine hors du ventre, pourueu qu'on se prepare comme s'ensuit: celuy qui le doit prédre ne doit rien

*L'Hemine
contient
soixante
drachmes,
qui sont
sept onces
& demie,*

Le Sestier
contient
trois onces.

souper: le lēdemain il faudra piller vne drachme d'encēs, & prendre vne drachme de miel cuit, & de ce vin vn Sestier, & le boire à ieun: que si c'est vn ieune enfāt, il luy en faudra dōner la moitié, ayant esgard à son aage. Voila ce que M. Caton en dit: lequel me semble estre vn peu excessif en la mesure, si tu as esgard à nostre temps, & à la disposition des corps d'aujourd'huy.

Compositions de quelques vins medicaux, seruans particulièrement de remede à quelques maladies, prinſes de Dioscoride.

Le vin de Roses.

Liez en vn linge cent drachmes de Roses pilees, & les plōgez dās huit sestiers de mouſt & trois mois après ſeparez le vin clair & le mettez à part pour le garder. Il ſert à ceux qui n'ont point de fieure, & pour aider à la digestion de l'eſtomach & aux douleurs qui y ſuruiennent, ſi on le boit après le repas: il eſt bon auſſi contre les trop grandes humiditez du ventre, & contre les diſſenteries.

Vin d'Aluine ou Absinthe.

Dioscoride propoſe pluſieurs & diuerſes manieres de cōpoſer ce vin, entre leſquelles nous auons choiſi ceſte ci cōme la plus aiſce. On prêt cent drachmes d'Absinthe Pōtique pilees & liees dans vn linge net & clair, & les met on dans vn baril de mouſt, la où on les laiſſe tremper l'eſpace de deux mois entiers.

Ce vin

Ce vin ainsi préparé est fort profitable à l'estomach, fait vriner, & aide à la digestion. Il sert de remède aux maladies du foye, à la jaunisse, & aux maladies des reins: chasse les degoustemens, & profite à ceux qui sont affligés de l'estomach. Il est aussi bon contre les enflures des parties d'autour du cœur qui ont longuement duré, & contre la vermine du ventre, & contre les mois arrestez.

Vin d'Ysope.

Il faut prendre vne liure d'Ysope pilé & le mettre dans vn linge clair avec quelques petites pierres (afin que par leur pesanteur elles fassent enfoncer l'Ysope) puis les plonger en vn vaisseau plein de moust: quarante iours apres il faut prendre le clair & le mettre en vn autre pot. Ce vin est propre contre les maladies de la poictrine, des costez, & des poulmons: contre la toix enuieillie & la difficulté d'auoir son haleine, fait vriner, & aide aux tranchées & aux frissons des fieures qui viennent par interualles, & si prouoque les mois.

Vin de Betoine.

Pour faire le vin de Betoine, il faut prendre vne liure de ceste herbe lors qu'elle est replie de sa graine, & la faire tremper en deux côches de vin, & le 7. mois apres le tirer & le mettre en vn autre vaisseau. Ce vin est excellent contre plusieurs maladies des entrailles,

comme est aussi l'herbe : car pour le dire en un mot, les vins composez prennent la vertu & faculté de choses dequoy on les fait. Il ne sera donc pas malaisé à ceux qui fauent le naturel des choses, de cognoistre incontinent la vertu de ces vins composez. Toutesfois l'usage du vin doit estre entierement defendu à ceux qui ont fièvre. On fait aussi du vinaigre de bethoine qui est bon aux mesmes maladies.

Vin de Thym.

Ce vin sert contre la difficulté de cuire & digerer la viande, contre les desgoustemens, la disenterie, les douleurs des nerfs & des entrailles d'autour du cœur, contre les froidures de l'hyuer, & cōtre les animaux venimeux apres la morsure desquels on sent vne froidure, ou bien le lieu pourrit. Le vin d'Origan sert aux mesmes maladies.

Vin de Cabaret & de Pastenaille sauvage.

Le premier prouoque l'vrine, & est propre aux hydropiques, à ceux qui ont la iaunisse & qui ont la sciatique. Le dernier sert aux maladies de la poictrine, des entrailles d'autour du cœur & de la matrice : fait venir les mois, chasse les rots & ventositez, & fait sortir l'vrine arrestee : il est bon aussi à la toux, aux rompus & cassez.

Vin de Sauge & de Marrube.

Le premier est grādemēt profitable cōtre les douleurs de reins, de la vésicie, cōtre les crachemens

chemens de sang, la toux, les rōpures, les conuulsions, & contre les mois arrestez. Le dernier est propre aux maladies de la poictrine, & à toutes les maladies auxquelles le Marrube peut seruir.

*Vin d'Ache, d'Aneth, de Fenoil
& de Persil.*

Ces vins se font tous d'une meſme ſorte, & les ſacultez ſont ſemblables. Il faut donc prendre de ſemence d'Ache, recente & bien meure, & criblee, neuf onces, & les lier dans vn linge clair; puis les plōger en vn vaiſſeau plein de mouſt. Ce vin fait venir l'appetit, aide à ceux qui ont mal d'eſtomach, à ceux qui vrinent à peine, & à ceux qui reſpirent avec difficulté.

Vin de Grenades.

De tant de façons de compoſer ce vin, que les anciens & les modernes ont mis en auant, i'en produiray ici ſeulement quelques vnes approuuees par Dioſcoride, & par les modernes eſcriuains. Ils tirent le ſuc des grains de ces grenades qui n'ōt pas le noyau dur comme hoys (appelees Apyrena) lequel ils font cuire iuſques à tant que le tiers ſoit conſumé, & lors ils le ferment pour garder: Ce vin eſt fort vertueux contre les fluxions interieures, & contre la fiere qui eſt coniointe avec flux de ventre: Il faiſt vriner, reſerre le ventre, & ſi eſt grandement vtile à

l'estomach. D'autres apres auoir nettié les grains de Grenade, les mettēt incōtinent au pressoir, & serrent le suc qui en fort dans des pots de verre: lequel ils laissent là bouillir de foy-mesme, iusqu'à ce qu'il ne bouille plus, & que la lie soit alee au fons: Cela fait ils prē nēt le clair & le mettēt en dautres pots, avec vn peu d'huyle par dessus, afin qu'ē le gardāt trop long tēps il ne s'esuente, ou qu'il se gaste ou aigrisse. Aucuns meslent pareille quātité de grains de Grenade & de Raisins noirs, vn peu aspres & rudes au goust, foulēt le tout ensēble, & laissent bouillir ce vin tout à part foy, iusques à tant que le vin soit clair: puis l'ayant coulé le serrent en des petis vaisseaux & le gardent: ainsi fait il est de fort bō goust. Tu trouueras encorēs vn autre moyē pour le faire, en nostre Iardin medicinal, au septiesme Sillon, au Quarreau onzieme, où nous auons traitté des facultez & vertus des Grenades. Le vin desquelles a aussi la mesme vertu, car les vins artificiels attirent la vertu des choses qu'on y mesle, cōme nous l'auons dit apres Dioscoride, quand nous auōs parlé du vin du Betoine. Tu pourras recueillir du mesme Dioscoride, le moyen de faire plusieurs autres sortes de vins composez.

Particuliere description de quelques vins medicaux & de leurs remedes: prins d'Arnaud de Villeneuf & autres.

Vin merueilleux pour les melancoliques.

Ceux qui sont trauaillez d'humeur melancolique, engendree de cholere bruslee, & contenue és vaisseaux du foye & és grosses veines (cōme escrit Arnaud) ou qui sont bilieux de nature, qu'ils composent du vin selō les façōs par nous cy deuāt proposees, dās le quel entre de Buglosse, de Melise, de Scoiopendria, d'Epithyme, de Behen blāc & noir, de Polypode de Chesne, de feuilles de Sené, de roses rouges nettiees des ongles, de fleurs de Borrache & de Buglose, le tout bien nettié, en telle quantité qu'il voudra, & selon la quantité du vin qu'il voudra composer. Le temps propre pour vser de ce vin, c'est au printemps, en hyuer, & sur tout en automne: car en ce temps l'humeur melancolique abonde fort. Si on le veut garder longuement, pour s'en seruir seulement a cōseruer la fanté, & non pas pour chasser la maladie qui presse, il faudra oster le Sené, & en son lieu mettre du Behen blanc, & du rouge autant de l'un que de l'autre, enuiron vne once. Ce vin oste la tristesse & chagrin aux melancoliques, chasse les facheuses apprehensions, engēdre liesse, rend le sens & la raison rassise, resiouit le cœur, & corrige le bruslement des humeurs. Il est bon ausi contrē les fieures quartes causees par adustiō, repurge le sīg de toute crasse & ordure, refait le corps

le mettant en bon point. On pourra bié mesler ce vin parmy celuy qu'on boit d'ordinaire, si on void qu'il soit trop fort & trop medicinal.

Vin Cordial, c'est à dire, propre au cœur.

On compose ce vin avec Borrache, Melisse, Buglosse, & Cannelle. Il est vtile contre le battemet de cœur, & contre les autres passions du cœur. Il purifie le sang corrompu, efface la rogne, guerit la lepre, conforte les esprits & resiouit le cœur: Il fait sortir par les vrines les humeurs melancoliques & brulez, & deliure le cerueau de toutes fumees & grosses vapeurs, qui le troublent & luy causent ennuis & fascheries. L'adiouste encores (dit de Villeneuve) que ce vin resiouit les furieux, & ceux qui sont tellement transportez de leur sens, qu'il les faut attacher, & les fait reuenir en leur bon sens & vsage de raison. Ma conscience m'est bon tefmoin, dit-il, si ie n'ay veu vne femme honeste, laquelle se mettât souuent en colere, deuenoit tellement transportee & hors dufens, qu'elle disoit, tout ce qui estoit honeste de dire & ce qu'il falloit cacher: & deuenoit tellement enragee & furieuse, qu'il l'a falloit attacher, iusques à ce que la colere fust passee. Or ce vin luy seruit de remede souuerain & singulier, qui luy fut enseigné par vn certain passant qui demandoit l'aumosne à la porte de ceste

ceſte femme, comme le meſme de Villeneuve eſcrit. Lequel dit auſſi que le ſuc de Borrache ou de Bugloſſe eſtant purifié, ou comme on parle clarifié, ſert grandement aux ſuſdites maladies ; ſi on le meſle parmy du vin, & qu'on en boyue tous les iours : & n'eſt ia beſoin d'y rien mettre de doux, car ce ſuc eſt aſſez doux & plaſant de ſoy-meſme.

Vin de Paſſules, ou Raiſins de Damas.

Pour faire ce vin, il faut auoir des Paſſules ou Raiſins de Damas bien nourris, & les mōder des pepins & petits grains qui ſont dedans, & apres les auoir vn peu pilees, les mettre en vn vaiſſeau propre, puis mettre du mouſt par deſſus, & le parfaire comme il a eſté dit des autres cy deſſus. Ce vin eſt fort vtile aux gens vieux, à ceux qui ſont valetudinaires, c'eſt à dire touſiours malades, aux phlegmatiques, melancoliques, & femmes delicatēs. Il adoucit la poictrine, fortifie le foye & l'eſtomach, corrige le ſang, reſiſte à toute putrefaction, oſte les appetits de vomir, engraiſſe le corps & nourrit tresbien. Il ſert de remede aux Aſmatiques & à ceux qui ont la toux: il fortifie grandement la vertu & faculté de cuire la viande, & les autres facultez naturelles: & arreſte tous flux de vêtre, fait reuenir ceux qui ſont tōbez en cœur failli, cōſume les humiditez, & remede à l'hydropiſie: Bref, quiconque vſera de ce vin ſera

garenti de toutes maladies procedantes de phlegme.

Vin de Coins, que les medecins appellent Cydonites.

*C'est quinze
livres.*

LE vin de Coins se fait en ceste sorte. Il faut mettre les pōmes de Coins en quartiers, comme on feroit vn reffort, apres toutesfois en auoir osté les semences, comme escrit Dioscoride : & mettre douze liures de ces Coins en soixāte sestiers de moust, & les laisser tremper durant trenté iours : & le vin estant rassis & purifié on le met à part pour s'en seruir au besoin. Il restraint, fortifie & recree: parquoy, il est propre aux affections du cœur, aux affections de l'estomach & du foye, aux disenteries, grauelles ; difficultez d'vrine. Si apres que les Coins auront assez trempé dans le vin, on les veut retirer & les faire cuire, puis les passer par vne estamine, & les confire avec sucre, on en pourra faire du cotignat qui sera fort bon ; & propre pour suruenir aux maladies de la famille. On fait aussi vne certaine compositiō qu'on appelle hydromelum, à laquelle aucuns donnent faucement le nō d'hydromel, car il n'y entre point de miel, mais seulement d'eau & de Coins, que les Grecs nommēt Mēla: voici la façon cōme il faut faire. Quand ce vient aux premieres pluyes du printēps, il faut recueillir

lir de l'eau de pluye dans des pots bien nets, & la laisser reposer longuement à l'ombre, & estant rassise mettre le clair en vn autre vaisseau: dans lequel il faut faire tremper les Coins mundez de leurs semences, & mis en pieces, si longuement que l'eau acquiere vne couleur de vin iaunastre ou claret: Cela fait il faut mettre ceste eau au soleil aux iours caniculaires, & l'y laisser assez long temps: ou bien la faire cuire à petit feu, sur des charbôs qui ne iettent point de fumee, & en cuisant l'escumer tousiours: apres il la faut mettre en vn autre vaisseau, le bien couvrir & le mettre en lieu propre pour le garder. Sept mois apres on s'en pourra seruir au lieu de vin, en toutes les maladies qui requierent fortification des vertus & astrictiõ, comme sont toutes relaxations, rompures, foibleesses, abondance de sueurs & semblables. Il renforce toutes les entrailles affoiblies, arreste l'appetit de vomir & le vomissement, refueille l'appetit perdu, fortifie l'estomac, retient le ventre par trop lasche, corrige la trop grande chaleur du foye, sert de remede à ceux qui crachent le sang, aide la digestion, & rabat les fumees qui montent au cerueau. Prins deuant le repas il renforce la faculté retentrice, fortifie les boyaux, & apaise les motiõ qui y peut estre. Son vsage cõuient à tout aage, sexe, & à quelque país ou regiõ que soit (dit Auicena,

il refiouit, appaife la foif, repare & embellit la couleur de la face, fortifie la foibleffe des reins, furuiët à l'yurongnerie, & eft fort profitable à ceux qui releuent de maladie. Mais entre toutes fes proprietéz, cefte-cy eft admirable, c'eft qu'eftant beu il fert de defenfif & preferuatif contre l'infection de la peſte, contre les venins & choſes venimeuſes, comme nous l'auons pluſieurs fois expérimenté. Au reſte ſi quelqu'un veut promptement & en peu de temps, auoir du vin de Coins, lequel toutesfois n'aura pas vne telle vertu que le precedent, qu'il mette des Coins tous cuits & mondez de leur pelure, dans quelque bon vin, lors qu'ils ſont encores chauds, & qu'il les laiſſe là tremper quelques heures, & apres qu'il coule ce vin. Ou bien apres auoir bien nettié les Coins & dehors & dedans, qu'il les mette tremper vn iour ou deux dâs quelque vin blanc fort puiſſant & ſubtil: puis quand ils auront bien tré pé, qu'il les face cuire à petit feu, dans vn pot bien net, propre pour ce faire: finalement: qu'il coule ce vin & le ſerre pour s'en ſeruir au beſoin. Si apres cela il veut confire au ſucre les Coins qui reſteront, il en pourra faire du cotignat qui ne ſera pas à meſpriſer: que ſi apres auoir paſſé les coins pour faire ce cotignat, & y auoir mis le ſucre, il y meſle encores vne ſuffiſante quâtité de Rhabarbe
bien

bien choisi & mis en poudre bien delicee, ou quelque autre drogue laxatiue, & ayant le tout bien meslé ensemble, il les fait vn peu recuire, il aura vn fort bon cotignat, & fort propre pour laschet le ventre & purger le corps: duquel on pourra vser beaucoup plus seuremēt & avec plus de profit qu'on ne fait pas de celuy qu'on apporte de Lion, dans lequel entre de la Scammonee ou Diagrid: comme nous l'auons escript en nostre Iardin medicinal, lequel depuis peu de temps nous auōs augmēté & enrichi de plusieurs beaux remedes & secrets: & là ie te renuoye pour scauoir les autres secrets des Coins: tu y trouueras choses profitabls.

Vin de Romarin.

L'inuention du vin fait avec Romarin, n'est pas nouuelle, ni sortie de nostre Europe: Or Arnaud de Villeneuve escriuant de ce vin, en parle en ceste façon, rapportant les paroles d'vn certain autheur, lequel il ne nomme point. Moy estant, dit-il, en Babylonie, i'aprins avec grandes prieres & requestes, d'vn vieil & scauant medicin Sarrafin, les vertus du Romarin, lesquelles vn certain docteur tenoit pour vn grand secret, lequel il ne vouloit communiquer ni enseigner à personne. Entre les autres vertus il parloit de celle du vin qu'on en fait, la composition duquel n'est pas fort differente de celle des

autres vins mediceinaux. Ses vertus ſont vrayement admirables en toutes maladies froides, principalement de la teſte & des nerfs: il reſueille l'appetit perdu, il eſlargit le cœur par ſon odeur; reſiouit tous les eſprits, s'ils ſont eſgarez il les r'aſſemble, fortifie le cerueau, raſermit les mēbres laſches & foibles; renforce les mēbres tremblans; ſoit qu'on le boyue ou qu'on ſ'en laue & baſſine: Si on ſ'en laue la face, il la rend fort belle, la polit & derride: Si on ſ'en baſſine les arteres des bras & des temples, incontinent la faculté eſt cōmuniquée au cerueau & au cœur; tellement que cela reſiſte merueilleuſement à l'infection & contagion, & à la maladie meſme de la peſte, muniffant & fortifiāt ſes parties nobles contre telles infectiōs. Il y a auſſi vne vertu ſinguliere pour preſeruer le corps de tous fronces, charbons, gales & autres tumeurs & puſtules malignes: d'autāt qu'il cōſume toutes ſuperfluitez, & diſout tous excrēmēs gluās & viſqueux, & corrige toutes corruptions interieures: Il attēue la phlegme, eſclaircit la melācolie, purifie le ſang, ouure les oppilatiōs, ſubtilie les choſes groſſieres; incife les gluantes, & garētiſſe le corps de toute corruptiō. Toutes les fois qu'on ſe lauera la bouche avec ce vin, il fera auoir le ſouffle plaifant & de bonne odeur, nettie les dents raſermit les genciues, & s'il y a quelque vice il le

il le guarit entieremē, Il defeiche les vlcères qui viennent en la bouche, & sert de remede contre toutes fieures putrides. Si celuy qui ne fait que releuer d'une longue maladie, continue de mâger tous les matins à ieun vne rostie trempée dans ce vin, & mesme sucrée par dessus, il recouvrera l'appetit perdu, & profitera grandement à l'estomach: Il aide aux phthifiques, aux etiques, paralitiques, à ceux qu'on ne peut esueiller, à ceux qui tombent du haut mal, à ceux qui sont subiets à deffaillance, à ceux qui sont detenus de fieures quartes, de colique, de maladie de poulmons, de podagre, qui sont subiets à souflemens de cœur, & de fluxions: soit qu'on le boiue, ou qu'on s'en laue & bäsine seulement. On tiēt que le vin dans lequel les fleurs de Romarin aurōt trépé ou bouilli, aura la mesme vertu. Entre les vertus que ce vin a, ceste-ci est vne des premieres, à sauoir qu'il tiēt le lieu & sert de Theriaque en tout & par tout, cōtre les viâdes & breuagss empoisonnez, & en general cōtre toutes choses venimeuses. Pour le dernier, ce vin est merueilleusement vtile aux femmes qui sont trauailles de la retention de leurs mois, ou de quelque autre maladie de la matrice, & si sert pour faire cōceuoir, mesmes celles qui semblent en auoir perdu toute esperāce. Voila ce que i'ay recueilli en partie, d'Arnaud de Ville

neufue, en partie de l'experience & des liures de plusieurs, que ie t'ay aussi fidelement & sincerement desparti.

Vin propre pour ouurir les opilations, & corriger les melancholiques.

Ce vin est composé des fueilles & racines de Cicorec, de Scolopendria, d'Endiuie, & quelque peu des cimes d'Absinte: Ces choses donc estans longuement trempées en vin, & cuites suffisamment, veulent estre coulees: & puis qu'on mette d'autre vin par dessus, que on les face recuire, & l'ayant derechef coulé, le faudra mesler avec le premier, & le garder en vn pot propre & conuenable. Que s'il est par trop amer, ou qu'il ait quelque autre mauuais goust, on le pourra corriger à la façon que nous auons dit quand nous auons parlé des fruiçts medicinaux. Vn tel vin sert pour oster les oppilatiõs du foye, de la rate & des autres entrailles, & pour amoindrir les maladies qui en peuuent sortir: comme sont la iaunisse, les passes couleurs de celes qui sont prestes à marier, & semblables maladies. Si on prend vne once ou dix drachmes d'Epithyme & de Polypode de Chesne, quelque peu pilez, & qu'on les face tremper en demie liure de quelque bon vin blanc, & les ayans fait vn peu bouillir, qu'on les coule & les face boire, cela aidera

dera merueilleusement les melancoliques: mais il faudra reiterer souuent & par intervalles ce breuuage: ou bien en faire assez bonne quantité à la fois.

Vin d'Euphraise, fort propre aux yeux.

Il faut mettre l'Euphraise dās du moust, & en faire du vin à la façon que nous auons dit ci deuāt, par l'vsage duquel le yeux des vieux raieunirōt: car il oste tous les empeschemēs par lesq̄ls la veuē est corrōpue ou affoiblie, en quelque personne que ce soit, de quelque age, habitude ou cōplexion qu'elle soit. J'ay cogneu vn certain persōnage, dit Arnaud de Villeneufue, qui auoit esté long tēps sans y veoir, qui estoit vn estat miserable, lequel en moins d'un an recouura la veuē par le moyē de ce vin: car la plante de laquelle il est cōposé, est douēe de ceste vertu, qu'elle sert de prōpt remede aux maladies des yeux: de sorte que si on prend de sa poudre dans vn iau-ne d'œuf, on s'appercenra d'une opperation merueilleuse en la restauration de la veuē. Le mesme aduiendra si on la prend en vin blanc, dans lequel on ait premicrement fait tremper ou vn peu bouillir, quelque grains de Fenail, dequoy nous auons plusieurs tēmoins encores viuans & gens dignes de foy, dit Arnaud, lesquels en ayant fait l'experien-
ce, ont leu les plus menues lettres sans point

EE.iiij.

de lunettes, au lieu qu'auparauant ils ne pouoyēt pas lire les plus grosses avec des lunettes. Si tu mesles yn peu d'eau de Fenoil parmi ce vin de Romarin, tu augmenteras de beaucoup sa faculté.

Vin d'Aunee.

Le vin dans lequel on aura fait tréper par trois iours de l'Aunee, ou Enula campana: il le rendra d'vne merueilleuse vertu pour éclaircir la veuë, pour resister à la peste, & pour prouoquer l'vrine & les mois: il seruira aussi de secours contre les enflures, contre les trenchées, morsure des serpens, contre la toux & autres maladies de la poictrine.

Vin de Sauge.

En quelque sorte qu'on face le vin de Sauge, soit en faisant bouillir la Sauge dans le vin, ou en la suspendant seulement dedans, il a vne admirable vertu & singuliere faculté contre les maladies des genciues relaschees, contre les douleurs des dens qui branlent, contre les maladies des nerfs, & des parties nerueuses, comme sont paralysie, cōuulsion, tremblement & semblables: car il conforte bien fort les nerfs, les resiouit & fortifie, soit qu'on le boyue, ou qu'on les bassine chaudement, apres les auoir frottez tout doucemēt: & n'y a rien meilleur, comme enseigne Arnaud, ni remede pl^r singulier ni plus asseuré.

Il est

Il est aussi vtile contre le haut mal procédât de l'estomach ou de la matrice, par le cōsentement ou communication que ces parties ont avec le cerueau. Quât au reste, tu le pourras aisément recueillir du recit que nous auons fait des vertus de la Sauge, en nostre Iardin medicinal: car ces vins composez, ont la vertu des choses desquelles on les fait, cōme nous auons monstré cy deuant, l'ayans prins de Dioscoride.

Vin d'Hyssope.

Ce vin estant adouci avec Regalisse ou sucre, est specialement appelé le vin desvieilles gens: car il a vertu de digerer, inciser, atténuer, mondifier, ouurir, attirer, & de prouoquer les vrines. Il donne grand secours à la toux humide, & au mal caduc, principalement aux enfans. Il desseiche les humiditez de l'estomach & de la matrice, si on le boit ou qu'on s'en foment. Il oste tous les empeschemens qui pourroyent estre aux poulmons, nettie tous les conduits de la voix de toute phlegme: aide aux hydropiques, il desseiche & fortifie les parties relaschees par trop grãde humidité, si on les fomente chaudemēt.

Vin de Fenail.

On fait ce vin avec semence de Fenail: lequel est souuerainement bon contre l'esblouissement des yeux: contre les ventositéz & les trenchées du ventre, contre l'hy-

dropisie & mauuaise habitude, mesmement és enfans , ce qu'Arnaud dit auoir expérimenté. Outre ce , il remédie aux venins & aux viandes de mauuaise qualité, & aide grandement à la toux & aux maladies des poulmōs, Il multiplie le laiēt & la semence genitale, oste les appetis de vomir, appaise les douleurs des costez, adoucit les vehementes douleurs de la colique, dissout les ventositez encloses dans le corps , aide la digestion , ouure les oppilations, guerit les fascheries de la rate & du foye. Si quelqu'un cōposoit ce vin avec les racines de Fenōil , il seruiroit de remede à ceux qui sont graueleux & qui ont la pierre aux reins, prouoqueroit l'vrine , profiteroit à la vescie, & attireroit les mois.

Vin de Panicaut, ou Chardon à cent testes.

Ce vin se fait à la forme des autres vins, avec la racine & toute la plante. Il guerit incontinēt la difficulté d'vrine , & ceux qui ne vrinent que goutte à goutte , y adioustant vn peu de sucre : Il rend fertiles les femmes qui ont cessé de porter lignee, voire les hommes augmentāt la semēce genitale. Il prouoque les mois & les vrines, & fait cesser les tranchées & les inflations . Il est aussi profitable contre les maladies du foye, contre les venins , la peste & contre beaucoup d'autres choses, comme plusieurs l'ont expérimenté.

Vin d'Anis.

Le vin d'Anis ouvre les oppilations intérieures, dissipe les vétoſitez, appaise les rots aigres, corrige l'indigestion d'estomach, & guerit les violentes douleurs du colon, Mais sur tout il est bon pour augmēter le laiſt aux femmes, si elles en prennēt quelques iours en assez bōne quātité avec du bon sucre: car pris ainsi, il est de grāde vertu. Il appaise les douleurs & autres maladies des reins procedantes de ventositez, & fait sortir le grauiet qui s'y engendre, principalement si on prend premierement des tablettes composees avec Anis, que les medecins nomment Dianisum, & des tablettes composees avec gomme diagragāt, appelees Diatragacātes: car soudain les douleurs estans appaisees, les reins sont nettiez de grauiet, lequel sort avec l'vrine.

Vin avec Roses, ou de Roses.

On peut bien appeler ce vin, vin d'Esté, car il est fort propre & conuenable aux personnes en temps d'E'sté, & par les grandes chaleurs. Il le faut faire avec des Roses rouges, mondees de leurs ongles, seichees & mises dans du mouſt, comme il a esté dit, puis tirees: on le pourra bien aussi faire beaucoup plus soudain, mais il n'aura pas vne telle vertu, si on met dās vne certaine quantité de vin autant d'eau Rose que le gouſt & l'odeur de l'vn & de l'autre ſoyent conseruez. Il est fort

propre pour esteindre les yehementes chaleurs interieures, pour renforcer le cœur & les entrailles, pour entretenir les forces & vertus du corps qui diminuēt, pour affermir la lascheté des membres, reparer ceux qui sōt affoiblis, remettre ceux qui sont à demi perdus, pour arrester les trop grandes sueurs, pour resister à toute putrefaction & à toute contagion & fièvre pestilentielle, seruant en toutes ces choses de souverain remede. Il est fort salutaire à ceux qui sōt de nature bilieuse & chaude : & si ne profite pas peu à ceux qui sont tormentez de flux de ventre, de difenteries, affoiblissement de la faculté retentrice, de vomissemens, souflemens de cœur, & defaillances, mesmement si on met vn peu d'eau de pluye parmi, & qui soit ferree. Si on s'en laue souuēt la bouche, outre ce qu'il raffermira les dens qui branlent & les gencies lasches, il rendra le souffle fort souē & plaisant. Si on se laue la face avec vin, y meslāt du suc de Limōs parmi, il apportera vne beauté indicible & admirable. Si on en met vne petite goutte dans les yeux, ce fera pour aiguiser la veuē : car à cause du vin il nettoiera & modifiera, & à cause des roses, il fortifiera & raffermira la veuē.

Vin de Baguenaude ou Alkekengi.

Ce vin se fait des grains ou cerises qui viennent dās les vescies de l'Alkekengi ou Baguenaudes

naudes, enuiron le temps des vendâges, lors qu'il iaunit, ou plustost rougit estant meur. La composition se fait en l'vne des fortes & manieres par ci deuant descrites. Si la necessité presse d'en auoir soudainement, il y faudra proceder en ceste maniere. Il faudra piler quelque nombre de ces Cerises dans quel que puissant vin blanc, les y laisser tremper quelque tēps, puis les faire bouillir vn bouillō ou deux, & les couler, & y ayant mis du sucre parmi, ou vn biē peu de canelle, si besoin est, on pourra boire le vin: il est propre cōtre la difficulté d'vrine, contre la retétion d'icelle, & contre la difficulté d'vriner: car il la fait sortir soudain, & quelque difficulté ou empeschemēt qui puisse estre, il faut qu'elle sorte en abondance: & avec l'vrine vne quantité de grauiier, & de pieces de pierre rompues, que facilement on les peut recognoistre & prédre à la main: voila d'où viēt que plusieurs personnes suiettes à la grauele & à la pierre, ayans par mon cōseil vsé de ce vin, ont esté miraculeusement deliurez des grandes douleurs qui les tormentoyent & bourreloyent iournellement: mais ie leur ordonnois l'vsage de ce vin à la lune nouuelle, ou biē vn peu apres ayant premierement purgé le corps avec de Casse, meslée avec Rhabarbe. Que si la maladie est enuieillie comme es gens vieux, il en faudra vser tant plus longuement. Mais à ce propos ie me souuiens d'vne hystoire recitee

par Arnaud de villeneufue, telle que s'ensuit. Il y auoit, dit-il, de mon tēps, vn certain Cardinal, auquel l'vrine fut tellemēt arrestee par l'espace de quatre iours entiers, que desia tout le petit ventre estoit enflé, comme vn bouc:& quelque remede qu'on y appliquast, on n'auançoit rien, tellemēt que chacun estimoit que c'estoit fait de luy : & de fait toute esperance estoit perdue s'il ne fust suruenu vn certain empirique, comme s'il fust esté enuoyé de Dieu, qui par le moyen de ce vin de Baguenaudes le guerit : car la vëscie luy fut tellement lāschee, & le conduit d'icelle tellement ouuert, qu'il remplit de son vrine vne conche ou bassin, comme dit Arnaud: & par ceste seule experience ce medicin qui estoit auparauant pauure & peu estimé, acquist grand bruit & grandes richesses.

Vin avec Gyrosles.

Pour faire ce vin, il faut mettre des Gyrosles dans vn sachet, ou les lier dans vn linge clair, & les plonger dans du moust, ou pour mieux faire les pēdre dessus. Ce vin sera fort bon cōtre l'Asthme enuicillie, cōtre la toux pourrie, contre les deffaillances & le haut mal. Il aide la digestion, conforte l'estomach refroidi & rend le soufflé fort souëf & plaisant: toutesfois pource qu'il eschauffe fort le corps, il sera bon d'y adiouster du sucre ou de regalisse, ou bien d'eau rose.

*Asthma-
rique est ce
luy qu'on
dit vulgai-
rement
Poussif.*

Vin de Gramen ou dent de chien.

On fait ce vin avec racines de Gramen, ou de Sanguinaire autrement appelee renouee, bien mûdees & lauees, il fait mourir la vermine du vêtre, nettoye les reins de tout grauiet: il descharge la vefcie remplie de l'vrine qui est arrestee; ouure les oppilatiōs du foye & des veines appelees meſeraïques, qui ſont engendrees de cruditez: appaiſe les douleurs des iointures, euacuāt les matieres phlegmatiques qui les engendrent, par les vrines: car la racine de Gramen est nombree entre les medicamens qui prouoquent l'vrine. Si on fait ce vin avec racines de Polygonon ou Renouee que les apotichaires nomment Corigiola ou lāgue de paſſereau, tu auras vn ſingulier remede, lequel i'ay ſouuent experimētē en pluſieurs, avec heureux ſucces, contre toutes les maladies des reins & de la vefcie: principalement contre la grauelle, la pierre, la douleur des reins, la difficultē d'vrine & les douleurs violentes qui en prouiennent.

Vin d'Yeble ou petit Sureau.

Ce vin est laxatif, & est compoſē de grains d'Yebles meurs, leſquels eſtans vn peu foulez en temps de vendanges, on les fait bouillir dans du mouſt, on les eſcume, & l'ayāt paſſē par vn panier d'oſier, on garde le vin raiſſi, & clair pour s'en ſeruir au beſoin. On peut bien faire autrement, aſcauoir faire bouillir

ces grains avec le moust à petit feu, iusques à ce que la troisieme partie soit du tout consumée, apres cela on les laisse rasseoir toute vne nuit à l'aër, & le lendemain on les coule comme nous auons dit ci deuant. Aucuns prennent les racines au lieu des grains; au reste ils le font tout de mesme que nous auons dit. Il purge la phlegme & l'humeur bilieux; sert de remede à l'hydropisie, ouure les conduits de l'amaris, profite aux vlcères, tât extérieurs qu'intérieurs: & sur tout il est vtile aux sciaticques, gouttes, & à ceux qui s'ont diaprés de verolle: car par sa vertu laxatiue, il appaise merueilleusement les grâdes douleurs qui accompagnent telles maladies; euacuât & destournât les matieres qui estoient prestes à tomber sur les parties, & mesme qui commençoit desjà à tomber: vray est qu'il est aucunement nuisible à l'estomach, & pourtant il sera bon de mettre parmi ce vin quelque chose odorante, afin de conforter & resiouir l'estomach.

Vin qui retient l'enfant au ventre de celles qui sont enceintes; & prepare à contenoir celles qui ont enuie d'estre enceintes.

On peut faire vn vin propre à dissiper les ventosités, & qui aide grandement à retenir & conseruer l'enfant conceu, au ventre de la mere, afin qu'elle n'auorte; & qu'elle le porte iusques au terme legitime sain & entier: voici donc quelle en est la composition. Prenez
de se-

de seméce d'Ache, de Méthe seiche, d'Ammi de chacun trois drachmes: de Mastic, de Girofles, de Cardamomum ou melegettes, de Roses rouges, de chacun vne drachme: de Cannelle, de l'escorce des racines de Capres, de Castoreum, de Zedoaria, de Glay Illirique, de chacun deux scrupules: de Sucre blanc & bon, deux liures, Faiétes de tout ceci du vin à la forme qu'on fait le vin aromatique, dict vulgairement Hipocras. La façon d'en vser c'est d'en prendre vn bien peu soir & matin. Il fortifie les ligamens de la matrice, & aide grandément la faculté reténtrice, pour pouuoir porter le fardeau de l'enfant. Il rend aussi les stériles habiles à concepuoir, si la stérilité procéde de la dispositiō venteuse & froide de la matrice, ou pour sa trop grande humidité, ou pour estre glissate, à cause dequoy elle ne peut contenir la semence genitale qui y est ietee: car ce vin repare & corrige toutes ces indispositions. Iusques ici nous auons, pour la pluspart recité, ce qu'Arnaud de Villeneuve médecin & philosophe fort excellent dit: vray est que entant que nous auons peu, nous auons poli son langage, lequel estoit assez mal limé & corrompu, à cause du temps auquel il estoit, mais il ne laissoit pas pourtant de pratiquer dextremēt la médecine, sachant bien, que ce sont les remedes qui guairissent les maladies, & non pas le beau babil.

On pourra composer d'autres vins mediceinaux de quelque plâte ou drogue qu'on voudra, selon la forme & maniere des precedés, les vertus & facultez desquels on pourra conjecturer par les choses qu'on y meslera.

Vin de Gayac, avec la vraye & legitime façon de le composer, & comme il en faut user: en semble la vraye maniere de guerir l'infection venerienne ou galle Espagnole, ou mal de Naples: prins de Pierre Andre Mathiol, Siennois.

Il est bien besoin de se prendre garde de quelques trompeurs & charlatans, lesquels sans sauoir ce qu'ils font, & ignorans des considerations de medicine, n'ont point de honte de mettre du pain porcin, de Coulouuree, de Pityusa, de Coloquinte & du Turbith, parmi la decoction du Gayac: voire sans considerer ni auoir esgard au temperament, à la maladie, à la saison de l'annee, au sexe, à l'age, ils font aualer tous les iours vn grand verre de ceste decoction tiede, à tous indifferement: & de là vient que pour vn qu'ils en guerissent, ils en fôt mourir dix, cōme des bourreaux qu'ils sont. Parquoy afin que chacun se puisse garentir de leurs mains, il m'a semblé bon de descrire en ce lieu le vray moyen de faire ceste decoction du vin de Gayac, & adioulter quant & quant comme on en doit user.

Pren

Pren donc du bois de Gayac bõ & bien choisi, rapé avec vne lime, ou rabotté bien menu avec le tour, quatre liures d'escorce du mesme Gaïac, deux liures: de chardõ benit, vne liure & demie: de Capili veneris, de Ceterach, de fleurs de Borrache, & de Buglosse, de chacun vne liure: de Canelle bonne & biẽ odoriferante, six drachmes: de semence d'Anis, vne once & demie, du Sucre, cinq liures. Mets tout ceci dans vn baril à vin, qui soit assez grand, & verse par dessus cent cinquante liures de quelque bon vin blanc tout bouillât, puis bouche tresbien ton vaisseau par dessus, & laisse ainsi trêper le tout par trois iours. Apres trois iours, fay passer ceci par vn linge, & garde ce vin en vn vaisseau à part pour en faire boire aux malades: car ce vin doit estre baillé à boire aux malades à souper & à disner, au lieu de la seconde decoction de Gayac: & non pas matin & soir, en lieu de sirop, comme plusieurs font assez inconsiderément. Ce mesme vin se peut faire plus cõmodément & en plus grande quantité en temps de vendanges, meslant le bois, son escorce & tout le reste parmi des raisins blancs, ou biẽ parmi le moust qu'on en a tiré, & les y laisser iusques à ce que le moust ne bouille plus, & qu'il soit clair & bien purifié: mais il faudra augmenter la quantité des drogues selon la quantité du moust.

Outre ce bruuage qu'on baillera à boire au repas, il en faudra faire d'un autre, qu'on leur fera boire soir & matin, trois ou quatre heures deuant le repas, qui est la decoction du bois de Gayac faite en eau, selõ que les medins la font, & leur en faut bailler 6. onces y meslât 2. onces de la liqueur suyuate. Pren de Capili veneris, du Oublon, de Fumeterre, de Ceterach, de Sené, de chacun trois poignes: de racines de la grande Centauree, de Regalisse, de Polypode, de l'une & l'autre Buglose, de chacun quatre onces: de semence d'Anis, & de Melanthiun, de fleurs de Borrache & de Buglose, de toutes les sortes de Santal, de Casse (qu'on dit communément Canelle) de chacun cinq drachmes. Fay cuire toutes les choses en vingt quatre liures d'eau, iusques à ce que le tiers soit consumé, puis les coule. Cela fait, prẽ de bõ Sené & bien choisi, deux liures: & les mets en vn pot de terre qui ait l'entree estroite, puis verse per dessus la decoction susdite toute bouillate, & bouche bien l'ẽboucheure du pot, avec vn oreillier de plume de duet bien chauffé, enuelope bien ton pot, & le mets en lieu chaud, & le laisse ainsi reposer vn iour & vne nuit. Le lendemain il te faut bien presser le Sené entre tes mains, & couler l'infusion: à laquelle il faudra adiouster de l'infusion de Roses, qui soit assez laxative, six liures: & de sucre huit liures, & les faire

faire bouillir deſſeſchef enſemble iuſques à ce que le tiers ſoit cōſumé. Cela fait adiouſtes y de Rhabarbe bien choiſi & coupé menu vne once, & les fais encores rebouillir iuſques à ce qu'ils ſoyent de la conſiſtence d'un Iulep. Finalement on les paſſe par vn linge, & les ſerre on en vn pot propre. Que ſi nous cognoiſſons que les malades ſoyent fort phlegmatiques, il ſera bon de mettre en la decoction precedente, vne once de quelque bon Turbith.

Il ne reſte ſinon de ſeigler la façon de viure des malades, laquelle doit eſtre telle. Il faut que tant à diſner qu'à ſouper, ils ne mangent que trois onces de pain, lequel ſoit de fine fleur de froment, bien appreſté & bien cuit au four: & autant de chair de poulets, de perdris, faiſans, griues, & autres tels oifeaux, nourris és bois & montagnes, & parmi les vignes, & ſera meilleur les leur donner roſtis que bouillis: on leur pourra auſſi donner vn peu de raiſins ſecs. Quant au boire il faut qu'il ſoit proportionné au manger & que ce ſoit de la decoction ordonnee ci deuant. Que ſi le malade ne pouuoit boire ceſte decoction toute pure, on y pourroit meſſer vn peu d'eau bouillie en vne phiole avec vne once de Gayac.

Le tēps propre pour la guerifō de ceſte maladie c'eſt le printēps, és mois de Mars, Auri

& May: que si on ne le peut faire en ce temps là, il y faudra trauailler au mois de Septēbre en autonne, car comme durant les grandes chaleurs, on ne peut pas seulement porter le long vsage des medicamēs, mais mesme d'en vsfer tant soit peu ainsi: durāt l'hyuer au tēps des grandes froidures il n'est pas bon ni seur d'en prendre. Or pendant la curation il n'y aura point de mal de permettre aux malades de s'esgayer & esbatre vn petit, en quelque iardin prochain, pourueu que le temps soit beau & serain: car la veuē de quelque beau iardin recree merueilleusement l'esprit.

Dauantage il est besoin que les vns continuent plus longuemrnt ceste diette & façon de viure, les autres moins, selon que la maladie le requiert, & qu'il est besoin pour la santé. Le vin de Gayac ainsi preparé, & baillé, ne sert pas seulement de remede à l'infection Espagnole & mal de Naples, & aux accidens qui en procedent, mais aussi aide merueilleusement aux longues maladies des iointures, de la teste, des nerfs, de l'estomach, du foye & de la rate, qui procedēt d'abondāce de phlegme. Il n'aide pas moins à la goutte des pieds pourueu qu'elle ne soit trop enuieillie. Au reste il faut bien se prendre garde en ceci, que ie ne suis pas d'aduis de faire boire de ce vin de Gayac, sinon à ceux qui ont abondance de phlegme, ou pour le moins qui ne sōt pas bilieux.

bilieux: car il m'a tousiours sēblé bon de faire boire à ceux qui sont bilieux, la secōde ou troisieme decoction de bois de Gaiac au lieu de vin, comme ie scay que les autres ont accoustumé de faire. Voila ce qu'André Mathiol Siennois, medicin fort docte & biē estimé, dit en ses commentaires sur Dioscoride.

Recit ou description de quelques vins mediceinaux, seruans de remede à diuerses maladies.

Vin propre la generation de la pierre.

Il faut prendre des racines & des fueilles de Pentaphilon, ou Quintefueille, de racines de Gramē, de Fenoil, de Persil, de chacun vne poignée, & apres les auoir faites seicher à l'ombre, & venant le temps de vendanges, il les faudra mettre dans vn petit tonneau bien net, & mettre par dessus du moust de raisins blancs, bon & fort puissant, autant qu'il en faudra selon la quantité des herbes & racines: Or apres que le vin aura bouilli, & qu'il ne bouillira plus, quelques iours suyuant il le faudra mettre en vn autre vaisseau, iettant là les matieres qu'on y auoit fait tremper & bouillir, desquelles le vin aura tiré la vertu & faculté: & faudra garder ce vin soigneusement pour faire vser à ceux qui sont suiets à la pierre: tellement que pour s'en garder, il ne leur faudra prēdre de ce vin, sinon de huit en huit iours, ou deux fois la sepmaine, au pois de

FF. iij.

trois ou de quatre onces, ayant toujours esgard à la complexion des corps, à l'aage & à la saison de l'année.

Vin propre pour les macules, souilleures, & taches qui deshonorent la face.

Pilez de la racine de Serpentaire, & la faites cuire dans du vin blanc, iusques à ce que le tiers soit consumé: apres cela coulez la, & vous lauez la face de ce vin, iusques à tât que toutes les taches soyent effacees, ce qui aduiendra en peu de iours, si on s'en laue tous les iours, soir & matin.

Vin propre contre les ventositez, contre l'enrouement, contre la toux, & l'asthme

Il fera aisé d'auoir de ce vin, si seulement en temps de vendanges on faict tremper dás du moust (iusques à ce qu'ils y ayent laissé leur vertu & faculté) d'anis, de fenoil, & de regalisse: bien est vray qu'il faut mettre de ce ste derniere au double des autres deux. On peut bien aussi faire du vin qui aura la mesme vertu (si la necessité presse, laquelle ne donne pas loisir d'attendre) faisant cuire les choses susdites dans du vin ordinaire en quelque temps que ce soit, pourueu qu'il soit bon & puissant.

Eau fort semblable à vin, bonne pour tromper les malades alterez.

Il faut

Il faudra prendre vne phiole bien remplie de bonne eau: & boucher l'entree de dessus avec le pouce, iusques à tant qu'on aye plongé ceste phiole dans vn vaisseau plein de vin rouge & odorant: or quand on sentira que la phiole touche le fôd, il faudra oster le pouce, & laisser là ceste phiole assez long temps: or quâd on la voudra tirer de là, il faudra faire ainsi qu'on a fait en la mettât, asçauoir fermer dextrement l'éboucheure avec le pouce, & la tirer: on s'apperceura vn peu apres que ceste eau aura la couleur du vin, & si tiendra vn bien peu de la faueur aussi, & de cela on pourra trôper le malade, qui sera vne bonne trôperie pour luy, tellemēt qu'au lieu de trôperie, on le peut biē nōmer plaisir & seruice.

Vin propre pour rendre la face vermeille

& de beau teint, & pour embelir

& farder les femmes.

Faites bouillir dans du vin rouge, des raboteures de Bresil, & d'Alum qu'on dit Sucrin, iusques à tant que de six parties il n'en reste qu'une de la decoction, ou vn peu davantage: & quand vous en voudrez vser, il ne faudra sinon avec vn peu de Coton en oindre tout doucement la face, & ce sera pour plaire aux amoureux.

Autre vin propre pour derrider & polir la face, & mesme pour blanchir les mains.

On pourra faire cela avec du vin, dâs lequel

on ait si long temps batu vn blanc d'œuf, qu'il en soit rendu liquide & coulant. Mais il est bon de le renouveler de deux en deux iours. Si on se laue avec cela, ce sera pour rendre la peau nette, delice & delicate: fait venir la face vermeille, polie & deridee, & si oste toutes taches.

Vin fort bon pour reparer & conseruer la veüe, & salulaire pour plusieurs autres choses.

Fay amas des fueilles & racines de Betoine, de Recise, d'Euphrase, d'Esclaire, de Rue domestique, de Verbenne de chacun vne poignée: de semence d'Anis & de Fenoil, de chacun deux onces: pile les vn petit, & lie-les tresbien ensemble: puis les plonge en vn petit tōneau de bō moust, lors qu'il veut bouillir, & les y laisse iusques à tant qu'il ne bouille plus, & encores quelques iours d'auantage: Apres cela mets le vin en vn autre vaisseau bien net, & fait de bonne matiere, & le garde pour ton vsage & de tes amis. Quand tu en voudras vsér, il faudra de trois en trois iours en boire trois ou quatre onces, de matin à ieun, plus ou moins ayāt esgard & à l'age, & à la personne, & à la complexion, & à la saison, & aux autres choses qu'on a accoustumé d'observer en telles choses, prenant aduis & conseil de quelque docte & bien expert medecin, afin que tu ne te trompes toy mesme.

Composition de ce vin tant excellent de Sené, & de son infusion: selon la description de Mesué & d'André Matthiol.

Vn certain personnage, dit Mesué, mesloit la grande vertu du Sené dans du moust, & trois mois apres il le donnoit à boire, & par ce moyen il purgeoit le cerueau, & les instrumens des sens, & accroissoit la ioye & liesse. Aucuns pour purger vsent de la decoction de Sené avec des pruneaux & du Nard, & s'en trouuent bien: vray est qu'il ne veut pas estre longuement cuit. En infusion, on en peut dōner iusques à vne once. Il purge tout doucemēt l'humeur melancolique, & la cholere bruslee du cerueau, des instrumens des sens, du polmon, du cœur, du foye & de la rate. Parquoy il est bon pour suruenir aux maladies de ces parties là, procedâtes de ce mesme humeur, comme sont les fieures melancoliques & longues: cause ioye, euacuant l'humeur qui engēdre fascherie sans aucune cause exterieure. Il fait le corps vif & dispos, & ouure les oppilations des entrailles. Je vien maintenant à descrire ceste tant excellēte infusion de Sené, laquelle ce grād & docte personnage André Mathiol ordonne en ceste façon. Il faut prendre des fueilles de Sené bien choisi, six drachmes: de gingembre, ou de canelle pilee, vne drachme: de fleurs de Buglose, deux drachmes: il faut mesler tout ceci, &

mettre dans vn pot de terre verni, ou dans vn pot d'estain qui ait l'emboucheure estroite, puis verser par dessus d'eau bouillante, ou de petit laiët de chieure, au pois de dix onces, & fermer tellement l'emboucheure qu'il n'y ait point d'aër d'aucune part: cela fait, il fera bõ de couvrir le pot avec vn oreiller de plume de duuet bien chauffé, le mettre dans vn coffre & le laisser là toute la nuict: car par ce moyen il garde sa chaleur, & la liqueur attire à soy toute la vertu & faculté du Sené, Ceste infusion n'euacuera pas seulement l'humeur melancholique & bilieux, comme nous l'auons recité apres Mesué, mais aussi le phlegme, comme l'enseigne Actuarius & l'experience le monstre, voire mesmes les eaux, & les superfluitez liquides & sereuses. Elle mondifie le cerueau, le cœur, le foye, la rate, le poulmon, & tous les sens du corps, & si profite à toutes le maladies qu'y peuuent suruenir: accroist la ieunesse, retarde la vieillesse, & resiouit l'esprit: fortifie le cœur, mesmement si on la mesle parmi les medicamens qui luy sont propres & conuenables, comme sont les Violettes, les Roses, les fleurs de l'vne & l'autre Buglose & semblables. Outre ce, elle profite merueilleusement à ceux qui resuent, comme dit Serapio, voire à ceux qui sont alienez de leur sens, aux paralysies & resolutions des nerfs,

au mal sainct Main, aux douleurs de teste, à la rogne, à la gratelle & au mal caduc. Bref, c'est vn remede propre à toutes maladies longues, & procedantes de melancolie. La decoction des fueilles de Sené & de Camomille, cōforte fort le cerueau & les nerfs, si on s'en laue, & si corrige fort la subtilité de la veüe & de l'ouye. Il ne faut pas oublier ce qu'e dit Manard, à sauoir que c'est vn souuerain remede contre la rogne Espagnole, d'autāt qu'il euacue les matieres pourries & la phlegme, qui est cōtre l'opinion d'Auerrhoes. Or cest assez parlé des facultez du Sené: qui en voudra scauoir dauantage, qu'il lise ce petit traitté que nous auons fait du Sené, qui est certes vne plante fort propre & salutaire aux hommes, sur toutes les autres: là il trouuera chose qui luy agreera.

Recueil de quelques observations & choses dignes d'estre notées, sur les compositions & de scriptions predites des vins medicaux.

Il faut que les vins que tu veux faire medicaux soyent blancs, ou clerets, ou de moyenne couleur, prins & cuiellis de bon plant, de raisins bien meurs & non pourris ni gastez: dans lesquels (par mesure & avec vne quantité que le medicin bien expert conoistra suffisante) on mettra les drogues desquelles on veut qu'ils tirent la vertu, en vn

vaiffeau bien net & fait de bon bois:finõ que tu aimes mieux faire comme les anciens,afça uoir les mettre dans des pots de terre bien vernis & biẽ cuits.Et là le vin qui bouillit naturellement , parfera ce que l'art eust fait,de forte que nature & l'art s'entraideront l'vn l'autre , & fe communiqueront leurs actiõs. Car pendât que le mouft bouillit,lavertu du mouft furmonte les chofes qu'on a mis dedans,comme en vn combat,& les defpouille de leurs facultez,les s'appropriant & attirât à foy,tellement que de deux,il en eft fait cõ me vne mefme fubftance &vn mefme corps, & ce par la chaleur du vin. Or tant meilleur fera ce vin & plus plaifant , tant plus penetrant il fera auffi,& tant plus aifémêt il produira fes vertus & facultez en toutes les parties du corps:& pourtant ayant comme renforcé la nature du corps , il refiftera tant mieux aux maladies qui l'affaillirõt & preffẽront.Dauantage,quand on met les drogues dans le mouft lors qu'il bouillit, il en reuiet ce profit,qu'il n'eft pas à craindre que la vertu s'efuanouiffẽ & fe perde par les vapeurs, que les matieres fe brulent,ni qu'elles fentent la fumee , comme il aduiet quand on le fait bouillir fur le feu , à la façon commune des apotiquaires.Le vin donc reçoit & attire les qualitez des drogues qu'on y melle, le quel leur fert comme de guide & condu-
cteur

Seur pour les faire paruenir iusqu'aux plus petites & esloignees parties du corps, par lesquelles il est receu & recueilli fort volôtiers, pour la cōuenance que sa nature a avec la nostre, sans aucune crainte ni frisson, telle que nous voyons aduenir quand il est question d'aualer quelq̃ medicine l'axatiue, à cause de l'odeur fâcheuse, la couleur mal-plaisante, & la saueur estrange qu'elles ont: ce qu'on ne trouuera pas en ces vins medicinaux, que s'il s'y trouue par fois quelque odeur ou saueur fâcheuse, on les pourra facilement couvrir & corriger avec du sucre, du miel, de regalisse, raisins secs, poudres de sêteur ou semblables, qui ne seront point mal plaisantes à l'estomach. Mais il ne faut pas aussi oublier, que par la subtilité de ces vins, laquelle paruiet bien tost par tous les cōduits du corps, non seulement le corps est purgé & deschargé de tous excremens, mais aussi est deliuré de toutes oppilations, à cause que le vin par sa force & vertu, oste tous empeschemens & ouure les conduits, & mesme les parties en sont fortifiees: qui est vn moyen bien vtile & biē court pour secourir aux parties affligées. Car quand les conduits sont ouuerts, les esprits ont les voyes libres, pour pouuoir aller à toutes les parties du corps, & avec les esprits la chaleur naturelle, avec laquelle est coniointe la vie de chascune partie. Mais

quand la chaleur naturelle est opprime & pressée par les oppilatiōs, elle s'affoiblit tellement qu'à grande peine peut-elle faire ses actions & fonctions accoustumées; non pas mesme separer par la coction, le bon du mauuais, voila d'où viennent les cruditez & pourritures desquelles procedent apres les maladies. Or d'autant que ces choses sont hors de nostre propos, ie n'en veux plus dire vn seul mot.

F I N.

TABLE ALPHABETIQUE DES
plantes & arbres dont les vertus & remedes sont
enseignez en ce Iardin Medicinal.

A		C	
Abfinthe	52	Cerifier	265
Ache	52	Chastaignier	319
Aluine	195	Chairs laxatiues	400
Amandes	312	Chous	41
Armoise	227	Citronnier	277
Artichauts	153	Coins	257
Asperges	74	Concombres	146
Auls	88	Coudrier	317
Auronne	130	Courges	142
Auelanier	317	Compositiō des vins me	
Deux Arbres admirables		medicinaux	417.418.
380		E	
B		Esclere	230
Basilic	131	Espurge	244
Bettes	61	Espinars	71
Elettes	64	F	
Bourraches	72	Fenoil	118

T A B L E.

Figues	288	Ozeille	66
Fraïfes	156	P	
Framboïfes	la meſme	Palme Chriſt	244
G		Parietaire	235
Geneure	334	Pasquettes	182
Giroflee ou Oeillet	180	Paffe-velours	191
Glayeul	185	Penſees	182
Grenades	286	Perfil	52
Groiſelles	158	Pefches	270
Guymaunes	238	Pin	315
H		Plantain	222
Hyſope	112	Poirier & Poires	253
L		Pommier & Pommes.	250
Laiſtue	30	Pourpié	58
Lauande	139	Pourreau	76
Laurier	323	Prunier & Prunes	262
Limonier	282	R	
Lis	167	Reffort	98
M		Rofmarin	137
Malue	238	Rofes	160
Mariolaine	117	Rue	203
Melons	150	S	
Menthe	122	Sarriette	115
Mercuriale	233	Sauge	107
Meurier	303	Sorbe	274
N		Soulcie	192
Nefflier	264	Sureau	343
Noifettes	317	T	
Noyer & Noix	317	Tannee	227
O		Thym	127
Oignons	82	V	
Oliuier	193	Violiers	177
Oranges	282	Violette de Mars	175
Ortie	116	Y	
Orual	235	Yeble	343




TABLE OV INDICE DES MATIERES PRINCIPALES CONTENUES en ce Iardin Medicinal, En laquelle se trouueront en leur ordre les herbes, plantes & vins, avec leurs remedes selon l'ordre de l'alphabet.

A

- Abfinthe** ouache profitable cōtre les vlceres de la bouche. 52. remede au mal des reins là mesme. vers du poete herboriste touchant la vertu de l'abfinthe. 196. maniere pour en faire boire le ius aux enfans. 199.
- Abfinthe** suruiuent aux inflatiōs & à la coliq. 54. Pourquoi anciēnemēt defēdue en viādes 55. ache defendue à ceux qui sont suiēts au haut mal. 56. trois choses notables de l'ache. plantes peu differentes de l'ache quelles. 56. Homere sus la vertu de l'ache. 58
- Acetabule** mesure, quelle. 147.
- Adresse** pour faire des vins laxatifs accoustumez. 412.
- Adresse** pour auoir des herbes & fruits laxatifs & de diuerse odeur. 390.
- Aduertissement** de l'auteur aux vendeurs de vin. 137.
- Aduertissement** aux suiēts à la colique. 145.
- Aluine** ou Fort pourquoy ainsi nommē. 194. trois sortes d'abfinthe & ses vertus, là mesme.
- Amandes** seruent de remede contre la pelade. 314. recit d'un medecin touchāt les amandes. 312. seruent contre la grauelle. 314.
- Armoysse** fort bonne pour ceux qui cheminent & pourquoy. 228.
- Artichaut** vſitē en tous bāquets sumptueux. 153.
- D'ou** venu le nom d'Artichaut 153. L'artichaut est de mauuaiſe nourriture. 154. ses pommes estās en cor tēdres prouoquēt l'vrine. là mesme. Xenocrates touchant la vertu de l'artichaut. 155.
- Aduertissement** aux Iardiniers touchant les Artichauts. 155.
- Artichaut** ſouuerain remede cōtre plusieurs maladies. 156.
- Asperge** plaisante à l'estomac. 74. chasse la grauelle. 75. sert contre la piqueure des mouches. là mesme.
- Auellanes** engendrent. douleur de teste. 318.
- Auronne** diuisee en masse & femelle. 203. fait sortir la barbe tardieue, là mesme.

- Auronne fait sortir les espines fitable. 307.
 plâtees en la chair, là mesme. Cerat rosat, que c'est. 163.
- B
 Cerises mangées le matin pro-
 vers. 194. Chelidoine ou esclere sert au
 Barbotine bonne contre les fitables & comment. 267.
 Chelidoine ou esclere sert au
 mal des yeux. 230. chairs la-
 xatiues. 400. 401. 401.
- Basilic nommé par les latins oc-
 cium & sa signification. 131. Chacun se doit estudier à faire
 contraires opinions des me-
 decins anciens touchant le la posterité participante de
 Basilic. 132. ses labeurs. 5.
- Basilic bon pour les nourrices Chastaignes ne sont pas saines
 133. sert contre les inflâma-
 tions des poulmons, là mes-
 à manger. 322.
- Crisippe medecin defend aux
 hommes de manger du ba-
 filic & pourquoy. 134. Chou fort loué & estimé par
 les anciens. 41. Pourquoy
 chose notable du basilic, ainsi nommé. là mesme. le
 chou excellent pour ceux
 qui vrinent avec difficulté. 41.
 135. Marc Caton de la vertu du
 chou contre l'yurongnerie,
 47. Galié sur les mesmes. 48.
- Blette ou saune herbe inuti-
 le à l'estomac. 64. vertus d'i-
 celle. 65. Egiptiens s'éseruent à l'en-
 tree de table imitez par les
 Alemans & Flamans. 49. Dis-
 cours de G. Gratarolus tou-
 chant l'yurongnerie. 51.
- Beau secret contre la diffi-
 culté d'yrine. 106. Cinq moyens pour mediciner
 les arbres afin qu'ils pro-
 duisent fruiçts qui purgent
 doucement. 366.
- Deux vertus excellentes de la
 bette esprouuees par Eoba-
 nus Hesselus. 61. Ciathe quelle mesure. 178
- chose notable de blanc-deau
 221. Comme il faudra faire pour a-
 voir les fruiçts des arbres qui
 purgent doucement. 363.
- Borrache estimé par plusieurs
 estre buglose. 72. remede Citron ennemi des venins. 278
- à la toux. 73. sert de reme- discours notable à ce propos
 de aux sieures. 73. chose 279. autre recit du citron
 approuuee de la borrache, bien notable. 280
74. C
- Beurre de may pourquoy gardé
 17. Cendre de noyaux bruslee pro-
 Côté le haut mal. 181. 223. 267.

- Contre les escrouelles. 228. 142.
 Contre la cheute du fondemēt Cuisiniers avec leurs diuersi-
 262. tez de sauces sont cause de
 Contre morsure de serpens. 48. beaucoup de maux. 13.
 Cōtre le mal de ventre. 223. 283.
 Coins de grande vertu contre
 le poison. 257.
 Confiture des Coins. 259. Diatesiaron de Mitridates, ex-
 Cotignat souuerain. là mesme cellent contre la peste. 212.
 Contre la pierre. 115. Dit de Iesus Sirach touchant
 Contre le mal des dens. 195. la medecine. 24.
 Contre douleurs de teste. 206. Drogues des pays estranges
 Contre le flux de ventre. 275. corrompues. 21.
 Contre la jaunisse. 139.
 Contre la rache ou tigne. 62. E
 Contre les brusleures. 143. Eau de fraiser & ses vertus. 56.
 Contre la morsure des scor- Eau ressemblante au vin en
 pions. 134. couleur. 69.
 Contre les tranches du ven- Eau de fleurs de lis. 170.
 tre. 119. Electuaire pour faire mourir
 Contre la douleur des māmē- les vers. 202.
 les. 261. En quel temps Il faut sarcler
 Contre les tumeurs des māmē- & arrouser les Iardins. 26.
 melles. 119. 238. Espinars incogneus aux an-
 Contre les mousches guespes. ciens. 71. maniere de l'apre-
 140. ster. là mesme.
 Contre la colique. 34. 219. 139. Confiture de noix. 309.
 Contre la peste. 70.
 Contre les gouttes. 336.
 Contre la douleur des oreilles. 116.
 Contre la morsure des chiens. 123.
 Contre les verrues. 128.
 Contre la pluresie. 253.
 Contre la fièvre. 70.
 Conserue fort profitable. 181.
 Courges nuisibles à l'estomac.

Façon pour cueillir & vser des
 fruiets medicinaux. 382.
 Fenoi anobli par le moyē des
 serpens. 18. arreste le vomis-
 sement. là mesme.
 diuers remedes du Fenoi. 120.
 121. Les figues causes de la
 ruine de Carthage. 291.

- Figues dommageables à la
voix. 292. bonnes pour les
grauелеux choses remarqua-
bles du figuier. 295. 296.
- Fraïses & frâboïses ne diffe-
rent guere aux meures rou-
ges. 156. prouerbe entre
les Frâçois, le vin sent la frâ-
boïse, là mesme. 157.
- Feue maschiee, souuerain reme-
de contre la morsure d'un
chat & de la mustelle. 209.
- Fleurs de peschier laschent le
ventre. 237.

G

- Geneure de deux sortes. 335.
histoire du Geneure. 336.
charbon de Geneure alumé,
dure vn an entier. 337.
- Geomantie que c'est à dire. 19.
- Gentil secret contre les larrôs
de fruits. 377.
- Giroflee ou œillet, pourquoy
ainsi nommé. 180.
- Comparaison de l'œillet à la ro-
se. 181. deuis d'André mathiol
touchant l'œillet. 181.
- Glai ou glayeul pourquoy ain-
si nommé. 185. ses racines
fort odorantes. là mesme. re-
medieaux verrues. 187. purge
la phlegmie. 188. guerit le
mal de teste. 189. profite
aux sciaticques. 190.
- Grenade fruit de bonne nour-
riture. 287.
vin de grenades fort profita-
ble. 289. recit de plusieurs
- vertus des Grenades 290.
Groisellier vité & cogneu de
plusieurs. 158.
description des Groiselles
rouges & raisins d'outre mer
159. leur vertu, là mesme.

H

- Huyle de pesches. 264.
Hysope d'angleterre quel 115.
Hysope profitable à ceux qui
ont difficulté d'aleine. 112.
Contre le tintement d'oreilles
113.

I

- Iardin medicinal diuisé en
huiet fillons. 26.

L

- Laietue beuë en du bouillon
fait dormir. 39.
La laietue en grande estime an-
ciennemet entre les Romains
31.
La laietue nuit à la veuë. 34.
Lauande appelée d'ancuns
Nard bastard. 139.
Les Arabes & auteurs Grecs
d'accord touchât la lauande
ou aspic. 140. pourquoy Phuy-
le d'aspic n'est dans les bou-
tiques des apotiquaires. 141.
Gens mariez doiuent fuir la
laietue. 33. le lis profite con-
tre les dartes & brusleures
169.

- Du l'aurier & de ses vertus. 344.

M

- Maniere de mediciner les 20.

T A B L E.

brés pour des effets bien re- marquables.	des yeux.	136.
Marguerites autrement nom- mées pasquetes & pourquoy	Oximel cōpositiō, quelle.	177.
184. ses vertus. là mesme.	P	
Mariolaine profitable aux yeux	Palma christi pourquoy ainsi nommé.	247. nommé grain royal
117. chose digne destre re- marquee touchant la mario- laine.	par Mesué. ses vertus.	248.
118.	Passuelours nommé par Pline.	
Methode pour auoir des her- bes, chairs & vin qui purge- ront doucemēt le corps.	Espi purpurin.	191 profitable à ceux qui crachēt le sang.
335.	191. la fleur du passeuelours se garde fresche sept ans ou plus & comment.	192.
Mente grandemēt profitable à ceux qui crachēt le sang.	Parietaire d'oū a prins ce nō	236.
123.	Pensée, herbe, nommé en latin	
ne doit estre mangé en tēps de guerre & pourquoy.	viola flāmea.	182. vertu de la pensée.
126.	183.	
Mercuriale herbe diuisee en deux especes.	233. Q. Serenus vertu admirable des fueilles de plantain.	226.
234.	N	
Noix excellentes confites en trois iours & comment.	mal de bouc he gueri par le moyen du plantain.	222.
311.	Pessaire que c'est.	189.
O	Pouree ou reparee blanche la- ché le ventre prouoque l'y- rine	62.
Oliuier & son huyle excellent conserue l'homme en santé.	Pouree bonne, ses remedes & secrets.	58.
301. ses vertus.	Pour faire auoir au fruit tel goust & telle odeur qu'il te plaira.	377.
302. 303.	Pour faire mourir les puces.	215.
Oranges. 285. leurs vertus.	Pour faire des vins composez qui subuiennent à diuerses ma- ladies.	405.
286.	Pour le mal des dens.	269.
Ozeille d'oū a prins son nom.	Des pommes & comme il en faut vser.	252.
66. deux sortes d'ozeilles.	Pour reserrer le ventre.	268.
67.		
experience de l'ozeille pour attendrir la chair.		
67.		
l'Ozeille propre contre la dis- senterie des petits enfans.		
69.		
remedie à la peste.		
70.		
Oric morte pourquoy ainsi nommee ses vertus.		
221.		
Orna, ses noms.		
135. sert contre les taches & blanchisseures		

- Poupō meurcomment cogneu. 130.
 150. engendre la colere. 151. Remedes pour les yeux. 207.
 & bon pour estancher la. Remede contre la rache ou ti-
 soif. 150. Secrets notable gne. 171.
 des melons. 152. Remede contre la colique. 124
 Poires de bonne digestiō. 255. Roses excellentes sur toutes
 vsage des poires quel. 154. fleurs. 160. Il faut considerer
 leurs vertus là mesme. six parties aux roses. là mes.
 Notable chose des poires. 254. Diuerfes substances conte-
 Prunes laxatiues. 264. nues en la rose. 163. Plu-
 electuaire de prunes. là mes. sieurs & diuerfes facultez
 Prophetie de M. Catō touchāt del'infusiō des roses. 164. sert
 les medecins estrangers. 13. contre les maladies du fonde
 R. mēt. 167. comment il faut sei-
 Raisins pour faire dormir & re- cher les roses & toutes autres
 filter aux venins. 398. fleurs. 168.
 Reffort contraire à la colique, Rosmarin de souefue odeur.
 101. son suc sert cōtre la dur & ses vertus. 138.
 té d'oreilles. 103. sert contre Rue nuisible au corps. 207.
 les venins. là mesme. S
 Contre l'oppilation du foye. Sauge pourquoy nommée Sal-
 102. uia des latins. 107. Demande
 Remede experimenté par l'au & respōce touchant la sauge
 teur contre la fieure pesti- 107. les sages femmes font
 lentielle. 194. prouision de sauge & pour-
 Remede contre les vers. 194. quoy. 108. profite contre la
 Remede fort exquis contre la morsure des bestes venimeu
 brusleure. 346. ses grand profit de la sauge
 Remede contre les charbons contre la sterilité des fem-
 de peste. 207. mes. 108. noircit les cheueux
 Remede cōtre le haut mal. 128 109. Contre les serpens. 109.
 Remede contre la douleur de vin Saluiatum fort vtile. 110
 teste. 162. la sauge fait reuenir l'appe-
 Remede pour les phlegmati- tit perdu. III. gentile histoire
 ques. 129. de Bocace touchant la sauge
 Remede contre les escrouelles III. Sarriette ou sauerée pro-
 218. uoque l'vrine. 115. resueille
 Remede pour les gouttes des ceux qui sont trop endormis

T A B L E.

11.	ne.423.	vin d'ysope. 423.
Soulcie nommé des Apoticaire	Vin de tin.424.	vin de cabaret
Calendata & pourquoy.192.	& pastenaille sauuage. 424.	
pourquoy nommé horloge	Vin de sauge & de marube.424	
des payfans. 193.	Squinance Vin d'ache,d'aneth, de fenoil,	
quelle maladie. 176.	& de persil. 425.	
Scrupule est le tiers d'une on-	Vin de grenades,la mesme.	
ce.	219. vin merueilleux pour les melā	
	coliqs.427. vin cordial, c'est	
	à dire propre au cueur. 428.	
T		
Taneé herbe propre pour rom-	Vin de passules,ou raisins de da	
pre la pierre 149.	mas.429. vin de coins q les	
Tablette de guimaue. 239.	medecins appellēt cydoni-	
Thym herbe de grande vertu.	tes.430. Vin de rosmarin.433	
130. Thym aimé des mous-	Vin propre pour ouurir les op-	
ches à miel & pourquoy.127	pilations,& corriger les me-	
Thym fort salulaire aux vieux.	lancoliques. 436.	
129.	V	
Vertu des violettes selon.Me-	Vin D'euphraze, fort propre	
sué. 178.les semēces des vio-	aux yeux. 437.	
lettes de mars soulagent la	Vin d'aunée, ou enula cāpana-	
goutte. 177.	438. vin de sauge là mesme.	
Vin artificiel fait de roses, a-	Vin d'ysope là mesme.	
neth & ses vertus. 417.	Vin de fenoil là mesme.	
Vin composé avec cabaret,pou	Vin de panicaud,ou chardon à	
liot,& fenoil. 418.	cent testes. 440.	
Vin de bayes de laurier,de per	Vin d'anis. 441.	
fil, & de l'herbe aux punai-	Vin avec roses ou de roses .441	
ses. 418.	Vin de baguenaudier. 442	
Vin de rue,de fenugrec,d'yso-	Vin de giroflēs. 444	
pe & d'ache. 419.	Vin d'yeble ou petit sureau	
Vin d'absinthe la mesme.	445.	
Vin pour lascher le ventre.420	Vi qui retiēt l'ēfant au vêtre de	
Vin pour faire vriner. 420.	celles qui sont enceintes.446.	
Vin propre à ceux q ont la scia	Vin de Gayac avec la vraye fa-	
tique.421. vin propre cōtre les	çon de le composer. 448.	
tranchees du ventre. là mes-	Vin contre la generation de la	
Vin de roses.422. vin de betoi-	pierre. 453.	
	Vin propre contre les taches	

T A B L E.

du visage,	454.	Vin excellent du fené & la ma-	
Vin contre la toux & contre		niere de le composer, selon	
lenrouement, la-mesme.		l'aduis de Iean Mesué & An-	
Vin pour rendre la face ver-		dré Mathiol.	457.
meille.	455.	Y	
Vin pour blanchir les mains, la		Yeble profitable à ceux qui ont	
mesme.		esté longuement detenus	
Vin pour cōseruer la veüe.	456.	de maladie.	347.

F I N.

DE L'IMPRIMERIE DE
IEREMIE DES PLANCHES.

1 5 7 8.